






25



Ad simplicem usum Fr. Antonii  
in Cassano.

vires S. Antonii jejunare in igne  
Purgat: sub conditione. necesse est.

Ind. dext. confuso usq. auris 40 sal.





2

Quatuor Tomis comprehensa.

Authore P. F. ANTONIO GOUDIN, Lem-  
vicensi, Ordinis Prædicatorum, Provin-  
ciæ Tolosanæ Alumno, in Sacra Facul-  
tate Parisiensi Doctore Theologo, & in  
Majori Conventu & Collegio Parisiensi  
eiusdem Ordinis Regente.

**3333333333333333**

Editio duodecima prioribus accuratior.

*Juxta novissimam Coloniensem, ab Authore ex integro re-*  
*confitam, emendatam, & figuris æreis illustratam,*  
*præcipuè ubi de modernis experimentis, & ob-*  
*servationibus, atque recentiorum Philoso-*  
*phorum placitis, & systemate.*

**T O M M U S Q U A R T U S.**

*Moralem & Metaphysicam complectens.*



COLONIAE,  
Et denuò Neapoli. Typis Felicis Mosca. MDCCLXXXII.

**Sumptibus Bernardini Gessari. SUP. PERM.**

1870

# INDEX TITULORUM

## TOMI QUARTI.

### TERTIA PARS PHILOSOPHIÆ, MORALIS.

**P** RÆFATIO. Pagina x

**QUÆSTIO** Preambula, De Objecto,  
Natura, Qualitate, Divisione Moralis  
Scientiæ, deque idoneo ejus Auditore. 3

Articulus unicus. ibid.

**QUÆ. I.** De Ultimo Fine, seu Felicitate. 9

Art. I. De ultimo Fine morum. 10

§ I. An detur ultimus finis vitæ humanæ,  
& quis sit. 11

§ II. An homo plures fines ultimos habere  
possit, & quomodo in fine ultimo sibi præ-  
stituendo mali à bonis differant. 16

Art. II. De Felicitate objectiva, seu de re, cu-  
jus possessio hominem naturaliter felicem  
efficere potest. 21

§ I. Felicitas hominis in nullo bono creato  
potest consistere. 23

§ II. Felicitas, etiam naturalis, in solo Deo  
consistit. 34

Art. III. De Felicitate formali, seu adeptio-  
ne rei, qua felices sumus. 41

§ I. An Felicitas formalis in hac vita possit  
obtineri, vel solum in altera. ibid.

§ II. In quo sita sit Felicitas hujus vitæ,  
quaque ratione possit obtineri. 48

§ III. In qua operatione consistat Felicitas  
for.

# INDEX TITULORUM

<i>formalis.</i>	58
<b>QU. II. De Actibus moralibus, seu de Voluntario, &amp; præcipue Libero.</b>	71
Art. I. De Voluntaria in genere, quid sit, à quibus tollatur, quomodo dividatur.	72
Art. II. De Voluntario Libero.	79
§. I. De variis libertatis acceptationibus & divisionibus.	ibid.
§. II. De origine Libertatis Arbitrii.	82
§. III. An indifferentia sit de ratione Libertatis Arbitrii.	87
§. IV. Quæ Indifferentia sit de ratione Libertatis.	98
Art. III. De Actibus Voluntariis specialim.	107
<b>QUÆSTIO III. De Passionibus.</b>	114
Art. I. De Passionibus in communi.	115
Art. II. De Passionibus partis concupiscibilis.	119
§. I. De Amore & Odio.	ibid.
De Natura Amoris.	ibid.
Amoris Cause.	122
Effectus Amoris.	123
§. II. De Desiderio & Fuga.	127
§. III. De Delectatione & Tristitia.	131
Delectationis natura & Divisio.	132
Delectationis Cause.	134
Delectationis Effectus.	137
De Tristitia, ejusque Remediis.	138
Art. III. De Passionibus Partis Irascibilis.	140
<b>QUÆSTIO IV. De Bonitate &amp; Malitia Morum.</b>	148
Art. I. Quid sit Moralitas, de que ejus divisione.	

# T O M I Q U A R T I

<i>stone.</i>	149
Art. II. <i>An detur actus indifferens.</i>	151
Art. III. <i>De Regula Morum.</i>	156
<i>De Conscientia.</i>	159
<i>De Lege.</i>	162
QUÆSTIO V. <i>De Virtute in genere.</i>	166
Art. I. <i>De Natura &amp; Proprietatibus Virtutis.</i>	ibid.
Art. II. <i>De Causis &amp; Divisione Virtutis.</i>	170
Art. III. <i>De Contrario Virtutis, scilicet Vicio.</i>	177
QU. VI. <i>De Virtutibus in particulari.</i>	181
Art. I. <i>De Prudentia.</i>	182
§. I. <i>De Partibus integralibus Prudentiæ.</i>	185
§. II. <i>De Partibus subjectivis Prudentiæ.</i>	189
§. III. <i>De Partibus potentialibus Prudentiæ.</i>	192
Art. II. <i>De Justitia.</i>	194
§. I. <i>De Partibus integralibus &amp; subjectivis Justitiæ.</i>	196
§. II. <i>De partibus potentialibus Justitiæ.</i>	202
Art. III. <i>De Temperantia.</i>	206
§. I. <i>De Partibus integralibus &amp; subjectivis Temperantiæ.</i>	208
§. II. <i>De Partibus Potentialibus Temperantiæ.</i>	211
Art. IV. <i>De Fortitudine.</i>	214
Art. V. <i>De Connexione Virtutum.</i>	222
QUARTA PARS PHILOSOPHIÆ, M E T A P H Y S I C A.	
P RÆFATIO.	229
QUÆSTIO Proœmialis, <i>De ipsa Metaphysica.</i>	230
Articulus unicus.	ibid.
DISP.	

# INDEX TITULORUM

DISP. I. De Ente in Comuni.	237
QUÆSTIO I. De Principiis Entis.	ibid.
Art. I. De Principiis cognitionis Entis.	238
Art. II. De Principiis Entis constitutivis.	240
Quid & Quotuplex sit Actus.	241
Quid & Quotuplex sit Potentia.	242
Art. III. De Potentia objectiva.	244
Art. IV. De Potentia Obedientiali.	247
QUÆ. II. De Ente secundum se.	252
Art. I. Quid & Quotuplex sit Ens, & quomodo sit primum cognitum.	253
Art. II. An ens sit univocū ad inferiora.	256
Art. III. De Distinctione Essentiæ & Existentiæ.	266
Art. IV. De Subsistentia, Supposito, & Persona.	275
QUÆ. III. De Proprietatibus Entis.	278
Art. I. De Unitate.	ibid.
Art. II. De Distinctione.	284
§. I. De variis distinctionum generibus.	ibid.
§. II. Non datur Distinctio Scotti.	287
§. III. Solvuntur ejus argumenta.	290
Art. III. De Veritate.	296
§. I. De Falsitate.	304
Art. IV. De Bonitate.	305
DISPUT. II. De Ente Spirituali.	308
QUÆSTIO I. De Deo.	ibid.
Art. I. De Existentiā Dei.	ibid.
Art. II. De Attributis Dei.	322
QUÆSTIO II. De Angelis & Anima separata.	327
Art. I. De Angelis.	ibid.
Art. II. De Anima separata.	330
QUÆSTIO III. De Præmotione, seu Influxu	

# T O M I Q U A R T I.

<i>fluxu Dei in causas secundas.</i>	334
Art. I. <i>Questionis status &amp; variæ sententiæ.</i>	336
Art. II. <i>Quid sit Concurfus simultaneous; Quid fit Præmotio Phÿfica; Quid Motio Moralis.</i>	341
Art. III. <i>An possit Deus etiam causas liberas, illas à libertate, Phÿsicè præmovere.</i>	347
Art. IV. <i>An re ipsâ Deus omnes causas ad agendum Phÿsicè præmoveat; deturne Præmotio.</i>	352
§. I. <i>Probatur Præmotio auctoritate Scripturæ.</i>	354
§. II. <i>Probatur Præmotio ex Conciliis.</i>	357
§. III. <i>Probatur Præmotio ex Ecclesiæ precibus.</i>	362
§. IV. <i>Probatur Præmotio ex Sanctis Patribus.</i>	364
§. V. <i>Probatur Præmotio auctoritate Philosophorum.</i>	365
§. VI. <i>Probatur Præmotio ex Divo Augustino.</i>	369
§. VII. <i>Probatur Præmotio ex S. Thoma.</i>	372
§. VIII. <i>Probatur Præmotio rationibus.</i>	377
1. <i>Ratio. Præmovet Deus, Quia est primus Motor.</i>	ibid.
2. <i>Ratio. Quia causæ secundæ sunt Instrumenta Dei.</i>	379
3. <i>Ratio. Quia Deus causat influxum causæ secundæ.</i>	381
4. <i>Ratio. Quia est universalis Provisor.</i>	382
5. <i>Ratio. Quia causa secunda est indifferens &amp; contingens.</i>	384
6. <i>Ra-</i>	

## INDEX TITULORUM TOMI QUARTI.

6. Ratio . Quia Deus est omnium Domi- nus.	386
7. Ratio . Quia virtus creature non est activa , nisi in actu primo.	387
Probatur Præmotio exemplis.	393
Probatur ultimò Præmotio ex inconve- nientibus.	394
Art. V. Utrum & quomodo Deus præmo- veat ad actum peccati.	
Art. VI. Explicatur natura Præmotionis, & modus , quo dispensatur .	398
Art. VII. Solvuntur objectiones.	404
Art. VIII. Declaratur ampliùs concordia libertatis cum Præmotione , ac ea in re Thomistas esse omnium remotissimos ab Hæreticis.	425
QUÆSTIO IV. De Accidentibus spiritua- libus , præcipuè de Scientia.	430
Art. I. De Virtute intellectuali in genere.	ibid.
Art. II. De Scientia secundum se.	434
Art. III. De Unitate scientiarum.	437
Art. IV. Utrum intellectus de eodem objecto possit simul habere Scientiam & Opinio- nem.	441
Art. V. Possitne Scientia esse simul cum Fi- de Divina.	446
A P P E N D I X	
De Ente rationis.	452
Art. I. An, quid , & quotuplex sit Ens ratio- nis.	ibid.
Art. II. Quæ Facultas efficiat Ens ratio- nis.	455
Finis Indicis Tomi IV.	





TERTIA PARS  
PHILOSOPHIÆ  
ETHICA, seu MORALIS.

P R Æ F A T I O.

**I**N hac Philosophia Parte non utar longa commendatione rerum, de quibus distulimus. Ex ipso enim titulo patet, ea non occupari circa notitiam Morum, id est, circa artem bene recteque vivendi, quæ nihil in scientiis præstantius, ac utilius esse potest. Unde ab Antiquis appellata fuit Geor-gica, id est, Agricultura. Animi, quod ut agrorum cultura illos ex se aut steriles, aut infelicium duntaxat plantarum fœ-races, exercendo, curando, artificiosque tractando, non ornatiores modò efficit, sed utillum, suaviusque fructuum multiplici proventu felices; si Ethica humanum Animum sine cultu rudem, agrestem, squalidum, h. mrescentem, hor-rentemque vitis, non modò præceptis suis informando polli-tilorem, mitiorem, ornatiusque efficit; sed etiam virtutem, quibus nihil in humanis exoptabilius, formosiusque existit, aberrimo fructu cumulatum. Quæ ars quàm ceteris præstet, satis omnes norunt; illeque luculenter indicavit, qui in mo-dum oraculi edidit, ut quisque seipsum agnosceret, et compendiosa voce, quid homini possimùm expediret, compre-hendens. Et pland dedecet sollicitam in ceteris scrutandis Mentem, in propriis negotiis cecutisse non turpi tantùm, sed

Philos. R. P. Gondin. IV. Pars. A per-

perniciosâ quoque socordia: cûm caterarum rerum cognitio  
 curiosa prope magis sit, quàm necessaria; vivendi verd ars &  
 notitia fax sit hominî ad virtutem & felicitatem pergenti,  
 qua nisi praluceat, ut navis in caca tempestate agitata, non  
 erroris modò, sed etiam certissima ruina exponetur. Maximè  
 cum nemo casu, bonus, ac verè felix evadere possit, sed ea vir-  
 tutis, qua boni felicesque sumus, prima conditio sit, ut quis  
 sciens operetur. Age igitur tam necessariam, tam fructuosam  
 scientiam aggrediamur, & cûm superiori Philosophia parte  
 de Anima rationali, deque potentia ejus dixerimus, nunc  
 qua arte seipsum, suosque motus regere, formare, tractareque  
 debeat, ut benè feliciterque vivat, paucis aperiamus. Sed  
 cum eorum, qua ad Moralem pertinent, maximam partem  
 sibi Theologia jure vendicat, ingensque sit affinitas inter res  
 Morales & Theologicas, ne, ut ajunt, saltemus extra chorum,  
 & intempestivè falcem in alienam messeni mittamus, ita  
 stylus nobis temperandus est, ut nihil aliud de Moribus dis-  
 feramus, quàm quidd ex naturalibus principiis humana ratio-  
 nis lumina deduci potest. Id nempe discutendum propriè  
 spectat ad Philosophum, nec in alio argumento accuratius di-  
 ligentiùsque insudarunt antiqua illa Philosophia lumina, So-  
 crates, qui, ut notat Cicero, Philosophiam in rebus natura-  
 libus morosissè harentem ad moris primus inter Græcos dedu-  
 xisse videtur, eamque devocasse è cælo, & in urbibus col-  
 locasse, & in domos etiam introduxisse, & coegisse de vi-  
 ra & moribus, rebusque bonis, & malis querere. 5. Tus-  
 cul. Plato in nulla re magis, quàm in hac parte Divinus.  
 Aristoteles, in quo humana ratio, quousque in moralibus pro-  
 gredi posset, ostendisse videtur. Idque, ut mittam Stoicos pe-  
 ne nimia virtutis reos, si tamen nimia virtus esse posset quàm  
 in medio consistit; Epicureos morum corruptores, potius quàm  
 tractatores; Cynicos, quibus impudentia pro Heroica virtutis  
 fuit. Sed ad rem veniamus.

## QUÆSTIO PRÆAMBULA

*De Objecto , Natura , Qualitate ,  
Divisione Moralis scientiæ ,  
deque idoneo ejus Au-  
ditore .*

### ARTICULUS UNICUS.

**M**oralis Scientiæ objectum esse Mores humanos ex ipso ejus nomine constat. Porro quid sit Mos luculenter declarat D. Thomas 1. 2. quæst. 58. art. 1. Mos, inquit, duo significat. Quandoque enim significat Consuetudinem, sicut dicitur Act. 15. Nisi circumcidamini secundum morem Moysi, non poteritis salvi fieri. Quandoque vero significat inclinationem quandam naturalem, vel quasi naturalem ad aliquid agendum: unde & etiam brutorum animalium dicuntur aliqui mores. Unde dicitur 2. Machab. 11. quidam Leonum more irruentes in hostes prostraverunt eos. Et sic accipitur mos in Psal. 67. ubi dicitur: Qui habitare facit unius moris in domo. Et hæc quidem duæ significationes in nullo distinguuntur apud Latinos quantum ad vocem, in Græco autem distinguuntur: nam, Ethos, quod apud nos morem significat, quandoque habet primam longum, & scribitur ἦθος per η: quandoque habet primam correptivam & scribitur ἦθος per θ. Dicitur autem virtus moralis à mores, secundum quod mos significat quandam inclinationem naturalem, vel quasi naturalem, ad aliquid agendum. Hæc ille. Ex quibus constat, Mores hic sumi pro inclinationibus, seu affectibus, aut à natura inditis, aut aliunde contractis, illique non purè sumptis, & quales brutis etiam conperunt, sed rationis judicio tractabilibus, & ad bonum, aut malum flexibilibus, quales duntaxat homini pro-

## 4 Philos. III. P. Quæst. Præambula.

proptiè insunt, qui ex libertate in bonum, ac malum flexilis est, & ratione seipsum regit, cujus proinde actiones & affectiones propriè Moris nomine designantur. Verùm cum tria distinguantur in objecto, materiale, formale, & raro, sub qua; ut hæc breviter circa Moralem dilucidentur.

Dico 1. Objectum materiale Moralis sunt affectus, seu actus humani, formale verò est moralitas, cujus tales actus seu affectus sunt capaces; ratio verò, sub qua sunt præcipua principia practica.

Declaratur conclusio quoad singulas partes. Et in primis, quòd affectus humani (Id est, quos duce ratione, ac libertate comite elicimus) sint objectum materiale Moralis, constat. Siquidem licèt actus illos aliquatenus attingat Physica, quatenus sunt vitales motus; eos tamen discutit Moralis, quatenus sunt subiectum boni & mali Moralis, proindeque eos habet, ut objectum materiale. Quòd vero Moralitas, seu, ut explicat S. Thomas in Præmio Ethicæ, *ordo ille, quem ratio facit in actibus voluntatis*, sit formale objectum Moralis Doctrinæ, sic probatur. Objectum quidem materiale scientiæ est res, de qua agit. Objectum verò formale est illa ratio, quam in tali re considerat & discutit: Sed Moralis circa humanos affectus non considerat aliud, quàm moralitatem, id est, rationem boni & mali, seu recti & iniqui, quam induere possunt: Ergo moralitas est objectum formale Moralis. Porro cum ex objecto materiali & formali fiat unum objectum totale, id respectu Moralis aliud esse non potest, nisi Ens Morale, seu Actio Moralis.

Tertia conclusionis pars etiam suadetur. Ratio, sub qua cujuslibet scientiæ sunt principia, quibus suas conclusiones demonstrat: Sed Moralis suas demonstrat conclusiones per prima principia practica, quæ sunt purissimi luminis naturalis radii, quibus circa fugienda, eligendaque illuminamur: Ergo sunt ratio, sub qua Moralis. Horum verò principiorum habitualis cognitio vocatur *synderesis*, seu *synteresis*, à verbo Græco *συντηρεῖν*, quod est *observare*, à quo *συντηρησις*, id est, *observatio*, eo quòd ille habitus sit instar vigiliæ cuiusdam censoris omnes actiones observantis, malas perpetuò carpentis, ac reprehendentis, ideoque im-

pro-

### *Philos. III. Par. Qu. Præambula. §*

probum animum tacite corrodentis, vellicantis, flagellantis.

Ex hac conclusione intelligi potest, cur *Moralis* dicatur subalternari *Physicæ*. Quia scilicet, ut solent scientiæ subalternatæ; format suum objectum addendo aliquam differentiam objecto *Physicæ*. *Physica* enim considerat motus vitales, & inter alios, humanos affectus, præcisè secundum quod motus sunt vitaliter ab anima procedentes. *Moralis* vero de iis agit non præcisè, ut motus vitales sunt, sed ut subjacent moralitati, id est, quatenus ad rationis regulas collati bene, vel malè fieri possunt.

Dico 2. *Moralis* est vera scientia à *Prudentia* realiter distincta.

Probatur prima pars. Siquidem *Moralis* ex certissimis principiis plures conclusiones evidenter deducit & demonstrat; imò evidentioribus ferè nititur principiis, quàm plures aliæ scientiæ. Quis enim adeo hebes, stupidus, protervus, qui neget homini secundum rationem esse vivendum; pro gratia non rependendam esse injuriam; parentes colendos; æquum esse, ut unicuique, quod suum est, reddatur; virtutem, bonumque amari debere, malum, ac turpe fugiendum; & alia ejusmodi apud gentes etiam maximè incultas, barbaras, ac feras receptissima, quibus ut principiis *Moralis* Doctrina nititur: Ergo est vera scientia.

Probatur etiam secunda pars, quæ est contra *Epicurum*, pluresque alios, *Moralem* scientiam cum *Prudentia* confundentes. Primò. Scientia dividitur contra *Prudentiam*. Omnes enim quinque virtutum intellectualium species distinguunt, *Intelligentiam*, *Sapientiam*, *Scientiam*, *Prudentiam*, & *Artem*: Sed *Moralis*, ut jam diximus, est *Scientia*: Ergo distinguitur à *Prudentia*.

Confirmatur. *Habitus* diversi sunt, qui habent diversa principia, diversum objectum, diversos actus, diversa corruptiva: Sed hæc omnia diversa sunt in *Scientia* *Morali* & *Prudentia*: Ergo sunt diversi habitus. Probatur minor quoad singulas partes. In primis habent diversa principia; ut enim notat D. Thomas 1. 2. quæst. 38. art. 5. principia *Prudentiæ* non sunt principia universalis sciendi, quid bonum sit, aut malum in communi, quod pertinet ad *Moralem*, sed principia particularia, quibus

## 6 *Philos. III. Par. Qu. Præambula.*

bus judicatur, quid hic & nunc in particulari eligendum sit. Unde, ut ibidem ponderat Sanctus Doctor, fieri potest, ut quis scientificè noscat, quid turpe sit, & quid honestum; illudque fugiendum esse, hoc verò eligendum; & tamen in particulari imprudenter eligat turpe, & repudiet honestum, *Quatenus*, inquit, *hujusmodi universale principium cognitum per intellectum, vel scientiam*, (Moralem nempe) *corrumpitur in particulari per aliquam passionem; sicut concupiscenti, quando concupiscentia vincit, videtur hoc esse bonum, quod concupiscit, licet sit contra universale judicium rationis*: Ergo Prudentia & Scientia Moralis nituntur diversis principiis.

Quod etiam habeant diversum formaliter objectum, suadet ex Aristotele 6. Eth. cap. 9. Nam licet utraque respiciat agibilia, seu operationes voluntatis; attamen Moralis respicit illas in universali, ut scientificè cognoscibiles. Prudentia verò in particulari, ut hic & nunc operabiles, ac rectè regulabiles, seu ut dicit D. Thomas Quæst. 4. de Virtutibus in communi, art. 6. *Ad Scientiam* (Moralem scilicet) *pertinet universale judicium de agendis, sicut fornicationem esse malam, furtum non esse faciendum; sed ad Prudentiam pertinet rectè judicare de agibilibus singulis, prout sunt nunc agenda*: Atque hæc duo in ratione objecti formaliter differunt: Ergo Prudentia & Moralis respiciunt objecta formaliter diversa.

Quod verò habeant diversos actus, probatur. Actus Scientiæ Moralis est scire; virtutum, virtutumque naturam subtiliter indagare, veraciter penetrare, evidenter demonstrare: unde Scientia Moralis utitur syllogismis logicalibus, quemadmodum & aliæ scientiæ. At verò actus Prudentiæ est ex bona finis intentione de congruis mediis judicare, ac quid eligendum sit præcipere: unde Prudentia non utitur syllogismis logicalibus, sed longè alterius generis, in quibus scilicet recta finis intentio est quasi major; Judicium verò mediis assumendi, quasi minor; & Electio quasi conclusio: Ergo Prudentia & Moralis habent actus diversos.

Quod demum habeant diversa contraria & corruptiva suadet. Nam Prudentia corrumpitur affectu vitii corrupto, quantumvis intellectus maneat circa agibilia illa.

### *Philos. III. Pax. Qu. Præambula. 7*

Iustratus : unde vir in Moralium rerum cognitione ver-  
satissimus potest esse imprudentissimus, si sit malus. Nam,  
ut rectè ait Aristoteles 2. Ethic. *Scire parùm, vel nihil  
prodest ad virtutem* ; & rationem subiungit, *quia multi  
non operantur ea, quorum scientiam habent*, quod scilicet  
affectus vitilis depravetur, ac prudentiale iudicium pas-  
sionibus corrumpatur. At verò scientia Moralis non tol-  
litur per vitia, sed per ignorantiam ; ideoque vir pessi-  
mus potest esse in Moralibus doctissimus : Ergo scientia  
Moralis, & Prudentia habent diversa contraria, & corru-  
ptiva.

Dices. Prudentia est recta ratio agibilium, seu  
virtus intellectiva rationem rectificans circa agibi-  
lia : At idem Scientiæ Morali competit : Ergo idem  
sunt.

Respond. Distinguo : Prudentia est recta ratio agi-  
bilium, ut hic & nunc formaliter agibilia sunt, præ-  
cipiendo quid agendum sit, concedo ; ut in com-  
muni sciibilia sunt, speculando Rectum & Hone-  
stum, nego. Id enim proprium est Scientiæ Mo-  
rali.

Instabis. In Mente idem est habitus docens & utens, ut  
de Logica diximus : Sed Moralis docet regulas morum,  
Prudentialis utitur : Ergo idem habitus est solo munere  
diversus.

Respond. Distinguo maiorem : in Speculativis, con-  
cedo ; in agibilibus, nego. Nam nova & præcipua dif-  
ficultas regularum actionis in ipso usu consistit ; tum ob  
circumstantias particulares, tum ob passionum iudicium  
particulare corrumpentes. Et ideo præter habitum  
Scientiæ, qui speculationem regularum dirigit, opus  
est alto, quo ratio practica firmetur, ad eorum usum  
in particulari, ne vel passionum præoccupatione sedu-  
catur, aut circumstantiarum varietate confundatur.  
Id verò spectat ad Prudentiam, quæ singulis atten-  
dit, & de his sincere iudicat : unde magis ex usu &  
bona voluntate pendet, quam ex doctrina & mentis præ-  
stantia.

Dico 3. Moralis est Scientia omnino practica.

Probat. Tum ex illius fine, qui est practicus, scilicet  
dirigere intellectum ad bene regulandas operationes vo-  
luntatis. Tum ex ejus objecto, quod est etiam aliquid  
practicum, scilicet ipsum opus voluntatis, ut induit ra-  
tio.

### 8 *Philos.-III.Par.Qu. Præambula.*

elonem honesti & turpis, ac bene vel malè fieri potest à nobis. Tum demum ex ejus principijs, quæ sunt practica, utpote ad synderesim pertinentia, quæ est habitus primorum principiorum practicozum, sicut intelligentia est habitus primorum principiorum speculativozum.

Quantum ad Divisionem hujus Philosophiæ Partis, secuti eundem ordinem sumus, quem tenuit Aristoteles, & quid quid circa Mores dicendum occurrit, sex Quæstionibus complectemur. Prima erit de Ultimo Fine Morum, seu de Felicitate. Secunda de Subiecto Moralitatis, scilicet de actibus voluntatis, ubi præcipue de libertate agitur. Tertia de Passionibus, quæ participant Moralitatem, quægenus à recta ratione regulari possunt. Quarta de Bonitate & Malitia, quæ sunt Moralitatis species. Quinta de Virtutibus in communi, quæ sunt bonorum morum principia. Sexta de iisdem in particulari.

Verùm antequam ad Moralem Doctrinam accedamus, quidpiam dicendum est de idoneo ejus Auditore. Aristoteles in coëtes exigit conditiones. Primam ex parte intellectûs, nempe docilitatem, ut scilicet non exactam in Moralibus subtilitatem & Mathematicam cœritudinem exigit, sed qualem natura vel patitur. Quippe, inquit lib. I. cap. 3. *est hominis probè instituti tantam in unoquoque genere subtilitatem, ac tractationis exactitudinem desiderare, quantum vel natura recipit.* Cùm igitur, ut superius dixerat, *in his rebus, quæ honestæ, quæque justæ sunt, (id est, in Moralibus) tantu sit dissensio, tantaque versetur erratio,* præcipue ubi ad particularia fit descensus, satis erit, si in illa eadem quandam veri formam adumbramus.

Secundam conditionem requirit ex parte affectûs, ne scilicet afferatur ad hoc studium animus vitilis correptus, ac passionibus serviens, sed qui ratione suos affectus dirigat. Moralis enim Speculatio circa Actiones versatur, & ideo, qui malè afficitur circa Actiones, de Veritatibus Moralibus vix potest sincerè judicare, sicut gustus depravatus de saporibus: unde inanem, atque inutilem operam in audiendo infumet, nec ex eo studio, quem oportet fructum, reportabit.

Tertiam demum exigit conditionem ex parte ætatis, ne scilicet, qui in hanc Scientiam incumbit, si juvenis, sed maturus & gravis. Tum, quia juvenes sunt, actionum



### *Philos. III. Par. Qu. Præambula. 9*

moralium adhuc imperiti. Tum quia passionibus in hac ætate fervidis, nondum satis robusta ad eas frænandas ratione, obtemperare solent. Verùm quia, ut egregiè notat Aristoteles, quodd juvenis sit ineptus ad Moralem scientiam, *Culpa non est in ætate, sed in eo, quodd passionibus deordinatis convenienter vivat, & quiddquid libuerit, effranti animo persequatur*; ideo cùm apud Christianos virtuti militet omnis ætas, juvenesque timore Domini, ac gratiæ divinæ auxilio defectum rationis supplente, passionibus suas frænare debeant & soleant, scientiæ Morali discenda inepti habendi non sunt; ideoque Salomon in ipso doctrinæ moralis limine, id est, Prov. cap. x. dicit se scribere, *ut detur parvulis astutia, adolescenti scientia & intellectus*.

---

## QUÆSTIO PRIMA

### *De Ultimo Fine Morum, seu de Felicitate.*

**T**Ractationem Morum cum Aristotele aufpicamur ab ultimo eorum Fine, quia hic est scopus nobis, ut ille ait, *tanquam sagittarum propositus*, ad quem in omnibus collimare debemus; mensura & regula totius rectitudinis moralis; clavus vitam nostram dirigens, rectamque inter viciorum procellos tenens, ac veluti Silius Nauticum, cui intendendo vitæ cursus ab errore, ac naufragio securus sit; potius dixerim portum, ad quem hujusce vitæ nostræ navigatio suspirat & tendit. Unde licet hic ultimus in affectione, est tamen primus in intentione, proindeque in cognitione, quia nihil volitum, quàm præcognitum; & ut sæpe advertit cum Aristotele D. Thomas, se habet in moralibus, sicut primum principium in speculabilibus, cujus cognitio præsupponi debet, tanquam eorum omnium fons, radix, & cardo. Quæ verò de Ultimo Fine, seu Felicitate, dicenda occurrunt, tribus

A 5

com.

## 10 Tertia Par. Philos. Qu. I.

complectemur Articulis. In 1. agemus de Ultimo Fine secundum se spectato. In 2. de Felicitate objectivâ, seu de re, cujus adeptio hominem felicem efficit. In 3. de Felicitate formali, seu de adeptione illius rei, qua homo felix efficitur.

### ARTICULUS PRIMUS.

#### *De Ultimo Fine Morum humanorum.*

**A**ctionum, quæ ab homine fiunt, pervulgata divisio est in *actiones humanas, & actiones hominis*. Actiones hominis dicuntur, quæcumque ab homine fiunt. Actiones verò humanæ sunt, quæ non solum ab homine, sed etiam modo homini proprio fiunt. Porro agendi modus homini proprius est, qui rationem, qua homines sumus, consequitur. Differt autem agens rationale ab aliis, quia cum cætera instinctu impetuque naturæ ad suos actus abriplantur, agens rationale per intelligentiæ lumen & voluntatis libertatem se ipsum regit, de suis actibus per propriam deliberationem disponit, sicque illorum dominum habet: unde actio humana propriè dicitur, ut definit D. Thomas 1. 2. quæst. 1. art. 1. *Qua ex voluntate deliberata procedit*, ratione scilicet præfulgente, ac in quem finem tendendum sit, ostendente; voluntate verò subsequente, ac non cæco naturæ imperio in bonum irridente, sed ex iudicio rationis in id, quod expedire visum fuerit, se inclinante. Actiones verò, quibus alterutra deest conditio, id est, quibus aut rationis lumen non præfulget, aut voluntatis liber consensus non accedit, hominis quidem dici possunt, quippe ab eo fiunt; at non propriè humanæ, quia modo homini proprio non fiunt. Huiusmodi sunt motus primò primi, sic dicti, quod rationis iudicium anteverrant; interni plerique passionum insultus, quos mens advertit, sed voluntas non approbat; membrorum varii motus, quos duce solâ imaginatione homo ciet, ut dum frigentes manus conficit, palpebras identidem claudit & aperit, cutem prurientem scalpit, &c.

Verùm quia intellectus in tantum præfulget voluntati, eamque movet & dirigit, in quantum ei bonum  
ostendit.

## *De Ultimo Fine Morum. Art. I. 1<sup>a</sup>*

ostendit, in quod tanquam in centrum inclinatur, ut in eo motus suos finiat & quiescat; ideo necesse est, omnem actionem humanam tendere in aliquem finem, qui si ulterius non referatur, dicitur *ultimus*; si verò ad alium ulteriorem ordinetur, dicitur *intermedius*. Porro quomodo definiatur finis, quid sit agere propter finem, & quomodo cum omnia naturalia quadantenus agant propter finem, sola agentia intellectualia sese dirigunt in illum, proindeque magis propriè dicuntur *agere propter finem*; abundè dictum est in Physica 1. part. disp. 2. q. 6. de *Causa Finali*.

Hic solùm agemus de Ultimo Fine Morum, seu vite humanæ, circa quem quæri duo possunt. 1. An sit, & quid sit, seu quomodo definiatur. 2. An idem homo possit plures ultimos fines intendere, ac quomodo boni & mali in ultimo fine sibi præstituendo differant.

### *S. I.*

*An detur Finis Ultimus vite humanæ, & quid propriè sit.*

**F**inis duobus modis *ultimus* dici potest. Primò secundùm quid, & respectu alicujus particularis negotii. Secundò simpliciter, respectu scilicet totius vite. In primis constat, in quolibet negotio dari aliquem ultimum finem, in quem tota ejus series tendat & terminetur; ut in Medicina, ejusque operationibus finis ultimus est sanitas; in studio scientiarum, cognitio veritatis; in bellicis expeditionibus, victoria & pax in domino: habità enim sanitate quiescit sollicitudo Medici; veritate cognita, cessat inquisitionis studium; paratà victorià, & pace gloriosà ac utili firmatà, bellicæ curæ ac labores terminantur. Quæritur, an & totius vite sit aliquis ultimus finis, cujus adeptio appetitum omnino quiesceret, hominemque felicem constituat.

PRIMA CONCLUSIO.

**N**ecesse est dari aliquem totius humane vite finem ultimum. Ita Aristoteles hic, D. Thomas 1. 2. q. 3. art. 4. & communiter alii.

Probatur ratione D. Thomas 1. 2. q. 1. art. 4. Impossibile est, ut intentio hominis in dispositione vite procedat in infinitum in finibus: Ergo necesse est dari aliquem ultimum finem, in quo quiescat. Consequencia patet. Probatur antecedens. Tum quia generaliter in causis subordinatis procedi non potest in infinitum, ut probat Arist. 2. Phys. text. 34. Tum specialiter, quia si daretur processus in infinitum in finibus, nullusque esset, in quo voluntatis Intentio ultimè sisteret, nullus etiam esset, à quo voluptas primò moveri inciperet: Atqui necesse est dari aliquem finem, à quo primò voluntas moveatur, aliàs nunquam moveri inciperet: Ergo non datur processus in infinitum in finibus, sed debet esse aliquis ultimus, in quo voluntas tandem quiescat. Minor patet. Probatur major. Ultimum in affectione, in quo voluntas quiescit, est primum in intentione, à quo moveri incipit; ut patet in consultatione Medica, quæ quia ultimè quiescit in sanitate obtenta, primò incipit ex sanitate intenti: Ergo nisi daretur aliquis ultimus finis, in quo voluntas ultimè quiesceret, non daretur aliquid primum in intentione, à quo voluntas primò moveri inciperet.

Confirmatur ratione Aristotelis hic cap. 3. Nisi daretur finis ultimus humane vite, appetitus humanus esset irritus & inanis; Sed hoc dici nequit, cum omnis appetitus sit inclinatio impressa ex ordinatione primi moventis, scilicet Dei, qui nihil in cassum facit, nec frustra movet: Ergo datur finis ultimus vite. Probatur sequela majoris. Ille appetitus est irritus & inanis, qui nunquam satiari potest & pervenire, quò tendit: Atqui appetitus humanus nunquam satiari posset & pervenire, quò tenderet, si in nullo posset ultimè quiescere: Ergo esset irritus & inanis: Maxime quia omnis inclinatio ad bonum, est propter quierem in bono, quod ideo dicitur finis, quia quietando finit & terminat desiderium appetitus: unde

## De Ultimo Fine Morum. Art. I. 13

appetitus, qui nunquam quiescere potest, sed quocumque obrento ulterius procedit, est irritus & inanis.

Obj. Humanum desiderium in nulla re plenè quiescit; Ergo non datur finis ultimus vitæ. Probatur antecedens ex ea inquietitudine, qua homines nunquam bonis expletis nova semper accumulare desideria videmus, ut avari nunquam satiantur divitiis, voluptuosi voluptatibus, ambitiosi honoribus, sed semper in infinitum suis desideris procedunt: unde Aristoteles E. Polit. cap. 6. dicit: *Instituto concupiscentia existente homines infinita desiderant.*

Resp. Nego antecedens. Ad probationem respondeo, hanc humani cordis inquietitudinem & novorum desideriorum accumulationem non probare, quod non detur finis ultimus, in quo appetitus humanus quiescat, aut quod ejusmodi homines non præstent sibi aliquem finem ultimum in dispositione vitæ suæ: Sed solum, quod illum finem nunquam obtinent, quia in illis rebus eum querunt, in quibus non est. Omnis enim homo sibi quidem præstituit aliquem ultimum finem, quo plenè obrento satiarus quiescere; scilicet summum bonum, seu perfectam satisfactionem, ex cujus intentione prinè ad operandum movetur. Sed quidam homines hanc perfectam satisfactionem, quam pro ultimo fine habent, in quibusdam querunt, quæ ad illam minime sufficiunt, quibus proinde obrentis non quiescunt satii, sed usque ipso cognita eorum insufficientiâ illis spretis ad nova querenda procedunt. Et hæc est radix inquietudinis cordis humani felicitatem in bonis periculis querentis; hocque pacto cuncti pravi in infinitum procedunt. In nulla enim se quiescunt, sed novis semper desideris æstuant; nec miserum cor eorum bonis concupiscit magis expletur, quàm fabulosum Danaïdum dolium aquâ.

## SECUNDA CONCLUSIO.

**U**ltimus humane vitæ finis rectè definiti potest, ille, quem propter se tantum volumus, cetera vero propter ipsam. Ita definitur ab Aristotele lib. 1. Ethicorum cap. 1. à D. Augustino 19. de Civitate Dei, cap. 2.

Declaratur. In primis quod ultimus finis propter se

#### 14. *Tertiae Partis Philosophiae. Q. I.*

tantum quæri debeat, palliū est; si enim ad ulteriorem ordinaretur, ultimus non esset. Quid etiam cætera omnia ad ipsum referri debeant, suadetur. Primum quia primum in unoquoque genere est causa cæterorum: Sed ultimus finis est primus in intentione, ut ex dictis patet. Ergo est causa omnium, quæ intenduntur, seu ratio volendi cætera. Secundū appetitus omnia refert ad id, in quo solo ultimū quiescit; nisi enim referret ulterius, in illis ultimū quiesceret, ut de se patet: Atqui ultimus finis est, in quo solo ultimū quiescit appetitus: Ergo cætera debet tandem referre ad ipsum. Tertio demum, ultimus finis plenē satiare debet appetitum, perfectē ipsi dominari, totaliter ei adæquari, aliās non in illū ultimū sisteret, proindeque finis ultimus non esset: Atqui nec plenē satiet appetitum, si aliquid ad ipsum non pertinens quæreretur; nec dominaretur totaliter affectui, si omnes ejus motus sibi non subiceret; nec adæquaretur ei, si aliquid extra eum desideraretur, quod propter ipsum non quæreretur; Ergo ultimus finis est, propter quem cætera omnia volumus, quique proinde dicitur *felicitas*, seu *summum bonum*, eo quod in se omnia bona colligere debeat, eoque possessio perfectē satietur appetitus.

Porro qua ratione omnia referantur ad ultimum finem, seu beatitudinem, & quomodo amor illius sit fons, origo, & radix omnium aliorum affectuum, declarari amplius potest non solum exemplo lucis, quæ, quia est primum summumque visibile, est ratio videndi omnia colorum discrimina; aut exemplo motus cordis, quæ, quia est primus vitæ motus, est causa à qua proficiunt omnes vitales motus; sed adhuc longè præclarior comparatione apud D. Thomam frequentissima intellectus cum voluntate. Sic enim se habet amor ultimi finis in appetibilibus, sicut cognitio principiorum in intelligibilibus: unde sicut prima principia sunt prima cognita, ita beatitudo, seu finis ultimus primum volitum; Et sicut non assentimus particularibus conclusionibus, nisi quatenus cohærent cum primis principiis, ita nec volumus bona particularia, nisi quatenus connexa sunt cum ultimo fine, scilicet beatitudine; Et demum sicut cognitio principiorum movet ad omnes alias cognitiones, quatenus per eam illustrati, cætera intelligimus, ideoque radix est omnium cognitionum, immo cæteræ cognitiones non sunt

## De Ultimo Fine Morum. Art. I. 15

sunt nisi quædam illius primi luminis propagationes & diffusiones, ita primus ille beatitudinis amor movet ad alios amores, quatenus per illum excitati, ea, quæ ad ipsum ducunt, quærimus, estque prima omnium affectionum radix; immodò ceteri affectus non sunt, nisi quidam illius primi amoris rami propagines ac diffusiones; seu lineæ, ab hac circumferentia natæ, & in ejus centrum, scilicet beatitudinem, terminatæ: unde præclare Boetius 3. de Consol. Prosa 2. *Omnis Mortalium cura, quam multiplicium studiorum labor exercet, diverso quidem calle procedit, sed ad unum tamen beatitudinis finem nititur pervenire.* Et D. Augustinus l. 13. de Trin. cap. 5. *Omnes homines beati esse volunt, & hoc ardentissimè appetunt, & propter hoc cetera appetunt.*

Obj. Illi, quorum Deus venter est, ut loquitur Apostolus ad Philipenses. 3. habent sine dubio illum pro ultimo fine: Sed non referunt omnia ad ipsum: Ergo non est necesse, ut omnia referantur ad ultimum finem. Probatur minor. Qui enim fieri potest, ut ad tam vile, tam angustum, tam brutale bonum humana voluntas, tam latè parens omnes affectus referat & coarctet?

Resp. Nego minorem; ob id enim dicuntur ab Apostolo habere ventrem, id est, voluptates ventris, pro Deo, quia cuncta aliquatenus ad ipsas referunt. Id vero quomodo fiat, facillè intelligetur, si rem altius repetendo annoremus, beatitudinem, seu perfectam appetitus satisfactionem esse finem ultimum omnium hominum. Licet autem humanus appetitus tam latè pateat, ut solâ boni infiniti possessione satiari possit, homines tamen falsâ existimatione decepti plenam desiderii satietatem sæpe reponunt in rebus angustæ, umbraticæque bonitatis: ac avari in pecunia, voluptuosi in delitiis corporis, ambitiosi in honore; quatenus putant, in his rebus se sui desiderii perfectam quietem reperturos; & ideo, dicuntur eam habere pro Deo suo, id est, pro summo bono. Hujus verò miserimè deceptionis radix est, quod homo in hac mortali carne passionibus potius, quàm ratione agitur; corpus enim, quod corrumpitur, aggravat, id est, affectibus ex se natis trahit, animam: unde quid sibi bonum sit, passionum magis gustu, quàm rationis lumine sæpe determinat. Contingit autem, passionum aliquam ita vehementer intendi, ut cæteras opprimat, aut ad se erahat, sicque voluntati sola dominetur, quam ita excocat.

## 16 Tertiæ Partis Philosophiæ. Qu. I.

eat, & coarctat, ut solum illius passionis bonum advertat & appetat; sicut oculus per foraminis angustias respiciens, ea solum advertit, quorum species foramen admittit: unde sic coarctata voluntas illo unico bono obesto se perfecte felicem fore putat, ideoque omnem affectum ad ipsum dirigit, quod præcipue videre est in hominis profani amoris castro percitis. Verum quando boni amati possessione passionis ardor sedatur, voluntas quasi laxato vinculo nativam ad amplitudinem redit, illiusque boni insufficientiam detegens nova quærit, quibus vastissimum desiderii hiatus explere possit. Et hæc est ratio, cur multi suam felicitatem in vilissimis rebus ponant, & tamen in nullo quiescere possunt, sed novis semper desideriis assuunt.

### §. I L

*An Homo plures Fines ultimos habere possit;  
& quomodo in Fine ultimo sibi præ  
situenso mali à bonis  
differunt.*

**Q**UANTUM ad primam Nullem partem, non procedit de Fine ultimo quasi materiali sumpto, pro re scilicet, in qua homo suam felicitatem reponit, debeatne esse una simplex, an possit ex pluribus sub una totali ratione boni perfecti apprehensis integrari. Quippe constat, homines ad suam perfectam felicitatem plura, eaque diversissima requirere, opes, honores, ingenium, delicias, &c. Sed procedit de Fine ultimo formaliter spectato, pro ipsa ratione summi boni, an scilicet rationem summi boni possit homo pluribus rebus ita tribuere, ut simul quamlibet divisim sumptam habeat pro ultimo fine.



PRIMA CONCLUSIO.

**I**mpossibile est, hominem plures ultimos Fines simul & semel habere. Ita D. Thomas 1. 2. q. 1. a. 5. & communiter alii.

Probat 1. Authoritate Christi Domini Matth. 7. dicentis, *Nemo potest duobus dominis servire*: Atqui finis ultimus est, qui totaliter affectui dominatur, ut ex dictis patet: Ergo idem homo non potest simul & semel habere duos ultimos fines.

2. Ex ipsa ultimi finis definitione, ac ejus proprietatibus. Finis ultimus est, qui ad nullum alium, sed ad quem omnia referuntur, qui perfecte satiat appetitum, qui est summum, ac plenum appetentis bonum: Atqui si homo duos ultimos fines haberet, ad neutrum eorum omnia referrentur, cum saltem unus ad alium non ordinaretur; neuter perfecte satiaret appetitum, cum obtento uno, alius adhuc esset appetibilis, neuter esset summum, ac plenum appetentis bonum; ut enim arguit Boetius 3. de Consol. Prosa 2. *Sanctum bonorum cuncta intra se continet, quia si quid adforet, summum esse non posset; quoniam relinqueret extrinsecus, quod posset optari*. Ergo finis ultimus cujuslibet hominis non potest esse, nisi unus.

3. Denum quod naturaliter appetitur, non potest esse nisi unum: Sed finis ultimus naturaliter appetitur. Ergo non potest esse nisi unus. Major videtur certa, quia natura est determinata ad unum: unde sicut unus rei non est, nisi unica forma ad unam rei speciem determinata, ita nec nisi unica inclinatio naturalis ad unum finem tali formae proportionatum. Minor verò declaratur. Nam licet res, in qua reponendus est ultimus finis, non sit à natura determinata, attamen amor ultimi finis, seu beatitudinis est naturaliter inditus voluntati: siquidem ut egregie arguit D. Thomas Qu. 16. de Verit. artic. 2. *Cum natura in operibus suis bonum intendet, & conservationem eorum, quae per operationem natura fiunt; in omnibus natura operibus semper principia sunt permanentia, immutabilia & constantiam conservantia*. Unde ut ait 1. 2. qu. 17. art. 9. ad 3. *Principia oportet esse naturalia*: Atqui amor

finitis

## 18. Tertiae Partis Philosophiae. Qu. I.

finis ultimi est principium omnium affectuum : Ergo oportet, ut sit naturaliter inditus voluntati, sicut cognitio principiorum naturaliter inest intellectui.

Obj. Non repugnat, ut quis se felicem fore arbitretur, si aut summam divitiam, aut summum honorem obtineat. Ergo duos ultimos fines sibi potest proponere.

Resp. Repugnare, ut qui res duas sibi appetibiles iudicat, alterutra se summè felicem fore arbitretur. Nam una obtenta, altera nihilominus sollicitaret ejus affectum ; immò jam sollicitat in Hypothesi.

Quantum ad secundam tituli partem, in primis constet, omnes homines sive bonos, sive malos in hoc convenire, ut beatitudinem, seu perfectum, plenumque bonum appetant, ut ultimum finem. Certum est præterea secundum rei veritatem, hoc bonum, hanc hominis beatitudinem in unica tantum re posse reperiri, quamvis eam varii in variis requirant, quatenus, ut præclare ait Boetius 3. de Cons. *Cum mentibus hominum verè boni sit naturaliter inserta cupiditas, ad falsa devius error adducit.* Superest igitur malos à bonis differre, non in appetitu beatitudinis, sed in modo determinandi sibi hanc beatitudinem, quatenus excecato intellectu, depravatoque viris, ac passionibus affecto, illam in his rebus quaerunt, in quibus non est, eà re neglectà, in qua verè est, & hoc modo quaerunt, quo minimè debent, immò quo nequaquam reperient. Ceterum cum in hac beatitudinis inquisitione pravi homines, tot tamque diversis viis procedant, & eorum cor veluti æstuosum mare tot, tamque invicem pugnantibus cupiditatibus agiteatur, difficile est, in his affectuum ambagibus hujus Labyrinthi filum adinventire, & unum tot, tamque erraticis motibus scopum determinare, in quo & omnes mali conveniant, & à bonis differant. Porro rem non discutimus de homine, ut elevato ad finem supernaturalem, & secundum principia fidei, quo pacto spectat ad Theologos, sed præcisè spectato in ordine naturæ, & quatenus ea de re veritatem venari possumus ex principiis luminis naturali notis. Hoc posito, sit.

## SECUNDA CONCLUSIO.

**D**ifferunt Mali à Bonis, quodd Mali sibi pro fine ultimo præstituant bonum proprium taxatum, non secundum rationis regulas, sed juxta effrænis, depravatæque passionibus voluntatis libitum; proindeque in his rebus, in quibus minimè reperitur, querendum: Boni verò è contra summum suum bonum, ac beatitudinem juxta rectæ rationis regulas sibi determinent, proindeque in illa re querant, ubi verè reperitur. Quanam autem res illa sit, dicetur articulo sequenti. Unde finis ultimus Malorum est bonum proprium, *non absolutè, sed dissolutè*, quæsitum; finis verò ultimus Bonorum est bonum proprium, *non dissolutè, sed relictè, & conformiter ad regulas rationis spectatum*.

Conclusio desumitur ex Aristotele 9. Ethic. cap. 8. ubi postquam statuit, quemlibet maxime se ipsum amare, sibi que bona procurare, inter bonos & malos illud discrimen statuit, quodd mali in procurando sibi bono *sua cupiditatibus, & affectibus, etque animi parti, qua rationis experta est, obsequantur*, proindeque in bonis fallacibus, suam beatitudinem constituent, *in pecunia, in honoribus, in voluptatibus denique corporis, sibi ipsis majorem partem tribuendo, & vendicando*: unde & à multitudine hominum, quæ ea bona magni æstimat, mali dicuntur *ἐπὶ λαῶσι*, id est, *sui amatores*, eo quodd immoderatè hæc sibi procurent. At verò boni *res pulcherrimas, atque optimas sibi tribuant, sed ei sui parti, qua principatum tenet*, id est, rectæ rationi) gratificantes, & omnibus in rebus obtemperantes. Ex quibus.

Probatur conclusio. Appetitus corruptus differt à recto, quodd cum uterque bonum proprium querat (quippe cum omnis appetitus sit inclinatio in bonum proprium naturæ, à qua fuit) rectus omnes motus suos rationis ductu regat, pravus verò effræni licentiâ rationis metas exeat: Atqui mali in determinando sibi fine, & querendo bono ducuntur appetitu corrupto, ideo enim mali sunt; boni verò appetitu recto: Ergo differunt mali à bonis, quodd mali sibi ultimum finem determinent in bono proprio non secundum rectæ rationis regulas, sed juxta

## De Tertia Partis Philosophiæ. Qu. I.

juxta prave voluntatis libitum taxato: boni verò in eodem bono proprio à recta ratione regulato.

Porro quomodo voluntas hominis boni à charitate altius evedat bonum proprium ulterius referat, in Divinum, quatenus est in se ipso, id est, quatenus est bonum ipsius Dei; & quomodo voluntas peccatoris quantumvis moralibus virtutibus instructi, postquam per peccatum exclusa charitate à bono Divino, ut est in se, excidit, in bono proprio culpabiliter torpeat, expendere pertinet ad Theologiam.

Cæterùm, quod dixi in conclusione, malos repudiatore rectæ rationis ductu in proprium bonum, ac felicitatem cæco impetu irruentes, eam in his rebus quærere, in quibus minimè sint reperturi; proindeque quidquid immoderatè sibi satisfaciendi aviditate molantur, semper inquietos, inanes, ac miserrimos remanere, non solum sancti Prophetæ, ac sacri Doctores cælitus edociti vobis vehementer inculcant, sed etiam solo rationis lumine, ac vi pervidit, luculenterque expressit Aristoteles 9. Ethicorum cap. 4. cujus vero aureis characteribus inscribi digna non pigebit pro hujus articuli epîlogo referre. Hujusmodi autem sunt. *Semper (improbi) secum pugnant ac dissident, alique volunt, alia concupiscunt. Ita enim spreto, ac rejecto, quæ sibi bona esse opinantur, jussanda sequuntur, & quæ sunt damnosa sumuntur (quippe ut Poeta ait, aliudve cupido, mens aliud suadet.) Propter ignaviam autem, ac desidiam ab iis agendis, quæ sibi optima ducunt, longè se remouent, & cum multa facinora admiserint, propter improbitatem vitam oderunt ac fugiunt, sibi que violentas manus inferunt. Quarunt, quibuscum dies totos ducant, seipsos autem fugiunt. Multa enim gravia, atque horrenda recordantur; taliaque rursus, cum soli sunt, expellunt; tantisper autem, dum cum aliis sunt obliuiscuntur. Cum sit nihil in eis amabile, nihil illius amicitialis affectus, qui solet esse inter amicos, habent ad seipsos. Neque enim secum unà latantur, neque unà dolent, sed in eorum animo discordia, ac seditiones concitantur, quatenus altera pars animi propter improbitatem, quia à quibusdam reprimitur, dolet, (pars scilicet sensitiva) altera (pars rationalis scilicet, quæ judicat, abstinendum esse à malo) interdum latatur, & huc trahit altera, illuc altera, animum quasi disperpentes. Quod si fieri non possit, ut quis simul doceat, & lateat, et certè pravus, paulo post, quid lo-*

## De Felicitate Objectiva Art. II. 21

*Latatur sit, dolore conficitur, nolletque hoc sibi voluptatem attulisse. Malos enim assiduus actionum suarum panitet. Non videtur igitur homo malus ne in se ipsum quidem amico esse animo, quia nihil habet amabile. Ut tandem peregre gressu concludit. Quid si ita affectum esse valde est miserum, acerrima contentione fugienda est improbitas, operaque cuique danda, ut sit vir bonus. Cujus pacatissimam, iucundissimamque vitam paullo ante descripserat.*

### ARTICULUS SECUNDUS.

*De Felicitate Objectiva, seu de re, cuius possessio hominem naturaliter felicem efficere potest.*

**C**UM in felicitate duo sint, res, qua felices sumus, & consecutio illius rei; primum dicitur *felicitas objectiva*; secundum *felicitas formalis*. De ista inferius dicetur, de felicitate vero *objectiva* nunc nobis sermo est. Quamquam vero in ea totius Moralis cardo vertatur, utpote cum sit omnium actionum finis, mensura, & premium, in nulla tamen Philosophiæ parte vehementius erraverunt antiqui Philosophi lumine fidei destituti. Cum enim formarent sublimem, magnificam, augendamque felicitatis ideam, nullum in his bonis, quæ in hominem cadere possunt, detegebant satis amplum, purum & excelsum ad tantum munus implendum. Unde, ut inquit D. Thomas 3. cont. Gent. cap. 48. *Magnam hinc inde patiebantur angustiam eorum præclara ingenia, nec, quod se verterent, satis in promptu habebant. Quidam hominem exactè felicem esse posse desperantes, eam vitam beatam dixerunt, non quæ bonis undique afflueret, sed quæ minus misera esset. Quorum nomine Plinius, Si verum iudicium ferre volumus, inquit, ac repudiata omni fortuna ambitione decernere, mortalium memo est felix. Abundè igitur atque indulgenter fortuna decidit cum eo, quod iure dici non infelix potest. Nam, inquit Cicero 5 Tuscul. ut quæstiosa mercatura, fructuosa oratio dicitur, non si altera semper omni damno, altera omnis tempestatis calamitate semper vases; sed si multo majori ex parte existeret in utraque*

## 22 Tertiæ Partis Philosophiæ Qu. I.

*felicitas, sic vita non solum si undique referta bonis est, sed si multo majore & gravare ex parte bona propendens, beata velle dici potest.*

Sed animosiores hac in parte Stoici, ut plenam felicitatem homini vindicarent, certissime adstruebant, virtutem esse summum bonum, vitium verò summum, Immo unicum malum; proindeque sapientem, id est, omni virtutum dote ornatum virum, etiam in Phalaridis tauro, ac exquisitissimis doloribus esse perfecte felicem. Quidam felicitatem perfectam reponebant, in tranquillitate animi, quam Democritus *εὐδαιμόνειαν*, seu *εὐεσθίαν* appellabat, quasi *bonum animi statum*. Heraclitus verò *ἡσυχίαν*, id est, *placabilitatem*, seu *pacationem animi*. Pyrrho autem *ἀταραξίαν*, *statum animi imperturbabilem*, & qualem magnifice describit Horatius 3. Carm. Ode 3. His verbis:

*Iustum & tenacem propositi virum  
Non civium ardor prava jubentium,  
Non vultus instantis tyranni  
Monte quatis solidâ, nec Ausper  
Dux inquieti turbidus Adriæ,  
Nec fulminantis magna Jovis manus.  
Si fractus illabatur orbis,  
Impavidum ferient ruinae.*

Anaxagoras, Possidonius, Herillus, Pythagoras, & alii ad felicitatem principaliter exigebant rerum Cognitionem, ac Contemplationem. Aristoteles verò, cum Contemplationi, ac Virtuti primas daret, addebat præterea bona fortunæ & optimum corporis statum. Aristippus & cum eo Cyrenaici cæteris omnibus delicias corporis præferebant; quem brutalem errorem multi è vulgo pravorum in praxi sequuntur, cum alii divitias & voluptates, alii honores & imperia, ut præcipua bona consecutentur. Immo, quasi homines ad se ipsos excruciantos geniti essent, quisque solet in his felicitatem reponere, quæ sibi cum desint, in aliis admiratur: ut Ignari in scientia, pauperes in divitiis, ægroti in sanitate, subditi in principatu, &c.

Demum ne singula memorem, notissimum est, Epicurum vitam beatam in Voluptate reposuisse; quam verò intellexerit, an animi, an corporis, an utriusque.

*De Felicitate Objectiva. Art. II. 23*

que, nihil attinet discutere. Unum adnotare juvat, ipsum ut puriores pararet voluptates, sive bonis, sive malis, illa omnia convellere fuisse conatum, quibus fructio voluptatis curbari solet. Unde negavit vigilantem supra nos Dei Providentiam, cujus formidabilis censura & ultor oculus lancinat inter ipsas delicias corda malorum. Omnia naturæ opera retulit ad ludum Atomorum, ut ea securius spectaremus, nihil ex tam innoxiiis causis formidantes. Mortis pavorem cunctas vitæ delicias amaritudine diluere avertere induit, dicendo, eam esse nihilum, & post ipsam nihil nostri superesse, quo dolere possimus, proindeque non magis timendam, quam somnum. Unde consequenter pœnas malis in altera vita paratas in fabulis habuit. Uno verbo in tota sua Philosophia huc collipavit, ut omnem animi anxietatem, laborem, curam, pavorem, dolorem vel penitus aboleret, vel saltem deliniret; efficeretque, ut homines præsentis vitæ usutam, quoad Natura concedit, jucundè, blandèque carperent, ut pereleganter describitur Sapientia 2. aut, ut rem dicam brevius, ut securè impli essent. Verùm, ut his omnibus sententiis, quatenus veritati obstant, confutatis, vera sententia stabilitur,

§. I.

*Felicitatem Hominis in nullo bono creato  
posse consistere.*

PRIMA CONCLUSIO.

**F**elicitas hominis non consistit in divitiis. Conclusio est contra Avaros, qui tantâ curâ opes sectantur, ut eas quasi pro summo bono habeant: unde Apostolus, vocat avaritiam; simulacrorum & idolorum servitutem.

Probatur ratione D. Thomæ 1. 2. quest. 2. artic. 2. Divitiæ aliæ artificiales sunt, ut denarii: aliæ naturales, ut frumentum, vinum, &c. Primæ sunt propter secundas, secundæ verò propter vitam subientem.

## 24 Tertia Partis Philosophia. Qu. I.

tationem : Ergo neutra sunt finis ultimus , sed tantum media ad aliquem finem , scilicet vitæ sustentationem . Unde annumerantur inter bona utilia , quibus repugnat ratio finis ultimi , ac beatitudinis .

Confirmatur 1. Bonum hominis consistit magis in retinendo beatitudinem , quam in emittendo ipsam . Sed sicut Boetius 3. de Consol. dicit , *Divitia effundendo magis , quam conservando melius nitentur ; siquidem avaritia semper odiosos , claros facit largitas* . Unde comparantur feno , qui dispersus prodest , agros impinguando , conservatus vero foetet : Ergo in illis beatitudo non consistit .

2. Pecunias consequitur cura servandi , sitis augendi , timor amittendi . Præterea segnitiei fomenta sunt , litium rixarumque incentiva , scelerum irritamenta , virtutis impedimenta ; ideoque à Christo spiritus comparantur , quæ virtutum sementem suffocant ; immo sæpe , ut dicitur Ecclesiaste 5. *Conservantur in malum domini sui* , nec unquam ejus appetitum satiant ; sed quæ quidem habentur , contemnantur , quæ non habentur , anxie quærantur . Unde præclare Bernardus , *Impossibile est , cor satiari auro , sicut nec corpus autem* : Ergo non faciunt felicem suum possessorem , sed potius famelicum .

3. Denique , ut omnes concedunt , felicior est pauper sanus , quam dives podagra , aut aliis doloribus lacinatus : hic enim veller sanitatem totis thesauris coemere . Inimò pauper Aglaus Psophidius in Arcadia angulo parvum , seu annuis victibus sufficiens prædium sine ulla cupiditate colens , Gyge regem amplissimo felicior habitus est ab Oraculo , ut refert Plinius lib. 7. cap. 48. Et ne plura commemorem , nullus est , qui Respublicas Romanam , Lacedæmonensemque beatiores fuisse non arbitretur , cum sine divitiis ista Græciæ , illa magnæ Orbis parti virtute armisque Imperaret , quam cum succedentibus divitiis , ac earum pedissequis vitis utraque labefacta est : Ergo divitiæ ad felicitatem hominis non consequuntur .

Objici posset pro avaris . Illud videtur esse summum vitæ humanæ bonum , quod maxime dominatur affectui hominum , & in quo cætera humana bona continentur : Atqui divitiæ maxime dominantur affectibus



## De Felicitate Objectivâ. Art. II. 25

bus hominum, juxta illud Ecclesiaste 10. Pecunie obediunt omnia. Et aliud ex Poeta tritum:

..... Quid non mortalia pectora cogis  
Auri sacra fames?

Similiter in divitiis cætera humana bona quadantenus continentur; unde Aristoteles 5, Ethicorum *Ad hoc*, inquit, nummus inventus est, ut sit quasi fidejussor habendi pro eâ, quomodocumque homo voluerit. Quod inculenter expendens Horatius Serm. lib. 2. satyrâ 3. ait:

..... omnis enim res,  
Virtus, fama, decus, divitia, humanaque pulchris  
Divitiis parent, quas qui construxerit, ille  
Clarus erit, fortis, justus, sapiens etiam, &  
rex,  
Et quidquid volet.

Ergo divitiæ sunt maximum hujus vitæ bonum.

Resp. Divitias dominari solènt affectibus, stultorum, qui venales animas habent. Nam vit. sapiens, ne minimum quidem turpe admittet propter cupiditatem divitiarum, ut videre est, non solum in veris Christianis, qui cælitus sunt edocti, *Beatos esse pauperes spiritu*, sed etiam in pluribus Antiquis, qui solo rationis lumine illustrati animum à divitiarum corruptela immunem servaverunt, ut patet in Lacedæmonijs & Antiquioribus Romanis. Adde, quòd ejusmodi divitiarum dominium in animos hominum non est blandum, dulceque imperium, quale summum bonum decet, sed dura quædam tyrannis, quæ mentem miserè opprimit, & sexcentis malis reddit obnoxiam: nam, ut ait Apostolus, *vanitas omnium malorum cupiditas*. Unde avari comparantur servis illis, qui apud Æthiopes Macrobius aureis carenis vinciebantur, quos eleganter Terrullianus vocat *tanto misseriores, quanto ditiores*. Quæ verò bona in divitiis contineri dixit Aristoteles, sunt solum venalia, id est, minora: nam spiritalia vendi non possunt, ut scientia & virrus. Unde Salomon Prov. 17. *Quid prodest stulto habere divitias, cum sapientiam emere non possit*. Quod verò saryricè, ironicè dixit Poeta, divitem esse justum, Philof. R. P. Gaud. IV. Pars.

B

sa.

## 26 Tertia Partis Philosophia. Qu. I.

sapientem, &c. intelligendum est non secundum veritatem, sed secundum adulationem; quatenus homines blandiendo divitibus, eis virtutes & dotes tribuunt, à quibus longissime absunt.

### SECUNDA CONCLUSIO.

**F**elicitas hominis non consistit in honoribus. Conclusio est contra ambiciosos, qui honoris causâ cuncta moluntur.

Probatnr tribus momentis. Felicitas debet esse in eo, qui felix est, ranquam bonum ipsi intrinsecum: Arqui honor est in honorante, & non in eo, cui deferretur respectu cuius est tantum denominatio extrinseca nihil in eo boni ponens: Ergo non eum felicem efficit.

2. Honor est duntaxat testimonium excellentiæ, quam non facit, sed supponit, cuique quasi tributum & appendix accedit: Sed felicitas est bonorum excellentissimum: Ergo honor eam non facit, sed supponit.

3. Bonum, quo felices sumus, debet esse solidum, ac stabile; Sed honor est instabilis & inanis, utpote qui pendet ex opinione hominum. Unde Jacobi 4. comparatur Vapor ad modum apparenti, & Sapient. 2. Umbra transienti, & Danielis 2. *Marinis fluctibus*: Immo, ut inquit Seneca ad Polybium, *Honores cum labore possidentur, cum invidia conspiciuntur, eosque ipsos, quos exornant, onerant & premunt*: Ergo felicitas non consistit in honore.

Dices. Beatitudo est præmium virtutis, ut ait Aristoteles 1. Ethicorum: Sed ut idem dicit 4. Ethicorum, honor maximè videtur esse id, quod est præmium virtutis: Ergo est ipsa felicitas.

Resp. Cum D. Thoma 1. 2. qn. 2. a. 2. quoddam honor non est præmium virtutis, propter quod virtuosi operantur; sed accipiunt honorem ab hominibus loco præmii, quasi à non habentibus ad dandum majus. Sicut Rex Peritarum à quodam paupere haustam utraq; volâ è fluvio aquam pro dono libenter accepisse fertur. Si autem propter honorem fieret opus, jam non esset virtus, sed magis ambitio: Unde qui sincerè virtutem colit, etiam dispendio famæ & honoris recta operantur, ut videre est in Apostolis, qui ibant gaudentes à conspectu concilii, quoniam digni habiti essent pro nomine Jesu contrameliâ pati.

TER-

TERTIA CONCLUSIO.

**F**elicitas non consistit in gloria & fama. Conclusio videtur esse contra Antiquitatis dictos Heroes, qui gloriæ & famæ gratiâ cuncta gerebant.

Probatur 1. Felicitas debet consistere in bono solido & vero. Sed, ut ait Boetius 3. de Consol. Prosâ 6 gloria fallax sære & turpis est. *Plures enim magnum sære nomen falsis vulgi opinionibus abstulerunt, quo quid turpius excogitari potest? nam qui falsè prædicant, suis ipsa necesse est erubescant:* Ergo in illa non consistit felicitas.

2. Gloria, ut ait Ambrosius, est clara cum laude notitia, cujus fama est quædam divulgatio. Notitia autem Divina est quidem causa rerum, ideoque in ea, ut in causa vera felicitas consistit: unde D. Francisci effatum, *Domine, tantum unusquisque est, quantum tibi apparet.* At verò humana notitia causatur à rebus: unde bonos non facit, sed supponit, si vera sit; si autem falsa, ad felicitatem nihil, sed infelicem reddit eum, qui propriæ conscientiæ testimonio confusus, de ea veluti de falso teste erubescit: unde, qui verè sapit, famam non querit, sed etiam in nemore solus, ut inquit Plato, aut Gygis annulo præfatus virtuosè agit.

QUARTA CONCLUSIO.

**F**elicitas hominis non consistit in potestate.

Conclusio est contra quosdam Politicos, qui summam hominis bonum in principatu collocantes, divina humanaque huic fini inservire cogunt, juxta illud à Cæsare usurpatum ex Euripide: *Si violandum est jus, re- gnandi causâ violandum est; ceteris rebus pietatem colat.* Unde antiqui Romani, quorum Respublica ex latitudine domini felicitatem suam æstimabat, sancta religio- sè sœdera, cum dilatando imperio obsrarent, callidis in- terpretationibus corrumpabant, uti & nunc Turcæ faciunt.

Probatur 1. Felicitas omnem sollicitudinem & me-  
B 2 rum

## 28 Tertiae Partis Philosophiae. Qu. I.

tum abigere debet : Sed potestas animum potius innu-  
meris curis & pavoribus lancinans , ut egregiè indica-  
vit Dionysius Siciliae Tyrannus ; se ipsum computando  
homini inter lautissimas dapes epulanti , cujus capiti gla-  
dius tenui filo vix reteritur , & tantum non cadens im-  
penderet : Ergo potestas non felicem , sed miserum ho-  
minem efficit , ut de Curru Solis Imperito Phaetonti com-  
cesso ait Ovidius :

... . Hoc vero nomine pona,  
Non honor est .

Quod etiam egregiè Boetius 3. de Cons. his verbis ex-  
pressit : *Potestas sollicitudinum morsus expellere , formidi-  
num aculeos vitare nequit . Felicem censes , cui Satellites  
latus ambiunt , qui quos terret , ipse plus metuit ?*

2. Potestas se habet per modum principis procurantis  
felicitatem alienam ; dat enim jus applicandi alios , &  
insistenda est , ut dicit Apostolus , à Deo propter bonam  
Reipublicae , malorum punitionem , bonorum protec-  
tionem : Ergo ipsa non est felicitas , sed potius medium  
quadamtenus inserviens felicitati .

3. Felicitas firmat hominem in bono : Atque potestas  
se habet indifferenter & ad bonum , & ad malum , ut  
patet in bonis & malis Principibus : Ergo non constituit  
felicitatem .

4. Vel principes abutitur potestate , vel bene utitur .  
Si abutatur , dominium est ei mulpula , & certissimae  
ruinae occasio ; ut patet in Tarquinis , Caesaribus , Dio-  
nysiis , &c. Si verò bene utatur , dominium est ipsi labor  
& onus , ut patet in Moyse , Lycurgo , Solone , Cedro ,  
&c. Vulgus tamen princeps putat felices , quia videt  
solum exteriorem splendorem . Qui verò secretum cordis  
norunt , infelicissimos reputant , & veluti ea Antiquo-  
rum simulacra , quae exterius anrum erant , interius ve-  
rò lutum . Hinc contemptus regni apud sapientes fre-  
quens , ut patet in Numa Pompilio , qui non nisi per  
vim regnum suscepit ; Anacharsi Scythae , qui Philoso-  
phiam regno anteposuit , idque ut sexcentos alios mit-  
tam .

Præter has rationes , quatuor aliae generales expendi  
possunt ex D. Thoma 1 2. q. 2. art. 4. ad probandum in nul-  
lo præfatorum consistere felicitatem .

1. Fc.

## De Felicitate Objectiva. Art. II. 29

1. Felicitas excludit omne malum, ideoque non nisi in virum bonum cadit: Sed divitiæ, honores, gloria, & potestas, sunt munera cæcæ fortunæ, malis sæpius, bonis rariùs concessa: Ergo non constituunt veram felicitatem.

2. Felicitas sola homini sufficit. His autem demptis plura defunt, ut sanitas, robur, scientia, virtus.

3. Ex beatitudine nemo fit pejor. Ex his verd plures deteriores evadunt. Honores enim mutant mores, ut patet in Hellogabalo, Tiberio, &c. Divitiæ sæpe cedunt in malum possessoris sui, ut videre est in Cræsa, Crasso, Romanis, & Lacedæmoniis, quorum urbes paupertas excoluit, ac servavit, opes verd perdidierunt. Principatus etiam est sæpe causa ruinæ & mortis, ut patet in Julio Cæsare, & omnibus ferè Cæsaribus. Gloriæ demum, seu famæ amor sæpe ad peccatum inducit, ut videre est in Lucretia, quæ quanvis maximè pudica, ne tamen servili concubitu falsò infamaretur, vero consensit adulterio: & Empedocles, ut Deus haberetur, in Ætnæ voragines se sponte præcipitem dedisse fertur.

4. Tandem felicitas consistit præcipuè in bonis stabilibus & internis animæ, quæ dignior hominis pars est. Prædicta verd bona solum externa sunt, arbitrio instabilis fortunæ versatilia, &, ut inquit apud Livium experrus Annibal, *innumeris casibus subiecta*. Unde plures prolapsi sunt ex principatu ad servitutem, ut Sedecias, Manasses, Perseus, Bajazeth, &c. E divitibus ad summam paupertatem, ut Belisarius, Cræsus, & Crassus ille, cui cùm pecuniæ magnitudo locupletis nomen dedisset, inopia decastris superlationem injunxit: Itaque, inquit Valerius Maximus, *turpi sigillatione non caruit, quia cùm egeus ambularet, divites ab occurrentibus salutabatur*. E summa fama ad insignem ignominiam, ut Aman, & Sejanus. E florentissimis honoribus ad statum servilem, ut Dionysius Siciliæ Tyrannus, Annibal, &c. Unde pereleganter Valerius Maximus lib. 6. cap. 9. *Caduca nimium hac fragilia, puerilibusque consentanea crepundia sunt, qua vires, atque opes humana vocantur. Assuunt. subitò, repentè dilabuntur; nullo in loco, nulla in persona stabilibus nexa radicibus consistunt, sed incertissimo statu fortuna hac, atque illuc alia, quos in sublime extulerant, improviso cursu destitutos, profundo cladium miserabiliter immergunt*. Unde jure concludit. *Itaque neque existimari,*

### 30 Tertiæ Partis Philosophiæ. Qu. I.

neque dici debent bona, quæ ut insistorum malorum amaritudinis desiderium sub duplicent, propensiore favore delinquentes, majore potestate malorum cumulo opprimere solent. Haberi ergo ad summum possunt, ut ex se indifferentia; quippe quæ, ut sapienter dixit Terentius Heautontimorumenos. Act. 1. Scen. 2.

... Perinde sunt, ut illius animus, qui ea possidet.

Qui uti scit, ei bona; illi, quæ non utitur rectè mala.

## QUINTA CONCLUSIO.

**I**N voluptatibus corporis, immò in nullo corporis bono vera felicitas consistere potest.

Conclusio est contra Libertinos, qui animam immortalem, immò spirituales negantes, solâ bonâ corporali agnoscunt & sectantur; quod idem, saltem in praxi, sequitur pravorum vulgus, præcipuè illi, quorum Deus venter est. Idem tenuisse videntur Epicurei, cum & ipsi animam corporalem, mortalemque assererent: immò & Mahometes paradysum suum ex gulæ, tactûsque voluptatibus seditione confingens.

Cæterum hic error non tam rationibus impugnandus esset, quàm sinceris descendens lacrynis. Nam quis, quæso, sicis oculis recogitet hominem paulò Angelis minorem creatum, ad imaginem Dei factum, intellectu, quo nihil sublimius, capacius, ac excellentius in rebus est, præditum, ita brutescere, ut generosæ illius, divinæque scintillæ ad æterna & divina bona innato quodam impetu se se surrigentis ardore, ac vigore oppresso, porcorum siliquis, id est, abjectissimis, pecudibusque concessis delitis, tanquam summo bono turpissimè inhiet. Verùm, ne quælibet solum res agatur.

Probatur conclusio rationibus. 1. Felicitas consistere nequit in perfectione rei ulteriùs ordinatæ: Sed corpus ordinatur ad animam sicut instrumentum ad artificem, materia ad formam, servus ad dominum: Ergo felicitas consistere nequit in perfectione corporis. Minor pater. Major etiã ex eo constat, quòd felicitas est ultima ho-

mi-

## De Felicitate Objectiva. Art. II. 31

minis perfectio, quæ proinde debet illi competere secundum præcipuam partem, & ad aliam nobiliorem non ordinatam.

2. Felicitas debet satiare omnem hominis appetitum: Sed bona corporalia non satiant omnem hominis appetitum: Ergo felicitas in eis non consistit. Major patet ex supra dictis. Minor etiam certa est, Cum enim duplex sit in nobis vis appetitiva, intellectiva scilicet & sensitiva, bona corporalia satiant solum sensitivam.

universale, & tempore non circumscriptum, apprehendat bonum nam ac stabile, non potest quietari ejus appetitus bonis particularibus & extemporaneis: Sed bona corporalia sunt admodum instabilia, & cum sint infima in rerum ordine, non nisi dispersam, divisam, diminutam, particularemque bonitatem capiunt: Ergo in illis felicitas hominis esse non potest. His rationibus utitur D. Thomas 1. 2. q. 2. a. 5. & Opusc. 2. p. 2. c. 9.

Confirmatur præcipue quantum ad voluptates corporales. Tum quia torpes sunt, & de quibus homo naturaliter erubescit. Tum quia, cum ut plurimum sine crimine non gustentur, relinquunt post se amaros poenitentiae aculeos: unde Boetius 3. de Consolat. Prosa 7. *Tristes, inquit, exitus esse voluptatum, quisquis reminisci suorum libidinum valet, intelligit*, & Apostolus ad Rom. 6. *Quem fructum habuistis in illis, in quibus nunc erubescitis?* Tum demum quia nec adesse possunt omni tempore, nec diuturnæ esse queunt, nec animum unquam expleant, sed, dum habentur; fastidium sui afferunt, & dum usque ad satietatem percipiuntur, corpus labefaciunt, mentis lumen & vigorem extinguunt, gravissimisque incommodis usuram sui dividentes, vehementius affligunt, quam delectaverint, ut de voluptuoso jure dixerit Augustinus Psal. 36. Conc. 1. *Etsi semper sic esset, plangendus esset.*

Adde tandem, quod, ut inquit Boetius, si voluptates, cæteraque corporis bona beatos efficere possent, nihil causa esset, quin pecudes quoque beatæ esse dicerentur; immò beatiores hominibus, cum à multis brutis homo his in bonis superetur: ut ab Elephantæ in diuturnitate vitæ; à Leonibus in fortitudine; à Cervis in velocitate; & ne singula attingam, ab omnibus ferè in sanitate, quippe cum corpus hominis & frequentioribus &

### 32 Tertiæ Partis Philosophiæ Qu. I.

gravioribus morbis urgeatur, quàm corpora pecudum. Immo voluptates corporis puriores, sincerioresque animalia, quàm nos, capiunt; utpote quas nec infatiabilis aviditas insufficientes efficit, nec verecundia turpes, nec pœnitentia amaras, nec nimietas fastidiosas, nec sollicitudinum, curarum, timorum impotenna commixtio ingratas: Ergo vel dicendum, bruta esse hominibus feliciora, quod nullus, quantumvis brutalis, admitter; vel felicitatem in corporeis bonis minimè repositam esse.

præter naturam tam ardentem voluptatis, bonique sensibilis sitim hominibus indidit, si illa ad veram felicitatem non juvant, immò impedimento sunt: Videmus enim, hominem alacri impetu naturaliter currere ad voluptates, bonaque sensibilia; ad honesta verò & spiritualia cogi magis, quàm tendere.

-Resp. Hominem etiam naturæ instinctu præferre bona animi bonis corporis; neque enim vel ipse Epicurus, quam se habere putabat sapientiam & virentem, sensibilis voluptatis pretio vendere voluisset. Immo nec voluptatem sensibilem probat, nisi temperatam ratione, id est, nisi aliquis in ea boni honesti splendor etuceat. Unde ejus nomine pronunciat Torquatus apud Ciceronem lib. 1. de Fin. *Non posse fœvundè vivi, nisi sapienter; honestè, insèque utatur.* Quodd igitur spreis animi, rationalisque bonis plerique hominum voluptari se totos dedant, in causa est non naturæ inclinatio, sed vel ignorantia, vel desperatio, vel rationis infirmitas. Quatenus animi bona, aut ignorantes, aut assequi desperantes, aut certè contra voluptatum illecebras tenere non valentes, ad bona corporis, quæ quotidie experiuntur, & in promptu se habere putant, quorumve blanditiis æget & puerilis eorum animus fallitur, totum suum impetum melioribus destinatum convertunt: ideoque illa vehementiore aviditate arripiunt, quàm pecudes ipsæ. Et cum in eis minimè reperiant bonitatem ardori, ac spei suæ respondentem, conantur copiam saltem compensare umbrarilis bonitatis inanitatem. Hinc illa libidinum portenta ad insaniam & furorem usque prorumpentia. Atqui non id naturæ consilium fuit, cum necessaria mortalitati nostræ officia voluptate quadam condivit; sed potius horum laborem hoc lenimento mollire, nosque ut pueros blanditiis ad illa exercenda adhortari, inditè interim ratione, quæ



## *De Felicitate Objectiva.* Art. II. 33

quæ & modum adhiberet, & nos melioribus genitos non debere languidarum instar pecudum hisce tam vilibus delectationibus inhærere admoneret.

### SEXTA CONCLUSIO.

**E**TIAM virtus ad felicitatem pertineat, attamen in ea non est perfecta hominis felicitas. Conclusio est contra Stoicos.

Probatur 1. Via distinguitur à termino: Sed virtus est via ad felicitatem, cum dirigat affectus hominis ad eam consequendam: Ergo non est ipsa felicitas. 2. Felicitas est premium virtutis: Ergo non est ipsa virtus. 3. Denique virtus non satiat appetitum hominis, sed solum ipsum rectificat. Unde homo etiam perfectâ virtute præditus, ad bona intelligibilia ulterius suspirat: Ergo non reddit hominem perfectè felicem.

Quantum autem spectat ad sententiam superius relata, quæ felicitatem collocabat in tranquillitate, pacatione, aut imperturbabilitate animi, eam fusius impugnare non est necesse. Nam vel sumit hanc pacationem, tranquillitatem, imperturbabilitatem merè privativè, pro carentia passionum immoderatarum animam agitantium. Et hoc modo in his felicitas nequit consistere, quia non est mera mali carentia, sed bonum summum: unde sicut eradicatione noxiarum herbarum non est finis agriculturæ, sed solum quædam preparatio ad finem; ita nec passionum sedatio est felicitas hominis, sed quædam ad felicitatem dispositio. Si verò hæc tranquillitas sumatur propositiva quiete animi in ultimo bono, non solvit quæstionem: nam ulterius determinandum superest, quodnam sit illud tam perfectum, tam immensum bonum, in cujus possessione felix animus perfectè quietatur.

## C O N C L U S I O.

*Felicitas Hominis in solo Deo consistit.*

**C**onclusio intelligenda est de Felicitate Naturali, de qua Veteres Philosophi duntaxat solliciti fuerunt; de Supernaturali enim dicere ad Philosophum nihil attinet, qui non ex revelatis, sed ex lumine naturali notis ratiocinatur. Porro sequitur ex his, quæ præcedenti §. dicta sunt: Cum enim, ut ostendimus, nullum bonum imperfectum, diminutum & particulare possit plenam hominis felicitatem constituere, vel negandum est, hominem posse esse perfectè felicem; vel surrigenda est altius cogitatio ad illud sublime, plenum, redundansq; bonum, in quo tanquàm in fonte bona creata continentur. Unde non solum apud Christianos Philosophos certa est, sed etiam ab Antiquorum quamplurimis, quantumvis lumine fidei destitutis, non obscurè fuit tradita. Nam, ut innuit D. Augustinus 8. de Civit. Dei, cap. 9. in eam sententiam quadantenus consensisse videntur Pythagoræ, Arhantici, (id est, Antiquissimi illi Philosophiæ Cultores Platoni non semel memorati) Ægyptii, Indi, Persæ, Chaldæi, Scythæ, Gallorum Druidæ, Hispani, &c. Sed eodem sancto Doctore annotante, tum ibidem cap. 4. & 8. tum Epistolâ 56. nulli luculentius, apertius, animosiusque hanc sententiam afferuerunt, ac propugnarunt, quàm Platonici, quorum princeps Plato nihil frequentius inculcat, quàm Deum esse totius pulchritudinis pelagus, *cujus participatione homo sit beatus, dum scilicet illo fruatur, non sicut amicus amico, sed sicut oculus luci*, id est, clarissimâ contemplatione; ut refert idem sanctus Doctor, adeo ut non immeritò de Platoniciis dicat: *Nulli nobis, quàm isti, propius accesserunt.*

Probatæ primò ratione, quam habet D. Thomas 1. 2. quæst. 2. art. 3. Felicitas est bonum adeo sufficiens &

pe-

## De Felicitate Objectiva. Art. II. 35

perfectum, ut in eo quiescat & satiatur appetitus : Sed in solo Deo quiescere, ac satiari potest appetitus humanus : Ergo solus Deus est felicitas hominis. Major constat. Ut enim supra ostensum est, felicitas est ultimus finis, ultra quem appetitus nequit se extendere, sed in quo satiatus quiescit. Minor verbò probatur. Appetitus humanus in eo dumtaxat bono satiatus quiescere potest, in quo tanquam in fonte, ac universalia bonitatis pelago cætera imperfecta & particularia bona colliguntur : Atqui solus Deus est illud immentum & universale bonum, in quo alia tanquam in fonte, pelago, centroque bonitatis comprehenduntur, quippe cum ab illo in varios dispersa rivulus effluerint : Ergo in solo Deo quiescere, satiarique potest appetitus humanus. Minor patet. Major declaratur ex ipsa ratione voluntatis humanæ, quæ cum sit capax omnis boni, quemadmodum & intellectus omnis veri, bonis particularibus expleri non potest, sed illis superior ita dominatur, ut possit vel repudiare, quæ parte insufficientia sunt; vel, si libeat, amare, quæ parte aliquid bonitatis obtinent : unde summa desideriorum ejus ab iis nimium angustis rivulis sitibundo ardore ulterius fertur, ad ipsum scilicet fontem boni, quo solo vastissimus desideriorum ejus hiatus impleri potest, quo obtento necesse est, ut satiata plene quiescat : quia cum in eo sit omne bonum, quod appetit, & in eo nihil sit mali, quod fugit, ab eo recedere nequit; immò in eo consistat necesse est. Unde acutè dixit Cajetanus, à Deo possessio voluntatem averti non posse, *quia ab ejus immensa bonitate undique circumdatur.*

Scilicet, ut præclarissimo effato simili & rationi sua lux afferatur, voluntas nostra est quasi punctum à quo infinitæ desideriorum lineæ quoquoersum procedere possunt; Divina verbò Bonitas est tanquam circumferentia in se principium, finemque bonitatis conjungens. Ut ergo à puncto in centro defixo, quamquam infinitæ lineæ duci possint, nulla tamen est, cui circumferentia non occurrat, ita quoque dum voluntas humana in possessione Dei stabilietur, ita ab ejus immensa bonitate undique circumdabitur, ut quamquam non secus, ac antea, infinitas desideriorum lineas à se procedere possit, omnibus tamen illis oc-

### 36 Tertiæ Partis Philosophiæ.Q.I.

curret Divina Bonitas, tanquam illud bonum, in quod tendunt, perfectissimè continens, ideoque omnes voluntatis motus plenissimè terminans, quod proprium felicitatis munus est.

Probantur secundò aliâ ratione, quæ videtur à Platonici deprompta, quæ videtur Divus Thomas in suppl. quæst. 92. art. 1. Ultima perfectio rei cujuscunque, proindeque ultimus finis, est in conjunctione ad suum principium: Atque Deus immediatè est principium animæ rationalis & potentialium ejus: Ergo ultima perfectio animæ, voluntatisque rationalis, proindeque felicitas ejus, est in conjunctione ad Deum, ut scilicet ei adhæreat suo modo, nempe per intellectum & voluntatem. Minor constat ex his, quæ in Physica diximus. Major declaratur tum inductione, tum ratione. Inductione quidem: nam videmus, omnia nunc perfecta, suoque modo beata esse, cum ei junguntur & adhærent, à quo tanquam proprio principio suum esse trahunt; à quo dum avelluntur, aut omnino pereunt, aut non nisi aegre subsistunt. Sic quia influxus cœlestis est elementorum principium, terræ quidem, quatenus viget in centro; ignis verò, quatenus viget in circumferentia; aliorum autem, quatenus viget in medio, quod est inter centrum & circumferentiam, ideo terra fertur ad centrum, ignis ad circumferentiam; alla ad medium; ut sic suo reddita principio quiescant, ac pro modulo suo felicia consistant. Sic quia Cor est principium spirituum vitalium; & Cerebrum animalium, utrique tunc perfectè se habent, dum illi Cordi, illi Cerebro conjunguntur; interruptâ verò cum illis fontibus communicatione, deficiunt; ac tandem corrumpuntur. Et demum, ne plura memorem, sic plantæ, quarum principium est genialis Solis calor, suo vertice adeo avidè lucem, influxumque illius astri quærunt, ut circumstantibus corporibus obrutæ, ac ab aspectu Solis prohibitæ, gracilem truncum tandiu extendant, donec emergentes in apertum, Solis luce liberè frui possint: unde amor, quo suam perfectionem cuncta cupidè quærunt, nihil aliud est, quàm inclinatio redeundi ad suum principium, seu, ut loquitur Dionysius, *circulus à bono in bonum revolutus*. Quod eleganter expressit Boetius lib. 4. de Consol. his verbis:

*Hic est cunctis communis amor,  
Repetantque boni sine teneri;  
Quia non aliter darare queant,  
Nisi conversus rursus amore,  
Resuant causa, qua dedit esse.*

Ratione quoque idem suadetur: Etenim ut qualibet res est per aliquam participationem sui principii, ita quoque perfectè est per participationem perfectam illius; ut enim fert axioma, *sicut se habet simpliciter ad simpliciter, ita secundum quid ad secundum quid*: Sed tunc res perfectè participat principium suum, cum ei perfectè coniungitur, ut patet: Ergo habet esse perfectum, seu suam ultimam perfectionem, per conjunctionem perfectam ad suum principium. Quod præcipuè locum habet in Spiritualibus Creaturis, quæ cum à Deo habeant esse, intelligere, & velle, tunc solam ultimam suam perfectionem obtinere possunt, cum et, quantum naturaliter fieri potest, adhærent, in qua, ut ait D. Augustinus lib. 8. de Civit. Dei, cap. 5. *invenitur & causa subsistendi, & ratio intelligendi, & ordo vivendi, seu volendi, sine quo, ut idem ait cap. 4. nulla natura subsistit, nulla doctrina instruit, nullus usus expedit*. Unde merito concludit, perfectionem hominis in eo sitam esse, ut ipse quæatur; ubi nobis secunda sunt omnia; ipse cernatur; ubi nobis certa sunt omnia; ipse diligatur, ubi nobis recta sunt omnia.

Probatur deum tertio ratione D. Augustini Epistol. 36. circa medium, ubi sic discutit: *Eo fruendo quisque deus est, propter quod cetera vult habere, cum illud non propter aliud, sed propter se ipsum diligatur. Et ideo finis ibi dicitur, quia iam, quid excurrat, & quid referatur, non invenitur; proindeque ibi regulæ appetendi, ibi fruendi securitas, ibi tranquillissimum gaudium optima voluntatis*. Atqui solus Deus est illud tam eximium bonum, quod non propter aliud, sed propter se ipsum est amabile; cætera verò bona sunt propter ipsum amabilia, quatenus scilicet de illo participant, & in ipsum ducunt: Ergo solus Deus est illud bonum, cuius fruitione homo felix fieri potest.

His omnibus adfici potest experientia: nam videmus,

Cor humanum nullis finitis bonis expleri, sed quanto uberius illa affluunt, tanto amplius ipsum dilatarì, & cum copia commoditatum crescere desideria. Quis cumulator fortunæ, corporis, animique bonis, quàm Alexander magnus? Sed quis avidior? quis inquietior? Id sanè illustre argumentum est, Cor humanum infinito cuidam bono, ut fini suo ultimo, destinatum esse; Ideoque minoribus satiari non posse. Unde peregre S. Augustinus 2. Confess. cap. 1. *Fecisti nos, Domine, ad te; & inquietum est cor nostrum, donec perveniat ad te.*

Objc. 1. Discrimen servari debet inter felicitatem naturalem, quæ viribus naturæ naturali auxilio adjunctæ acquiri potest, & felicitatem supernaturalem, quæ solius gratiæ auxilio potest obtineri: Sed Deus est supernaturalis felicitas hominis: Ergo naturalis ejus felicitas in Deo non consistit, sed minori bono infra Deum.

Respond. Deum esse felicitatem hominis tam in ordine naturæ, quàm in ordine gratiæ, cum ipse sit ultimus finis non solum gratiæ, sed etiam naturæ; cui proinde immediate conjungi debent creaturæ in rerum vertice positiæ, quales sunt substantiæ intellectuales, ut felices sint; quippe cum cætera bona sint infra ipsas, ideoque illas ultimò perficere, ac satiare nequeant: unde acutè S. Augustinus 8. de Civit. cap. 4. adverrit hominem (& idem dicendum de alijs substantiis intellectualibus) inter alias creaturas præcellentem ita creati debuisse, *ut per id, quod in eo præcellit, attingat illud, quod cuncta præcellit.* Unde ordo gratiæ, & ordo naturæ in eo duntaxat differunt, ut cum uterque in Deum tendat, non tamen æquali modo & perfectione illum attingant. Cum enim Deus dupliciter possideri possit, eo scilicet modo, quo se ipsum possidet amando & cognoscendo, & alio inferiori modo viribus naturalibus creaturæ intellectualis accommodato; gratia, quæ est Divinæ Naturæ, ut in se est, participat, tendit ad fruendum Deo, eo prorsus modo, quo ille se ipso fruitur; id est, videndo ipsum, ut est in se, percipiendo speciem, qua se ipsum videt; amando illum charitate aliquâ ejusdem, quantum creaturæ conditio patitur, ordinis cum ea, qua se ipsum amat; & demum fruendo ineffabili quadam societate vitæ, qua ipse vivit. Natura verò in ipsum obtinendum modo longè inferiori tendit, cognoscendo scilicet cognitione perfectissimâ intra.

## De Felicitate objectiva. Ar. II. 39

tra eas, quæ de illo viribus naturæ & speciebus naturalis ordinis haberi possunt; amando amore, non quo se ipsum amat, sed quo maximo voluntas creata per sua naturalia potest; & demum adhærendo illi non per modum elevationis ad consortium viræ, ac regni ejus, sed per tranquillam subjectionem ut optimo ac maxime benefico & amico substantiarum spiritualium principi.

Objic. 1. Finitas rei non debet correspondere nisi finitum bonum: Sed homo & appetitus humanus est quædam res finitas: Ergo summum hominis bonum non est, nisi aliquid finitum, non verò Deus infinitus.

Respond. Cum Divo Thoma, tum 1. 2. quæst. 2. art. 8. ad 3. tum pluribus aliis in locis, distinguo minorem: Appetitus hominis est finitus subjectivè, concedo; objectivè nego. Et similiter distinguo consequens: Ergo summum hominis bonum est aliquid finitum, subjectivè, concedo; objectivè, nego. Bonum subjectivum est, ut explicat Divus Thomas, *cujus homo est capax, ut res intrinseca, & inharerentis*. Bonum verò objectivum est illud, quod tanquam ad suum objectum attingere potest. Quamvis autem nihil infinitum inharere possit homini, attamen aliquid infinitum ab eo tanquam objectum attingi potest. Cum enim intellectus sit veri in communi, & voluntas boni universalis, illud præcipuè à voluntate & intellectu attingi potest tanquam objectum, in quo ratio boni & veri perfectius reperitur: illud autem est aliquid infinitum, scilicet Deus; & ideo etiam in Deum tanquam in objectum voluntas & intellectus hominis ferri possunt.

Instabis. Inter objectum & potentiam debet esse proportio: Sed inter Deum & potentias hominis nulla est proportio: Ergo potentia hominis non possunt tendere in Deum ut objectum. Probat minor. Finiti ad infinitum nulla est proportio: Sed Deus est infinitus, potentia verò hominis sunt quid finitum: Ergo, &c.

Respond. Nego minorem: Ad probationem distinguo majorem: Inter finitum & infinitum nulla est proportio, quantitativa & commensurationis, concedo; objectiva & habitudinis, nego. Quamvis enim res finita non possit comparari Deo infinito secundum aliquem determinatum excessum, quæ est propria quantitatum proportio, potest tamen dicere habitudinem ad Deum ut ad suum prin-

# 40 Tertiæ Partis Philosophiæ. Qu. I.

principium, vel objectum. Solutio est D. Thomæ in Supplementum. q. 92. ar. 1. ad 6.

Dici præterea posset, inter finitum & infinitum modo infinito actum non posse quidem esse proportionem, bene tamen finito modo actum. Res enim, quæ attingitur se habet quasi materialiter; modus autem attingendi formaliter; & ideo potentia finita potest tendere in Deum, ut objectum finito modo attingendum.

Objic. 3. Felicitas debet satiare appetitum: Atque Deus naturali lumine cognitus, quantum scilicet relinere potest in speciebus creatis, non satiat, sed potius excitat appetitum ad quærendam cognitionem ejus ut est in se; ut enim ait Divus Thomas 1. part. quæst. 12. art. 1. *Naturale est hominis visis effectibus, & ex illis cognita causâ, desiderare videre causam in se ipsa, nec quiescit donec ipsam ejus essentiam clarè videat*: Ergo Deus naturali lumine cognitus non est naturalis felicitas hominis.

Respond. Distinguo majorem: Felicitas debet satiare appetitum, quantum ad desideria inefficacia & impossibilia, nego; quantum ad desideria efficacia, concedo. In naturali autem beatitudine appetitus excitatus ad videndum Deum ut est in se, & eo modo, quo se ipsum videt, non est efficax; quia non est possibile, ut per sua naturalia intellectus videat Deum: unde ut homo sit naturaliter felix, non est necesse, ut tale desiderium expleatur, sed id reservatur beatitudini supernaturali, quæ idcirco vocatur Lucæ 6. *mensura bona, & conferta, & coactata, & superfluenta*, quod omnia omnino desideria non modo satiet, sed etiam excedat.



ARTICULUS TERTIUS.

*De Felicitate Formali, seu de ademptione  
illius rei, qua sumus felices.*

**C**onstat igitur, non tantummodo, ampliusque inclinationem sortitum esse, ut nullo creato bono expleri, sed solo Deo satiarì possit, proindeque tam, qua felices sumus, esse ipsum Deum. Nunc superest, ut discutiamus, quo pacto fiat illius tam eximii boni adeptio; atque id quidem tribus conficiemus paragraphis. In primo quæremus, in quo statu fiat illa felicissima adeptio Dei, an in præfenti vita, an in altera. In secundo dicemus speciatim aliquid de Felicitate hujus vitæ. In tertio demum latè discutiemus, in qua operatione consistat essentialiter Felicitas formalis.

S. L

*An Homo Felicitatem suam adipisci, cōtinereque  
possit in hac vita, vel solum in altera,  
cū scilicet anima fuerit à cor-  
pore separata.*

**Q**uæstio minimè nobis hæc est cum illis, qui errore toti humano generi maximè injurio animum hominis mortalem fecere, quique proinde putarunt, omnia hominis bona per mortem finire; sed solum cum his primæ notæ Philosophis, qui duplicem animæ statum asseruerunt, alterum conjunctionis cum hoc mortali corpore, alterum separationis. Et quidem Aristoteles ultra sensibilia vix sese efferens, cum hanc quæstionem moveat 1. Ethic. cap. 11. *Vivens, an mortui, ut Solon voluit, beati sint dicendi?* In primis ita exponit, Solonem, quasi duntaxat voluerit, felicitatem hominis, quandiu vivit, incertam & timoribus malorum futurorum obnoxiam esse; ideoque

## 42 Tertia Partis Philosophiæ. Qu. I.

nullum, quandiu in tam periculosa alea versatur, debere beatum dici; sed expectandum virgæ diem supremum tanquam cæterorum arbitrum, quo prosperè transacto, tum quisque beatus existimandus est, non quodd tunc beatus sit, sed quodd antea fuerit; in quo sensu acceptam Solonis sententiam egregiè impugnat. Deinceps verò adstruere conatur, etiam in hac vita hominem posse esse felicem, non perfectè quidem & omnibus numeris, *sed ut hominem*, id est, in quantum mortalitatis conditio paritur. *Quarum de statu Animæ post separationem altum apud eam silentium est*, nec aliud in hoc eâ de re innuit, nisi *res futuræ nobis esse incertæ*, viderique *res nostras ad mortuos non nibil pertinere, sed ita & tantum*, ut neque beatos non beatos efficiant, neque quidquam aliud tales unde ut advertit D. Thomas in 4. Dist. 49 q. 1. art. quæstionc. 3. *Felicitatem, qua est post hanc vitam, nec asseruit, nec negavit*. At verò Plato sublimis ingenti acieni à sensibilibus ad spiritualia, à temporalibus & fluxis ad æterna & immutabilia erigens, apertè animosèque adstruit, veram felicitatem non nisi post separationem à carne obtineri posse, nec nisi per paucos in hac mortali vitæ futuræ huiusce felicitatis prælibatione quadantenus felices esse potest: quam sententiam deinceps Platonici secuti sunt, & inter Antiquos ante illum docuerat Pythagoras egregiis hîsce carminibus.

*Optima mens animi fac ut moderetur habenas;  
Tum corpus linguens tranabis in æthera apertum,  
Immortalis erit Deus, ampliùs baud mortalis.*

Pro huiusce difficultatis resolutione, ut in Platonis, Aristotelisque hac de re sententiæ concilientur, sit

### PRIMA CONCLUSIO.

**P**erfecta beatitudo, etiam naturalis, obtineri nequit in hac vita, sed reservatur alteri meliori.

Prima pars est D. Thomæ 1. 2. q. 5. ar. 3. & D. Augustini lib. 19 de Civit. cap. 5. ubi eam fusè probat, præcipuè ex miseris, quibus homo, quandiu vivit, opprimitur. Hanc etiam docuerunt, non solum Socrates & Plato, sed antiquissimi quoque Philosophi, ut Parmenides & Trismegistus; qui etiam corpus, in quo vitam hanc agimus, vocat *sepulcrum portatile, indumentum pravitatis & ignorantia, vinculum corruptionis, sensitiuum cadaver*, ita ut non im-

me-

## *De Felicitate Formali. Art. III. 43*

merito Euripides in hanc sententiam dixerit, *Quis scit, an vivi sint mortui, & mortui vivi?*

Probarur itaque 1. Ex miseriis, quibus hæc vita subjacet: sed hoc argumentum experientia satis urget.

2. De ratione felicitatis perfectæ est, ut sit stabilis & inamissibilis: Sed nullum bonum in hac vita est stabile & inamissibile; nam & virtus, quandiu vivitur, obnoxia est vitio propter humani arbitrii versatilitatem, & scientiæ per oblivionem corrumpuntur; cætera verò minora bona, ut sanitas, opes, &c. majori adhuc inconstantia versantur: Ergo felicitas, in quacunque re tandem collocetur, in hac vita perfectè obtineri nequit.

3. Felicitas consistit, ut supra dictum est, in Deo. Sed quandiu vivimus, Deo perfectè conjungi non possumus; quippe cum corpus, quod corrumpitur, aggravet animam, & sensibilibus addictus intellectus nequeat satis ad Divina assurgere: Ergo felicitas in hac vita nequit saltem plenè obtineri.

4. Perfecta felicitas est præmium virtutis, requies laboris, vitæ terminus: Sed in hac vita satis digna præmia virtutis non rependuntur, sicut nec vitæ supplicia; nec datur ulla stabilis requies à laboribus, quos boni contra vitia pugnando subeunt; nec unquam terminatur intellectualis vita, cum semper aliquid novi ad discendum, & aliquid mali emendandum occurrat: Ergo in hac vita felicitas humana perfectè haberi nequit.

5. Felicitas in eo sita est, ut homo perfectè obtineat bonum intelligibile, cujus est capax, sicut felicitas oculi consistit in eo, ut perfectè fruatur bono visibili: Atqui quandiu sumus in corpore bonum intelligibile, scilicet veritas, non nisi admodum imperfectè, umbraticè, & cum infinitorum errorum mixtione obtineri potest: Ergo in hoc mortali corpore perfecta felicitas haberi nequit. Minor patet tum ipsâ experientiâ, qua videmus, humanum ingenium mirè caligare, non solum erga Divina, ad quæ, inquit Aristoteles, sic habet ut oculus nocturnæ ad Solem sed etiam in ipsis naturalibus. Tum ratione; nam omnis nostra cognitio oritur à sensibilibus, quæ non sunt nisi umbræ eorum, ut observavit Plato: unde  
dies

#### 44 Tertiæ Partis Philosophia. Qu. I.

diei nostri non solum sicut umbra transeunt, sed etiam inter umbras aguntur; propter quod dicit Propheta Psal. 38. *In imagine hominem pertransire*, ut interpretatur D. Thomas; ideoque hæc vita comparatur somno, in quo umbræ inanisque imagines pro rebus apprehenduntur: Ergo perfecta veritatis notitia nequit haberi in hac vita, sed ad summum ex his sensibilibus homo duntaxat ea cognoscere potest, non quorum cognitione sit perfecte felix, sed quibus se dirigere, ac erigere possit ad beatitudinem cupiendam, quærendam, obtinendam.

6. Denum idem suadet ex egregio discrimine, quod statuit D. Thomas inter Angelum & Hominem, quale cernitur inter cœlestia corpora & sublunaria. Nam ut illa suam naturalem perfectionem in sua productione statim sortita sunt, illa verò per morum ducuntur ad perfectionem suam successivè proficundo; sic Angeli statim in sua productione omnem naturalem perfectionem, ac proinde beatitudinem naturalem obtinuerunt; at verò Homo, ut ad illam perveniat, motu quodam eget & longiusculâ viâ, quæ est ipsa vita, quam agimus, qua ad seculum intelligentiarum, id est, ad ipsam veritatis intellectuâlisque luminis patriam, pergitur: Ergo in vita felicitas consistere nequit, sed solum viâ ad felicitatem.

Secunda verò pars est de Fide, quantum ad felicitatem supernaturalem; quantum verò ad naturalem, de qua sola nobis sermo est, eam D. Thomas in pluribus locis insinuat, ferèque eadem rationes probant, quas pro felicitate supernaturali adducit. Inter Antiquos verò cum Aristoteles, ut supra ex D. Thomas notavimus, rem indecisam reliquerit, Plato eam acerrimè semper adstruxit cum Pythagora, Trismegisto, pluribusque aliis; præcipuè verò in Phædone & libris de Repub. ac legibus, ubi ait: *Quid cum à vita decesserimus & si modò purgati exeamus, tunc verum ipsum, & id, quod οὐτως, id est, verè est Deum videlicet, intuentes, fruamur re tantopere nobis concupitâ, hoc est, veritate, ac verum omnium cognitione. Itaque sicut oculo virtus, manusque nullum est, si lux absit, ipseque in tenebris agens sempiterno marore consumitur; si verò accedat Sol ipse rebus, fungitur vi & vitâ suâ, magnoque cum gaudio spectat & agit: sic intellectus noster*

cor.

## De Felicitate Formali. Art. III. 45

*corpore solutus, si desit ei lux veritatis, Deus scilicet, torpeat, mareatque necesse est; si adsit, latetur, ac fruatur ea luce, in qua insunt viva, expressaque rerum omnium species: quo fit, ut felicitas nostra sita sit in perfecta pura sapientia Divini luminis assecutione. Quid præclarius à Viro fidei lumine non illustrato potuit de futura illa felicitate prædicari?*

Probari autem potest. Primò, quia felicitas debet esse præmium virtutis, sicut è contra summa miseria victiorum pœna, ut sic benè se habeat respublica Mundi, dum à supremoejus Moderatore malis pro supplicio miseria, bonis verdè pro præmio felicitas rependitur. Cum igitur in hac vita nec mali pro merito puniuntur, nec bonitatis digna præmia referant; superest, ut perfecta felicitas bonis, & summa miseria malis in altera vita referatur.

2. Felicitas consistit in conversione ad Divina, ut patet ex dictis: Atqui intellectus separatus à corpore convertitur ad superiora & Divina, suas species & cognitionem à Deo immediatè recipiens: Ergo felicitas perfecta contingere debet post separationem à corpore.

3. De ratione felicitatis est, ut sit à miseriis pura, mutationi non obnoxia, sed æterna & inamissibilis: Atqui anima post separationem à miseriis liberatur, & in bono suo in æternum desigitur, ac stabilitur: Ergo tunc veram obtinet felicitatem, per modum præmii pro honestis laboribus inamissibiliter concessi ab Authore naturæ.

Contra conclusionem objici possunt difficulta quædam argumenta. Primò felicitas perfecta debet competere toti homini, & non parti solum, sicut & totus homo est, qui collaborat virtuti, cujus est præmium: Sed in altera vita sola superest Anima; resurrectio enim corporis non spectat ad ordinem naturæ: Ergo felicitas perfecta nequit esse in altera vita.

Secundò si felicitas perfecta solum competeret Animæ pro statu separationis, sequeretur, animam naturaliter inclinari ad separationem: Atqui potius refugit separationem à corpore: Ergo in illa non obtinetur.

## 46 *Tertia Partis Philosophia* Qu. I.

Terrid si in separatione obtineretur felicitas, sequeretur, conjunctionem ad corpus non esse propter melius animæ, quippe cum in ea obtinere non possit suum bonum. Consequens est falsum, ut patet ex D. Thoma 1. p. q. 89. art. 1. Ergo, &c.

Resp. Platonicos ab his argumentis se se facile expedivisse, dicendo, corpus non pertinere ad essentiam hominis, sed hominem esse Animam solam, ut etiam observat D. Thomas loco proximè citato. Verùm, quia secundum nos, & secundum veritatem corpus est essentialis pars hominis, ideo argumenta videntur difficilia, sistendo præcisè intra ea, quæ naturaliter fieri videmus. Cujus ratio est, quia licet homo condi potuerit in statu naturæ puræ; attamen de facto non est in eo conditus. Unde res humanæ aliter disponuntur propter ordinem gratiæ, cui subjacent, quàm fuissent in statu naturæ puræ dispositæ, præcipue quantum ad moralium virtutum præmia, & flagitiorum punitionem.

Idelfonsus Thomista egregius putat, quoddam stante ordine naturæ puræ corpus etiam ad consortium perfectæ felicitatis pertinuisset, quatenus Author naturæ viros bonos morti non permisisset, sed ad meliorem vitam integros transulisset, ut contigit sancto Henoch. Vel certè si mori permisisset, statuto tempore illos resuscitasset, in integrum premiandos. Hæc solutio fundamentum habet in D. Thoma 4. contr. Gent. cap. 79. ubi probat, resurrectionem fieri debere rationibus etiam in ordine puræ naturæ convincentibus, inter quas est illa, quæ petitur ex perfecta præmii retributione.

Verùm si hæc solutio non placeat, absque recurſu ad resurrectionem, satisfieri potest argumentis, dicendo ad primum, beatitudinem perfectam naturalem soli Animæ competere posse, utpote cum in intelligibilibus bonis consistat, & sit præmium virtutis, quæ soli Animæ formaliter convenit. Unde anima corpori naturaliter quidem unitur, non tamen permanenter, & ut in eo ultimum virtutis præmium recipiat, sed per modum transeuntis, & ut in eo ad beatitudinem per merita bonæ vitæ formetur, sicut puer naturaliter quidem per aliquod tempus gestatur in utero matris, non tamen, ut ibi sit permanenter, sed ut ibi formatus ad portorem statum transeat.

Ad secundum dici posset, quoddam sicut puer natu-

## *De Felicitate Formali. Art. III. 47*

saliter refugit exire ab utero matris ante statum à natura tempus ; postquam verò satis , ut ita dicam , ad vitam maturuit , extra prodire gessit . Ita & Anima in statu naturæ puræ creata refugeret ante statutum tempus è corpore exire ; appetente verò matura senectute , & jam ex virtutem meliori vitæ aptior facta , nihil prohiberet , quin appeteret , appetitu elicto , & secundum partem superiorem , dissolvi & conjungi Authori suo , ut ab eo virtutis præmium reciperet , à quo quandiu est in corpore peregrinatur ; sicuti & Sancti in ordine supernaturali jam meritis pleni appetunt per corporis ruinam Deo , ut Authori supernaturali , conjungi .

Ad tertium , nego sequelam . Isti enim duo status & conjunctionis , & separationis sunt propter bonum Animæ , etiam in ordine naturæ puræ ; quatenus in primo per bona opera dignam se reddit præmio in altero statu recipiendo . Cæterum absolutè loquendo & abstrahendo ab omni perfectione in præmium virtutis reddenda , proindeque à felicitate , sitne perfectior Anima corpori unita , quàm separata , & modus intelligendi sine corpore perfectior , quàm in corpore . Aliaque ejusmodi ad naturam Animæ separatæ spectantia discutere non est hujus loci . Videri potest D. Thomas 1. part. qu. 89. art. 2. & ibidem Cajetanus .

## SECUNDA CONCLUSIO.

**P**Otest homo etiam in hac mortali vita aliqualem , imperfectamque felicitatem obtinere . Conclusio vix ab ullo negari potest . Eam perpetuò docet Aristoteles , & non semel S. Thomas 1. 2. qu. 5. præcipuè art. 3.

Probatur ratione , quam ibidem innuit sanctus Doctor . Etenim , ut felicitas perfecta consistit in perfecta participatione summi boni , ita & imperfecta felicitas in aliqua ejus participatione : Atqui homo non est ita elongatus à Deo in hac mortali vita , quin summum illum bonum possit aliquo modo participare cognoscendo , amando , & pro suo modulo imitando optimum illum Mundi Principem : Ergo potest aliquam felicitatem , etiam in hac mortali

## 48 Tertiae Partis Philosophiae. Qu. I.

vita obtinere. Sed res uberius expendenda est. Itaque sit

### S. II.

*In quo sita sit hujus vita Felicitas, quave ratione possit obtineri.*

CUM omnis auctoritas Philosophia consistat in beata vita comparanda, ut optimè dicit Cicero lib. 5. de Finib. hic insumendus foret, non unus paragraphus, sed totus operis nostri conatus, Ecquid enim optabilius, quidve Philosophorum omnium curâ & investigatione dignius, quàm ut tandem certo noverint homines, in quo posita sit vera felicitas, quave ratione valeat comparari? Verum quia res, ut olim omnibus Philosophis obscura visa est, ita non facilis & explorata habetur beneficio Evangelii, quo nobis commonstratæ sunt veræ beatitudinis semitæ, traditaque ea vivendi ratio, quam qui tenent, non modò immensis bonis, atque omni spe humana majoribus, quæ nempe præparavit Deus diligentibus se, in futuro cumulabuntur; sed etiam præsentis vitæ cursum optimè, ac quantum finit conditio mortalis vitæ, felicissimè peragunt: Idcirco nihil necesse est officium à Christo, tam luculenter expletum, ex Aristotele, ac humanâ ratione operosius emendicare. Ut tamen tantisper hanc Moralis Philosophiæ partem, quantum lumine naturali fieri potest, attingamus, sit

### PRIMA CONCLUSIO.

Nemo rationis compos est, nullaque vitæ conditio, cui non suppetant media vitæ præsentis bene, ac feliciter transigendæ: unde semper in culpa hominis est, quòd sit verè miser, etiam in hac vita. Dixi verè miser, nam quæ vulgò miseria dicitur, cum scilicet infantis desiderii affatim vitæ com-  
moda



## De Felicitate formali. Ar. III. - 49

moda non respondent, vitari quidem persæpe nequit; at non est verè miseria, ut patebit ex infra dicendis.

Conclusio in primis constat omnium Sapientium consensu, qui toti sunt in refutanda inscitia vulgi existimantis, vitæ bene, ac beatè transigendæ rationem pendere ex arbitrio fortunæ, nec positam esse in potestate, ac consilio nostro, sed in quibusdam bonis adeptu difficillimis, puta in divitiis, imperiis, &c. adversus quem errorem acriter sic insurgit Horatius Epistolâ 11. lib. 1.

*Strenua nos exercet inertia: navibus, atque*

*Quadrigis petimus BENE VIVERE: quod petis,  
hic est,*

*Est Ulubris; animus si te non deficit aquas.*

Memorat autem *Ulubras* speciatiim, nempe ignobilem Italiæ vicum, ut doceat nullum locum, nullamve conditionem excludere à vita bene, ac feliciter duenda.

Probatur ratione. Natura & Deus non deficiunt in necessariis: Sed nihil tam necessarium homini, quàm ut in promptu habeat media vitæ optimè, ac feliciter transigendæ: Ergo ea nemini prorsus negata sunt, sed paternâ Dei liberalitate unicuique pro suo capru, ac modulo concessa; adeo ut in culpa ejus sit, quodd'is non utatur. Et sanè impium est existimare, Authorem naturæ, cum nostro corpori tam solerter providerit omnia necessaria ad obtinendam, tuendamque optimam ejus habitudinem, adeo ut, cum aliquid ex iis deficit, manifestè appareat non esse in culpa artificem, sed materiam perpetuitati repugnantem; Animo verò, rei tam excellenti, denegasse media ad consequendam, tuendamque bonam habitudinem, in qua consistit vera felicitas, adeo ut non hominis culpa sit, sed naturæ duritia, quodd' miser existat.

Confirmatur inductione. Quippe, dum convertimus mentis oculos in tam varias hominum condiciones, videmus, splendorem conditionis & abundantiam rerum, quas vulgus habet, ut media certa ad felicitatem vitæ, aut parùm, aut nihil ad eam conferre, sed quamplurimos

## 50 Tertiæ Partis Philosophiæ. Qu. I.

in illis sublimioribus conditionibus , atque in rerum omnium copia miserrimam vitam ducere , nempe nequitiam , cutis , invidiam , timore , dolore , cupiditatibus , irâ , uno verbo omnibus animi ægreditudinibus miserè divexam . Cum è contra alii in re tenui & angusta ; imò , ut vulgus existimat , in ratione vivendi satis dura , felicitas , ac bonæ vitæ suavitates omnes degustent . Cujus quidem rei , cum hæc scriberemus , incidit illustre testimonium Viri pietate herolcâ , eruditione insigni , candore , ac celsitudine animi incomparabilis R. P. Vincentii Baronii Inquisitoris Tolosani Ordinis Prædicatorum . Quippe optimus senex morbo , quo brevi confectus est , prostratus , cum occasione dolorum , quibus lancinabatur , incidisset nobis de hujus vitæ miseris sermo , in hæc verba non sine insigni quadam explicantis se internæ suavitatis notâ prorupit : *Sibi quidem magnopere ingratos videri homines , qui innumeris cumulatî beneficiis propter pauca incommoda Deum incusant . Se verò , cum recogitaret , quanta bona nihil merenti contulisset Deus , etsi ad nativum nihilum sibi reddendum foret , pro anteaacta vita infinitam gratiam illi habiturum . Adjecit præterea , quod etsi ad rem nunc minime facit , tacendum tamen non est , Se imminensem æternitatem ita expectare , ut divino de se judicio , quodcumque tandem foret , libentissimè subscriberet , probè tenens , optimum Patrem Deum , nihil nisi optimum de suis filiis decreturum . Atqui vir egregius datum vitæ genus perpetuè coluerat , ab omnibus illis , in quibus fatui homines prosperæ , felicesque vitæ rationem reponunt , quàm maxime alienum ; imò cum incurrentibus molestiis , tum sponte susceptis laboribus asperrimum . Sed cum eâ , qua erat , æquitate animi rem æstimaret , censebat , vitam bonam , in quantavis dura conditione , nunquam esse miseram , illique tantum suavitatis inesse , quantum satis est ad eam habendam , ut magnum Dei beneficium , ac beatitudinem quandam imperfectam .*

Nec verò his repugnant querelæ illæ in ore Sanctorum , tam frequentes adversus hanc vitam . Hæ quippe rejiciendæ sunt in vitia ipsa , quibus bona vitæ corrumpuntur . Aut certè nihil aliud probant , quàm felicitatem hujus vitæ , quantumvis bonæ , non esse plenam , imò comparatione mellioris , quam speramus à Deo , videri nullam . Cæterum omnium sententia fuit , in bona vitæ satis suavitatis esse , ut etiam sine alio præmio amari , a ali debeat .

Ob- c

## *De Felicitate formali. Ar. III. 51*

Objici potest argumentum, quod queruli homines palmare putant, nempe peticum ex miseris, quibus etiam boni gravantur. Ut cum acerbè torquentur, cum fame pereunt, cum obruantur calumniis, aliisque ejusmodi, quæ satis esse videntur ad expungenda penitus omnia felicitatis lineamenta.

Sed respondeo in primis, maximam partem miseriarum quibus premitur vitæ, proficisci ex nostra insipientia & nequitia, ut meritiò celebraverit D. Chrysostomus, *Neminem ladi, nisi à seipso*. Et Poeta quidam

*Quam falsè accusant superos, stultique queruntur*

*Mortales: etenim nostrorum causa malorum*

*Nos sumus, & sua quemque magis recordia ver-*  
*sat.*

Quapropter, his amaritudinum fontibus per virtutem semel probè occlusis, pauca, eaque levia restant mala, quæque majoribus bonis diluta non penitus corrumpunt bonæ vitæ suavitatem, quamvis fateamur illam minuere. At non contendimus hic felicitatem perfectam.

Addo præterea, quæ vulgò habentur ut magnæ miseriæ, dum sciè tractantur, cedere in bonum vitæ, atque adeo in parrem felicitatis. Nempe sunt ut fructus acerbi, qui cum ex se nihil habeant, nisi ad cruciandum gustum, conditi tamen cedunt in delicias.

At audiendus hæc in re Aristoteles lib. I. Ethic. cap. I. I. In his (nempe calamitatibus vitæ) splendet, atque elucet ipsum honestum; cum quis multas & magnas calamitates fert leniter & placidè; non quiddam doloris sensu careat, (ut deinceps voluerunt Stoici) sed quiddam generosi & magni sit animi. Imò qui verè bonus & bene sana mentis est, omnes fortune casus (non solum) decenter & ex persona sua dignitate feret, (sed etiam) ex iis res pulcherrimas agere: quomodo bonus imperator eo exercitu, qui præsto est, semper utitur bellicosissime: & peritus sutor ex iis pellibus, quæ ad eum delata sunt, calceum pulcherrimum conficit. Unde concludit peregre, **SI VIRTUTES VITÆ DOMINÆ SINT, NULLUS BONUS EX BEATO MISER ESSE POTEST,**

## §2 Tertiæ Partis Philosophiæ. Q.I.

quomvis vulgè talis habentur, si in Priami calamitates, id est, maximas, incideret. Ob hanc causam vocat virum perfectâ virtute instructum, *Tetragonum sine vituperio*, id est, perfectum, & exactum; eo quod, ut explicat S. Thomas lect. 16. sit ad similitudinem corporis cubici habentis sex superficies quadratas; propter quod bene stat in qualibet superfice: similiter virtuosus in qualibet fortunâ bene se habet. Imò fortunæ casus suâ sapientiâ emendans, eos in suum commodum inclinât, ut peritus Nauta contrarios ventos: cùm è contra insipiens etiam prosperos eventus in sui cruciatum & perniciem randem convertat. Quam industriam ad bene vivendum capitaliter necessariam lepidè his versibus expressit Terentius in Adelphis, Act. 4. Scæ. 7.

*Ita vltà est hominam, quasi, cùm Iudas Tesseris:*

*Si illud, quod maxumè opus est jactu, non cadit,*

*Illud, quod cecidit fortè, in arte ut corrigas.*

Adde, hunc consuetum animi nostri, cùm calamitatibus vitæ, atque splendidam de illis victoriam, (si res æquè æstimemus) esse iucundiores omnibus bellicis expeditionibus. Ut igitur Imperator non se miserum existimat, cum multis, magnisque laboribus insignes victorias reportarit, sed magis ex eo lætatur; ita potiori jure Vir bonus felicitati deputare debet hanc virtutis suæ cum calamitatibus luctam, emergentesque exinde victorias.

Instabis. Non omnes habent hunc mentis vigorem, illamque ingenii præstantiam, qua possint tam sublimia prævidere, præcipuè in adversis: unde facillè se obrui sinunt: Ergo non habent media ad vitam feliciter agendam.

Resp. Stupidiores posse sapientioribus credere, ac se se formandos tradere: etenim ut rectè Horatius Epist. 2. lib. 1.

*Nemo adeo ferus est, ut non mitescere possit,  
Si modè cultura patientem commodet aurem.*

Cæ-

*De Felicitate formali.* Ar. III. 53

Cæterum, qui neque per se valent ad rectum dispiciendum, tenendumque, nec sapientioribus obtemperant, audiant, inquit Aristoteles 1. Eth. cap. 2. Hesiodi versus:

*Optimus est, sese qui novit cuncta magistra,  
Ad finem usque videns, qua semper sunt meliora;  
Et bonus ille etiam, qui parat recta monenti.  
Atqui mentis inopia aliorum audire recusat  
Consilia, hi malus est, telluris inutile pondus.*

SECUNDA CONCLUSIO.

**E** Tiam imperfecta illa præsentis vitæ felicitas non est posita in aliqua re creata, sed in Deo; nempe quatenus homo illi adhæret, ut Authori naturæ, ac fonti bonorum, quantum finit mortalitatis conditio.

Conclusio est capitaliter contra Epicureos, qui eò furoris erupere, ut putarent, non posse jucundè, id est, feliciter vivi, nisi sublato omni cum Deo commercio, omnique providentiâ. Ad instar nempe perditissimorum civium, qui sub optimo Principe semper pavidi, tum demum se felices, ac securos arbitrantur, cum illum trucidaverint, aut in ultimas oras ablegaverint. Ecquid enim aliud sonat seditiosa illa Velleji Epicurei vox apud Ciceronem lib. 1. de Natura Deorum? Itaque impossibilis cervicibus nostris sempiternum Dominum, quem dies & noctes timeremus. Quis enim non timeat omnia providentem, & cogitantem, & animadvertentem, & omnia ad se pertinere putantem, curiosum, & plenum negotii Deum? Horrendæ sanè blasphemix, & quas mirum potuisse homini venire in mentem. At, ut exclamât Sapiens, Eccli. 17. Quid nequius, quàm quod excogitavit caro & sanguis? Atqui ante illas generis humani pestes longè aliter senserant prima Græcæ Philosophiæ lumina, quorum, referente Plutarcho lib. de Audt. capitale ad bene vivendum præceptum illud fuit, *ἑπὶ Θεῷ, Sequere Deum.* Quapropter Aristoteles Ethic. lib. 10. cap. 9. cum beatam vitam definisset, *Quæ fungeretur muneribus virtuti consentaneis*, eam tandem ex eo cumulatè beatam fore ait,

## 54 Tertia Partis Philosophia. Q.I.

quoddam conjungat Deo ut amico: *Erit*, inquit, *sapiens Deo carissimus*; itaque hoc modo erit beatissimus. Quamquam, ut verum fateamur, peccarunt omnes antiquitatis Philosophi, quoddam ipsam rei perspicuitate convicti cogerentur fateri, summam beatitudinis esse Deo conjungi, id tamen dictis & factis admodum frigide celebraverint, ut mercedem queratur Apostolus ad Rom. i. illos, *cum cognovissent Deum, non sicut Deum glorificasse*. At exinde non fit præjudicium veritati solaribus hisce radiis splendidiori, sed solummodo conjectandi ansa datur, genus humanum grandi, & in omnes vulgata plagâ percussum, ac malo quodam genio agitata, hoc ad felicitatem iter tam apertum, tam planum, tam simplex, nec satis videre, nec protius tenere valuisse.

Probatur conclusio iis argumentis, quibus superius demonstravimus, appetitum hominis satari non posse, nisi conjungatur ipsi bonorum fonti; proindeque plenam ejus beatitudinem esse perfectè Deo conjungi; inchoatam autem, cum incipit ipsi adhærere. Scilicet res se habet in hac rerum universitate, ut in ordinatissima civitate: ut enim in ista felicitas cujusque civis est, ut adhæreat in omnibus optimo principi ac legislatori, atque hoc pacto tutâ & tranquillâ vitâ in civitate perfruatur sic omnis nostra felicitas est, ut viventes in illa mundana spirituum republica, pro viribus jungamur supremo illius regi Deo, atque hoc pacto sub ejus optima ditione vitam bonam, ac securam agitemus. Sed ut res dicatur explanatius.

### TERTIA CONCLUSIO.

**C**onjunctio hominis cum Deo, in qua hujus vitæ felicitas posita est, perficitur Intellectu & Voluntate. Intellectu quidem, quatenus de Deo rectè sentimus. Voluntate vero, quatenus illi, ut optimo legislatori placidè, ac studiosè in omnibus subijcitur, affectuumque nostrorum cursum eo modo dirigimus, quo illi gratum esse intelligimus.

Antequam probetur conclusio, tantisper declaranda est. Igitur cum conveniat, hominis beatitudinem at-

ten.

tendendam esse secundum functiones mentis, cognitionem scilicet & affectum, manifestum est, illum non posse aliter conjungi Deo, ut objecto beatificanti, quàm utraque hac functione, cognitione scilicet & affectu. Sed cum duplex sit cognitio Dei, altera subtilis & arguta, quam homo acquirit laboriosis contemplationibus, ac disputationibus; altera verò simplex, naturalis, & nulli non pervia, quam etiam maxime rudes facillè possunt consequi. Quamquam prima, utcumque conferat ad vitæ felicitatem, uti & aliæ scientiarum cogitationes, attamen hæc secunda est germana beatitudinis basis, sufficitque ad vitam bene agenda. Nempe in ea tota consistens, ut de Deo bene, ac dignè sentiamus. Illum orationum rerum principium & moderatorem esse, præcipuè hominum utpote sibi similiorum, quod rationis participos sint. Ejus bonitatem, ac benignitatem tantam esse, ut nullus melior princeps aut optari, aut cogitari possit. Eà præditum esse sapientiâ, ut nihil ordinatius, quàm quod ille disposuerit. Omnia in ejus manu esse, nec quidquam nobis contingere posse, nisi ejus bonitate approbante, ac sapientiâ ordinante. Nos, si boni esse velimus, ei carissimos fore, ut filios ingenuos optimo patri. Erratis nostris, cum tamen illa seridè emendaverimus, in ejus clementia præsidium fore; nec nos unquam deserturum, nisi nostrâ insipientiâ, ac nequitia nos perdere priores ipsi decrevimus. Nihil nobis melius esse, quàm illi obsequi, illum pro modulo nostro imitari, justitiâ, clementiâ, bonitate, prudentia, omnibus demum virtutibus, quas in eo summas intelligimus. Huc labori, ac studio magnus præmius apud illum nobis fore, quamquam & istud maximum sit, illi placere. Hæc igitur & similia, quæ inspirante, ac ubique resonante natura facillè quisquis sanæ mentis intelliget, si animo altè defixa, ac probè explorata habuerimus, contendimus, fore culmina vitæ bene, ac beatè degendæ, accedente tamen stabili, alacrique voluntatis affectu illis commensurato, nempe quo passionum imperus cogamus ad hanc regulam; quo res vitæ nostræ juxta hæc principia geramus; quo nihil turpe, inordinatumque, sed ubique suavissimum honestatis odorem, splendoremque respiremus, &c. His ita constitutis.

Probatur conclusio. In ea conjunctione posita est ve-

### 36 *Tertia Partis Philosophiæ. Q. I.*

ra vitæ beatitudo, cui insunt omnes omnino dotes  
 omniaque bona, quæ Philosophi operantur ad beatitudi-  
 nem: Atqui in illa cognitione Dei & affectibus illi  
 commensuratis cumulari reperitur, quidquid operantur  
 Philosophi ad veram beatitudinem: Ergo in illis consi-  
 stit vera vitæ beatitudo. Declaratur minor. In primis  
 reperitur illa animi celsitudo, illudque *Honestum*, ac  
*Decorum*, quod unice bonum putavere Stoici. Quid  
 enim celsius, quid honestius, ac magis decorum, quam  
 adhærere Deo, illum imitari, ei carum esse? Reperi-  
 tur eidem imperturbabilis animi adamantina firmitas,  
 quam nulli eventus possint violare. Ecquid enim pave-  
 bit, qui ceres tenet, nihil in vita evenire, quàm  
 quod iusserit amantissimus pater, optimusque amicus,  
 qui nihil nisi optimum potest decernere, imò nihil nisi  
 quod tandem verat in commodum amicorum suorum?  
 Insunt quoque huc vivendi rationi præclaræ illæ vitæ  
 rationalis functiones, quam habuit Aristoteles, ut ve-  
 ram beatitudinem. Quæ enim præclarior functio, quàm  
 de Deo bene sentire, atque secundum illum totius vi-  
 tæ cursum componere? Adest pariter illa jucundæ vitæ  
 vera suavitas ab Epicureis tam celebrata, sed extra  
 Deum, imò contra Deum, tam nefarie quæsitâ, quam  
 nec pavor irati numinis conturber, nec mortis metus  
 exagitet, nec cupiditatum inexplebilis fames cruciet,  
 quæque dolores leniter ferat, bonis oblatiis tranquillè  
 fruatur, illaque usque ad medullas degustet. Qui enim  
 Deum, ut par est, novit, & sincerè amat, eum ha-  
 ber non ut iracundum tyrannum, sed ut clementissi-  
 mum principem, à quo nemo lædi potest, nisi qui sibi  
 ipsi prius nocere voluerit, averrendo se ab hoc boni  
 fonte. Mortem non timet, probè sciens, deficientem  
 vitam se non ruiturum in profundam nihili voraginem,  
 (quod ab Epicureis decantatum, mortis metum non  
 lenit, sed auget) sed in manus Patris amantissimi, qui  
 cum nobis nihil tale meritis vitam, ac multa bona de-  
 derit, majora secreto à mortali corpore animo conce-  
 det, si hîc illum dilexerimus. Quam suavissimam spem  
 celebrans Plato in Epimenide, *Præclara*, inquit, *spes*  
*est, fore, ut post mortem consequatur quis omnia, quorum*  
*desiderio accensus, instituerit, transegeritque quàm opti-*  
*mè potuerit vitam.* Cupiditate inexplebili non torque-  
 tur,



*De Felicitate formali. Ar. III. 57*

tur, quia cerè novit, sibi nihil deberi, proindeque non modò pro sufficienti, verùm etiam pro magno habet, quidquid illi Deus concesserit. Dolorem consolatur, non inani Epicuri dilemmate, *Si summus, brevis, si productior, levis*; sed constanti persuasione, Dei medicas manus non torquere, nisi ut profint. Quæ in vita jucunda occurrunt præ cæteris suavius degustat, primò quia virtute, ut sale, condita fiunt ei sapidiora. Deinde quòd puriori sit palato, ac passionum agritudine minimè depravato. Postremò quòd cum omnia vitæ bona habeat, ut Dei beneficia, gratius illa suscipit de tam digna & amica manu, lætusque cogitat se convivam magni regis. Imò, quia Deum habet ut amicum, non modò de bonis ab eo susceptis purissimam percipit voluptatem; sed etiam divinore perfruitur delectatione, cum cogitat, quàm bene sit amico suo! Quàm sit potens! Quàm late regnans! Quàm dives! Gaudet quippe de his omnibus, ut filius de paternis bonis. Cum verò tali modo affectum animum afferet ad Mundi & Naturæ contemplationem, quàm puto, quàm casto, quàm suavi gaudio perfunderetur? Hic luce meridiana clariùs perspiciet præsentis ubique Dei, id est, patris & amici, potestatem, bonitatem, sapientiam, beneficentiam, quò nullum ei jucundius spectaculum. Nec ad hæc opus est Mente acuta, sed simplici, quieta, pura, & Deum amante. Hinc *Cæli enarrant gloriam Dei. Hæc in Divinis Operibus exsultat.* Hujus sunt castæ illæ jubilationes, *Quàm magnificata sunt opera tua, Domine: omnia in sapientia fecisti: impleta est terra possessione tua: tuus est Dies, & tua est nox: Tu fabricatus es Aurora & Solem, & alia, quæ ex hac plenitudine gaudii Regius Vates passim, ac præcipuè toto Psalmo 101. effundit.*

Sed fusior essem, si singula persequerer. Tantùm, quæso te, tantisper proponas tibi animo virum cujusvis sortis & genii, sed cui altè animo infederint cognitio & amor Dei, emergentesque exinde affectus, ut à nobis tantisper delineati sunt; planè eum habebis, non modò ut beatissimum hominem, sed ut visibilem quendam Deum. Quæ cum ita sint, nihil cunctandum, sed capessenda unicuique nostrum hæc vitæ forma, atque contra omnes vitiorum imperius con-

## 58 *Tertia Partis Philosophia. Q. I.*

stanter tenenda. Sed rem delibasse sufficiat: est enim, ut superius monuimus, exigenda uberior horum cognitio ex fontibus Christi, qui hæc naturaliter quidem manifesta, sed tam parum à Philosophis animadversa commonstravit; atque insuper adiecit longè præstantiora bona, spem, ac sortem nostram in immensum superantia, adoptionem filiorum, gratiæ Thesauros, Spiritus sui consolationem, amoris innumera pignora, regni hæreditatem, æternæ vitæ societatem, &c. Sed de his ad Theologiam.

### §. I I.

*In qua Operatione consistat essentialiter Beatitudo formalis.*

**B**eatitudo, seu Felicitas formalis, ut supra diximus, est summi boni possessio; seu actio, qua illud consequimur. Porro, ut ostendi, summum hominis bonum est Deus. Unde formalis beatitudo consistit in ea operatione, qua Deo conjungimur, ac illum possidemus, quæ quidem alia esse nequit, nisi partis intellectivæ: non enim sensu, sed mente Deo conjungimur, quippe cum sit bonum intelligibile, non sensibile. Hæc apud omnes rara sunt. At cum in parte intellectiva dum sint facultates, quæ Deum attingunt, Intellectus, & Voluntas, subtilior movetur questio, Utrius potentie actus hac in re primas obtineat, atque adeo essentiam formalem beatitudinis constituat. Scotus præfert actum voluntatis. S. Thomæ, Thomistæ omnes, pluresque alii præferunt actum Intellectus. Quidam ex utroque essentiam beatitudinis constituunt. Pro resolutione sit

PRIMA CONCLUSIO.

**B**eatitudo formalis non consistit essentialiter in pluribus actibus.

Conclusio supponit distinctionem hęc apprime observandam Beatitudinis quoad statum, & quoad essentiam. Beatitudo quoad statum est integra complexio bonorum omnium, quę statui beati debentur: unde à Boetio definitur, *Status omnium bonorum aggregatione perfectus*. Beatitudo quoad essentiam est Consecutio summi boni, ex qua cętera bona prosuunt: unde licet hęc desint, modò summum bonum possideatur, stat beatitudo quoad essentiam. Ut Sancti Deum videntes, etsi gloriam corporis nondum habeant, quę tamen ad plenitudinem beatitudinis requiritur, *beati* nihilominus essentialiter dicuntur, quòd Deum mente possideant. His positis.

Probatur. Beatitudo essentialis est actio, qua homo primatib; consequitur, ac possidet summum bonum: Sed illa actio est unica: Ergo Beatitudo essentialis consistit in una actione. Major constat ex jam posita definitione. Minor probatur. 1. Quia illa actio est omnium præstantissima: Ergo unica. 2. Bonum simplex & unum unũ quoque actione ipsi correspondente possidetur: Sed summum bonum est unum & simplex: Ergo una ei correspondente actione possidetur. 3. Summum hominis bonum est Deus, ut supra ostendimus. Deus autem est bonum intelligibile, ut pater, proindeque, ut infra ostendemus, intellectione, seu contemplatione possidetur: Sed illa contemplatio est una simplex actio, ut constat: Ergo possessio summi boni est posita in una tantum actione.

Confirmatur. In pluribus ordinatè se habentibus, oportet, esse unum principale, cui cętera subordinentur; imò ordo in eo consistit, ut multa reducantur ad unum. Unde tritum, ac verissimum effatum est, *Omniem multitudinem reduci debere ad unitatem*: Atqui actus pertinentes ad beatitudinem ordinatè esse debent: Ergo debent reduci ad unum primum & principale, qui proinde essentialem beatitudinem constituit.

## 60 Tertiæ Partis Philosophiæ Qu. I.

Obj. Felicitas est summum bonum, summaque perfectio: Sed plures operationes sunt meliores, quam unicas. Ergo in pluribus consistit felicitas.

Respond. Distinguo majorem: Felicitas est summum bonum, summaque perfectio, aggregativè & extensivè, nego; radicaliter & intensivè, concedo. Differt enim felicitas quoad statum à felicitate quoad essentiam, quiddam illa sit aggregatio bonorum & perfectionum omnium ad felicitatem concurrentium; ista verò sit in illis perfectionibus excellentissima, in qua cæteræ, ut in fonte continentur, & ad quam reducuntur. Porro hæc una est. Ad di posset, felicitatem formalem non esse summum bonum ut quod, & entitativè, sed ut quo, & consecutivè, id est, operationem, qua consequimur primariè & principaliter summum bonum, quæ non est nisi unica.

Instabis. Felicitas essentialis debet implere omnia iusta desideria: Sed unica operatio ea non implet; quippe aliæ operationes supersunt expetendæ: Ergo felicitas essentialis non est unica, sed multiplex operatio.

Resp. Distinguo majorem: Felicitas essentialis debet implere omnia iusta desideria, formaliter, nego; radicaliter, concedo. Et distinctione applicatâ minori, nego consequentiam. Quemadmodum enim essentia hominis non debet formaliter dare, sed solum radicaliter præcontinere omnia, quæ pertinent ad hominem; ita nec felicitas essentialis debet formaliter dare omnes perfectiones ad statum felicem pertinentes, sed solum radicaliter eas præhabere.

Urgebis. Felicitas essentialis consistit in unionem perfectissima cum summo Bono: Atqui per unicam operationem non fit perfectissima unio, quippe cum adhuc supersit ulterior peragenda per alias operationes: Ergo felicitas non consistit in una operatione.

Resp. Distinguo majorem: Felicitas consistit in perfectissima unionem, perfectione primariâ & possessiva, concedo; perfectione omnimodâ, nego. Essentia enim rei est id, quod est perfectissimum in re, non quidem perfectione omnimodâ, quippe cum ulterius perficiatur per accidentia superaddita; sed solum per perfectionem primariâ, à qua, ut à fonte, alia profluunt.

SECUNDA CONCLUSIO.

**F**elicitas formalis non potest consistere in actu voluntatis.

Probatur ratione fundamentali D: Thomæ 1. 2. qn. 31. art. 4. Felicitas est essentialiter consecutio summi boni. Sed impossibile est, consecutionem summi boni esse actum voluntatis: Ergo felicitas formalis non est essentialiter actus voluntatis. Major pater. Ut enim felicitas objectiva est bonum summum, quod felices facit, ita felicitas formalis est affectio illius boni. Minor probatur tribus momentis.

1. Ex ipsa ratione voluntatis, quæ est inclinatio in bonum. Inclinatio autem non est affectiva boni, aliis ut assequeremur bonum, satis esset ipsum velle. In id non tangit bonum nisi affectivè, in quantum affectus ejus terminatur ad ipsum; cæterum attractus effectivus, & possessivus boni fit per aliquid aliud, quàm per inclinationem, & affectum ad ipsum. Ut si sit bonum sensibile, per sensum; sicuti harmonia sonorum possidetur auribus, sapor gustu, &c. Si sit bonum naturale, per unionem naturalem, puta per contactum & indistantiam localem, quomodo lapis possidet centrum; vel per inhærentiam, sicut homo possidet sanitatem. Si verò sit bonum intelligibile, per intellectum, sicut doctus intellectu possidet scientiam.

2. Inductione, nam ut insinuat Divus Thomas 1. 2. art. cit. & ampliùs declarat in 4. Dist. 49. quæst. 1. art. 1. Omnis actus voluntatis erga bonum vel est inclinatio in bonum absens; ut amor, desiderium, spes, intentio, &c. vel quietatio in bono præsentis; ut fructio & delectatio. Sed nullus eorum actuum est affectio boni: Ergo affectio boni non potest esse actus voluntatis. Declaratur minor. In primis quod inclinatio in bonum absens non sit illius affectio, constat ex terminis. Quod verò etiam quietatio in bono non sit affectio illius, suadet: nam quies in bono supponit possessionem & affectationem ejus, siquidem ideo voluntatis motus quiescit, quia respicit bonum ut possessum, quod respiciebat antea ut acquirendum: Ergo quies in bono non est ejus affectio, sed potius

## 62 Tertia Partis Philosophia. Qu. I.

complacencia de adeptione præsupposita, seu affectio consequens ex possessione boni.

3. Demum suadetur eadem minor, specialiter de amore & frustione Nam amor abstrahit à præsentia & absentia; amamus enim bonum & absens & præsens. Fruitio verò, cum sit jucunda quies in bono possessio, non facit possessionem boni, sed eam consequitur: ut enim egregie observat Divus Thomas 1. 2. quæst. 3. art. 4. voluntas fruatur bono & delectatur in ipso, ex eo quod sit præsens & possessum: non autem è converso bonum sit possessum & præsens, ex eo quod voluntas fruatur ipso, & in eo delectatur.

Objc. Plures Patrum autoritates, qui reponunt felicitatem in gaudio, delectatione, frustione jucunda, fructiva, suavique Dei præsenis dilectione, &c. quas omnes referre longius esset; imò Scriptura vocat felicitatem *gaudium*: Ergo est actus voluntatis.

Respond. In locis, quæ adduci solent, Patres solum descriptivè definire beatitudinem, non verò essentialiter. Patres enim rhetoricè magis, quàm philosophicè res tractare solent; ideoque frequentius utuntur descriptionibus, quæ sunt rethoricæ definitiones, tem per proprietates & adjuncta notiora explicantes, quàm subtilibus & quidditativis definitionibus. Scriptura verò vocat felicitatem *gaudium*, non formaliter, sed objectivè, quatenus felicitas est summi gaudii objectum: quo loquendi modo Christus vocari solet *nostra spes, salus, amor, corona, gaudium, &c.* non formaliter, sed objectivè.

Obj. 2. Ex ipso D. Thoma in 4. Dist. 49 q. 1. art. 2. questione. 1. ad 3. homo perfectissimus conjungitur Deo, qui est felicitas ejus, per affectum, quàm per intellectum: Atqui felicitas essentialis consistit in perfectissima conjunctione cum bono: Ergo fit per affectum.

Respond. Ex eodem Divo Thoma ibidem, ideo hominem perfectissimum conjungi Deo per affectum, quia unio affectiva supponit intellectivam, cui advenit decorans & perficiens ipsam, sicut proprietas essentialiam. Primum enim necesse est, assequi bonum intelligibile, & hoc fit, ut mox dicetur, per intellectum. Deinde ex effectiva consecutione derivatur in voluntatem quædam affectiva adhesio & veluti spiritualis complexus boni possessi, quatenus ei tanquam centro affectio uniuntur & adherent, cupientes ipsum firmiter retinere. Unde in forma: homo perfectissimus

## De Felicitate Formali. Art. III. 63

Etius unitur bono per affectum, perfectione consummationis & completivâ, concedo; perfectione essentiali & quidditativâ, nego.

**Instabis.** Actus voluntatis est perfectiori modo unitivus & consecutivus summi boni, quàm ullus alius: Ergo in eo felicitas essentialiter consistit. Probatur antecedens: nam proprium amoris, qui est actus voluntatis, est unire amatum cum amante, ut probat Divus Thomas 1. 2. quæst. 28. art. 2. Unde Dionysius cap. 4. de Divin. Nom. vocat amorem *vinc unktivum*, & Sanctus Augustinus lib. 8. de Trinit. cap. 10. *Amor, inquit, est iunctura quadam, duo copulans*. Immo amor est transformativus: unde S. Augustinus Tract. 2. in 1. Epistolam Joan. *Si terram diligis, terra es; si Deum, Deus eris*. & confessionum lib. 4. cap. 6. *Quidam bene dixit de amico suo, dimissum esse anima sua*: Ergo perfectissima unio fit per actum voluntatis.

**Respond.** Distinguo antecedens: Actus voluntatis est perfectiori modo unitivus, unione affectivâ, concedo; unione effectivâ & possessivâ, In qua consistit felicitas, nego. Voluntas enim & amor non uniunt possessivè, ut ostensum est in probatione, sed solum affectivè. Quæ affectiva unio præcipuè consistit in tribus. Primò per appropriationem, quatenus amicus se habet ad amicum, sicut ad se ipsam in amore amicitiae, ipsumque reputat alterum se: unde communiter dicitur, *amicus est alter ego*; in amore verò concupiscentiae amans se habet ad bonum amatum, non ut ad se, sed ut ad aliquid sui. Secundò per conformitatem, quatenus amor est quædam coaptatio cum re amata, & amicorum est idem velle & nolle. Tertiò per ecstasim & raptum, quatenus amor, si sit fortis, rapit omnes effectus & cogitationes amantis ad amatum: in quo sensu dixit Christus, *Ubi est thesaurus tuus, ibi erit & cor tuum*, id est, affectus & cogitatio: quomodo etiam intelligi potest illud Platonis effatum, *Anima magis est ubi amat, quàm ubi animat*. Cæterùm unionem effectivam & possessivam amor non facit, sed quærit; in quantum instigat ad eam, sicut gravitas ad centrum: ut voluptuosus per voluntatem instigatur ad cibos delicatos, quos tamen gustu consequitur; & amici, ut refert Aristoteles 2. Polit. cap. 2. ex Aristophane, *per amorem desiderant fieri unum; sed, quia ex hoc accideret, vel ambo, vel alterum corrumpi*, qua-

## 64 Tertiæ Partis Philosophiæ. Q. I.

*runt unionem, qua decet & convenit, quam consequuntur per familiarem convictum, & collocationem.*

Urgebis. Felicitas essentialis est quid ultimum: Sed actus voluntatis, scilicet fructio & delectatio, sunt ultimæ operationes amici circa bonum: Ergo felicitas essentialiter consistit in actu voluntatis.

Respond. Distinguo majorem: Felicitas essentialis est quid ultimum, simpliciter & per modum consecutionis, concedo; secundum quid & per modum complementi & proprietatis ex consecutione boni derivantis, nego. Et pariter ad minorem: fructio & delectatio sunt ultimæ operationes, simpliciter & per modum consecutionis, nego; secundum quid & per modum ornamenti, complementi, & proprietatis, concedo, & nego consequentiam. Ut enim in generatione forma substantialis dicitur ultimus terminus simpliciter, proprietates vero ab ea dimanantes sunt solum quid ultimum secundum quid: ita felicitas essentialis, seu consecutio summi boni, dicitur simpliciter ultimus terminus: operationes vero illam consequentes, ut delectatio & fructio, sunt solum quid ultimum secundum quid & per modum ornamenti & proprietatis: unde Aristoteles dicit, quod *delectatio est perfectio operis, sicut decor juventutis*.

Dices. Actus, in quo felicitas essentialiter consistit, debet respicere rem, qua sumus felices, sub ratione boni: Sed voluntas sola respicit objectum sub ratione boni, intellectus autem sub ratione veri: Ergo felicitas essentialis pertinet ad voluntatem. Confirmatur. Ejusdem potentie est tendere in bonum, & ipsum assequi: Sed sola voluntas tendit in bonum: Ergo sola consequitur bonum.

Respond. Distinguo majorem: Actus, in quo felicitas consistit, debet respicere rem, qua felices sumus, sub ratione boni, *appetibilis*, nego; *consecuti*, concedo. Et distinctione applicatâ minori, nego consequentiam. Felicitas enim sita non est in appetendo, sed in possidendo bono: unde actus, quo constituimur felices, non debet respicere bonum ut appetibile, sed ut consecutum: Quamvis autem sola voluntas respiciat bonum sub ratione appetibilis, est enim appetitus boni, non eamen sub ratione consecuti: sed si sit bonum sensibile, consecutio pertinet ad sensum; si bonum intelligibile,

ad



## De Felicitate Formali. Ar. III. 65

ad intellectum. Ad confirmationem responderi posset eodem modo. Sed præterea distinguo majorem: Eiusdem potentiae est tendere in bonum affectivè & ipsum consequi effectivè, nego; eiusdem potentiae est tendere in bonum executivè & ipsum assequi effectivè, concedo. Quamvis autem sola voluntas tendat in bonum affectivè, aliae tamen potentiae tendunt in ipsum executivè, sicut sensus in bona sensibilia, & intellectus in bona intelligibilia: unde affectio & possessio boni ipsis competit, non voluntati.

### T E R T I A C O N C L U S I O.

**F**elicitas formalis naturalis essentialiter consistit in actu intellectus, contemplatione scilicet perfectissimâ, quæ intra naturæ ordinem de Deo haberi possit; Supernaturalis verò in visione divinæ essentiae, de qua Theologi.

Conclusio est non solum Divi Thomæ, sed etiam Aristotelis, imò & Platonis egregiè docentis, *Animam esse beatam, non ut pulchro & caro fruatur Deo*, in quo est delectatio, quæ est actus voluntatis, *sed ut vero*, id est, per cognitionem, quæ est actus intellectus, tamen pulchritudo statim consequitur, & proinde delectatio, ut in Philebo differit, nec sejuncta hæc esse possunt. Nemo enim Deum contemplatur, nisi simul admiretur, & cognita pulchritudine bonoque amet cum summa oblectatione. Eandem tradunt sancti Patres, qui à Theologicis fuscè referuntur. Præ cæteris verò expressus est S. Augustinus lib. 82. qq. quæst. 35. ubi ex professo hanc difficultatem versans, concludit, felicitatem consistere in cognitione: Eo quòd habere summum bonum nihil aliud sit, quàm nosse. Unde pereleganter ait: *Quid est aliud beatè vivere, nisi aliquid æternum cognoscendo habere?* omnium enim præstantissimum est, quod æternum est, & propterea id habere non possumus, nisi scire, quæ præstantiores sumus, id est, mente: quidquid autem mente habetur, cognoscendo habetur. Quibus verbis tangit fundamentum summi boni spectare ad intellectum, quia est perfectissima potentiarum; & quia cum summum bonum habet, quid

## 66 Tertiæ Partis Philosophiæ. Qu. I.

quid intelligibile, non nisi intelligendo possideri potest. Unde Psal. 5. *Hæc hereditas*, inquit, *intelligendo & videndo Deum possidetur.*

Probatur itaque Conclusio ratione S. Augustini, qua utitur S. Thomas 1. 2. q. 3. art. 4. Felicitas essentialiter est consecutio & possessio summi boni. Sed hæc fit per actum intellectus: Ergo in eo consistit essentialiter felicitas. Major constat. Minor probatur. Summum bonum est bonum intelligibile, ut constat: Sed bonum intelligibile non aliter, quàm intelligendo possideri & haberi, ut sensibile sentiendo: Ergo ejus possessio & consecutio consistit actu intellectus.

Illustratur ampliùs hæc ratio. Sicut se habet natura sensitiva ad bonum sensibile, ita & intellectiva ad bonum intelligibile: Atqui natura sensitiva non possidet, nec consequitur bonum sensibile per appetitum, sed per sensum, ut saporis gustatu, lucem visu, harmoniam auditu: Ergo & natura intellectiva intellectu bonum intelligibile possidet.

Confirmatur ex discrimine Intellectus & Voluntatis. Voluntas enim est inclinatio in objectum: unde S. Augustinus, *Amor meus pondus meum*; *ed feror quocumque feror.* At è contra Intellectus est apprehensivus objecti. Unde voluntatis est querere bonum intelligibile, ac in eo possessio & apprehensio quiescere: at verò proprium est intellectus bonum illud possidere. Atque vel id confirmat experientia. Nam quantumvis nervos omnes contendant voluntas, nunquam bonum intelligibile se ipsam consequetur, sed quandiu ejus cognitio deest, absens dicitur, & voluntas inquieta manet: at cum mente percipitur, tunc possideri dicitur, & motus voluntati quiescit.

Huc præcipuæ rationi quædam aliæ addi possunt.

1. Felicitas essentialiter consistit in operatione præstantissimæ facultatis; in subordinatis enim cætera ordinantur ad id, quod principalius est: unde meritis Aristoteles: *Ethic. c. 7. felicitatem definit operationem secundum perfectissimam virtutem*: Sed, ut ostendimus in fine Physicæ, intellectus est perfectior voluntate: Ergo in ejus actu Felicitas consistit.

2. Ut arguit S. Thomas 3. Contra Gent. c. 26. cum felicitas sit proprium bonum intellectualis naturæ, oportet, ut secundum eam potentiam ei conveniat, quod est

## De Felicitate Formali. Art. III. 67

est illi maxime & per se propria: Atqui potentia maxime propria intellectuali naturæ non est appetitus, sed intellectus. Ergo felicitas debet ei competere secundum operationem intellectus, & non appetitus, seu voluntatis. Declaratur minor. Quod est proprium rei ratione sui, est ei magis proprium, quam quod appropriatur ei tantum ratione alterius: Atqui intellectus est proprius intellectuali naturæ per se ipsum & ratione sui; appetitus vero non est ei proprius nisi ratione intellectus, quatenus ab eo dimanat, ipsumque participat: Ergo intellectus est maxime proprius naturæ intellectuali, non vero appetitus. Minorem luculenter ostendit, D. Thomas his verbis: *Appetitus omnibus rebus inest, licet sit diversimodè in diversis; quæ tamen diversitas procedit ex hoc, quod res diversimodè se habeant ad cognitionem. Quæ enim omnino cognitione carent, habent appetitum naturalem tantum: quæ vero habent cognitionem sensitivam, & appetitum sensitivum habent; quæ vero habent cognitionem intellectivam, & appetitum cognitioni huic proportionatum habent, scilicet voluntatem. Ergo voluntas secundum quod est appetitus, non est propria intellectuali naturæ, sed solum secundum quod ab intellectu dependet. Intellectus autem secundum se est proprius intellectuali naturæ.*

3. Demum contemplatio summi Veri, scilicet Dei, habet omnes conditiones ad veram felicitatem requisitas: nam præterquam omnia vitæ humanæ officia huic tanquam ultimo fini suo inserviunt, ut petelegantè ostendit D. Thomas 2. contra Gentes, c. 37. est radix omnium ad felicitatem consequentiam, ut amoris fructivi, quietis, satietatis sine fastidio, delectationis summæ, pacis, securitatis, amoris fructivi, &c. Obtinetque præterea quinque veræ felicitatis dotes à Boetio 3. de Consolationibus enumeratas, sufficientiam, quam promittunt divitiæ; jucunditatem, quam promittunt delictæ; celebritatem, quam promittit fama; reverentiam, quam promittit sapientia; securitatem, quam promittit potentia. Hæc quinque excellenter tribuit æterna, perfecta que Dei contemplatio. Sufficientiam quidem, nam per eam Deus habetur, qui solus sufficit. Et veritas perfectè cognoscitur, quod unum est intellectualis naturæ, quæ talis, vorum. Assert etiam jucunditatem; quia contemplatio veritatis est unica voluptas mentis. Dat quoque celebritatem, quia hominem clarum apud Deum & alias intel-

## 68 Tertiae Partis Philosophia. Qu. I.

seduales creaturas efficit. Dat etiam reverentiam: nam hæc sapienti, ac ei, qui Deo conjungitur, debetur; quis autem sapientior ac Deo conjunctior, quam qui Deum perfecte contempletur? Tribuit demum securitatem à malis & in bonis: nam summa illa contemplatio in præmium virentis in altera vita concessa, æterna est & inamissibilis, Deoque arctissime conjungit, in quo est omne bonum, ad quem nullum malum accedere potest.

Objl. 2. Felicitas essentialiter consistit in operatione ulterius non ordinata: Sed contemplatio Dei ordinatur ad amorem; nam, ut ait D. Anselmus in libro, *Cur Deus homo*, Perversus ordo est amare ad intelligendum, rectus vero intelligere ad amandum: Ergo felicitas essentialis non consistit in contemplatione, sed magis in amore.

Resp. Distinguo majorem: Felicitas consistit in operatione ulterius non ordinata, ut medium ad finem, concedo: ut causa ad effectum, & ut primaria operatio ad secundariam, quam perficit, nego. Et ad minorem, contemplatio Dei ordinatur ad ejus amorem, ut medium ad finem consequendum, nego; ut primaria operatio beatitudinis ad aliam ex ea consequentem, quam perficit, concedo. Amor enim Dei suspirat ad visionem ejus, ut ad finem & centrum, in quo quiescit, juxta illud Davidis, *Satiabor, cum apparuerit gloria tua*. At rursus ex ea visione amor completur & perficitur: unde secundum rectum ordinem visio tendit ad perfectionem amoris. Nec aliud evincit allata autoritas. Aliter exponi potest. Nempe de perfectione caritatis est, ut homo se & omnia sua, etiam propriam felicitatem ordinet in Deum. Et ideo perfecta Caritas non amat Deum propter visionem ejus, in qua est felicitas hominis secundum nos; immò nec ut eo viso delectabiliter quiescat, sicque eo fruatur, in quo Adversarii felicitatem constituunt sed potius ipsam visionem ac fruitionem Dei querit propter Deum, ut plenius ametur. Unde autoritas nihil juvat Adversarios: nam perinde dici potuisset, *Perversus ordo est amare Deum, ut eo fruaris, rectus vero, eo velle frui, ut firmitus ames*. Itaque non inde adstrui potest, essentiam beatitudinis consistere in amore; sed perfectum amorem in ipsa amanti beatitudine non sistere, sed eam ulterius ad Deum amatum referre, quod verissimum

## *De Felicitate Formali. Art. III. 69*

sumum est. Sed de his fufius Theologi.

Inftabis. Amor Dei perfectior est, perfectiùsque unit Deo, quàm quælibet cognitio, faltem extra intuitivam visionem: Sed contemplatio illa, de qua loquimur, non est ipsa Dei visio, cum hæc fit præmium in ordine gratiæ: Ergo amor est perfectior, perfectiùsque unit Deo, quàm talis contemplatio, proindeque aptior est, ut fit essentialis felicitas. Probaturs major: nam amor tendit in Deum ut est in se, ipsique immediatè unitur: at verò contemplatio extra visionem non tendit in Deum nec ipsi unitur ut est in se, sed solum ut repræsentatur per species creatas, id est, valde imperfectè.

Resp. Distinguo majorem: Amor perfectior est, perfectiùsque unit Deo, quàm cognitio extra visionem, in ratione possessionis & affectionis, nego; alio modo, transeat. Amor enim, quantumvis aliis prærogativis excellat, ex sui ratione non est possessivus & consecutivus, proindeque minus aptus, ut fit essentialis felicitas. Sicut & unio hypostatica, quamvis perfectiùs unit Deo, quàm ipsa supernaturalis visio; quia tamen non conjungit Deo ut bono intelligibili possessio, sed ut supposito sustentati, idcirco esse nequit essentialis felicitas.

Urgebis. Per contemplationem ( præcipuè quæ fit per species creatas, de qua solum loquimur ) anima non unitur Deo entitativè, sed solum intelligibilitèr & in esse intentionali: Ergo in illa nequit consistere essentialis felicitas.

Resp. Nego consequens. Ad felicitatem enim non requiritur unio entitativa, sed possessiva objecti beatificantis. Porro unio illa intentionalis & intelligibilis est possessio boni intelligibilis; sicut in natura sensibilium unio intentionalis & sensibilis est possessio boni sensibilis. Bonum enim naturæ intellectualis est veritas, quæ non nisi per unionem intelligibilem & actualem manifestationem possidetur. Unde S. Augustinus, *Summum bonum habere nihil aliud est quàm nosse*. Itaque quamquam naturalis cognitio Dei fiat per species creatas, attamen quia est intelligibilis Dei possessio, quantum potest in statu naturæ possideri, sufficit ad felicitatem ordinis naturalis.

Objic. 2. Ex S. Augustino lib. de Moribus Ecclesiæ.  
Bon-

Beatus dici non debet, qui non amat, quod habet, etiam si optimum sit, quod habet: Ergo felicitas non in eo consistit, ut summum bonum cognitione habeatur, sed ut cognitum & habitum ametur.

Resp. Distinguo consequens: felicitas consistit in eo, ut bonum cognitum ametur, tanquam in dispositione requisita, concedo; tanquam in essentia, nego. Nam essentia beatitudinis sita est in possessione boni, seu ut bonum habeatur. At requiritur ex parte subjecti, ut bene ad illud bonum se habeat, id est, ut amet illud; nec aliud intendit S. Augustinus.

Instabis. Anima separata, quantumvis Deum perfecte cognosceret in ordine naturali, posset ipsa non amare: Ergo posset esse non beata, proindeque felicitas naturalis non consistit in cognitione illa naturali, esse supernaturalis sita sit in visione, quam necessario consequitur amor. Probatur antecedens. Nulla quantumvis sublimis cognitio Dei extra claram visionem necessitat ad ejus amorem: Ergo posita illa cognitione naturali posset anima Deum non amare.

Resp. Nego antecedens. Ad probationem distinguo: nulla Dei cognitio extra visionem necessitat ad amorem ejus, omnimodum, id est, tam naturalem, quam supernaturalem, concedo; ad amorem naturalem, nego. Nam cum ea summa cognitio naturalis, quæ foret præmium ordinis naturæ, clarè suo modo manifestaret, Deum esse summum bonum ordinis naturæ, inferret quoque necessariò amorem ejus in ordine naturæ. Et ideo docent Theologi, quod Angeli, qui tali modo Deum cognoscebant, tanquam fierent visionis ejus participes, eum ut naturæ necessariò diligebant, atque ita in ordine naturali fuisse impeccabiles. Adde, quod Anima per separationem à corpore in æternum firmatur in bono amato. Cum ergo illa summa cognitio Dei, ut authoris naturæ non retribueretur, nisi his, qui Deum in via dilexissent, eos in æternum firmaret in amore Dei; sicque beatos efficeret, quia per eam Deum amatum, quantum naturaliter possibile esset, possiderent.

Dices. Felicitas consistit in actu omnium amabilissimo: Sed voluntas plus amat proprium actum, quam actum intellectus: Ergo felicitas non consistit in actu intellectus, sed voluntatis. Probatur minor. Nam

## *De Felicitate Formali. Art. III. 71*

Nam quælibet potentia plus amat proprium actum, quàm actum alterius potentie.

Resp. Nego minorem. Ad probationem dico, id verum esse cæteris partibus, & quando actus alterius potentie non est summum bonum suppositi. Contemplatio autem Dei, ut ostensum est, est summum bonum nature intellectualis; & ideo voluntas, quæ est inclinatio totius suppositi, ardentius amat contemplationem illam, quàm proprios actus.

---

## QUÆSTIO SECUNDA

### *De Actibus moralibus, seu de Voluntario, præcipuè Libero.*

**A**CTUM est de Ultimo Fine hominis. Nunc dicendum de moribus, quibus itur ad illam finem, seu de Actibus voluntariis & Liberis. His enim velut gressibus natura intellectualis pergit ad suum finem; suntque propriè materia & subjectum moralitatis, id est, bonitatis & malitiæ. Quamquam autem variae, præclarissimæque quæstiones agitari solcant circa actus voluntarios, quia tamen eas sibi vendicant Theologi, cæteris vel delibatis, ea solùm accuratiùs exsequemur, quæ maximè ad naturalem Philosophiam pertinent. Itaque dicenda tribus complectemur articulis. Primus erit de Voluntario in genere. Secundus de Voluntario Libero, deque Libertate, cujus notionem summè necessariam huc usque distulimus. Tertius de Actibus Voluntariis singulatim.

ARTICULUS PRIMUS.

*De Voluntario in genere, quid sit, à quibus tollatur, quomodo dividatur.*

**V**oluntarium definitur ex Aristotele 3. *Ethic. cap. 1.* Cujus principium est ab intrinseco, cum cognitione finis.

Explicatur ex D. Thoma 1. 2. q. 6. a. 1. Nomen *voluntarii* propriè importat, ut motus & actus sit à propria illius, qui movetur, inclinatione; proindeque perfectè à principio intrinseco: quippe ea, quæ ab intrinseco sunt, non sunt ex inclinatione, sed quasi ex violentia. Ad motum autem tria concurrunt, principium passivum, quod movetur; principium activum, quod movet; principium finale, quod excitat & allicit agens ad movendum. Ille ergo motus dicitur perfectè ab intrinseco procedere, proindeque voluntarius, cujus hæc omnia principia sunt ab intrinseco, ita ut in eo, quod movetur, non solum sit principium talis motus susceptivum, uti est in corpore cœlesti; aut etiam activum, uti est in omni motu vitali; sed etiam finale, uti est in agentibus cognitione præditis, quæ ex finis cognitione se movent ad agendum: ut animal ex cognitione cibi, qui est finis localis motus, se movet ad ejus persecutionem. Hæc autem omnia comprehendit jam data definitio, principium quidem passivum & activum, dum dicit, motum voluntarium esse, *cujus principium est ab intrinseco*; finale verò, dum additur, *cum cognitione finis*.

Ex ea Voluntarii notione deduci potest, à quibus tollatur Voluntarium, & Involuntarium inducatur. Ut ea tamen accuratius explicentur,

PRIMA CONCLUSIO.

**V**iolentia potius Voluntarium perimit, quæ tamen propriè talis est, nempe sufficiens & absoluta.

Conclusio supponit duplex genus Violentiæ. Alia *sufficiens* dicitur, S. Thomas *compellentem*, Juristas *abso-*



## *De Voluntario in genere. Art. I. 73*

*absolutam* vocant . Alia est , quam *insufficientem* dicunt , S. Thomas *impulsivam* vocat , Juristæ *conditionatam* . Violentia sufficiens , quam etiam *Physicam* propriè dixeris , est , cum actus aliquis vi ineluctabili à nobis invitis & repugnantibus extorquetur . Hæc locum habet solum in actibus externis , non in ipso voluntatis actu : repugnat enim , ut fiat nobis nolentibus , cum essentialiter sit voluntatis ; atque adeo non fit , si nolumus , hæcque nobis invitis fieri nequit . Violentia verò insufficientis est , quæ etiam *Moralis* dici potest , cum dolore , ac suppliciis consensus voluntatis extorquetur . Sic dum Tyrannus vim infert corpori , ut voluntatem adigat ad abnegandam fidem , violentia quidem est , sed insufficientis , impulsiva , conditionata , & moralis ; nam absolutè possumus id , quod exigitur , non agere . At si violentè arrepta magis cogatur ad impiam subscriptionem , aut si plena thure coram Idolo prunis aduratur , donec ignium ardore soluta in subjectis prunas thus emittat , palam est , esse violentiam sufficientem , compellentem , absolutam & physicam .

Dicimus itaque , hanc violentiam sufficientem perimere omnino Voluntarium . Siquidem contra rationem Voluntarii est , ut sit ab extrinseco , & renitente inclinatione . Sed quæ tali violentiâ extorquentur , sunt omnino ab extrinseco & renitente inclinatione : Ergo voluntaria non sunt , proindeque nec bona , nec mala moraliter . At quæ sunt per violentiam insufficientem , sunt tamen absolutè voluntaria : nam Voluntas absolutè potest non consentire ; atque adeo peccat , qui suppliciis impellentibus rei turpi consentit .

Dices . Qui suppliciis ad actus rei bonæ consentit , non propterea bene agit : Ergo nec malè , qui iisdem coactus rei malæ consentit .

Resp. Nego paritatem . Nam bonum ex integra causa , malum verò ex quovis defectu . Et ideo , ut quis bene agat , requiritur non solum , ut consentiat operi bono ; sed etiam , ut ex motivo honesto consentiat , quod non est in eo , qui solum suppliciis coactus bonum agit . At ut quis malè agat , satis est , ut contra officium volens agat , quovis motivo ad id ducatur . Itaque malè agit , qui ut fugiat dolorem , rei turpi consentit ; minuitur tamen inde operis malitia , quia minus voluntarium est .

## S E C U N D A C O N C L U S I O.

**I**gnorantia quoque perimit voluntarium, sed non omnis.

Explicatur simul & probatur conclusio. Triplex distinguitur ignorantia, Antecedens, Consequens & Concomitans. Ignorantia *antecedens* est, quæ nullo modo est volita, & est causa volendi aliquid, quod non eligeretur, si adesset cognitio: ut dum quis amicum in sylva latentem incautus percutit, putans esse feram. Ignorantia *subsequens* est, quæ aliquo modo est volita, vel expressè, ut illorum qui Job. 22. dicunt Deo, *Recede a nobis, scientiam viarum tuarum nolumus*: & illius, de quo dicit Scriptura, *Noluit intelligere, ut bene ageret*. Hæc dicitur *malitiosa & affectata*. Vel tacitè & interpretativè, ut in illis, qui socordiâ negligunt ea addiscere, quæ scire possunt & tenentur; hæc dicit *crassa*. Ignorantia demum *concomitans* dicitur, quæ quidem non est volita, sed supponit sufficientem curam, ut tollatur; est tamen causa volendi aliquid, quod perinde fieret, si cognitio adfuisset; ut dum quis irâ percussus hostem in sylva latentem quæritat ad Interimendum; at spe Inveniendi ademptâ venationi Incumbens, putansque in senticeto Aprum latere, telum vibrat, quo perimitur hostis, quæm si advertisset, perinde occidisset. His positis,

Constat 1. Ignorantiam antecedentem omnino tollere voluntarium, ac proinde rationem meriti & demeriti. Nam tollit omnino cognitionem, quæ est de ratione voluntarii, atque inducit ad opus voluntati repugnans. Constat 2. Ignorantiam consequentem non tollere proprius voluntarium. Nam cum volitum sit, censetur & volita, saltem in causa, quæ propter eam sunt.

At verò ignorantia concomitans, ut mediat inter antecedentem & concomitantem, ita medio modo se habet. Non enim tollit positivè rationem voluntarii, sicut antecedens. Nec efficit, ut actus ipse censetur volitus, sicut consequens, sed negativè se habet, efficitque, ut opus nec volitum, nec nolitum actu censetur.

**TERTIA CONCLUSIO.**

**M**etus minuit quidem Voluntarium, non tamen omnino tollit. Unde actio ex metu facta mixta est ex Voluntario & Involuntario.

Antequam probetur conclusio, tantisper explicanda est. Metus definitur, Passio causata ex malo impendente difficile. Alius dicitur gravis, & qui cadat etiam in vitium inconstantem; alius levis, & non cadens in constantem vitium. Metus gravis est, cum malum impendens est grave & certum: levis vero si malum impendens vel leve sit, vel incertum. Sape ergo metu alterutro extorquetur ab homine consensus in rem, quam abhorret; ut mercator metu naufragii pretiosas merces ad alleviandam navim projicit in mare. In quo quidem casu tria concurrunt. Primb amor minoris boni, scilicet mercium. Secundò amor majoris boni; scilicet vitæ. Tertio consensus in carentiam minoris boni ad conservandum majus. Dicimus ergo, hunc consensum metu extortum esse mixtum ex voluntario & involuntario.

Probatur. Quod est ex inclinatione, est voluntarium; quod vero est contra inclinationem, est involuntarium: Sed consensus ex metu partim est ex inclinatione, partim contra inclinationem: Ergo est mixtus ex voluntario & involuntario. Declaratur minor, ut enim mox notatum fuit, in agente ex metu duplex est inclinatio, alia major, qua vult servare v. g. vitam; alia minor, qua vult cum vita, si potest, retinere pecuniâ: Sed consensus in jacturam pecuniæ propter conservationem vitæ est juxta primam inclinationem, & contra secundam: Ergo est mixtus ex voluntario & involuntario.

Confirmatur. Nam ut peregre observat D. Thomas, actio ex metu est partim ab intrinseco, partim ab extrinseco: Ergo est partim voluntaria, partim involuntaria. Declaratur antecedens. Quod ex amore agimus, ab intrinseco agitur, quia amor est motus ab intimis voluntatis visceribus enascens; quod vero est ex metu, est quoadtenus ab extrinseco, quia metus est passio appetitui minimè naturalis, sed forinsecus ab urgente periculo intrusa: Atqui actio facta ex metu partim procedit ex

## 76 Tertiæ Partis Philosophiæ.Q.II.

amore servandi majus bonum, partim ex timore incurrendi malum: Ergo, &c.

Quæres. Cum actio ex metu sit mixta ex voluntario & involuntario, eñe dicenda simpliciter voluntaria, an involuntaria?

Respondeo cum Aristotele & D.Thoma, esse simpliciter voluntariam, & secundum quid tantum involuntariam. Quod enim attentis omnibus circumstantiis efficaciter est volitum, censetur simpliciter voluntarium; quod verò non nisi inefficaciter & conditionatè est non volitum, censetur solum secundum quid involuntarium. Cum igitur id, quod fit ex metu, ut projectio mercium in mare ad vitæ conservationem, attentis omnibus circumstantiis sit volitum, idque voluntate efficaci & inferente effectum; sit autem duntaxat inefficaciter & conditionatè non volitum, si scilicet esset alia evadendi commodior via, simpliciter est voluntarium, & secundum quid tantum involuntarium.

Inferes, in his, quæ sunt etiam ex gravi metu, esse sufficiens voluntarium, ut peccata sint, quando sunt mala: imò contractus factos ex gravi metu esse, validos; sunt etiam simpliciter voluntarii. Attamen sunt quædam, quæ ex natura rei plenum, perfectumque voluntarium requirunt, eo quod perpetuam & indissolubilem obligationem importent, cujusmodi sunt matrimonium & votum solenne: unde irritantur à jure, si fiant ex metu, non quidem levi, sed cadente in constantem virum.

## QUARTA CONCLUSIO.

**C**oncupiscentia non tollit, sed potius facit voluntarium. Ira D. Thomas 1.2.qu.6.a.7. Per concupiscentiam verò intelligitur motus appetitus sensitivi in bonum delectabile.

Probatur ratione D. Thomæ. Dicitur aliquid voluntarium ex eo, quod voluntas in id fertur: Arqui concupiscentia non impedit, sed magis facit, ut voluntas in aliquid feratur: Ergo non impedit, sed facit voluntarium. Declaratur minor ex discrimine, quod est inter metum & concupiscentiam. Metus enim non reddit  
opus

## De Voluntario in genere. Art. I. 77

opus gratum & amatum, sed solum invitam quadantenus voluntatem necessitatis vinculis trahit, ideoque opus ex metu remanet semper displicens, ac odiosum proindeque aliquatenus involuntarium. At verò concupiscentia movet ad opus reddendo illud gratum, quatenus suis illecebris inclinatur in illud voluntatem, ut in aliquid omnino amabile. Unde in his, quæ ex concupiscentia viciantur, voluntatis præcedens inclinatio emollitur, enervatur, expungitur, novaque illi subrogatur, quæ opus prius displicens, de novo gratum & amabile, proindeque voluntarium, fiat. Sic Davidi ardentem legem Delamanti concupiscentia ex aspectu Bethsabæe nata cor emollivit, & suis blanditiis ita subvertit, ut frigescente charitate, inardescente cupiditate, non invitum id, quod displicebat elegerit; sed mutatus id, quod antea nolebat, optaverit.

Dices 1. Concupiscentia diminuit peccatum; ut enim docet D. Thomas, magis peccat, qui transgreditur præceptum ex malitia, quam qui ex passione: Ergo diminuit voluntarium. 2. Concupiscentia diminuit cognitionem, ideoque dicitur *excacare*: Ergo non facit, sed potius impedit voluntarium.

Respond. Ad 1. Ideo concupiscentiam minuere peccatum, non quoddam diminuat rationem voluntarii, sed quia impedit perfectam deliberationem. In his enim magis meremur, aut demeremur, quæ ex pleniori iudicii deliberatione agimus. Resp. Ad 2. Cum D. Thomas 1. 2. q. 6. a. 7. ad 3. hanc ipsam diminutionem cognitionis esse aliquatenus voluntariam, quatenus voluntas passione præoccupata retrahit iudicium à diligenti examine. Unde talis inconsideratio non tollit rationem voluntarii.

Quantum ad voluntarii divisionem, primò dividitur in perfectum, & imperfectum. Voluntarium perfectum est, quod fit ex perfecta finis cognitione, id est, quod regulatur à cognitione, quæ attingit finem, non solum materialiter ejus bonitatem apprehendendo, sed etiam formaliter ejus merita ponderando, & cum mediorum utilitate conferendo. Tale Voluntarium solis agentibus intellectualibus competit, quia solius intellectus est rationem finis cognoscere, ac media in finem ordinare. Voluntarium imperfectum est, quod procedit ex imperfecta finis notitia, quæ scilicet finem, bonitatemque illius apprehendit, non tamen penetrat rationem

formalem finis ejus, cum mediis proportionem exami-  
nando. Tale Voluntarium reperitur in brutis, pueris,  
amentibus, motibus primò primis, &c. ac potius dicitur  
*Spontaneum*.

Dividitur secundò Voluntarium in *liberum & necessa-  
rium*. Voluntarium est, quod regulatur per judicium  
indifferens, & ita est sub potestate, dominioque volun-  
tatis, ut de eo ad beneplacitum disponat. Voluntarium  
necessarium est, quod regulatur per judicium ad unum  
determinatum, nec relinquit voluntati dominium de eo  
disponendi.

Dividitur tertio voluntarium in *formale & virtuale*.  
Voluntarium formale est, quod procedit à voluntate per  
actum proprium. Voluntarium verò virtuale est, quod  
procedit ex aliquo actu præcedente, in quo virtualiter  
includitur, & à quo sequitur. Sic dum quis iter facit,  
singuli passus dicuntur *voluntarii virtualiter*, quia proce-  
dunt ex voluntaria, efficaciæque intentione, qua se com-  
misit vitæ.

Dividitur quarto Voluntarium in *positivum & negati-  
vum*, seu, ut alii vocant, in *directum & indirectum*. Vo-  
luntarium directum & positivum est, quod fit per actus  
positionem, negativum verò & indirectum, quod fit per  
actus omissionem, quando scilicet aliquis tenetur, po-  
test, advertit, & tamen non agit, sed aliis intendit,  
censetur voluntarium indirectum & negativum.

Dividitur quinto in voluntarium *elicatum & impera-  
tum*. Voluntarium elicatum est actus ipse voluntatis, ut  
amor, odium, &c. Voluntarium imperatum est actus,  
quem alia potentia elicit ex applicatione voluntatis, ut  
ambulatio, comestio, locutio, &c.

Dividitur sexto Voluntarium in *Physicum & Morale*.  
Physicum est, quod est à voluntate propriæ personæ.  
Morale verò, quod fit per procuratorem, cui jus nostrum  
commisum est vel à lege, vel à natura, vel à nobis: sic  
dispositio tutoris est moraliter voluntaria pupillis, & di-  
positio magistratum totæ urbi.

ARTICULUS SECUNDUS.

*De Voluntario Libero.*

**E**TI de Libertate, quæ voluntatis dos est, agendi occasio sese superius obtulerit, cum de ipsa voluntate in fine Physicæ differebamus, opportunius tamen visum est, totius Moralitatis fundamentum, in Morali, tanquam in propria sede discutiendum, ac pro rei momento paullo accuratius, fusiùsque examinandum reservare. Quæ verò de Libertate dicenda occurrunt, quatuor complectemur paragraphis. In 1. Variæ Libertatis divisiones referentur. In 2. Radix & origo Libertatis arbitrii investigabitur. In 3. Discutietur, an Indifferentia sit de ratione Libertatis arbitrii. In 4. Quæ Indifferentia sit de ratione Libertatis.

S. I.

*De variis Libertatis divisionibus & acceptionibus.*

**C**UM Libertas opponatur Servituti, ac Subjectioni, à qua eximit, tot modis dicitur Libertas, quot modis Servitus & Subjectio. Servitus autem, seu subjectio voluntatis ex quinque præcipuè principiis oriri potest. Primò à principio externo cogente, ac violentiam inferente. Secundò à principio intrinseco ad unum naturaliter determinante & restringente, cujusmodi est naturalis instinctus, quo res non ex propria deliberatione, sed ex naturali dispositione ad aliquid rapitur. Tertiò à perverso habitu, aut passione voluntatem impellente, ac trahente, & à rectitudine morali dimovente. Quartò à lege obligante. Quintò à miseria & pœna invitum

## 80 Tertia Partis Philosophia. Q. II.

muldante , ac opprimente . His enim omnibus principiis voluntas obnoxia , subjectaque esse potest . Hinc oritur quintuplex Libertatis species . Prima dicitur *Libertas spontaneitatis & libentia* , consistitque in exemptione à violentia & coactione . Secunda dicitur *Libertas arbitrii* , consistitque in exemptione ab instinctu , naturalique judicio ad unum determinante . Tertia dicitur *Libertas virtutis & rectitudinis moralis* , quæ consistit in exemptione à peccato , & ab habitibus ad malum inclinantibus . Quarta dicitur *Libertas à lege* , consistitque in exemptione obligationis ad legem , superioremque præcipientem . Quinta dicitur *Libertas felicitatis* , consistitque in exemptione ab omni miseria & pœna . De singulis ut tantisper dicamur ,

Prima Libertas , *Spontaneitatis* scilicet , & *Libentia* , in omnibus reperitur , quæ non invito & per vim , sed sponte , ac ex inclinatione agunt . Unde competit etiam brutis , quæ agunt , non quasi ab extranea vi impulsæ , sed ab interiori instinctu , naturalique judicio determinata . Immo transfertur ad res cognitione prorsus carentes , ut aqua dicitur *liberè* fluere , & lapis *liberè* cadere , cum remotis obicibus naturæ suæ utrunque relinquatur . Dicitur quoque de omnibus illis animi nostri motibus , quos aut natura ipsa nobis indidit , ut est amor boni in communi , ( quæ est in voluntate , non tamen , ut ab ipsa ex proprio arbitrio excitatus , sed ut ipsi ingenuus , ac à natura indicus ) aut præsternus imperus à nobis abripit , quales sunt motus primò primi .

Secunda Libertas , *Arbitrii* scilicet , soli naturæ intellectuali comperit , quæ non operatur ex judicio sibi à natura præscripto , & instinctu ad unum necessariò applicante ; sed ex judicio à se formato , actuque , ad quem se ipsam per deliberationem applicat & determinat . Cum enim intellectualis natura ex naturali conditione circa bona particularia sit indifferens ; in tantum ad illa fertur , in quantum se ipsam per rationem determinat , conferendo de agendis , examinando rerum merita , penetrando habitudines , ac detegendo proportionem mediorum cum finibus , sicque judicium suæ actionis formando ; supra quod iterum reflecti potest , examinando , sive



## De Voluntario Libero, Art. II. 81

rectum an non ; & si visum fuerit , ipsum iterum emendando , abrogando reformando , suspendendo , prout placuerit . Hinc est , quod bruta quidem semper uno modo agunt , quia à natura iudicium & instinctum de rebus agendis acceperunt , quod ipsorum motui non subiacet , sed præsudet . Homines verò agunt diversis modis , quia se ipsos per arbitrium & proprium iudicium à ratione formatum determinant . Ratio autem ad diversissima viam habet ; reflectitur enim supra se , potestque rem uno modo constitutam reformare , abrogare & mutare , juxta quod exigunt rerum diversarum habitudines , ad quas attendit .

Tertia Libertas , à peccato scilicet , solis bonis convenit ; in quibus mitigantis passionum insanis moribus , & excusso peccati iugo , tranquillum est voluntatis , ac rationis regnum & regimen soli Deo subditum , ceteræ verò sibi subjiçiens . Ut enim notat D. Thomas , cum pax ex D. Augustino sit tranquillitas ordinis , ordo verò creaturæ rationalis in eo consistat , ut Deo subjiçatur , & cetera sibi subjiçiat , ejus pax & libertas sita est in perfecta subjectione ad Deum , & pacifica tranquillaque ceterarum rerum gubernatione , quæ pax & libertas per peccatum , & inordinatos passionum motus turbatur .

Quarta Libertas , scilicet à lege , primariò quidem & principalitè Deo convenit , qui nemini subditus , solus sibi ipsi lex est & regula : secundariò tamen , & participativè justis convenit . Justus enim , cum in Divinæ Naturæ quadantenus particeps , omnes affectus rectos habet , nec in his eger legis directione , sed ipse quædam lex & regula animata est , ut etiam sæpius annotavit Aristoteles . Unde licet nulla lex ei posita esset , quasi connaturaliter & ex propria inclinatione ea , quæ sunt legis servaret : quod præcipuè verum est in illo , qui justus est iustitiâ supernaturali , de quo loquendo dixit Apostolus , quod lex non est posita iusto , sed impii .

Quinta demum Libertas , scilicet à miseria & pena , illis comperit , qui ad felicitatem perfectam pervenerunt , ejus munus est , omnia mala , defectusque omnes procul abigere , & omnia bona largiri .

## 82 *Tertiae Partis Philosophia. Q. II.*

Unde hic quidem habetur in spe, sed in futuro solum habebitur in re.

Circa primum, tertium, quartum, & quintum Libertatis modum nihil speciale controversitur; ideoque totum difficultatis pondus ad solam arbitrii Libertatem tendit, quæ idcirco plenius discutienda nobis est.

### S. II.

#### *De Origine Libertatis Arbitrii.*

**J**ucundum est rerum radices scrutari & notitiam veluti ex fonte haurire. Nam *dulcius ex ipso fonte bibuntur aqua*. Sed accessum sæpe difficultas negat, quæ nullibi major est, quàm in ipsis rerum originibus, quas omnes profundâ quadam nocte, quasi de industria, Natura circumtexit. Verùm quia periti ducis sequentibus vestigia nihil invium & inaccessum esse potest, tentabimur in hoc paragrapho, præeunte D. Thoma, ipsos humanæ Libertatis fontes penetrare, origines quantumvis occultas lustrare, radices in ipsis, non terreæ, sed intellectualis naturæ visceribus latentes eruere, sicque Thomisticam Libertatis notionem ab ovo, primordialisque suis repetitam tradere, quæ nobis esse pro cardine possit in his difficultatibus, quæ circa Liberum arbitrium solent agitari.

Libertas propria voluntatis dos est, ideoque ab eodem fonte oritur, à quo & voluntas ipsa. Est autem voluntas. Inclinatorio consequens formam intellectualem & immaterialem. Unde consequens est, ut libertas quoque oriatur à forma intellectuali & immateriali. Id verò, ut alitèr repetatur, sciendum est, quodd, ut sèpissime inculcat D. Thomas, omnem formam sua sequitur inclinatio ipsi proportionata, ideoque juxta variam perfectionem formarum attenditur varietas & perfectio inclinationum. Formarum autem perfectio sumitur ex earum elevatione supra materiam. Quippe materia est, quæ limitat, deprimit, imperfectamque reddit formam, ut patet ex D. Thoma 1. part. quæst. 7. art. 1. Sicur & o-

mnis

## De Voluntario Libero. Art. II. 83.

minis potentia limitat, deprimit, imperfectumque reddit actum suum, ut generaliter S. Doctor 1. contra Gentes, cap. 43. ratione 4. Unde sicut actus tanto perfectior est, quanto à potentialitate purior; ita forma tanto nobilior, perfectiorque censetur, quanto altius è materiæ facibus emergit. Quod adhuc clariùs innotescet, si cum eodem D. Thoma 1. contra Gentes, cap. 43. ratione 3. advertamus, in rebus duo esse extrema, actum purum, scilicet Deum, in quo est tota essendi plenitudo; & potentiam puram, scilicet materiam primam, in qua nihil est de ente actu, quæque proinde vocatur à Sancto Augustino *prope nihil*. Unde quia media, quò propiùs accedunt ad alterum extremorum, eò magis naturam ejus sapiunt, ideo quanto magis aliquid materiæ immergitur, tanto magis minuitur, limitatur, deprimitur, ac annihilatur. E contra verò quanto longiùs aliquid à materia recedit, tanto propiùs ad Deum accedit, ideoque perficitur, dilatatur, ac de plenitudine entis in se capit.

Porro formarum è materia gradatim emergentium triplex est ordo, proindeque triplex inclinationum eas consequentiam gradus. In primo ordine sunt eæ formæ, quæ penitus in materia immerguntur, proindeque valde imperfectæ sunt, ac limitatæ. Ejusmodi sunt formæ elementorum, mineralium, plantarum, cæterarumque rerum insensibilium. Has formas sua sequitur inclinatio proportionata, quæ *appetitus naturalis* dicitur, & est cæcum aliquod pondus ad finem admodum limitatum inclinans, ut ad centrum, circumferentiam, aut aliquid hujusmodi. Quod pondus nihil juris, ac potestatis supra se rebus, quibus inest, relinquit, cum sit proprietas à natura indita, essentiam necessariò consequens, proindeque nullius, nisi Authoris naturæ, arbitrio subjacens. Unde in tali appetitu ne umbra quidem Libertatis, ac dominii apparet, sed solum cæca necessitas ad unum urgens & alligans, quod capitaliter repugnat Libertati. Ecce verba Divi Thomæ quæst. 23. de Veritate, art. 1. hanc doctrinam luculenter expendentis: *Res materiales, in quibus est, quidquid eis inest, quasi materia obligatum & concretum, non habent liberam ordinationem ad res alias, sed consequentem ex*

## 84 Tertia Partis Philosophia. Q. II.

necessitate naturalis dispositionis : unde hujus dispositionis ipsa res materiales non sunt sibi ipsis causa , quasi ipsa se ordinent ad id , ad quod ordinantur , sed aliunde ordinantur , unde scilicet naturalem dispositionem accipiunt .

In secundo ordine sunt etiam formae , quarum felicitas conditio est materiae facibus aliquatenus emergit , quaque medium obtinent inter formas purè materiales , & spirituales . Mundus enim , ut saepe annotavimus , non constat ex partibus dissipatis , sed miraculo unitis , ac compaginatiis : unde cum extrema uniantur per media , semper inter duo extrema medium aliquod utrique accedens Natura excogitat . Hæ igitur formae mediae quatenus à materia angustis sese eximunt , & ad spirituales formas accedunt , quandam amplitudinem obtinent , per quam possunt aliarum rerum formas intra se admittere , ac recipere , non secundum esse physicum , ( hac enim impossibile est ) sed secundum aliquod esse defæctius , quod vocatur esse intentionale : sic oculus omnis coloris expertus , omnium colorum formas intentionales admittit , & Imaginatio infinitis rerum formis , ut Protheus alter , figuratur . Has formas sua sequitur proportionata Inclinator , quæ appetitus sensibilis dicitur , qui aliquid amplitudinis & indeterminatæ obtinens , non ad unum cæco impetu rapit , ut appetitus naturalis , sed præeunte cognitionis luce ad varios actus & motus sese extendit juxta varias formas , quas appetens præcuncipit : quippe ut appetitus naturalis sequitur naturalem formam , ita ille sensibilis appetitus formam sensibus acceptam sequitur , & ad ejus variationem variatur . Id videre est in Canis , in quo apprehensio hero pacato sequitur inclinatio amoris , gaudii , blanditiarum ; viso eodem irato , sequitur inclinatio timoris & fugæ ; viso extraneo , sequitur inclinatio furoris , &c . In his tamen formis sicut non est perfecta supra materiam eminentia , ( quippe cum forma sensibilis à materia dependeat , tanquam ab organo & subjecto ) ita nec perfecta amplitudo , Indeterminatio , & libertas . Unde appetitus has formas consequens non ad omne bonum patet , sed intra limites boni sensibilis coercetur . Imò , cum inter tot bona sensibilia , quæ se offerunt , na-

tura

entia sensitiva discernere nequeat, quid sibi expediat, quidve noceat, (quippe cum discretio opus sit proprium rationis res invicem conferentis, ac merita cuiusque ponderantis). Ideo appetitus sensitivus regitur iudicio, instinctuque à natura inditis, & ad unum determinatis, quæ arbitrio naturæ sensitivæ non subiacent, sed ipsam naturam, ejusque appetitum sibi omnino subijciunt: Unde talis naturæ appetitus non est perfectè liber, sedque juris, nec se ipsum regit, sed ab Authore naturæ mediante iudicio, instinctuque naturaliter indito regitur. Ecce verba Divi Thomæ Quæst. 23. de Verit. art. 1. id totum egregiè declarantis: *In substantia sensitiva licet recipiantur formarum sine materia, non tamen omnino immaterialiter, & absque materia conditionibus (limitatione scilicet & imperfectione) ex hoc, quod recipiuntur in organo corporali. Et ideo inclinatio in eis non est omnino libera, quamvis in eis aliqua libertatis imitatio, & similitudo sit. Inclinantur enim per appetitum in aliquid ex seipsis, in quantum ex apprehensione aliquid appetunt. Sed inclinari in id, quod appetunt, vel non inclinari, non subiacet dispositioni propria: quia, ut inquit 1. part. quæst. 83. artic. 1. iudicant naturalis iudicio, & instinctu.*

In tertio demum, supremoque ordine sunt illæ formæ, quæ actui puro viciniore à materiæ facibus ita recedunt, ut etiam sine ullo ejus consortio subsistere possint, & *subsistentes* dicuntur: Ejusmodi sunt Anima rationalis & Angeli. Harum formarum latissima capacitas est, adeo ut licet ex conditione entis creari ad certum rei genus definiantur, suâ tamen vastissimâ amplitudine omnium omnino entium formas intelligibiliter recipere possint, ob quam causam Divus Thomas 1. part. quæst. 54. art. 2. eas infinitas esse dicit, non quidem secundum actualitatem entitativam, (id enim solius Dei est) sed secundum capacitatem intellectivam. Tales formas suarumque sequitur proportionata inclinatio, ideoque amplitudinis infinitæ, ac ad omne omnino bonum patrens. Unde si ad aliquid naturalem ordinem habeant, ac à natura ipsa determinentur, hoc solum est ad summum, universaleque bonum, quod naturaliter & necessario amant, habitu quidem semper, actum  
verè

## 86 Tertiæ Partis Philosophia. Qu. II.

verò cùm ipsis debite proponitur . Et hunc summi boni naturalem amorem pro arbitrio mutare non possunt , nec in ipsum jus , dominiumque obtinent , sed illum habent à natura inditum pro semine , ac principio omnium affectuum , ac motuum suorum . Oportet enim principia esse à natura , ut ait Divus Thomas 1. part. quæst. 82. artic. 1. quia natura est primum in unoquoque , proindeque principium aliorum . Cæterùm quantum ad omnia bona particularia , in quibus tota boni plenitudo non est , inclinatio ipsis præeminet , ac dominatur , ita ut possit vel ea diligere quatenus bona sunt , vel respicere qua parte sunt defectiva . Unde si ad illa feratur , id non est ex naturali determinatione , ac instinctu , sed ex propria electione , ac arbitrii nutu : unde circa talia bona liberrima est , tum quia ipsis præeminet , ac dominatur , tanquam sibi inferioribus ; tum quia ad ea non alligatur ; utpote suâ capacitate. minor ; tum quia ad illa ferrur non ex instinctu à natura sibi determinato , sed à se formato . Hæc inclinatio *voluntas* vocatur , quæ in tanta indifferentia & amplissima capacitate appetendi quidquid libuerit , ut dirigere , ac determinare se possit , à naturæ Authore non certum aliquod iudicium , ac particularem instinctum sortita est , sed rationem , intellectumque omni iudicio , instinctuque naturali universaliorē , quo deliberat , discutitque quid faciendum , fugiendumque sibi sit , sicque non à natura , sed à se ipsa , proprioque iudicio regitur . Imò quia iudicium illud est aliquod particulare bonum , de ipso per reflexionem disponere , judicareque possunt agentia tali intellectu , voluntateque prædita , illud emendando , revocando , morando , prout ipsis videtur ; sicque perfecte sui juris sunt , de suis motibus disponunt , plenumque sui iudicii , ac determinationis dominium obtinent , præter quod ad perfectam libertatis arbitrii rationem nihil aliud requiritur .

Ex his omnibus , quæ ad mentem Divi Thomæ paulo fusiùs pro rei momento ponderavimus , jam manifestè apparet , primam Libertatis radicem esse elevationem alicujus naturæ super materiam & causam verò propinquiorem esse amplitudinem tum cognitionis , quæ ad omne ens ferri potest ; tum iudicii , quod

cun-

cuncta, etiam seipsum per reflexionem, ad tribunal suum examinat; tum appetitus, qui ad omne bonum patet, ideoque particularibus bonis eminet & dominatur: Formale verò Libertatis arbitrii constitutivum consistere in pleno dominio supra proprios motus, seu in jure regendi seipsum, ac de propriis actibus disponendi, non ex naturali determinatione, sed ex propria electione. Propter quod Aristoteles 1. Metaphys. cap. 2. peregre dixit, *Liberum esse, quod est causa sui, & ex seipso agit*. Quippe, ut exponit Divus Thomas variis in locis, cum ad actionem tria concurrant, instrumentum exsequens, forma principaliter efficiens, & finis ad agendum movens, agentia libera hæc omnia ex se ipsis habent; nec enim solum motus suos exsequuntur, ac formas illos causantes per propriam cognitionem accipiunt, sed etiam sibi finem agendi præstituunt, in quem sese, ut libuerit, dirigunt. Videatur Divus Thomas 1. p. quest. 18. art. 3.

## §. III.

*An Indifferentia sit de ratione Libertatis arbitrii.*

**H**Æcenus dictum est de causa tum radicali, tum proxima, tum formali Libertatis arbitrii; nunc videndum, an in sua ratione includat indifferentiam. Quamquam autem ex jam dictis satis constet, naturalem determinationem ad unum capitaliter repugnare libertati, proindeque ad illam requiri indifferentiam aliquam, ut tamen id amplius expendatur, Libertatisque essentia luculentius innotescat, difficultatem ex professo movemus in hoc paragrapho: pro cuius intelligentia nomen, varique divisiones *Indifferentia* in ipso limine occurrunt explicandæ.

Indifferentia ex ipsa vi nominis est, qua unum perinde se habet ad plura: unde opponitur limitationi & determinationi ad unum. Quatuor modis dividi potest. Primum in indifferentiam *activam* & *passivam*. Indifferentia passiva est, quæ subjectum perinde se habet ad plura

rect-

## 88 *Tertia Partis Philosophia. Qu. II.*

recipienda. Indifferentia verò activa est, qua facultas activa perinde se habet ad plures effectus producendos: sic Cera dicitur passivè indifferens ad figuras omnes, quia eas indiscriminatim recipit; Sed verò activè indifferens ad indurandum & emolliendum, quia utrumque præstare potest.

Secundò dividitur Indifferentia in *objectivam* & *subjectivam*, seu *formalem*. Indifferentia objectiva est, qua objectum proponitur potentia, ut perinde se habens ad terminandos oppositos ejus actus, puta volitionem, aut nolitionem. Indifferentia subjectiva, seu *formalis*, est, qua potentia vicissim ex parte sui perinde se habet ad objectum vel acceptandum, vel respiciendum.

Tertiò dividitur in indifferentiam quoad *specificationem*, & quoad *exercitium*; seu, quod idem est, *contrarietatis*, & *contradictionis*. Indifferentia quoad specificationem, seu contrarietatis, est, qua potentia perinde se habet ad actus contrariæ speciei, puta ad amorem & odium. Indifferentia quoad exercitium, seu contradictionis, est, qua potentia perinde se habet ad ponendum, vel non ponendum eundem actum, ut ad amandum vel non amandum.

Quartò Indifferentia dividitur in *Physicam* & *Moralem*. Indifferentia Physica est facultas agendi, vel non agendi. Indifferentia Moralis est facultas bene, & malè agendi. His positis,

Duæ sunt oppositæ sententiæ. Prima est Jansenii, ac quadantenus Scoti. Contendit ille, ad rationem perfectæ libertatis arbitrii requiri solum lumen, directionemque rationis voluntati præfulgentis, ac exemptionem à coactione; adeoque voluntatem, modò hæc duo adfuerint, liberè velle, etiam quæ necessariò vult & absque indifferentia. Ex quo infert, Amorem, quo Beati Deum, & Deus seipsum amat, esse liberum, quamvis sit necessarius & absque indifferentia. Cæteri serè omnes Theologi, ac Philosophi aliquam indifferentiam ad libertatem arbitrii requirunt.



## C O N C L U S I O.

**I**ndifferentia est de ratione Libertatis arbitrii : unde quæ voluntas vult ex necessitate suæ naturæ , non vult liberè Libertate arbitrii , sed solum improprie dictâ , nempe libentis ac spontaneitatis .

Conclusio duo supponit . Primò , distinctionem Libertatis supra explicatam in Libertatem *Spontaneitatis* , & libertatem *Arbitrii* , ac solum de hac posteriore procedit .

Supponit secundò , Voluntatem ad aliqua inclinari naturaliter ex necessitate suæ essentis ; ad alia verò , cum sit naturaliter indifferens , sese propriâ electione determinare . Dicimus itaque Libertatem arbitrii locum non habere circa prima , sed solum circa secunda ; sicque ad eam requirit indifferentiam , saltem eam quæ excludit naturalem necessitatem ad unum determinantem .

Hæc suppositio cum liberi arbitrii notitiam , ac conclusionem illustret , operæ pretium fuerit paullo accuratius expendere ipsis Sancti Thomæ verbis Quæst. 22. de Veritate , art. 3. *In rebus* , inquit , *subordinatis oportet primum includi in secundo* , *et in secundo inveniri non solum id , quod sibi competit secundum rationem propriam , sed etiam quod competit secundum rationem primi* . Sic homini non solum convenit ratione uti , quod ei competit secundum propriam differentiam , quæ est rationale , sed etiam uti sensu & alimento ; quod ei competit secundum genus suum , quod est animal . . . *Natura autem & voluntas hoc modo ordinata sunt , ut ipsa voluntas quidam natura sit ; quia omne , quod in rebus invenitur , quidam natura est ; et ideo in voluntate oportet inveniri non solum quiddam est voluntatis , sed etiam quod est natura* . Hoc autem est injustum : *babet naturam creatam , ut à Deo sit ordinata in bonum naturaliter appetens illud : unde & voluntati ipsi inest naturalis quidam appetitus boni sibi naturaliter conveniens* . Et præter hoc *babet appetere aliquid secundum propriam determinationem & non necessitate , quod ei competit in quantum voluntas est* . Sicut autem est ordo naturæ ad voluntatem , ita se habet ordo eorum , quæ naturaliter vult voluntas , ad

## 90 Tertia Partis Philosophia. Qu. II.

ea, respectu quorum à se ipsa determinatur, & non ex natura; & ideo sicut natura est fundamentum voluntatis, ita appetibile, quod naturaliter appetitur, est aliorum appetibile principium & fundamentum. In appetibilibus autem finis est fundamentum & principium eorum, quæ sunt ad finem, eam, quæ sunt propter finem, non appetantur, nisi ratione finis; & ideo quod voluntas de necessitate vult, quasi naturali inclinatione in ipsum determinata, est finis ultimus, nempe beatitudo, seu, ut passim ait, (bonum universale, atque illud in quo clarè continetur omnimoda boni ratio: voluntas enim est essentialiter appetitus boni per intellectum apprehensum; & ideo ex sua essentiali ratione determinatur ad id, quod ei proponitur ab intellectu sub omnimoda boni ratione) Ad alia verò (nempe ad bona particularia) non de necessitate determinatur naturali inclinatione, sed propria dispositione absque necessitate. Hanc doctrinam passim repetit 1. p. quæst. 60. art. 1. & 2. quæst. 82. art. 1. 1. 2. quæst. 10. art. 1. & c. eamque illustrat ex analogia intellectus, qui naturaliter adhæret primis principiis, ac ex illis se movet ad assensum conclusionum: sic voluntas naturaliter inclinatur in bonum universale, seu finem ultimum, ac ex eo se movet & determinat ad bona particularia. Quippe Oportet, inquit 1. p. q. 82. art. 1. ut quod naturaliter convenit & immobiliter, sit fundamentum & principium omnium aliorum: quia natura rei est primum in unoquoque, & omnis motus procedit ab aliquo immobili.

Probatur sic explicata conclusio 1. Authoritate Sancti Thomæ, qui hic adeo expressus est, ut mirum sit, Janse-  
nium conari eum in suam pertrahere sententiam. Ex innumeris locis hæc duo sufficiant. *Liberum arbitrium*, inquit 1. p. q. 19. art. 1. habemus respectu eorum, quæ non necessarium volumus, vel naturaliter inclinari. Appetitus verò naturalis, ut ait q. 83. ar. 1. non subjacet libero arbitrio. Et q. 41. ar. 2. *Voluntas & natura secundum hoc differunt in causando, quia natura est determinata ad unum, sed voluntas non est determinata ad unum. . . Eorum igitur voluntas est principium, quæ possunt sic, vel aliter esse: eorum autem, quæ non possunt, nisi sic, esse, principium natura est.* Unde ubique opponit S. Doctor libertatem arbitrii naturali necessitati & determinationi ad unum, 1. p. q. 83. ar. 1. q. 24. de Veritate, ar. 5. & c.

Probatur 2. ejus ratione. Voluntas libera est libertate  
arbi-

arbitrii, cum agit ut voluntas se determinando: Atqui in his, quæ vult necessarid, naturaliter, & absque indifferencia, non agit ut voluntas seipsam determinando, sed ut natura ex sua essentia ad unum determinata: Ergo in his non est libera libertate arbitrii. Major est S. Thomæ, & constat. Nam libertas dos est voluntatis ut voluntas est: ut enim ait Quæst. 22. de Veritate, ar. 5. ad 7. *Hoc proprium est voluntatis in quantum voluntas est, ut sit dominus suorum actuum*, id est, libera. Unde agens naturale & agens liberum dividunt agens ut sic, ut genere & modo agendi diversa. Minor etiam est evidens: nam proprium est naturæ ad actionem determinari ex necessitate suæ essentia: voluntatis verò se ipsam determinare. Imò propriè libertas arbitrii sita est in jure sese determinandi, ut vel ipsa vox *Arbitrii sonat*.

Hoc argumentum acutè & profundè duobus verbis sic expressit Cajetanus 1.2. quæst. 10. ar. 1. Differt voluntas à natura, quòd natura causat, *quia est*, nempe ex necessitate suæ formæ naturalis, ac proinde necessarid unum, quia unius non est, nisi una naturalis forma; voluntas verò causat, *quia vult*, nempe non ex suæ naturalis formæ, sed ex propria determinatione: Atqui voluntas actum, ad quem non est indifferens, sed naturaliter necessitata, non causat præcisè, quia vult, id est, ex propria determinatione; sed quia est, id est, ex naturæ determinatione: Ergo illum non elicit liberè ut voluntas, sed naturaliter ut natura. Declaratur minor. Nam determinari est ejus, quod ante indifferens erat & indeterminatum, ut constat ex terminis: Ergo ut voluntas se determinet ad actum, oportet, ut ad illum ex sua natura sit indifferens: nam si ad illud naturaliter determinetur, determinatio non illius est, sed naturæ, in quam nullum jus habet voluntas.

Respondebis, naturam à voluntate differre, quòd illa cæco impetu, hæc verò agat cum luce & directione rationis; proindeque voluntatem non elicere has volitiones, ad quas necessitatur, ut naturam, sed modo voluntati proprio, cum in his à propria ratione dirigatur.

Sed contra. Etsi natura cognitione destituta cæco agat impetu, attamen hoc non est de ratione naturæ ut sic, sed solum ut agat ex suæ essentia determinatione. Hoc enim à natura est, quod à rei essentia necessarid pro-

92 *Tertia Partis Philosophia. Q. II.*

profuit. Unde in natura cognoscente motus illi naturales sunt, ac ab ea ut natura est procedunt, ad quos ex sua essentia determinatur, licet cognitionem supponant.

Confirmatur. Principium libertatis arbitrii non cadit sub libertate; eam enim antevertit: Sed volitiones illae naturales & necessariae sunt principia libertatis arbitrii, sicut quae sunt naturaliter nota sunt principia discursus, ut saepe ait S. Thomas: Ergo non sunt liberae libertate arbitrii.

Probatur 3. Conclusio. Liberum est libertate arbitrii, cuius domini sumus, quod est in potestate nostra, quod nostro subditur imperio & arbitrio, quod inest nobis à nobis: unde liberum definitur, *Quod est causa sui*: Sed volitio naturalis & necessaria his omnibus caret dotibus: Ergo non est libera libertate arbitrii. Major est per se nota: unde Liberum arbitrium à Græcis dicitur *αὐτεξούσιον*, id est, *quod sui habet potestatem* Minor quoad singula declaratur: nam cum natura sit primum in re, naturalia nostrum præveniunt dominium. Necessitas verbò legem & dominium nescit, ut vulgò dicitur & constat: unde hæc Axiomata per se nota S. Thomas admittit, *Nihil sua natura dominium habet*, 1. par. quæst. 60. art. 1. *Ejus quod ex necessitate est, non sumus domini*, 2. par. quæst. 82. art. 1. Nec iidem id in nostra est potestate, nec nostro subditur imperio, sed naturæ, quæ jus in sua nobis non sinit, sed præcipit, ac sibi uni veridicat. Unde illud vulgò tritum, *Quod natura dedit, tollere nemo potest*. Itaque hic voluntas non præest, sed naturæ, ac necessitati subditur & servit. Demum quod nobis naturaliter & ex necessitate inest, non est nobis à nobis, id est, ut à nobis causatum, sed ut à natura datum. Unde in naturalibus agimur potius, quàm agamus. Hinc Sanctus Thomas 3. Eth. cap. 11. *Si operari est in nostra potestate, oportet, quod non operari sit etiam in nostra potestate; aliud operari non esset à nobis, sed ex necessitate*. Et 1. par. quæst. 82. artic. 1. *Sumus Domini nostrorum actuum secundum quod possumus hoc, vel illud eligere*.

Ex his colligitur, ad libertatem arbitrii, præter exemptionem à coactione, quæ omni voluntario essentialis est, duo requiri. 1. Lumen ac directionem rationalis. 2. Indifferentiam à naturali necessitate ad unum deter-

determinante. Hæc enim necessaria sunt ad plenum actus dominium. Lamen quidem, directioque rationis, ne caro brutalique impetu abripiantur, sed disponamus de nostro actu tanquam nos regentes, nostrique compotes. Indifferentia verò à naturali necessitate, ut agamus ex nostra, non ex naturæ determinatione, ita ut tota ratio, cur actus sic fiat potius, quàm aliter, sit, quia volumus, id est, nostra electio; non verò quia sumus, id est, naturalis conditio. Horum quodvis desit, deest arbitrii libertas. Defectu prioris conditionis motus primi primi non sunt liberi, quia plenam advertentiam præcurrunt. Defectu posterioris, amor beatitudinis non est liber, quia voluntas ex natura sua ad illum determinatur, ac necessituratur, habitu quidem semper; actu verò, quando est in aliqua dispositione, inquit S. Thomas 1. 2. q. 10. ar. 1. ad 2. id est, cum ea res, in qua est beatitudo, evidenter ei ab intellectu proponitur.

Obijcit. Jansenius lib. 6. de Gratia Christi, integram Iliadem auctoritatem S. Augustini, ex quibus hoc argumentum pro Epiphonemate eruit. Omnis volitio est essentialiter libera, etiam perfectà, seu arbitrii libertates. Sed non omnis volitio est cum indifferentia, ut constat de amore beatitudinis & Dei clarè visi: Ergo indifferentia non est de ratione libertatis. Sic probat Majorem. Liberum est libertate perfectà, quod est in nostra potestate. Sed omnis volitio est essentialiter in nostra potestate: Ergo est essentialiter libera. Major constat. Minorem sic probat. Illud est in nostra potestate, quod fit, cum volumus, & non fit, cum nolumus: Sed omnis volitio est talis, ut constet ex terminis; si enim nolumus, non erit volitio, sed nolitio: Ergo omnis volitio est in nostra potestate. Minor constat. Major verò usurpatur à S. Augustino ut principium certissimum in Lib. de Spiritu & Litera. *Hoc, inquit, quisque in sua potestate habere dicitur, quod si vult facit; si non vult, non facit.* Unde concludit Lib. 3. de Lib. Arbit. c. 3. *Voluntas ergo nostra nec esset voluntas, nisi esset in nostra potestate.* Quia, ut inquit lib. 3. de Civit. Dei, c. 10. *Si volumus est; si nolumus, non est.* Idem sexcentis in locis inculcat.

Ad hoc argumentum, quod Jansenii Achilles est, Resp. Nego majorem. Ad probationem, nego minorem. Ad ejus probationem, distinguo majorem: Illud est in nostra potestate, quod fit, cum volumus, ita ut tota ratio, cur fiat

## 94 Tertia Partis Philosophia. Q. II.

fiat potius, quàm non fiat, sit, quia volumus, concedo; si tota ratio, cur fiat potius, quàm non fiat, non sit, quia volumus, sed quia ita sumus à natura determinati, nego. Itaque hoc S. Augustini principium verissimum est, modò verba in sensu formali accipiantur. Quod enim quisque si vult, facit, si non vult, non facit, hoc in ejus est potestate & arbitrio, modò fiat præcisè, quia vult; at si volendi necessitas ei à natura imponatur, ea jam volitio non est in ejus arbitrio & potestate electiva, sed in naturæ necessitate. Nec de tali volitione propriè dici potest, *Fit, si velimus; non fit, si nolimus*: Sed potius dicendum, *Natura facit, ut velimus, & ut non velle non possimus*. Porro quod non velle non possumus, nemo dixerit in nostra esse potestate, nec hoc unquam dixit S. Augustinus.

At ne quis de ejus mente dubitet, ea constat ex ipso Libro 3. de Libero Arbitrio. Nam cum Evodius ibi cap. 1. hoc principium ut per se notum posuisset, *Nulla culpa, proindeque nulla arbitrii libertas, deprehendi potest, ubi natura, necessitasque dominatur*; illud non reprehendit, sed admittit Sanctus Augustinus, ac fatetur, quòd si voluntas à naturali necessitate ad bona commutabilia converteretur, jam ea volendo non peccaret. Sed cap. 17. contendit, ideo peccare, quia non naturà & necessitate, sed proprià determinatione ad ea fertur, nec alia ulterior causa dari queat, cur avarus v.g. ultra modum pecuniis inhiat, quàm quia vult. Cæterùm fatetur, quòd si hujus volitionis causa alia esset, quæ huic voluntati interservisset, puta, natura ipsa, jam peccatum non esset, nempe defectu libertatis. Unde tandem concludit: *Hoc brevissimum tene: Quacunque ista causa est voluntatis, si non ei potest resisti, sine peccato ei ceditur. Si autem potest, non ei cedatur, & non peccabitur. Quis enim peccat in eo, quod nullo modo caveri potest? Peccatur autem: caveri igitur potest. Ut autem ait Lib. 1. de Spiritu & litera cap. 30. Cùm potestas datur, necessitas non imponitur.*

Fatendum tamen, Sanctum Augustinum in sua cum Evodio disputatione lib. 3. de Lib. Arb. cap. 3. paullo lautius hoc principium extendere, *Nos id habere in potestate, quod, cùm volumus, adest*; atque iude concludere, omnem volitionem esse in potestate, quia cùm volumus, adest, ideoque liberam esse. At tunc latius sumit liberum pro voluntario, seu pro eo, quod est juxta inclina-

tio-

tionem voluntatis. Unde Evodius, aut potius ipse Sanctus Augustinus in persona Evodii, non ita acquievit huic suo ratiocinio, quin rursus cap. 17. quærat, an volitio, ut ut libera, & in potestate nostra dici possit, esset tamen libera libertate sufficienti ad peccandum, id est, libertate arbitrii, si ex necessitate inesset voluntati ab aliqua altiori causa. Ad quod respondet, quodd si hæc volitio insita esset voluntati ab aliqua causa, ita ut voluntas oppositum non posset velle, omnino culpabilis non esset, nec proinde libera libertate arbitrii. Ex quo constat, Sanctum Augustinum ut certum supponere, ad libertatem arbitrii requiri indifferentiam à naturali necessitate, nec proinde sensitse, volitiones, ad quas voluntas naturaliter determinata est, esse liberas libertate arbitrii, sed solum libertate latius sumptâ, seu libentia.

Instabis. Amor beatitudinis est ex naturali conditione voluntatis; Sed amor beatitudinis est perfectè liber, ut sæpe Sanctus Augustinus & D. Thomas innuunt? Ergo etiam volitio procedens ex natura voluntatis est libera,

Respond. 1. Distinguo minorem: Amor beatitudinis est liber, libertate naturalis inclinationis & spontaneitatis, concedo; libertate dominii & arbitrii, nego. Solutio patet ex dictis, & est expressè S. Thomæ 1. part. quæst. 81. artic. 1. ad 3 ubi ait: *Appetitus ultimi finis* (id est, beatitudinis) *non est de his, quorum dominus sumus.*

Respond. 2. Distinguo eandem minorem: Amor beatitudinis est liber, quoad specificationem, nego; quoad exercitium, subdistinguo: si summum bonum, in quo est beatitudo, clarè proponatur voluntati, nego; sin minus, concedo. Voluntas enim ex naturali sua conditione determinatur ad amandum summum bonum, seu beatitudinem; & ideo non est libera quantum ad speciem actûs, quem debet habere circa illud: hic enim necessariò debet esse amor. Sed quantum ad aduale exercitium illius actûs, voluntas non est naturaliter necessitata pro omni statu, sed solum quando rem, in qua est summum bonum, evidenter proponit intellectus: tunc enim naturali impetu in illud voluntas rapitur; imò tunc ipsum exercitium amandi pertinet ad fruitionem summi boni, ideoque non

non magis repudiari potest, quàm ipsa beatitudo oblata recusari.

Urgebis. Amor summi boni clarè visus, scilicet Dei, qualis est in Beatis, est necessarius quoad exercitium. Sed talis amor est liberrimus: Ergo cum omnimoda necessitate stat libertas. Minorem probare nritur Janse-  
nius variis Divi Augustini testimoniis, sed nullum satis expressum & apertum refert. Præcipuum desumit ex lib. 22. de Civit. cap. ultimo, ubi sic habetur: *Erit una & inseparabilis in beatis voluntas libera fruens indeficienter æternorum iucunditate gaudiorum*. Addit præterea Divum Thomam sæpe dicentem, *Beatos liberè Deum amare*; imò Qu. 18. de Pot. ar. 2. ad 1. *Deum liberè seipsum amare*.

Resp. 1. Solutione jam data, hæc intelligenda esse de libertate spontaneitatis & naturalis inclinationis, non verò dominii & arbitrii.

Respond. 2. Quòd si aliquando uterque sanctus Doctor videatur docere, beatos liberè amare Deum, etiam libertate arbitrii hoc intelligendum est de Deo, ut est ratio diligendi bona creata. Nam beati amant Deum propter se, & alia propter Deum. Quantum ad primum non sunt liberi libertate arbitrii, sed feliciter necessitati. Quantum ad secundum, liberrimi sunt etiam libertate arbitrii. Sed de his ad Theologos, ad quos etiam objectiones remittimus, quæ ex libertate divina solent desumi.

Repones. Sanctus Thomas 1. par. quæst. 82. artic. 1. & quæst. 23. de Verit. art. 4. dicit, quòd naturalis necessitas non repugnat libertati; sed sola necessitas coactionis. Atqui nec Deus seipsum, nec beati Deum amant necessitate coactionis, sed quasi naturali: Ergo hic amor liber est.

Respond. Distinguo maiorem: necessitas naturalis non repugnat libertati spontaneitatis, libentia, ac ut loquitur Sanctus Thomas, naturalis inclinationis, concedo; libertati arbitrii, subdistinguo, repugnantia contrarietatis, concedo; repugnantia diversitatis specificæ & impossibilitatis in eodem actu, nego. Seu, ut distinguit Cajetanus, non repugnat libertati arbitrii, causaliter, concedo; formaliter, nego. Non enim fieri potest, ut volitio, ad quam voluntas necessitetur naturaliter, sit libera libertate arbitrii;

at-



## De Voluntario Libero. Art. II. 97

attamen fieri potest, Immo necesse est, ut omnis volitio libera reducat ad aliquam naturalem, ut supra explicuimus: & ideo hæc volitiones non opponuntur causaliter, nec contrariè, quia non est alterius causa, & cum ea in eodem subjecto reperitur.

Dices. Christus liberè, etiam libertate arbitrii, adimplebat præcepta Patris: Sed ad ea implenda non erat indifferens; non enim fieri poterat, ut ea transgredere-tur, aliàs peccare potuisset: Ergo indifferentia non requiritur ad libertatem arbitrii.

Resp. Distinguo minorem: Christus non erat indifferens ad præcepta Patris, indifferentiâ Physicâ nego; indifferentia morali, concedo. Non enim humana Christi voluntas naturali necessitate, sed summâ tuâ morali rectitudine determinabatur ad præceptum implendum: unde poterat actum oppositum facere, sed non malè. Porro, ut infra ostendemus, non est de ratione libertatis arbitrii, sed ejus defectus est, posse actum malè facere. At hæc operosius Theologi.

Obj. 2. ex D. Thoma in 2. Dicitur 25. q. 1. art. 4. *Libertum arbitrium dicitur ex eo, quod cogi non potest*: Ergo ad libertatem arbitrii sufficit exemptio à coactione, nec proinde requiritur indifferentia.

Respondeo, distingo antecedens: Libertum arbitrium dicitur ex eo, quod cogi non potest, adequatè, quasi sola exemptio à coactione sit totale constitutum liberi arbitrii, nego; aliàs enim appetitus brutorum esset liber libertate arbitrii, cum & ipse cogi non possit. Dicitur inadæquatè & partialiter, ita ut inter alia ad libertatem arbitrii requiratur exemptio à coactione, concedo, & nego consequentiam. Libertum arbitrium duo præcipuè dicit, exemptionem à coactione, & à naturali determinatione ad unum. Verum quia illi, contra quos agit D. Thomas loco citato, non negabant, Immo supponebant: liberum arbitrium esse indifferens ad utrumlibet, sed solum contendebant ad unum cogi posse ab extrinseco, ut per efficien-tem concupiscentiam, per Angelorum inspirationem, per cœlestem influxum, ut illos refuter, solum expressè statuit coactionem capitaliter repugnare libertati arbitrii, prindeque ab his exterioribus motivis ipsum cogi non posse, sed solum moraliter inclinari.

## S. IV.

*Quæ Indifferentia sit de ratione Libertatis.*

**C**onstat igitur, ad libertatem arbitrii aliquam indifferentiam omnino requiri. Verum quia superius plures indifferentiæ modos attigimus, superest determinandum, quinam ex illis & requiratur, & sufficiat ad perfectam libertatem. Pro solutione.

## PRIMA CONCLUSIO.

**I**ndifferentia objectiva requiritur ad libertatem arbitrii. Unde impossibile est, ut voluntas liberè, libertate arbitrii, feratur in objectum, quod sibi necessariò proponitur ut omnimodè bonum & amabile; sed solum liberè feratur in illa bona, quæ sibi proponantur, ut quædantenus bona, & quædantenus à bonitate deficientia, vel secundum veritatem, vel saltem secundum apparentiam.

Probat. Voluntas non est libera circa objectum, in quod naturali necessitate feratur: Atqui voluntas naturali necessitate fertur ad objectum sibi sine indifferentia, seu sub omnimoda ratione boni propositum: Ergo ad illud non est libera. Major constat ex superiori §. Minorem sic peregre probat S. Thomas 1.2.q.10.art.2. his verbis *In motu cuiuslibet potentia à suo objecto consideranda est ratio, per quam objectum movet potentiam; visibile enim movet visum sub ratione coloris actu visibile; unde si color proponatur visui, ex necessitate movet ipsum, nisi aliquis visum avertat, quod pertinet ad exercitium actus. Si autem proponeretur aliquid visui, quod non omnibus modis esset color in actu, sed secundum aliquid esset tale, secundum autem aliquid non tale, non ex necessitate visus tale objectum videret. Posset enim intendere in ipsum ex ea parte, quæ non est coloratum in actu; & sic ipsum non videret. Sicut autem coloratum in actu est objectum visus, ita bonum est objectum voluntatis: unde si* pro-

## De Voluntario Libero. Art. II. 99

proponatur aliquod obiectum voluntati, quod sit universaliter bonum, & secundum omnem considerationem ex necessitate voluntas in illud tendit, si aliquid vult; non enim poterit velle oppositum. Si autem proponatur sibi aliquod obiectum, quod non secundum quamlibet considerationem sit bonum, non ex necessitate voluntas fertur in illud.

Confirmatur. Voluntas, non est libera libertate arbitrii respectu obiecti, cui non dominatur & præminet, sed potius de necessitate subicitur. Atqui voluntas non præminet & dominatur obiecto sibi sine indifferentia & cum omnimoda bonitate ac amabilitate proposito, sed potius ei de necessitate subicitur: Ergo ad libertatem arbitrii requiritur, ut obiectum proponatur cum indifferentia, & non cum omnimoda bonitate, ac amabilitate. Major nota est ex terminis, quippe cum libertas arbitrii sit idem, ac libertas domini, proindeque præminentia: non enim dominamur, nisi his, quibus præminemus, quæque nobis subjacent. Minor verò suadetur. Omnis potentia de necessitate subicitur suo adæquato obiecto, & omne mobile suo sufficienti motivo: sed omnimoda bonitas est obiectum adæquatum, & motivum sufficiens voluntatis: Ergo voluntas de necessitate subicitur obiecto sibi proposito cum omnimoda bonitate. Minor est per se nota. Voluntas enim est appetitus summi & universalis boni: unde bona quidem indifferentia & particularia non adæquantur voluntati, nec sufficienter eam movent; bene tamen bonum omnimodum & perfectum. Major verò declaratur. Dominium enim & subiectio, sicut actio & passio, sunt à proportionem majoris inæqualitatis, ut loquuntur Philosophi, ita ut, quod fortius est & superius agat & dominetur; quod verò inferius & debilius, patiatur & subiciatur: Atqui omnis potentia necessarîo inferior est suo obiecto adæquato, & omne mobile debilius est ad resistendum; sufficiens vero ejus motivum fortius ad movendum: Ergo potentia de necessitate subicitur suo obiecto adæquato, & mobile suo sufficienti motivo. Hanc rationem duobus verbis expressit D. Thomas 1. p. q. 82. art. 2. ad 2. *Movens*, inquit, tunc ex necessitate causat, motum in mobili, quando potestas moventis excedit mobile, ita quod tota ejus possibilitas moventi subdatur. Cum autem possibilitas voluntatis sit respectu boni universalis & perfecti, non subicitur ejus possibilitas

*tota alicui particulari bono ; & ideo non ex necessitate movetur ab illo . At verò , inquit , 1. 2. q. 10. art. 2. & 3. Bonum perfectum de necessitate movet voluntatem .*

Confirmatur amplius ex eodem S. Doctore . Eatenus actus voluntatis est liber , quatenus iudicium , à quo procedit , est liberum & in potestate voluntatis : Atqui iudicium non est liberum & in potestate voluntatis , si desit indifferentia objectiva : Ergo indifferentia objectiva requiritur ad libertatem . Major , quæ est D. Thomæ 1. p. q. 83. art. 1. & Quæst. 24. de Veritate , art. 2. ex eo constat , quòd iudicium intellectus sit regula voluntatis , immò radix , origo , causaque libertatis , ut ostendimus §. 2. Minor verò videretur nota ex terminis , quippe cum libertas iudicii in eo sita sit , ut objectum judicari possit indifferenter bonum & amabile : unde tollitur per hoc , quòd iudicium sit necessariò determinatum ad iudicandum aliquid omnimodè bonum & amabile .

Obji. contra hanc rationem . Ex D. Thomæ locis mox citatis , iudicium in potestate nostra & liberum est , secundum quod possumus de eo iudicare per reflexionem , & quatenus formatur à ratione per collationem : Atqui possumus iudicare per reflexionem de iudicio , licet careat indifferentiâ , ipsumque per collationem rationis formamus : Ergo tale iudicium est liberum . Major est D. Thomæ . Minor verò ex eo constat , quòd ratio sit supra suos actus , etiam necessarios , reflexiva , & de rebus iudicet cognoscendo & conferendo invicem earum habitudines .

Resp. Nego minorem quoad utramque partem . Cum enim , ut millies reperit D. Thomæ , voluntas proportionetur intellectui , & agibilia speculariilibus , sicut in speculariilibus ratio non iudicat de primis principiis , sed secundum ea de cæteris iudicat , nec illa cognoscit per collationem , sed per naturalem determinationem : ita in agibilibus primum iudicium , quo iudicamus , bonum adequatum & omnimodum esse necessariò amandum , non formatur per collationem , sed per naturalem determinationem ; nec est in nostra potestate , ut de eo propriè iudicemus , ac deliberemus , sed secundum ipsum de aliis omnibus agilibus iudicamus & deliberamus : Per quod etiam patet ad probationem . Quamvis enim intellectus reflecti possit supra iudicium necessarium , reflexio-

sione cognoscitiva, cognoscendo scilicet ipsum; non tamen cognitione judicativa & deliberativa: nam principium deliberationis & iudicii agibillum non cadit sub deliberatione. Nec similiter tale iudicium fit per collationem, quia collatio agibillum fit, quatenus conferuntur media cum fine: unde iudicium necessarium de ultimo fine non habetur per collationem, sed per naturalem determinationem.

Obj. contra conclusionem. Liber est, qui ex seipso agit, qui est causa sui, qui seipsum disponit, ac regit ex proprio iudicio, & non ex alieno praescripto: Atqui ille, qui agit sine indifferentia objectiva, nihilominus ex seipso agit, est causa sui, seipsum ex proprio & non ex alieno iudicio dirigit, ac disponit: Ergo stat libertas sine indifferentia objectiva. Major est ipsa notio libertatis arbitrii. Minor vero suadetur. Beatus v. gr. qui movetur ad amorem Dei, apprehendendo ipsum ut omnimodè bonum & amabilem, proindeque absque indifferentia, immò cum summa necessitate objectiva, nihilominus ex seipso producit hunc amorem, ac in illum se movet ex proprio iudicio, ponderando scilicet divinae bonitatis merita; & illi necessarium, ac summum amorem impendendo, quia videt, ac iudicat illam summo, necessarioque amore dignam: Ergo in tali amore Beatus est causa sui, seipsum perfectè dirigit, ac de actu suo disponit, non ex alieno, sed ex proprio iudicio.

Confirmatur. Eatenus agens intellectuale ab Aristotele & D. Thoma dicitur causa sui, seque disponens, & proinde liberum, quatenus ex se habet non solum executivum principium, & formam principalem sui motus, sed etiam principium finale, quo se movet: Atqui beatus necessariò iudicans, Deum amandum esse, habet tamen ex se non solum principium executivum illius amoris, scilicet voluntatem, formamque intelligibilem, à qua causatur talis amor, scilicet objectum per intellectum apprehensum, sed etiam principium finale illius, divinam scilicet bonitatem à se cognitam, ut dignam tali amore: Ergo in tali amore est perfectè liber.

Resp. Nego minorem. Ad probationem respondeo, Beatum se habere ad Divinam Bonitatem, proportionem servatam, sicuti non beatus se habet ad beatitudinem.

finem in communi, & ad universale bonum; quippe videt evidenter Beatius, Deum esse ipsissimam beatitudinem & universalem in se colligere, ac comprehendere bonitatem; unde sicut in amore beatitudinis in communi & universalis boni voluntas non se movet per propriam deliberationem, ac determinationem, sed necessario movetur, & à natura determinatur, ut superius fuisse ostensum; ita nec Beatus producit amorem Dei charè vult, sese movendo cum domino & per propriam determinationem, sed tanquam raptus à magnitudine bonitatis objecti, ex ipsa voluntatis per charitatem elevatæ naturali determinatione: unde in forma vel negari potest antecedens, vel ita distingui: Beatus ex se producit amorem Dei, ac in illum se movet ex proprio iudicio, *vitaliter & elicte*, producendo scilicet actum vitalem consequentem ad proprium iudicium, concedo; se movet *appliance & determinativè*, sibi finem præstituendo ac determinando, ac de suo actu disponendo cum domino & præ eminentià supra objectum & iudicium formale de objectu, ut requiritur ad libertatem arbitrii, nego. Solutio patet ex dictis. Quod verò additur, Beatum se movere ad talem amorem ex ponderatione, ac veluti libratione sui amoris & meritorum divini bonitatis, formaliter loquendo; falsum est. Quamvis enim particulares fines & bonitates voluntas libet & ponderet consultando, deliberando, & æstimando earum amabilitatem ex proportionem, quàm habent cum ultimo fine, perfectæ scilicet & universali bonitate, quæ est mensura aliarum; attramen universalis bonitas evidenter proposita voluntati, non subiacet ejus ponderationi, ac examini, sed potius eam sibi subijcit, ac immenso pondere abripit.

Per quod etiam patet ad confirmationem. Distinguenda enim est ultima pars minoris: Beatus ex se habet principium finale sui amoris, Divinam scilicet bonitatem, ut vitaliter cognitam, concedo; ut sibi ex proprio arbitrio pro fine præstitutam, seu præ aliis statutam ac determinatam, nego, & nego consequentiam. Ut enim aliquis dicatur ex seipso habere finale principium sui actus, proindeque perfectè causa sui; perfectè liber, non satis est, ut finem, ejusque bonitatem cognoscat, sed oportet ut illum sibi

ex

## *De Voluntario Libero. Art. II. 103*

ex proprio arbitrio præstatur, id est, præ aliis statuat ac determinet, deliberando & eligendo ipsum; non verò in illum sibi à natura determinatum, ac constitutum ex necessitate tendendo. Cum ergo Beatus amet Divinam Bonitatem, non ut per deliberationem eligens ipsam, sed ut necessario raptus ab ea, & ex naturæ suæ determinatione ad illam amandam necessitatus, non dicitur propriè habere à seipso, & in sua potestate principium finale talis amoris.

Dices, Ex S. Thomæ 1. 2. q. 10. art. 2. aliisque in locis, voluntas à nullo objecto necessitatur quoad exercitium: Sed, ut infra dicitur, ad libertatem satis est non necessitati quoad exercitium; Ergo ex S. Thomæ voluntas libera est circa objectum etiam sub omnimoda boni ratione propositum; sicque ad libertatem non requiritur indifferentia objectiva.

Resp. 1. Cum Cajetano, S. Thomam velle solum necessitatem quoad exercitium, etsi semper sit circa summum bonum ut tale ab intellectu judicatur, non oriri effectivè ab objecto, sed esse ex ipsa voluntatis natura. Nam intellectus movet solum voluntatem quoad specificationem; ad exercitium verò actus ipsa movetur vel à se, vel à propria natura, vel à Deo.

Resp. 2. S. Thomam spectare voluntatem pro eo statu, in quo potest applicare, vel non applicare intellectum ad cogitandum de summo bono. Tunc enim potest seipsam indirectè retrahere ab ejus actuali amore, avertendo intellectum, ne de eo cogitet. Ceterum supposito, quod intellectus objectum ut summè bonum voluntariè proponat, nec possit à voluntate averti ab eo judicio, ut contingit in Beatis, quorum mens à nulla re potest averti à summi boni contemplatione, voluntas in illud tendit necessariò etiam quoad exercitium.

SECUNDA CONCLUSIO.

**I**ndifferentia formalis & subjectiva est de ratione libertatis arbitrii.

Conclusio patet ex dictis. Tum quia hæc sequitur ex objectiva : unde utriusque est par ratio. Tum quia ad libertatem arbitrii necesse est, ut voluntas indifferenter tendat in obiectum, ut superius ostensum est : non potest autem indifferenter tendere in obiectum, nisi ipsa sit formaliter indifferens. Tum demum voluntas eatenus est libera, quatenus ex proprio arbitrio se determinat. Ergo necesse est ad libertatem, ut antequam se determinet, sit ex se ipsa formaliter indifferens.

TERTIA CONCLUSIO.

**I**ndifferentia moralis, seu ad bene, vel malè agendum, non est de ratione, sed potius de imperfectione libertatis.

Conclusio est communis, quam D. Thomas tradit in 2. Dist. 25. q. 1. art. 2. ad 2. his verbis : *Ad rationem liberi arbitrii non pertinet, ut indeterminatè se habeat ad bonum & malum.* Et patet tum in Christo, tum in Deo, tum in Beatis, in quibus ita perfectissima libertas arbitrii cum summa impeccabilitate, & sine indifferentia ad malum.

Probat 1. Ratione D. Thomæ 2. p. q. 62. art. 8. Sic se habet liberum arbitrium ad eligenda ea, quæ sunt ad finem, sicut ratio ad deducendas conclusiones ex suis principiis : Atqui non pertinet ad perfectionem, sed ad defectum rationis, quod prætermisso principiorum ordine malè inferat conclusionem : Ergo nec pertinet ad perfectionem, sed ad defectum libertatis arbitrii, quod possit prætermisso finis ordine, malè media eligere, sicque peccare.

Probat 2. Ratione, quam D. Thomas insinuat in 2. Dist. 25. qu. 1. art. 1. Non est de ratione potentia in bonum ordinata, quod tendat & desinat in malum : Sed  
li.



## De Voluntario Libero. Art. II. 105

liberum arbitrium ordinatur in bonum, sicut & ratio in verum: Ergo non est de ratione liberi arbitrii, quoddam tendat in malum peccando; sicut nec de perfectione rationis, ut tendet in falsum.

Confirmatur. Tum ex definitione liberi arbitrii ex D. Thoma deprompta, qua dicitur Facultas electiva mediorum servato ordine finis: Ergo non est perfectio, sed defectus, quoddam peccando possit turbare ordinem finis. Tum quia liberum arbitrium constituitur per dominium supra proprios actus: Atqui ad rationem dominii non pertinet potestas abutendi, sed solum utendi: Ergo ad liberum arbitrium, non requiritur potestas abutendi actu suo, peccando. Tum demum quia liberum arbitrium non tendit in malum, nisi quia intellectus decipitur apprehendendo illud ut sibi bonum: nam omnis peccans ignorans: Atqui deceptio intellectus non est de ratione liberi arbitrii, sed potius quidam ejus defectus, sicut defectus est, quoddam pes regitur ab oculo caligante, & exercitus ab imperatore imperito: Ergo non est de ratione liberi arbitrii, ut possit declinare in malum: unde D. Anselmus lib. de Liber. Arb. cap. i. *Nec libertas, inquit, nec libertatis pars est posse peccare*; sed solum ut notat D. Thomas, quoddam ejus signum, sicut agriculus est signum vitæ.

### QUARTA CONCLUSIO.

**A**D Libertatem arbitrii non requiritur necessarium differentia contrarietatis, seu quoad specificationem; sed sufficit indifferentia contradictionis & quoad exercitium. Conclusio etiam communis est.

Probatur. Indifferentia contradictionis & quoad exercitium sufficit ad perfectum dominium: Ergo ad libertatem arbitrii. Probatur antecedens, tum ex D. Thoma 2. contra Gentes, cap. 47. ubi inquit: *Spiritualis substantia domina est actus sui, quia in ea existit agere & non vivere*. Tum ratione: Hoc ipso enim, quoddam exercitium actus non sit voluntati ex necessitate præscriptum, voluntas censetur in componendo perfecte sui juris, quatenus non solum in eo per lumen rationis se dirigit, sed etiam de eo ad arbitrium disponit, ipsumque elicit, non quia est &

ex naturae determinatione, sed quia vult ex proprii consilii determinatione.

Quæres, quomodo definiatur liberum arbitrium.

Respondetur, cum varii varias definitiones afferant, præ cæteris placere eam, quæ ex D. Thoma circumferatur, quam supra insinuavimus, quæque dicitur, Facultas electiva mediorum servato ordine finis. Per *media* intelliguntur omnia bona particularia, in quibus tota ratio bonitatis evidenter non refucet. Per *finem* verò, finis ultimus, id est, bonum perfectum, seu Beatitudo.

Hæc autem definitio explicari potest cum S. Thoma 1. part. quæst. 83. art. 4. aliisque in locis, ex collatione voluntatis cum intellectu. Voluntas enim sequitur intellectum, ipsique proportionatur. Unde sicut in facultate intellectiva duo munera distinguimus, primum cognoscendi principia naturaliter evidenter, & secundum hoc munus facultas intellectiva dicitur *Intelligentia*; alterum deducendi conclusiones ex his principiis, & secundum hoc munus dicitur *Ratio*, seu *Discursus*. Ita in facultate volitiva duplex est munus, primum appetendi ultimum finem, alterum ex finis amore se movendi ad eligenda media. Facultas appetitiva sub primo munere retinet commune nomen *voluntatis*; sub secundo verò propriè dicitur *liberum arbitrium* unde liberum arbitrium est Facultas eligendi, ac determinandi media ex præconceptis finis Intentione; sicut ratio est facultas deductiva conclusionum ex principiis per se notis. Unde, ut epilogicè jam dicta colligimus, sicut inferre conclusiones legitimo principiorum ordine prætermisso non est de perfectione rationis: ita nec est de perfectione arbitrii prætermisso finis ordine media eligere, sicque peccare. Et sicut prima principia sunt naturaliter nota, & non per discursum: ita & ultimus finis est naturaliter volitus & non per liberum arbitrium: unde sicut ratio non est de principis, ita nec liberitas arbitrii de fine ultimo. Sed sicut ratio negotiatur de conclusionibus, ac seipsam movet & applicat ad illas assentiendum: ita & voluntas deliberat de his, quæ sunt ad ultimum finem; & se movet & applicat ad ea eligenda, ex amore ultimi finis. Et denique sicut intellectus non semper actu assentitur Principiis, sed solum quando sibi debite proponuntur: ita voluntas, etsi naturaliter tendat in ultimum finem perfectamque bonitatem, non tamen quod exercetium semper.

## *De Actibus voluntariis. Ar. III. 107*

semper ipsam vult, sed solum quando sibi debere præsentatur. Sicque apparet mirabilis contextus doctrinæ Thomisticæ circa libertatem; respondent enim extrema primis, media utrisque, omnia omnibus. Ex hisque, quæ pro rei momento fusiùs prosecuti sumus, mirum in modum elucescunt alia pleraque dogmata cum libertatis doctrina connexa, quæ imperiti tantoperè exagitant, ac reprehendunt, eo quodd prætermisâ verâ liberi arbitrii notione, rudem quandam & spuriam ejus ideam sibi con-  
finxerint.

### ARTICULUS TERTIUS.

#### *De Actibus Voluntariis speciatim.*

**U**T de Actibus Voluntariis speciatim aliquid dicamus, in primis notum est, actum voluntarium, alium esse elicitedum, id est, ab ipsa voluntate productum, ut *amare*; alium verò imperatum, id est, ex voluntatis applicatione ab alia potentia factum, ut *loqui*. Actus eliciti, de quibus solis agere suscepimus, (quippe cum imperati rationem voluntariis ab illis totam habeant) sunt sex, tres circa finem) scilicet simplex Volitio, In-  
sentio, & Fruitio, & tres circa media, scilicet Con-  
sensus, Electio, & Usus. His accedunt ex parte in-  
tellectus sex alii dirigentes, quorum tres etiam versan-  
tur circa finem, tres circa media. Horum omnium œco-  
nomia & ordo, ut ob oculos ponatur, colligendi, ac di-  
rigendi sunt ejusmodi motus animi nostri, qui ita sibi  
succeedunt & insubulantur, ut semper actum voluntatis  
præcedat aliquis actus intellectus dirigens ac regulans, vi-  
cissimque omnem actum intellectus, excepto primo,  
præcedat aliquis actus voluntatis applicans, ac vigorem  
& exercitium inspirans: quippe, ut ad intellectum  
pertinet ordo, directio, & objectiva specificatio actuum  
voluntatis; sic rursus ad voluntatem spectat applicatio  
& exercitium aliarum potentialium, etiam ipsius in-  
tellectus. Omnes itaque actus, qui ad opus morale  
concurrunt, tum ex parte intellectus, tum ex parte  
voluntatis, sunt præcipuè duodecim, qui in triplici

elasse ita disponuntur, ut alii finem respiciant, alii circa media assumenda negotientur, alii executionem perficiant.

Primo igitur eorum ducit ex parte intellectus Simplex boni Apprehensio, qua aliquid, ut bonum percipitur & voluntati proponitur, cui statim secundò respondet ex parte voluntatis Simplex Volitio, id est, complacentia in bono presentato, quæ si sit fortis, excitat & applicat intellectum ad examinandum, num illud bonum sit adeptu expediens & possibile; sicque tertio sequitur Judicium, quo intellectus bonum proponit voluntati, ut adeptu expediens & possibile, cui iudicio ex parte voluntatis succedit quarto intentio boni per media assequendi.

Post ejusmodi quatuor actus, qui sunt circa finem, succedit negotiatio de mediis. Unde quinto in vi intentionis applicatur intellectus ad investiganda media ad consequendum finem opportuna, qui actus Consilium, seu Consultatio dicitur, cui ex parte voluntatis correspondet sextò Consensus, quo voluntas approbat, seu potius appetit utilitatem illorum mediorum; In vi cuius consensus, seu appetitus approbatiui movetur intellectus ad media illa examinanda & discernenda, discutendo, quæ sint aptiora & commodiora, si tamen plura sint, nec omnia possint adhiberi; sicque fit septimus actus, scilicet Judicium discretivum mediorum, cui ex parte voluntatis correspondet octavus actus, qui dicitur Electio, per quam voluntas unum medium præ alio acceptat.

Hi quatuor actus sunt circa media in finem ordinanda, quibus expeditis manus, ut ita dicam, operi admoveatur. Nam in vi & efficacia electionis movetur intellectus ad intimandam executionem mediorum electorum: sicque fit nonus actus, scilicet Imperium, cui ex parte voluntatis respondet decimò Usus Activus, quo voluntas applicat potentias executivas ad assumenda, exsequendaque media. Huius activæ applicationi respondet undecimò in potentis voluntati subditis Usus passivus, id est, assumptio mediorum in virtute voluntatis applicantis facta, qua mediante duodecimò tandem finis, in quem tota illa series actuum collimabat, acquiritur, ac possidetur, in qua possessione jucundè quiescit voluntas, quæ jucunda quies vocatur Fructio.

Ex

## *De Actibus voluntariis. Ar. III. 109*

Ex his apparet voluntatis, ac intellectus mutua dependentia, & processus, ac ordo, qui in humanis negotiis servari solet, saltem dum prudenter, ac ratione maturâ & non præcipiti festinatione, aut solâ imaginatione procurantur: quippe cum plures hominum sint, qui passionibus & imaginatione abrepti, vix ullum legitimi ordinis vestigium tenent, nullo consilio, nullâ rerum faciendarum ponderatione, discussione, ac electione sese regentes; attamen etiam in hominibus prudentissimis hi omnes actus ita subito sunt, ac sine mora sibi succedunt, imò inobservabilibus discriminibus miscentur, ut eorum ordo, ac distinctio vix agnosci, etiam ab ipso operante, possit.

Ut de præcipuis aliquid attingamus, Volitio definitur, simplex voluntatis complacentia in bono per intellectum præsentato. Duplex distingui solet, prima & secunda. Secunda volitio est, ad quam ex alia priore movemur: quippe, ut in arbore ex uno ramo nascuntur alii; sic ex una volitione alia pullulant, ut ex volitione voluptatis sequitur volitio pecuniæ, qua res voluptuose coemi possint. Prima verò volitio est, quæ ex alia non pullulat, sed ex qua cætera oriuntur, & hoc vel simpliciter & in tota vita, qualis est primus ille affectus, quo puer rationis compos recenter effectus suam voluntatem, ut ita dicam, primò experitur; vel post omnis actus interruptionem, ut est illa volitio, quam evigilantes primò formiamus, vel pro aliquo particulari negotio, ut est illa, quæ nobis alia agentibus, circa novum negotium cum illis, quæ gerimus nullatenus connexum primò incidit; verbi causâ dum cui venationem rôto studio exercenti subito incidit & cogitatio, & volitio deferendi seculum, ac religiosæ vitæ amplectendæ. De his omnibus primis volitionibus perpetuò, & constantissimè docet Divus Thomas, quod licet vitaliter producantur à voluntate, attamen ad illas voluntas non se movet & applicat, sed applicatus speciali quodam instinctu ab Authore suo, scilicet Deo; qui instinctus non est tantùm physicæ præmotorio, qua omnis causa ad omnes & singulos actus applicatur à Deo, sed aliqua motio longè specialiter, quæ sibi actum ita vindicat, ut nullum locum sese ad hunc applicandi relinquat voluntati.

Porro hanc veritatem, quam Theologi fusius expendunt,

## 110 *Tertia Partis Philosophia. Q. II.*

dunt, Divus Thomas variis rationibus demonstrat 1.  
par. quæst. 82. artic. 4. 2. 2. quæst. 9. art. 4. & 3. contra  
Gentes, cap. 88. aliisque in locis. Præcipuum sunt, cum  
ea, quæ petitur ex proportionem intellectûs & volun-  
tatis, qua fit, ut sicut intellectûs se ipsum quidem mo-  
vet ex assensu principiorum ad assentiendum conclusio-  
nibus; sed ad assensum principiorum movetur & appli-  
catur præcisè ab Authore suo; ita voluntas seipsam qui-  
dem ex una volitione ad aliam applicet, sed ad primam  
applicetur tantùm a suo Authore. Tum quia in tantum  
aliquid se movet, in quantum est in Actu: Atqui vo-  
luntas ante primam volitionem non est in actu, sed so-  
lùm in potentia: Ergo non potest movere se ipsam, sed  
eget moveri ab Authore suo. Tum quia in omni vita  
primus illius vitæ motus est à generante, ut patet in  
motu cordis: Sed Deus est author, & genitor vitæ in-  
tellectuális: Ergo primus motus illius vitæ, id est,  
prima cognitio intellectûs, & prima volitio voluntatis,  
ei specialiter debetur. Tum quia omne multiforme va-  
riabile, defectibile, & contingenter conveniens, de-  
bet reduci tanquam in principium in aliquid uniforme,  
indefectibile, ac naturaliter conveniens, proindeque  
datum ab Authore naturæ: Sed ceteri voluntatis motus  
sunt multiformes, variables, contingenter convenien-  
tes: Ergo reduci debent in aliquem primam unifor-  
mem, indefectibilem, naturaliter convenientem, ac  
ab Authore voluntatis specialiter inditum. Tum de-  
mum quia voluntas se movet & applicat mediante con-  
silio: Sed primam volitionem nullum potest præcedere  
consilium, ut de se patet, cum illa sit radix & origo  
totius consultationis: Ergo ad primam volitionem vo-  
luntas non se applicat, sed ab alio, Authore scilicet  
suo, applicatur & movetur. Unde sicut in formatione  
fœtus primò apparet pulsus cordis à generante inditus,  
qui est radix vitæ, spirituum officina, fons & origo vi-  
taliū motuum; ita pariter in voluntate primus affe-  
ctus, qui est omnium affectuum semen, vitæque appe-  
titivæ fons & origo, nobis specialiter inest à Deo, ac  
deinde per consilium & deliberationem intellectûs se se  
explicat, ac diffundit in eam affectuum seriem, quæ  
perpetuâ concatenatione ad remotiora volenda nos du-  
cit, & infinitis implicat negotiis. Sed de his fusiùs in  
Theologia.

Inten-

## De Actibus voluntariis. Ar. III. 111

Intentio definitur potest, Efficax voluntatis tendentia in finem per media consequendum. Quippe simplex illa boni complacentia, quam supra descripsimus sub nomine *volitionis*, accedente iudicio de possibilitate consecutionis boni, crescit, roboratur, ac firmatur in constantem appetitum finis per certa media consequendi, sicque fit Intentio, quæ quidem principaliter est de ultimo fine, ætamen etiam esse potest de finibus intermediis, qui & ipsi intendi possunt, quatenus per quadam media obtinentur.

Consilium dirigit electionem, ideoque definitur, Inquisitio, seu deliberatio de mediis eligendis. Est actus intellectus practici, qui ut perfectus, consummatusque sit, tribus gradibus constare debet. Primus est investigatio mediorum. Secundus examen & ponderatio utilitatis cujuslibet. Tertius iudicium dictans voluntari, quodnam sit de pluribus mediis assumendum, in quo iudicio tota consultatio consummatur. Ex his patet, consilium esse tantum de mediis, quippe cum finis sit basis & principium totius consultationis, sub qua proinde non cadit; sicut in speculabilibus principia discursus non cadunt sub discursu, sed ad ipsum supponuntur. Patet etiam, consilium non esse de rebus jam determinatis & certis, aut quæ non sunt in nostra potestate. Etenim quæ sunt certa & determinata, inquisitione non egent, quæ verò non sunt in nostra potestate, non possunt à nobis assumi ad consequendum finem. Consilium autem est inquisitio mediorum assumendorum.

Consensus sequitur consilium. Cum enim per consultativam inquisitionem plura media congrua voluntari proponantur, voluntas eorum utilitatem approbans dicitur consentire. Est autem propriè *consentire* cum alio *sentire*, & quasi in alterius sententiam ire; unde consensus est propriè voluntatis eorum, quibus intellectus tanquam utilibus assentitur, approbatio. Tunc enim voluntas dicitur cum intellectu sentire, & quasi in sententiam ejus ire; & ideo consensus pertinet ad voluntatem, sicut assensus ad intellectum. Præclare autem notat Divus Thomas 2. 2. quæst. 13. artic. 4. consensum ultimam, & quem statim sequitur actio & electio, pertinere ad rationem superiorem. Id patet tum experientia, qua sentimus, quod quantumvis tumultuentur poten-

tia

tim inferiores, nunquam tamen proceditur ad actum, quantumvis in promptu sit, nisi consentiat suprema mentis pars, qui cæteræ subjacent. Tum etiam ratione. Cum enim consensus in actum sit finalis sententia, ad illam animi partem spectare debet, quæ de omnibus finaliter judicat. Hæc autem est suprema ratio, à cuius tribunali provocari non potest. Unde peccatum non censetur consummatum, donec superior pars animæ ipsi vel tacite, vel expressè consentiat. Ex quibus habetur, hos omnes motus inimiciæ, iræ, concupiscentiæ, &c. hæc omnes cogitationes infidelitatis, blasphemiarum, impudiciarum, &c. quæ frequenter miserum hominem invadunt, premunt, turbant, confundunt, non esse peccata, nisi accedat suprema illius partis cæteras applicantis consensus, vel expressus, in eis complacendo, vel tacitus ea, ut debet, non resutando. Quæ quidem refutatio perficitur, non anxiam mentis contentione, impediendo, ne occurrant, hoc enim impossibile plerumque est, (nam ut in hydræ capitibus, uno resecto aliud pullulat) sed generoso dissentio, renuendo approbationem tum in opus, tum in delectationem, & ad meliora mentem convertendo.

Electio definitur ab Aristotele 3. Ethicorum, Desiderium præconscriptum. Ex qua definitione, ista erui potest, Electio est unius præ alio discretiva quadam acceptatio: unde debet supponere consilium dirigens, proindeque propriè non est in brutis, quæ non consilia, sed naturæ instinctu reguntur. Grandis quæstio est circa electionem, possitne voluntas ex duobus mediis minus bonum eligere. Hanc in Theologia fusiùs discuti solitam ut breviter attingamus, in primis certum est, id, quod est minus bonum in se, imò quod ut tale judicatur in communi, aliquando præligi posse majori bono, quippe cum voluntas non sit eorum, quæ bona judicantur absolute & in communi, sed nobis & hic, & nunc in particulari. Unde merito Poeta inducit Medeam dicentem.

..... *Videò meliora, proboque,  
Deteriora sequor.*



## De Actibus voluntariis. Ar. III. 113

Ceterum fieri nequit, ut quod hic & nunc ultimato iudicio minus eligibile, id est, minus bonum bonitate utilitatis iudicatur, præeligatur alteri, quod magis eligibile iudicatur. Tum quia electio est appetitus præcon-  
siliati, id est, in consultatione prælati. Tum quia vo-  
luntas, cum supponat, ac sequatur intellectum, eo mo-  
do tendit in bonum; quo tendendum dicitur intellectus.  
Ergo impossibile est, ut si intellectus diceret, aliquid  
præeligendum & aliud postponendum, voluntas istud  
præeligat, illud postponat; idque, ut mittam varias alias  
efficacissimas rationes. Verum quia id, quod secundum  
unam considerationem iudicatur minus bonum & vile,  
secundam aliam iudicari potest melius & utilius, saltem  
ad exercendam libertatem, ideo præligi quoque potest.  
Ex quo etiam solvi possunt, quæ in oppositum obijci so-  
lent.

Imperium definiri potest cum Divo Thoma 2.2, q. 170.  
Intimatio ordinativa efficaciter movens ad agendum.  
Explicatur definitio. Postquam enim finis intentus, me-  
diaque electa sunt, oportet, ut imperium fiat ad execu-  
tionem mediorum, & finis affectionem. Hunc impe-  
rium executivum incipit imperium quatenus id, quod  
ordinatum est à ratione, & approbatum à voluntate, pro-  
mulgat, intimat, &, ut loquitur D. Thomas Quæst. 22. de  
Verbo. art. 3.2. ad 4. distribuit potentis executivis. Un-  
de in Imperio tria sunt, intimatio rei faciendæ, ordina-  
tio subditorum in id, quod faciendum est, & demum ap-  
plicatio ad opus. Illa enim intimatio & ordinatio non de-  
bet esse purè instructiva & indicativa, qualem sonat mo-  
dus iudicativus, *hoc est faciendum*; sed excitativa, effica-  
citerque applicativa ad opus, qualem exprimit modus  
imperativus, *fac hoc*. Hæc autem tria explicat definitio  
tradita.

Ceterum cum in actu Imperii aliquid voluntaris re-  
luceat, & aliquid intellectus, ambiguum est, ad quam  
potentiam substantialiter pertineat. Divus Thomas di-  
cit, esse actum intellectus voluntatem præsupponentis.  
Ratio huius est, quia imperium est essentialiter intima-  
tio ordinativa applicans ad opus: *intimare* autem, & *or-  
dinare* pertinet ad intellectum, *applicare* verò ad volun-  
tatem. Unde substantia actus imperii spectat ad intel-  
lectum, efficacia verò, quam habet ad applicandum  
ad opus, derivatur à voluntate, ab ipsa scilicet electio-  
ne,

## 114 Tertiae Partis Philosophia. Q. II.

ne, quæ cum præcedat imperium, ipsi suam efficaciam inspirat: quia, ut optimè dicit Divus Thomas, *In subordinatis virtus prioris remanet in posteriori*. Unde prudentia, quæ est virtus bene præceptiva, residet in intellectu.

Ufus definitur, Applicatio rei ad operationem. Unde quia proprium munus voluntatis est applicare ceteras potentias, ideo usus propriè est actus voluntatis.

Fruitio definitur, Quies & delectatio in fine, & bono præsentis. Unde cum bonum & finis dupliciter haberi possit, vel secundum esse intentionale per spem, vel secundum esse reale per veram possessionem, duplex quoque distinguitur fruitio. Altera imperfecta & quasi deliberativa, qua delectamur in bono in spe possesso, sicut dicit Apostolus, *spe gaudentes*. Altera perfecta, qua iureundè quiescimus in bono secundum rem obrento. Cum autem fruitio à fructu deriveretur, videtur idem esse, ac fructus perceptio: fructus verò duo dicit, suavitatem, qua delectat, & rationem ultimi, in quantum finit & coronat labores agriculturæ. Unde licet secundum primum munus fruitio esse possit de quocumque bono, quatenus delectat, attamen secundum alterum munus non est nisi de ultimo fine, qui perfectè finit, quietat, & coronat omnes voluntatis affectus. Sed de his hæcenus.

---

## QUÆSTIO TERTIA.

### *De Passionibus.*

**I**MPETUS illi animi nostri, qui ex appetitu sensitivo pullolantes, *Passionum* nomine designari solent, tanti momenti sunt in negotio morum, ut & virtutum maxima pars illis regendis occupetur, & vicia pene omnia ex eorum deordinatione proveniant, Unde  
non

## De Passionibus in communi. Ar. I. 15

non abs re fore visum fuit quædam de illis deliberare, ac ex Divo Thoma, qui hanc materiam peregre regie prosecutus est 1. 2. à Quæstione 22. ad 48. decerpta hîc apponere, ne rem & ad notitiam motum pernecessariam, & seitu jucundissimam neglexisse videamur. Cæterum, ut brevitati consulatur, quidquid de Passionibus dicendum se offerre, tribus complectemur Articulis, quorum primus erit, de Passionibus in communi. Secundus de Passionibus partis concupiscibilis. Tertius de Passionibus irascibilis.

### ARTICULUS PRIMUS.

#### De Passionibus in communi.

**Q**UÆ circa passiones in communi quærî possunt, ad tria capita reducuntur; scilicet Quid sint, Quot sint, & Quomodo se habeant ad bonitatem & malitiam moralem.

*Passio* à Græcis *πάθος* dicitur, quam vocem Cicero nomine *perturbationis* exponit; Quintilianus verbò nomine *affectus*; quamquam vulgata *Passionis* vox Græcæ originî videatur accommodatior. Rem autem variè variè definiunt. Stoici *Passionem* dicebant esse, *Aversam à ratione contra naturam animi commotionem*. Verùm hæc definitio non passionis naturam, sed defectum explicat. Alii brevius *Passionem* definebant, *Vehementiorem appetitum*. Alii, *Demissionem, vel elationem animi, aut ejusdem contractionem, vel effusionem*. Sed præstat cæteris definitionibus, quam ex S. Damasceno lib. 2. Orthodoxæ fidei D. Thomas refert, quæ *passio* dicitur *Motus appetitivæ virtutis sensibilis ex imaginatione boni, vel mali, cui ex eodem D. Thoma addi potest, cum transmutatione corporali*, quippe cùm motus illi sensitivi appetitus semper sint cum aliqua corporis alteratione, à qua nomen *passionis* oblinent.

*Passio* in primis dicitur *motus*, id est, commotio, & veluti quidam impetus, ut hæc vox sit loco generis. Additur *virtutis appetitivæ sensibilis*, ut per id incipiat discerni, cum ab aliis motibus & transmutationibus, quas

### 116 *Tertiæ Partis Philosoph. Qu. III.*

corpus nostrum subit; tum à voluntatis affectibus, qui & ipsi quadantenus dici possunt *motus*. Dum dicitur *ex imaginatione boni, vel mali*, horum motuum propria causa assignatur: quippe proprium appetitus sensitivi motivum est bonum & malum imaginatione apprehensum, sicut proprium voluntatis motivum est bonum & malum intellectu apprehensum. Particulæ verò *cum transmutatione corporali*, non modò adjunctum aliquod essentiam passionis concomitans significant, sed illius discrimen, tum à moribus voluntatis, quæ, cum non resideat in organo corporeo, non se movet per corporalem transmutationem; tum à motibus partis sensitivæ cognoscitivæ, quæ licet sit affixa organo corporeo, per se tamen, saltem physice, non transmutat corpus, sed solum intentionaliter; passio verò etiam physice corpus mutat, præcipuè, ut notat Divus Thomas 1. 2. quæst. 24. artic. 2. ad 2. Corpus ipsum: nam ut ille ait; *in omni passione additur aliquid, vel diminuitur à naturali motu cordis, in quantum cor intensius, aut remissius movetur secundam systolen, aut diastolen.*

Quantum ad Passionum divisionem, aliæ sunt partis concupiscibilis, aliæ partis irascibilis. Cum enim sine motus sensitivi appetitus, eo modo dividi debent, quo & ipse appetitus. Appetitus autem alia pars dicitur *Concupiscibilis*, quæ scilicet versatur circa bonum & malum sensibile præcisè sumptum. Alia verò dicitur *Irascibilis*, quæ scilicet respicit bonum & malum, non præcisè, sed sub ratione ardui, ac proinde cum quadam pugna, & conatu attingendi. Differunt verò Passiones partis Concupiscibilis à Passionibus partis Irascibilis, ut notat S. Thomas 1. 2. quæst. 23. art. 2. quòd omnis passio Concupiscibilis aut tendat in bonum, aut recedat à malo. Unde contrariantur invicem ex parte objecti, quia feruntur in contrarios terminos. At verò passionibus partis irascibilis circa eundem terminum motibus oppositis feruntur, ut Spes tendit in bonum arduum. Desperatio verò ab eo recedit. Audacia insurgit in malum. Timor verò ei succumbit. Unde contrariantur invicem, non modò ex parte termini, sed etiam ex accessu, ac recessu ab eodem termino.

Passiones Concupiscibilis sunt sex, Amor & Odium, Desiderium & Fuga, Gaudium & Dolor. Amor est veluti pondus urgens in bonum, unde S. Augustinus: *Amor*

## De Passionibus in communi. Ar. J. 117

*meus pondus meum*. Desiderium est motus in bonum ex illo pondere procedens. Gaudium est quies in bonum. E contra Odium est veluti pondus retrahens à malo. Fuga est motus ex illo pondere causatus. Tristitia est violenta quies in malo.

Passiones irascibiles sunt quinque, Spes & Desperatio, Audacia & Metus, & Ira, quæ caret contrario. Spes animum ad bonum in arduo situm erigit. Desperatio deprimat. Audacia insurgit in malum arduum. Timor, seu Metus succumbit. Ira verò in causam mali animum incendit, & ad vindictam acuit. Omnis passio partis irascibilis oritur ex passione partis concupiscibilis, & in eam terminatur: quippe cum pars irascibilis sit veluti ministra partis concupiscibilis, istiusque sit & tendere in bonum, & quiescere in bono; illius verò impedimenta removere.

Quantum ad bonitatem & malitiam Passionum nota est Stoicorum sententia, quæ passiones non modò virtuti inutiles assererat, sed etiam omnes omninò ut malas damnabat, ut cum è contra Peripatetici laudarent passiones moderatas, & per rationem regulatas, tanquam bonas. Sed cum hæ duæ sententiæ adeo inter se pugnare videantur, Divus Thomas 1.2. quæst. 24. artic. 2. annotat, discrimen solum in voce esse, ceterum in re convenire. Stoici enim, cum satis non discernent voluntatem ab appetitu sensitivo, omnes animi nostri affectus per rationem regulatos vocabant *voluntates*; qui verò rationis præscriptum vel excederent, vel tardius sequerentur, græcè quidem *παῖδος*, latinè verò *perturbationes*, *agitationes*, *morbosque* appellabant. In quo sensu sumpta *passio*, ut scilicet à rationis regula recedit, etiam apud Peripateticos mala est, & vitiosa. At verò, ut rationi obtemperat & cooperatur, nec ab ipsis Stoicis condemnari potest.

Sed difficillior quæstio est, an passio, dum rationi, voluntatique cooperatur, diminuat, vel augeat voluntatis bonitatem. An, v.g. iudex, qui cum passione, ardoreque partis sensitivæ iusticiam exercet, melius, vel deterius agat, quàm sit silente appetitu sensitivo totum opus pacatâ, nudâque voluntate perageret.

Respond. Hic cum Sancto Thoma esse distinguendum. Passio enim dupliciter ad rationem & voluntatem comparari potest, uno modo ut antecedens, alio modo ut subsequens.

Sequens. Aliquando enim præcurrentes passionēs sollicitant & urgent voluntatem, etiam ad rem bonam, puta ad miserendum, puniendum, &c. Aliquando è contra præcurrentis ratio & voluntas passionum motus excitat, ut opus non frigide, sed ardentè, ac vividè peragatur: quippe passionēs sunt veluti igniculi quidam, attentionem, vehementiam, ardorem, vigoremque operi inspirantes. Sic iudex ad malos terrendos iram excitat, & miles adversus hostem animum exacuit iracundiâ, quam eleganter veteres *Academici fortitudinis cōtem* dixerunt: unde vulgatum illud Homeri:

*Virtuti immittit furorē.*

Hoc posito facillè elucescit difficultas. Nam passio præveniens, trahensque post se voluntatem diminuit bonitatem, tum quia obnubilat iudicium rationis, ex quo, ut fonte suo dependet bonitas moralis, quæ ideo, veluti exornato fonte rivulus, minùs pura est. Tum quia diminuit libertatem, quippe cum voluntas passionis impera abrepta, si minùs tui juris, ac actus domina. At verò passio subsequens non diminuit bonitatem, sed cum dupliciter subsequi possit, uno modo per quandam redundantiam, quatenus voluntas, cum fuerit intensa, secum rapit appetitum inferiorem; alio modo per electionem, quatenus voluntas expressè, ac nominatim eligit aliquam passionem, puta *irasci*, ad incutiendum timorem. Dum subsequitur primo modo, non addit quidem propriè, sed quædam maiorem bonitatem; imò quædamtenus extendit ipsam. Secundò verò modo addit bonitatem actioni. Ad perfectionem enim boni moralis spectat, non solum ut homo bene agat secundum parrem rationalem, sed etiam ut membra sua, omnesque affectus exhibeat arma iustitiæ, ut loquitur Apostolus.

ARTICULUS SECUNDUS.

*De Passionibus partis Concupiscibilis.*

**A** Passionibus partis Concupiscibilis incipimus, quod illae sint & principia, & termini passionum partis Irascibilis. Constat ex dictis, esse sex numero, Amorem & Odium, Desiderium & Fugam, Gaudium & Dolorum. De his ordine hic dicendum.

*§. I.*

*De Amore & Odio.*

**U**trumque sub uno titulo comprehendimus, quia contraria contrariis innotescunt, ideoque oppositorum eadem est scientia. Ut autem ab Amore incipiamus, Amor (& idem dicendum de Odio) duplex est, sensitivus & intellectivus. Amor intellectivus est ille affectus, quo voluntas sibi complacet in bono per intellectum apprehenso. Amor vero sensitivus, est sensitivi appetitus passio, qua sibi complacet in bono per sensum apprehenso. Addi potest & rectius, scilicet naturalis, qui est inclinatio uniuscujusque naturae in id, quod sibi conveniens est. De primo & tertio non agimus, sed solum de sensitivo, cujus naturam, causas, & effectus hic investigabimus.

*De Natura Amoris.*

**A** Mor variè à variis definitur. A Platonice dicitur *Desiderium pulchri*, seu *Animi nixus in pulchrum*. Verum hac definitio in duobus deficit. 1. Confundit duas passiones, amorem scilicet & desiderium. 2. Diminuta est, quippe cum amor sit omnis boni, pulchrum vero non

videatur esse nisi quædam boni species. Siquidem omne pulchrum est bonum, sed non omne bonum est pulchrum; non enim dicimus pulchros sapes, sed bonos. Imò pulchrum sæpe non videtur esse terminus amoris, sed potius huius & esca, quo bonum allicit ad sui amorem. Est enim pulchritudo veluti flos, splendor, diffusioque bonitatis, quæ amatur. Sed de his exactius, agendo de causis amoris. Alii definiunt amorem, *Motus appetitûs, quo animus bono adhæret*, adhæsiōne, inquam, non effectivâ, sed affectivâ. Verùm hæc definitio repugnantibus invicem terminis uti videtur, quippe cum moveri in bonum, & adhærere bono videantur invicem opponi; non enim per motum in bonum, sed potius per quietem in bono, fit adhæsiō voluntatis ad ipsum bonum. Placere igitur præ cæteris hæc D. Thomæ definitio, *Amor est Complacentia appetibilis, seu boni.*

Hanc ingeniosissimam definitionem explicat D. Thomas 1. 2. qu. 26. ar. 2. supponendo passionem esse effectum agentis in patiente. Quemadmodum ergo agens naturale dupliciter immutat patiens, primò quidem dando formam, quæ est principium motus secundò mediante forma imprimendo motum, ut generans lapidem dat primò ei gravitatem, secundò mediante gravitate motum ad centrum: Sic, ut verbis ejus utar, *appetibile dat appetitûs primò quidem quandam coactionem ad ipsum, quæ est quædam complacentia appetibilis, ex qua sequitur motus ad appetibile, nam appetitivus motus circulo agitnr, ut dicitur in 3. de Anima. Appetibile enim movet appetitum, faciens in eo quodammodo ejus inclinationem, (id est, imprimendo in ipsum quasi pondus aliquod gravitans, & absque vi inclinans ipsum appetitum in bonum) & appetitus tendit in appetibile realiter consequendum, ut sit ibi finis motus, ubi fuit principium. Prima ergo immutatio appetitus ab appetibili, (id est, illa coactio, qua bonum appetibile immutat appetitum, illum sibi appropriando, vindicando, & ad se inclinando per impressionem cujusdam metaphorici ponderis, ac gravitatis, quæ sit principium tendendi in ipsum) vocatur amor, qui nihil aliud est, quàm complacentia appetibilis. Ex hac complacentia sequitur motus in appetibile, qui est desiderium; & ultimò quies, quæ est gaudium.*

Dices. Complacentia non videtur esse, nisi quoddam amoris rudimentum, inchoatio, delineatio, prælibatio, & , ut ita dicam, aurora: Ergo malè definitur



nitur amor per complacentiam, sicuti si dies per auroram, & fructus per florem definiretur.

Respond. Complacentiam esse ipsissimum amorem: Sed considerari potest in duplici statu. Primum ut recens, infirma, teneta, nondum rapit, sed solum leviter commoveret & agitat appetitum: & tunc non dicitur proprie amor, sed potius inchoatio amoris, aut simpliciter complacentia. Secundum considerari potest ut jam robusta, firma, constans, & appetitus domina, cum scilicet bonum non leviter tantum commoveret, sed potenter inclinaret ad se appetitum: & tunc dicitur proprie, ac perfecte amor.

Porro perfecta illa boni complacentia si sit cum electione, qua iudicio discretivo bonum aliquod ex multis deligitur, in quod affectus tendat, dicitur *Dilectio*. Si vero præcisè sit ex impressione fortè ipsius boni rapientis affectum, retinet simplicis amoris nomen. Unde præclare Dionysius 4. cap. de Divin. Nom. *Quibusdam*, inquit, *Sanctorum visum est, divinius esse nomen amoris, quam dilectionis*: quia scilicet, ut egregie interpretatur D. Thomas 2. 2. qu. 26. art. 3. ad 4. *Magis homo in Deum potest tendere per amorem passivè quodammodo ab ipso Deo attractus, quam ad hoc eum propria ratio possit ducere, quod pertinet ad rationem dilectionis: & propter hoc divinior est amor, quam dilectio*. Si autem complacentiæ accedat ingens quædam boni amati appetitatio, quatenus id, quod amatur magni pretii æstimatur, tunc vocatur *charitas*, quæ idcirco locum habet proprie in amore divinorum; non vetò, nisi improprie, in amore bonorum corporallium, quæ sunt vilis pretii. Si demum talis complacentia sit personæ, cui tanquam nobis ipsis volumus bonum, vocatur *amor amicitia*, præcipue cum recipiatur: vix enim placere potest persona in se ipsa, eique bonum velle possumus, nisi vicissim illa nobis bonum velit. Complacentia verò boni, quod personæ volumus, sive nostræ, sive alienæ, vocatur *amor concupiscentiæ*; maxime cum tale bonum nobis ipsis volumus.

*Amoris causa.*

**A** Moris causa prima & præcipua, imò quæ est aliarum ratio, est Bonum. Amor enim est passio quædam appetitus, & complacentia amanti ad rem amatam. Patet autem, solum bonum esse proprium appetitus motivum, nullamque rem placere, nisi quatenus conveniens est appetitui, proindeque bona. Si autem dicas, etiam Pulchrum esse causam amoris, imò inter ejus causas efficacissimam, Respond. cum Divo Thoma, pulchrum contineri sub bono, imò idem esse secundum rem cum illo, solumque ab eo ratione differre. Unde sicut Pulchrum est Bonum, imò quædam excellentia, diffusio, flor, splendorque bonitatis, juxta Platonicos, ita est causa efficacissima amoris. Discrimen autem Boni & Pulchri egregiè Divus Thomas explicat 1.2. quæst. 27. artic. 1. ad 3. his verbis: *Cum bonum sit, quod omnia appetunt, de ratione boni est, quod in eo quietetur appetitus. Sed ad rationem pulchri pertinet, quod in ejus aspectu, seu cognitione quietetur appetitus. Unde illi sensus præcipue respiciunt pulchrum, qui maxime cognoscitivi sunt, scilicet visus & auditus rationi deservientes; dicimus enim pulchra visibilia, & pulchros sonos. In sensibilibus autem aliorum sensuum non utimur nomine pulchritudinis; non enim dicimus pulchros sapes & odores. Et sic patet, quod pulchrum addit supra bonum quendam ordinem ad vim cognoscitivam, ita quod bonum dicatur id, quod simpliciter complacet appetitui; pulchrum autem dicatur id, cujus ipsa apprehensio placet. Ex quo inferendum obiter, res tantopulchriores esse, quanto magis habent de cognoscibilitate, proindeque in spiritualibus pulchritudinem longè excellentiorem reperiri, quàm in corporalibus.*

Secunda causa Amoris est Similitudo. Unde proverbium, *Simile simili gaudet*; & Eccles. 23. *Omne animal diligit sibi simile*. Verùm præclare Divus Thomas duplicem distinguit similitudinem. Primam, quæ sita sit in eo, quod utrumque habeat idem actu; sicut duo homines sunt in humanitate similes, & duo alba in albedine. Secundam, quæ in eo sita sit, ut unum in potentia, non purè susceptiva, sed cooprata, & inclinata, id habeat,

## *De Passion. Part. Concupisc. A. II. 123*

beat, quod aliud habet in actu. Potentia enim habet quandam similitudinem ad actum suum; non solum quatenus est quaedam inchoatio ejus, & in ipsum tendit & inclinatur, sed etiam quatenus est ipsi commensurata omnis autem commensuratio est quoddam similitudinis genus. Prima similitudo fundat amorem amicitiae: simile enim reputatur ut unum suo simili, proindeque affectus unus se habet & tendit ad aliud, sicut ad seipsum, in quo sita est ratio amicitiae. Unde naturaliter homo homini amicus est propter naturalem similitudinem, & civi civi propter politicam similitudinem, &c. Secunda vero similitudo est causa amoris concupiscentiae, quia unicuique existenti in potentia inest appetitus sui actus, in cuius consecutione delectatur, si sit sentiens & cognoscens. Attamen per accidens prima similitudo causat odium, quatenus in consecutione boni unum simile impeditur aliquando à suo simili, quo fit, ut ipsum odio habeat tanquam noxium sibi. Unde Proverbium ex Aristotele depromptum, *Figulus figulo invidet*, quatenus ab eo impeditur in suo lucro; & inter superbos semper sunt jurgia, quia se invicem impediunt in propria excellentia, quam singulariter cupiunt. Ad has amoris causas aliae reduci videntur, ut familiaritas, sympathia, societas, & communicatio in aliquo bono, &c.

### *Effectus Amoris.*

**E**ffectus amoris, cum Innumeri sint, sex praecipue à Divo Thoma recensentur. 1. Unio, 2. Adhæsiō, 3. Ecstasis, 4. Zelus, 5. Læsiō amantis, 6. demum universalis quidam inflexus in omnia, quæ aguntur ab amante.

Unio adeo proprius amoris effectus est, ut Dionysius cum revocaverit virtutem unitivam: & S. Augustinus 8. de Trinit. cap. 10. *Amor, inquit, est quasi junctura quaedam duo copulans, vel copulare appetens, amantem scilicet, & id, quod amatur.* Verum quia non omnis unio est Amoris effectus, ideo adnotat Divus Thomas 1. 2. quæst. 28. art. 1. ad 2. *Quid unio tripliciter se habet ad amorem. Quaedam enim unio est causa amoris: & hac quidem est unio substantialis, quantum ad amorem, quo quis amat se ipsum; quan-*

## 124 Tertia Partis Philosoph. Qu. III.

Iam verd ad amorem, quo quis amat alia, est unio similitudinis. Quadam verd unio est essentialiter ipse amor: & hac est unio secundum coactionem affectus, qua quidem assimilatur unioni substantiali, in quantum amans se habet ad amatum, in amore quidem amicitia, ut ad se ipsum; in amore autem concupiscentia, ut ad aliquid sui. Quadam verd unio est effectus amoris, & hac est unio realis, quam amans quarit de re amata. Ut enim Philosophus dicit 2. Polit. cap. 2. Aristophanes dixit, Quid amantes desiderarent ex ambobus fieri unum: sed quia ex hoc accideret, aut ambos, aut alterum corrumpi, quarunt unionem, qua convenit & decet; ut scilicet simul conversetur, & simul colloquantur, & in aliis ejusmodi conjungantur.

Adhæsiō & Inhæsiō dupliciter causatur ab Amore. Primo quantum ad cognitionem, quatenus amor aliquid desigat amatum in apprehensione amantis. Unde Virgilius Dionis amorem describens ait,

*Multa viri virtus animo, multusque recusat  
Gentis bonos; hærent infixi pectore vultus.*

vicissimque idem amor amantis cogitationem desigat in amatum, sicque efficit, ut perpetuâ contemplatione ipsi inhæreat. Secundo quantum ad effectum, quatenus & amatum possidet affectum amantis, ipsique per intimam complacentiam imprimetur, ac omnes ejus motus causat, non quasi per extrinsecam vim, sed per internam inclinationem; unde & amor dicitur intimus, & dicuntur viscera charitatis; ac vicissim amans omnes affectus suos defixos habet in amato, ut non immerito dixerit Plato, Animam ipagis esse, ubi amat, quàm ubi animat. Imò per amorem amicitia ea inhæsiō mutua perfectiùs fit per affectivam quandam identitatem, quatenus amicus amicum reputat unum sibi, & ut alterum se.

Ecstasim causat Amor, & secundum apprehensionem, & secundum affectum. Secundum apprehensionem quidem, quatenus facit, ut amans sui oblitus de amato duntaxat cogitet; sicque feratur extra propria, in quo ratio Ecstasis consistit. Secundum affectum verd, quatenus amatum ita curas, affectusque omnes amantis rapit, ut propriis neglectis, de amato solum sollicitudinem habeat, sicque extra se ipsum exeat.

Zelus causatur ab Amore, quatenus Amor, cum intensus

*De Passione. Part. Concupisc. A. II. 125*

sus fuerit, non solum fertur in amatum, sed etiam acriter repellit omne sibi contrarium & repugnans, in quo sita est ratio zeli. Verum in hoc differt amor concupiscentiæ ab amore amicitiae, quod ille repellat non tam contraria amato, quam possessioni, quam de ipso habere querit: sicut vir, cujus zelus in amore concupiscentiæ fundatur, non tam repellit ea, quæ displicent uxori, ipsique contrariantur, quam quæ opponuntur singulari ejus possessioni. At verò amor amicitiae per zelum repellit ea, quæ opponuntur ipsi amico, ac bono illius, insurgendo in ea, quibus ille offenditur: Et ideo de illis bonis, quæ sic possidentur à pluribus, ut à singulis inregrè habeantur, quæ sunt bona divina, non est zelus concupiscentiæ, sed solum zelus amicitiae.

Læsionem amanti causat Amor, vel ratione sui materialis, id est, illius corporalis transmutationis, quæ ad rationem omnis passionis pertinet; quippe cum intensior est, spiritus, quibus præ cæteris passionibus amor dominatur, nimis commovet, intendit, ac consumit. Vel etiam ratione sui formalis, quando inordinatus est, & his rebus adhæret, quæ nec decet, nec congruunt amanti. At verò si rectus sit, & vero bono adhæreat, non lædit, sed magis perficit amantem. Quippe, ut inquit D. Thomas, amor significat coaptationem quandam appetitivæ virtutis ad aliquod bonum. Nihil autem, quod coaptatur ad aliquid, quod est sibi conveniens, ex hoc ipso læditur, sed magis, si sit possibile, proficit & melloratur. Quod verò coaptatur ad aliquid, quod non est sibi conveniens, ex hoc læditur & deterioratur. Præcipue quia cum amor sit fons affectuum & morum, si sit malus, eos omnes in sua radice, ac fonte corrumpit.

Est demum Amor causa omnium, quæ ab amante aguntur, non modò quatenus, ut inquit Dionysius cap. 4. de Div. Nom. Propter amorem boni omnia agunt, quæcumque agunt, aut quatenus bonum amatum habet rationem finis, qui movet agens ad agendum; sed etiam quia est dominus appetitus, cujus est applicare ad agendum; radix omnium affectuum, ac passionum, quibus movetur animal; & potentissimus motor urgentissime stimulans, efficacissime applicans, in id agendi vires, industriam, ac perseverantiam miro quodam modo inspirans.

Præter hos celebriores Amoris effectus, quatuor allos proximos ei attribuit Sanctus Thomas 1, 2, quæst. 28. art. 5.

Hi sunt Liquefactio, Fruitio, Languor, & Fervor. Liquefactio opponitur congelationi. Ea enim, quæ sunt congelata, in se ipsis coarctata sunt, ut non possint de facili subintrationem alterius pati. Ad amorem autem pertinet, quoddam appetitus coarctetur ad receptionem boni amati, quatenus, ut dictum est, amatum subleuat amantem, ipsumque penetrat & intus pervadit. Unde cordis congelatio, vel durities est dispositio repugnans amor. Sed Liquefactio importat quandam cordis mollescentiam, qua se ipsum pervisum exhibet amato subintranti. Si vero amatum est præsens, amor causat Fruitionem, quæ est affectivus quidam boni possessi complexus, quo amans ipsum veluti abstringit, ac ardentem retinet. Si autem bonum amatum fuerit absens, amor Languorem causat, qui est dolor, tadium & quidam impatientis animi defectus, ac deliquium. Sed ne in hoc misero statu torpeat animus, amor reficit, excitat, acuit, contenditque omnes vires; sicque causat Fervorem, qui est veluti quædam æstuantis animi ebullitio; sicque fiunt Amoris quasi paroxysmi, quibus animus à deliquio languoris in ardorem impetum, vivacitatemque fervoris alternatim inducitur.

Quæ de Odio dicenda essent, ex his, quæ de Amore dicta sunt, satis innotescunt. Unum admiratione dignum est, odium scilicet, quantumvis sit ab amore diversum, ab eo tamen producti, nasci, ac educari. Amor enim quoddam pondus animi est; unde sicut ab eodem pondere producit & accessus ad centrum, & recessus à puncto, quod centro opponitur; ita & ab eodem Amore fit, quoddam animus inclinatur in bonum, ipsique commensuretur, coarctetur, conformetur, ac in illo complacet, & quod ea, quæ bono amato repugnant, repugnent quoque amanti, displiceant & ingrata sunt, in quo sita est Odii ratio.

## S. I I.

## De Desiderio &amp; Fuga.

**D**esiderium & Fuga sunt veluti quædam animi penna, quibus & ad bonum absens fertur; & malum, quam longissimè potest, devitat & fugit. Quippe cum animalis commoda & bona extra ipsum sint, mala verò in ipsum incurrere possint, conveniens fuit; ut his duobus veluti pennis, aut pedibus instrueretur, quibus & mala fugere, & bona prosequi valeret. De his ut paucis dicamus.

Desiderium variis nominibus exprimitur solet. Dicitur enim imprimis *cupiditas*, atque *concupiscentia*, quamquam hæc nomina paulo latius sumi soleant pro aliis appetitibus concupiscibilis affectibus, præcipue pro amore; nec ad desiderium significandum derivata, simplex, innocens, aut qualecumque desiderium signent, sed ardentius, effræne, immoderatum, ac rationem non sequens, sed turbans, ac rapiens. Solet etiam aliquando vocari *libido*, sed illa vox ex usu ferme restringitur ad illum impetum significandum, quo voluptates tactus inordinate appetuntur: sicut ambitio, ac avaritia non simplex, sed vitiosum honoris, ac pecuniæ appetitum exprimunt. Unde huius affectus, prout ab ordinato & inordinato abstrahit, proprium nomen est *desiderium*.

Definitur autem Desiderium, *Motus, seu affectus appetitus sensibilis tendens in bonum absens, seu quo prosequimur possessionem boni*. Quatenus dicitur *affectus*, convenit cum aliis passionibus; cæteræ verò particulae distinguunt desiderium ab aliis affectibus partis concupiscibilis. Nam amor est affectus, quo complacemur nobis in bono, sive præsentem, sive absente. Delectatio verò versatur circa bonum præsens & possessum. At verò desiderium est propriè boni absens. Imò per easdem particulas differt desiderium à passionibus partis irascibilis, præcipue à spe, cui magis affine videtur; spes enim non est, qualiscumque absens boni prosecutio, sed ardui, ac difficultatibus circumsepti; nec quomodocumque in illud tendit,

sed cum quadam erectione, conatu, ac lucta contra difficultates animum deprimentes. At verò desiderium est simplex animi motus & affectus in bonum absens, quatenus præcisè bonum.

Verùm natura Desiderii præclariùs adhuc elucescet, si observemus ex dictis, hunc affectum medium esse inter amorem & gaudium, istumque habere, ut principium, illud verò ut terminum. Quippe amor pondus quoddam animi est, ipsum inclinans fortiter & suaviter in bonum. Unde, ut in rebus naturalibus, si avulsæ, ac remotæ sint à centro, suo ex pondere nascitur conatus, ac motus ad reperendum centrum, quo adeptò, cessat talis motus, ei-que quies succedit: ita in animo, si bonum amatum sit absens; ex amore nascitur ille motus, ac impetus, quo rapimur in illud, quique *desiderii* nomine intelligitur; obrenro verò bono, illi motui succedit quies in bono, quæ est delectatio.

Desideria, cum sint innomera, generalius dividuntur in Naturalia, & non Naturalia. Desiderium naturale est, quod oritur ex indigentia naturæ, ac tendit in bonum, quo talis indigentia remouetur: ejusmodi sunt cupiditates cibi & potus, & aliorum naturæ necessariorum. Desiderium non naturale est, quod oritur, non ex naturæ necessitate, sed ex appetentis judicio, & fertur in id, quod appetens sibi judicat conveniens, præter id, quod natura requirit: ejusmodi sunt lautiores cibi, pretiosa vestimenta, pecunia, honores, res pulchræ, &c. Desiderium naturale facillè expleri potest, & tendit non modò in aliquid finitum, sed etiam modicum; natura enim paucis contenta est. At verò desiderium non naturale inexplebile est, ac infinitum, ideoque à quibusdam non immeritò vocatur *inane*, non solum quia tendit in res minimè necessarias, sed quia nullo bono plenè satiari, ac impleri potest. Unde præclare Lucretius Cor æstuans ejusmodi desiderii vocat *Pertusum*, quodd nullò bono impleatur. Hujus ratio est, quia procedit ex rationis apprehensione; ratio autem in infinitum procedit, quatenus ex una cogitatione sibi viam parat ad aliam, sicque perpetuam quandam desideriorum seriem insubulat. Aliam hujus rationem affert S. Thomas ex copositam, quodd naturale desiderium fertur solum ad ea, quæ habent rationem medi ad solatium naturæ. Cum ergo media in tantum appetantur, in quantum conducunt fini, naturale desiderium non



## *De Passion. Part. Concupisc. A. II. 129*

non appetit res in infinitum, sed solum quantum exigit naturalis necessitas. At verò ratio sibi præstituerè potest finem in his, quæ cupit, puta in divitiis: cum ergo finis appetatur, non secundum aliquam mensuram, sed quantum possibile est, desiderium consequens apprehensionem rationis cupit res absque mensura, puta habere divitias, quantum possibile est. En id scitè expressum ab Horatio lib. 1. Satyr. 1.

*At bona pars hominum decepta Cupidine falsa,  
Nil satis est, inquit: quia tanti, quantum habeas,  
sua.*

Notatque ibidem, avaros, quod pro fine pecuniam habeant, & non ut medium, illi parcere tanquam rei sacre.

*..... Congestis undique sacris  
Indormis inbians, & tanquam parcere sacris  
Cogit, aut piliis tanquam gaudere tabellis.*

Causa desiderii est amor cum indigentia. Amor quidam, ex quo (ut superius dictum est) dimanat, ut à suo principio, non secus ac motus deorsum ex gravitate. Indigentia verò, quia non omnis amor desiderium parit, sed indignus, ac privatus bono amato. Verbum cum duplex desiderium distinxerimus, Naturale, & Innaturale; primum nascitur ex vera, naturalique indigentia, quatenus natura dimota à suo bono, id est, à debita dispositione (ut dum stomachus aridior, calidiorque factus fuerit, quam par sit ad bene, naturaliterque se habendum) creat illarum rerum cupiditatem, quibus ad pristini status restitutionem opus est, idque vel per modum innati motus in his, quæ sensu carent; vel per modum animalis affectus. In rebus sensu præditis. Desiderium verò non naturale nascitur ex indigentia per iudicium rationis apprehensa, quatenus scilicet cum in homine facultates sensitivæ per conjunctionem ad rationem quandam elevationem sortiantur, appetitus sensitivus ex hoc habet, ut feratur ad res, non modò quatenus naturæ conveniunt, sed etiam quatenus per rationem disponuntur. Cum ergo ratio ex his sensibilibus quedam ut bona apprehendat, quæ tamen naturæ necessitatem non concernunt, puta vestes pretio-

130 *Tertia Partis Philosoph. Q. III.*

fas, picturas, gemmas, opes, &c. eorum indigentia apprehensa desiderium creat, illudque tanto vehementius naturali, quanto ex altiori fonte derivatur.

Effectus Desiderii, cum inter illos Unio & Ecclasis haberi possint, quatenus desiderium, ut amoris minister, tendit ad unionem amantis cum bono amato, amantemque veluti extra se abripit, ut in rem amatam ferat. Præterea recenseri possunt quidam ei peculiæres, cujusmodi sunt in primis Tædium, quod est dolor ex dilatione boni desiderari, cum adjuncto eorum, quæ habentur, fastidio. Item Impositivitas, quæ est nimia, molestaque sollicitatio rei desideratæ. Suspiria, quæ huic affectui adeo propria sunt, ut pene cum eo synonyma sint, suntque retenti spiritus quasi etuctationes, huiusque quatenus in desiderio appetitus spiritum intus trahit, ut illum deinde quasi ejaculetur in rem amatam, non secus ac sagittarius cordam arcus simul cum telo ad se trahit, ut fortilis deinde illud in scopum expellat. Accensio etiam potest inter effectus, aut certe proprietates desiderii, constare ille, quo in re prohibita prorumpit, juxta vulgatum illud Ovidii.

*Nititur in vetitum semper, cupinasque nega-  
ta.*

Ind quod sæpe vires ex difficultate, ac dilatione acquirit, sæpeque ex nimia rei facilitate moriatur. Huius autem ratio reddi potest, non solum, quia in prohibitis libertas, in arduis victoria desideratur, quæ duo excellentissima reddunt res, quibus conjunguntur, longè optabiles, sicque desiderium augent & vehementius intendunt; sed etiam ex ipsa desiderii natura. Ille siquidem affectus nihil aliud est, quàm quidam conatus in bonum, seu quasi telum, quod in bonum tanquam in scopum vibratur: unde quemadmodum res difficiles majorem conatum exposcunt, & sagittarius in scopum remotum majori vi, quàm in propinquum, telum mittit; sic animus majori conatu, & conatu in ea bona tendit, quæ vel prohibito, vel difficultate, vel dilatio quasi à nobis elongat.

De Fuga, cum ea satis innotescat ex dictis circa Desiderium, non est cur operosius differamus. Unum cum De Thema libet annotare, hunc nempe affectum proprio care-  
re.

## *De Passion. Part. Concupisc. A. II. 131*

tere nominer unde metaphorico, ac paullo communiori  
exprimitur, nempe *fuga*, seu *aversationis*.

### *§. III.*

#### *De Delectatione, seu Gaudio, & Tristitia, seu Dolo.*

**H**Æ dum passiones sunt omnium aliarum termini,  
quemadmodum amor & odium principia. Omnis  
enim animi nostri affectus ex amore boni, aut odio mali  
nascitur, & in delectationem, aut dolorem desinit, ac  
consummatur. Unde inter passiones præcipui momenti  
sunt, proindeque paullo accuratius explicandæ.

Delectatio variis nominibus exprimi solet. Dicitur  
enim *Gaudium*, *lætitia*, *exultatio*, *jucunditas*, *voluptas*,  
*hilaritas*, &c. Quæ nomina ita exponi possunt ex D. Tho-  
ma, ut *delectatio* sit proprium, genericumque illius affe-  
ctus nomen; *gaudium* verd illum significet, quatenus ad  
rationalem partem atinet, cætera verd à quibusdam il-  
lius effectibus imponantur: Nam, ut inquit Sanctus Do-  
ctor 1. 2. quæst. 31. art. 3. ad 3. *Lætitia* imponitur à *dilatatio-  
ne cordis*, ac si diceretur *lætitia*. *Exultatio* verd dicitur ab  
exterioribus signis delectationis interioris, quæ apparent ex-  
terioribus, in quantum scilicet interius *gaudium* proficit ad ex-  
teriora. *Jucunditas* verd dicitur à quibusdam specialibus læ-  
titia signis, vel effectibus; præcipue *jocis*. Ac verd *voluptas* à  
volendo deducti viderur, quatenus delectatio est maxime  
inclinatio conformis, quamquam frequenter hoc no-  
men restringatur ad delectationes corporales.

*Delectationis Natura (& Divisio.)*

**D**Efiniri potest hic affectus prout voluntati, ac sensibili appetitui communis est, *Quies appetitus in bono*, seu *Affectus causatus ex apprehensione boni possessi*. Prout verò specialiter restringitur ad sensitivum appetitum, *Passio facta in appetitu ex presentia boni sensibilis*, seu *Quies in bono sensibili*. Hæ definitiones ex dictis innotescent. Quippe quemadmodum, ut diximus, ex amore boni nascitur quidam motus in ipsum, si sit absens, qui dicitur *desiderium*; ita ex eodem amore nascitur quies, seu tranquilla quædam appetitus bene se habentis pax, quando bonum apprehenditur, ut præsens. Porro quies & pax illa in bono non est accipienda merè privativè, pro cessatione omnis motus; sed positivè, pro quodam affectu, seu immutatione facta in appetitu, quatenus eum antea elongatus à bono, ac tanquam extra centrum suum positus, violentiam quandam pateretur, ex possessione boni, ac conjunctione cum ipso, bene se habet, ac quasi starni sibi proprio & optimo redditur. Unde Aristoteles 1. Rethor. cap. 11. definit voluptatem, *Motionem animi. & constitutionem subitam, ac sensibilem in statu natura sua convenienti*, sumendo scilicet *motionem* non pro tendentia ad ulteriorem terminum, sub qua ratione quieti opponitur, sed pro quodam mutatione facta ex adeptione termini, mutatione, inquam, non successivâ, ut est ambulare, loqui, &c. sed subitâ, qualis est visio, intellectio, &c. Unde etiam D. Thomas advertebat, delectationem non fieri in tempore per se, sed solum per accidens, eo quod boni possessio, à qua causatur, consistit in successione, ac veluti per particulas dispensatur.

Delectationum quædam sunt intelligibiles, ac spirituales, quæ scilicet mente, ac voluntate percipiuntur; ut ea, quæ consistit in contemplatione veritatis: quædam verò sensibiles, quæ sensibus apprehenduntur, & ad appetitum sensitivum pertinent, ut ea, quæ in cibo, potu, pulchrarum rerum aspectu percipiuntur. Primæ sunt secundum se perfectiores, puriores, ac majores; quæ quia percipiuntur à potentia nobiliori, mente scilicet.

## *De Passion. Part. Concupisc. A. II. 133*

licet, quæ sensitivis potentiis longè præstat; cuius signum est, quodd, ut notat Sanctus Augustinus, nemo est, qui non veller magis catere visu corporali, quàm intellectu, eo modo, quo bestię & stulti carent. Tum quia sunt de nobiliori bono; spirituale enim bonum eminentius est bono sensibili, cuius signum est, quodd' propter bonum spirituale homines abstinere à maximis corporis voluptatibus, puta propter honorem & virtutem. Tum demum quia bona spiritualia perfectius, intimius, ac firmitus possidentur, quàm sensibilia: unde cum possessio boni sit causa delectationis, maiorem quoque creant delectationem. At tamen delectationes corporeæ respectu hominis sunt vehementiores propter tria, ut notat Divus Thomas 1. 2. quæst. 31. artic. 5. *Primo quia sensibilia sunt magis nota quoad nos, quàm intelligibilia. Secundo quia cum sint passiones sensibiles appetitus, sunt cum aliqua transmutatione corporali, quod non contingit in delectationibus spiritualibus, nisi per quandam redundantiam à superiori appetitu ad inferiorem. Tertio, quia delectationes corporales appetuntur, ut medicina quadam contra corporales defectus, vel molestias, ex quibus tristitia sequuntur. Unde dupliciter delectant, & propter bonum, quod afferunt; & maxime propter malum, quod auferunt. Imò quia, ut ait S. Augustinus lib. 33. qq. 36. nemo est, qui non magis dolorem fugiat, quàm appetat voluptatem, idcirco voluptates sensibiles ardentius capiuntur, eo quodd' tristitiam, qua fere homo semper aliqua ex parte premitur, delinunt. Imò quædam avidè quæruntur & delectant, in quibus nihil aliud boni apparet, nisi quodd' auferunt tristitiam, quæ est ex labore, ut orium, ludus, & alia, quæ ad regulam pertinent.*

Sensibilis verò delectatio, non secus ac desiderium, rursus dividi potest in naturalem, & non naturalem; seu, ut vocat Aristoteles 1. Rhetor. cap. 11. in eam, *qua rationis experta est; & eam, qua est cum ratione. Delectatio naturalis & rationis experta est, quæ causatur ex perceptione boni purè naturalis, quodque per sensum apprehenditur ut bonum, præcisè quia naturæ convenit, ejusmodi est, quæ in cibo potuque percipitur; & hæc brutis competit, etiam quadrantibus purior, quàm homini. Delectatio verò non naturalis, sed altior naturalis, quæque est cum ratione, est illa, quæ causatur*

### 134 Tertiæ Partis Philosoph. Q. III.

ex perceptione boni sensibilis, quod ut tale apprehenditur, non præcisè quia naturæ convenit, sed, ut loquitur Aristoteles, *ex persuasione rationis*, idest, quia rationi, sensuique, quatenus ratione in homine aliquatenus participat, conveniens est. Ejusmodi est delectatio illa, quam etiam in appetitu sensitivo percipimus ex consecutione honoris, famæ, victoriæ, opum, & aliarum ejusmodi rerum, quas solus homo inter animalia querit & amat.

#### Delectationis Causæ.

**P**rima & universalior Delectationis causa est Operatio, tum quia omnis delectatio ex aliqua operatione nascitur, saltem ex consecutione ipsius boni, & cognitione illius, ut præsentis. Tum quia ipsa operatio quoddam bonum est, &, ut decentius, attingiturque fiat, voluptatis illecebris à natura conditur, ut præcipue videre est in his operationibus, quæ ad individui conservationem, & ad speciei propagationem pertinent, quas ut animal libentius exsequetur; condimento voluptatis naturæ Author commendavit. Attamen, quia operatio in tantum delectat, in quantum potentie agentis commensuratur, si excedat, fit laboriosa & molesta, proindeque amplius non delectat, sed cruciat.

Secunda causa delectationis est Alternatio. Nam juxta Proverbum, *Placet varietas* quod admirans Augustinus 3. Confess. cap. 3. *Quid est hoc, Domine Deus meus, inquit, edm tu in æternum tibi ipsi sis gaudium, & quidam de te cetera te semper gaudeant, hac rerum perpetua alternatio despectu & profectu; offensionibus & conciliationibus gaudet.* Hujus verd rationem egregie reddit Divus Thomas. Tum quia natura nostra transmutabilis est, ideoque transmutatione, ut se sibi connaturali, gaudet. Tum quia, cum delectatio fiat ex actione mediocri, & non superexcedente, rei delectabilis, quando continuata præsentia ejus incipit excedere mensuram naturalis habitudinis, efficitur onerosa, ac molesta, proindeque remotio ejus ex successione contrarii fit delectabilis. Tum demum, quia homo desiderat eorum  
cogno-

## *De Passione. Part. Concupisc. Ar. II. 135*

cognoscere & cum ergo quædam non possint apprehendi tota simul, delectat in his transmutatio, ut unum transeat, & aliud succedat, & sic totum sentiatur. Imò nimia prioris mora incipit esse tardiosa, quatenus posterioris cognitionem differre unde Augustinus lib. 4. Confess. cap. 11. *Non vis, inquit, stare syllabam, sed transvolare, ut alia veniant & totum audias.*

Tertia & quarta causa delectationis sunt Spes futuri boni & Memoria præteriti. Cùm enim ex præsentia boni nascatur delectatio, hæc duo bonum in re absens quatenus animo præsens efficiunt. Nam per Memoriam ea, quæ jam in re sunt elapsa, recolimus, ac nobis repræsentamus; per Spem verò quandam futuri boni prælibatam possessionem degustamus, quatenus ademptionem ejus nostræ potestati inesse sentimus. Sed cur etiam præterita mala, dum recolunt, delectant? Juxta illud Homericum,

*Nam delectatur, memoret, quicumque laborum.*

*Cùm res est multas passus, multasque peregit.*

Respondet Aristoteles: Rethor. cap. 12. Id fieri, quod exantlati labores relinquunt nost se aliquid honestum & bonum, quod cùm sit præsens animo recolendo mala præterita, delectat. Addi potest, quod labores insignes pertulisse, periculaque evasisse, est aliquod victoriæ genus, felicitatis pars, & res admiratione dignum efficiens. Cùm igitur victoria, felicitas, illæque res, quæ nos admiratione dignos efficiunt; maxime animum delectent, consequens est, ut dum præteritos labores, & superata pericula cogitamus, ex hoc maxime delectemur.

Verùm id mirum magis, non solum memoria dolorum, sed etiam ipse dolor, luctus, lacrymæque, quibus ob absentiam retamatz perfundimur, sunt quædam delectationis causæ. Et quidem de luctu & lacrymis dici posset, causare delectationem, quod mitigent, & deliniant amaritudinem doloris, eam exterius effundendo, & quasi propulsando. Hinc Ovidius,

... *Est quædam fere Voluptas:*

*Expletur lacrymis; egeriturque dolor.*

Verum alia ratio ex D. Thoma & Aristotele reddi potest, quia hæc omnia faciunt vivaciorem memoriam, ac cogitationem rei dilectæ: unde, ut inquit Aristoteles *Rethor. cap. 11. Licet molestia sit in eo, quod talis rei non adsit, attamen voluptas in eo est, quod quia recordetur, & videat quodammodo illam; & quid ipse ageret, qualisque esset.*

Quinta causa delectationis est Similitudo. Nam, *Simile simili gaudet*, & juxta frequentata Græcis proverbia: *Cognoscat fera feram; & Semper græcula cum græculo*. Similitudo enim est quædam unitas, sicque bonum bono unitum ipsum augeat, unde consequitur delectatio. Verum quia per accidens ex similis accessu bonum proprium corrumpi potest, ut dum singulus singulum in suo luctu turbat; ideo ex hoc fit, ut aliquando simile suum simile abominetur.

Porro, ne singulatim omnia prosequar, inter delectationis causas recenseri possunt cum Admiratio, quatenus novæ aliquantæ cognitionem secum affert, amplioremque pollicetur: unde rara & mira sunt jucunda, sicut & omnes representationes rerum, etiam in se minimè delectabillium: *Gaudet enim anima*, inquit D. Thomas, *in collatione unius ad alterum; quia conferre unum alteri est proprius & connaturalis usus rationis*, Tum Beneficentia, quæ sit homini quædam imaginatio abundantis boni in ipso existentis. Tum etiam Ira, quæ, ut ait Homerus, *melle effuso longè dulcior est*, quatenus spem facie vindictæ, quæ jucunda est: *In quantum*, inquit D. Thomas, *videtur removere apparentem minorationem, quæ videtur esse ex precedenti læsione. Cum enim aliquis est ab alio læsus, videtur per hoc ab alio minoratur, & ideo appetit ab hac minoratione liberari per retributionem læsionis. Similiter amari, laudari, suspici, delectationem creant, quatenus sunt signa boni existentis in nobis, maxime dum sunt à sapientibus. Imò vincere, redarguere, aliosque increpare jucunda sunt, non quatenus aliis malum inferunt, sed quatenus perveniunt ad bonum proprium, quod*



## *De Passion. Part. Concupisc. Ar. II. 137*

quod homo plus amat, quàm malum alterius aduersetur. Vincere enim est delectabile, quia per hoc fit æstimatio propriæ excellentiæ; hinc & omnes ludi, in quibus est concertatio, & in quibus potest esse victoria, sunt maximè delectabiles. Redarguere autem & increpare est delectationis causa, tum quia homo per hoc alteri benefacit, quod iucundum est; tum præcipuè, quia hoc facit homini imaginationem propriæ sapientiæ & excellentiæ: increpare enim & corrigere est sapientum & maiorum.

### *Effectus Delectationis*

**E**ffectus delectationis sunt in primis Dilatatio duplex. Altera propriè sumpta, quatenus in gaudio eor sese explicare ac diffundere videtur, spiritusque diffusi sese uberius effundunt, quasi in occursum boni pergentes, tantà aliquando licentiâ, ut cor ipsum deserant, sicque deliquium & mors sequatur: ob hanc causam multi ex nimio, inopinatoque gaudio exspirasse leguntur; nisi maioris, ejusmodi genus mortis causari, non præcisè quodd spiritus cor deserant, sed quodd nimis pulmones dilarent, nimisquæ sanguinis affusione cor obnuat; sicque tam respiratrice, quàm pulsatrice virtute afflicta, quasi duobus vitæ cardinibus concussis, deliquium, imò interitus inferatur. Altera verbò dilatatio est metaphorica, quatenus in lætitiâ, apprehensio ex perceptione boni convenientis perfectionem quandam affequitur, quæ est spiritualis quædam magnitudo; & affectus, ut plenius donum capiat, sese explicare videretur.

Secundus delectationis effectus est creare sitim ac desiderium sui, non modò quando absens memoriâ recolitur, sed etiam quando incipit haberi, & nondum perfectè habetur: tunc enim delibatio ejus acuit desiderium plenius eam degustandi. Verùm postquam usque ad saturationem percipitur, causat sui fastidium ac nauseam, ut patet in delectatione ciborum aliorumque sensibilium, in quibus duntaxat locum habet id fastidii genus: nam spirituales delectationes, quo plenius habentur, eo ardentius appetuntur.

Ter-

### 138 Tertia Partis Philosoph. Q. III.

Tertius effectus delectationis sensibilis est, impedire usum rationis, vel ipsum penitus absorbendo, si delectatio maxima sit, & omnem animi intentionem ad se rapiat; vel saltem, si moderatior sit, multum distraendo; (Delectatio enim, ut egregie notat Marcellus Ficinus, est *esca & veluti harnus spirituum*, qui neglectis aliis functionibus ad eam percipiendam assatim accurrunt) vel demum vigorem iudicii practici emolliendo; unde Aristoteles 6. Ethic. cap. 5. *Delectatio, inquit, corrumpit estimationem prudentia.*

Quartus demum delectationis affectus est, perficere propriam operationem, qua percipitur. Tum quatenus & ipsa est quoddam bonum, proindeque addita bono operationis ipsum auget, decorat, condit, ac perficit. Tum precipue quatenus allicit attentionem, intentionem, consentionemque virtutis agentis; est enim condimentum quoddam reddens operationem suaviorem, cariorem, appetibiliorem; & veluti quædam esca spirituum. Unde prudens natura necessariis operationibus liberali manu voluptatem admiscuit, ut libentius, attentius, decentius, ardentius, efficaciusque peragerentur.

#### De Tristitia, ejusque Remedii.

**T**RISTITIAM, de qua peregre D. Thomas 2.2. dissectuit per quinque quaestiones, ut breviter attinamus; ejus Natura, Causæ, & Effectus satis intelligi possunt ex dictis circa delectationem. Definiri enim potest *Quies appetitus, malo*; quies, inquam, non tranquilla & appetitui conveniens; sed repugnans & disconveniens. Vel etiam, *Affectus causatus ex apprehensione mali presentis*. Inferitur autem à contrariis eorum, quæ inter causas delectationis recensuimus, & generaliter ab omni malo conjuncto & apprehenso ut talit. Effectus vero ejus sunt. Tum angustiare, constringere, ac aggravare animum, sicut ipsum delectatio dilatat & erigit. Tum operationem debilitare, sicut & delectatio roborat. Tum præcæteriis passionibus corporis, vitæque nocere, eo quod, ut præclare notat D. Thomas, impedit, ne per motionem ac vitam liberè in alia membra effundat, sicque quasi vitalem fontem occludat, ipsum

## *De Passione. Par. Concupisc. Art. II. 139*

constringendo, ac præ cæteris passionibus opprimendo. Si tamen moderata sit, vitæ prodest; nam spiritus intus continet, ac veluti figit. Hinc Apostolus 2. ad Corinth. 7. *Qua secundum Deum tristitia est, salutem; sæculi autem tristitia mortem operatur.*

Tristitiæ immoderata, cum sit quædam animi ægritudo, quædam ejus remedia & lenimenta commemorat Divus Thomas, inter quæ primum est qualibet delectatio, quæ suavitate suâ, veluti balsamo quodam, vulnus à dolore inflatum consolidat, aut certe demulcet, reficitque fatigatum animum, ut quies membra labore soluta.

Secundum remedium & connaturalius sunt fletus, gemitus, suspiria, lamenta, cæteraque exteriora tristitiæ signa. His enim exoneratur animus, ac veluti evacuatur, & extra effunditur quædam acerbitalis tristitiæ pars, in-  
tentioque animæ ab interiore doloris sensu ad exteriora illa signa divertitur; interimque aliqua satisfactio capitur in hoc opere connaturalissimo: quid enim tam naturale dolenti, quàm flere? Omne autem connaturale opus delectat.

Tertium est amicorum compassio, quæ dolorem delinit, tum quatenus est egregium signum amoris eorum: signa verò amoris, cum semper delectent, tum maximè dum affligimur, quia tunc magis assenâ ope indigemus. Tum etiam quia oppressus doloris pondere animus alleviatur, dum aliter per compassionem ei conjunguntur ad onus doloris cum illo portandum.

Quartum remedium sapientibus proprium est contemplatio veritatis, qua mitigatur dolor, non solum quatenus per eam menti acies à doloris sensu avertitur; animus, ne malis succumbat, erigitur; robur quoddam ac generosum sensibillum seu affligentium, seu delectantium contemptum concipit: sed etiam quatenus ipsa cum sit maximè jucunda, exasperatum animum demulcet, & suavitate suâ acerbitalatem omnem perfundit.

Quintum demum doloris lenimentum sunt quædam remedia corporalia, quibus dum debitus corporis status, dolore turbatus restituitur, animus simul cum corpore reficitur. Inter ea verò sunt cum somnus, qui, ut inquit Ambrosius, *mentes lassas allevat, luctusque solvit* anxios, quatenus scilicet & dolorum, curarumque obli-  
vjo.

tionem inducit, & benigno quodam rore amentes spiritus recreat: unde vocatur à Terrentiano *Recreator corporum, redintegrator vitium, medicus laborum*. Tum etiam balnea, de quibus S. Augustinus *g. Conf. cap. 12.* ait: *Andieram balnei nomen inde dictum, quod anxietates tollat ex animo.*

## ARTICULUS TERTIUS.

### *De Passionibus Partis Irascibilis.*

**U**T reliquas Passiones, quæ scilicet ad partem Irascibilem spectant, breviter expediamus; in primis patet ex dictis, quod cum aliæ ad Concupiscibilem pertinentes versentur circa bonum & malum simpliciter sumpta, istæ addunt rationem ardui, ac difficilis, suntque proinde veluti quidam animi conatus, quibus & ad bonum se erigit & contra mala insurgit. Sunt autem numero quinque, Spes & Desperatio, Timor & Audacia, & Ira, de quibus ut verbo dicamus,

Spes definitur, *Passio, quæ appetitus tendit in bonum futurum arduum, adeptu tamen possibile*. Ut passio convenit cum aliis: cæteræ particulæ eam ab illis distinguunt, à timore quidem quatenus objectum spei dicitur *bonum*; timor enim est de malo: à gaudio, quatenus dicitur *futurum*; gaudium enim est de præsentis: à desiderio; quatenus dicitur *arduum*, desiderium enim est de bono futuro præcisè ut conveniens est, non verò ut induit rationem ardui: à desperatione, quatenus dicitur *adeptu possibile*; desperatio enim est de impossibili. Ex quo patet, quod spes supponit desiderium, & in illo fundatur, additque quandam appetitus firmitatem contra difficultates: quippe desiderium est simplex anhelatio in bonum absens. Verùm quia dilatio, difficultatesque, quibus obsidetur bonum desideratum, veluti deprimunt, deiciuntque appetitus aciem, ideo indiget quodam conatu, quadamque firmitate, ut sese erigat, & robores in prosecutione boni. Hic conatus animi sese obfirmantis est spes, quæ nascitur ex boni possibilitate.

*Causæ spei sunt in primis Experientia, secundum quod*

quod per eam erudimur tum de possibilitate boni, tum de modo tendendi in ipsum. Nam si per eam cognoverimus, rem solere in deterius cadere, tunc impeditur magis, quam juvat spem. Secundò vires, quibus difficultates sunt superabiles; ad quam causam pertinent divitiæ, fortitudo, amici, &c. Tertiò calor cordis, quo spiritus roborantur, ne ita facillè cedant difficultatibus imaginationi, qua retunduntur. Quartò demum inconsideratio, qua fit, ut difficultates non reputentur, aut non advertantur. Propter has causas & juvenes, & ebrii, & stulti sunt bonæ spei: Juvenes quidem, tum quia in eis est parum de præterito, multum verò de futuro, & ideo spe magis, quam memoria vivunt. Tum quia optimam opinionem habent de suis viribus, difficultates verò parvipendunt, quia eas satis non penetrant, nec experti sunt. Tum demum quia abundant calore cor dilatante, & spirituum motum obfirmante. Ebrii verò, quia & in ipsis calor aëstuat, & bene sentiunt de suis viribus, nec difficultates perpendunt. Stulti demum propter inconsiderationem periculorum. At verò Senes raræ spei, eo quòd, cum in præteritis experti sint res plerumque in deterius cadere, in futuris idem suspicantur: & præterea difficultates magis ponderant ac penetrant: & demum languescens in illis calor non satis roborat spirituum motum, qui propterea facillè retunduntur ex opinione difficultatum.

Effectus Spei sunt tum delectare, quatenus per eam desiderati boni quandam prælibationem degustamus. Tum operationem perficere: nam quatenus respicit bonum arduum, excitat attentionem; querens verò respicit bonum possibile, non retundit conatum. Tum in amorem personæ inducere, à qua bonum speramus: ex hoc enim, quòd per aliquem speramus bona nobis pervenire posse, moventur in ipsum sicut in bonum nostrum, & sic eum amare incipimus.

Desperatio satis innotescit ex dictis de Spe, cui contrariantur, non quidem penes objecti contrarietàtem secundum bonum & malum, (utraque enim est de bono) sed penes accessum & recessum, quatenus spes est accessus ad bonum, desperatio verò recessus ab illo. Contingit enim aliquando, bonum desideratum tot  
diffi-

## 142 *Tertiae Partis Philosoph. Q.III.*

difficultatibus circumvallati, ut illis obrutus animus succumbat, & ab ejus prosecutione recedat. Hic affectus dicitur Desperatio, quæ proinde definitur potest Passio, quæ appetitus recedit à bono arduo adeptus impossibili. Hæc verò impossibilitas non debet esse metaphysica, sed moralis, quatenus nimis difficilia, quæque conatum nostrum superant, reputantur ut impossibilia.

Audacia definitur Passio, quæ appetitus insurgit in malum terribile ad ipsum fugandum & superandum. Ut passio, convenit cum aliis: cæteræ particulæ proprium audaciæ characterem assignant, quæ ut intelligantur, advertendum cum D. Thoma, quod licet appetitus per se tendat in bonum, & recedat à malo; per accidens tamen & recedit à bono, cum scilicet tot difficultatibus vallatur, ut non possit obtineri, sicque fit desperatio, & contra tendit in malum, non obtinendum, sed vincendum, quando spes ipsius superandi affidget; & hic motus dicitur audacia. Expresse verò diximus in malum terribile, quia mala levia contemptum potius, quàm audaciæ inducunt: unde audacia non est nisi circa magna & terribilia mala.

Causæ Audaciæ sunt in primis Spes; non enim quis movetur ad insurgendum contra mala, nisi ex spe vincendi ipsa: unde Aristoteles 3. Ethic. cap. 8 ait, *Quid illi, qui sunt bonæ spei, sunt audaces*: ut juvenes, ebrii, sulci. Omnia quoque, quæ spem foveant & augment, pari ratione audaciæ causant, ut divitiæ, amici, robur, experientia in periculis, &c. Sed præ omnibus legitimam audaciæ facit confidentia divini auxilii: unde Aristoteles 2. Rhet. cap. 5. agnoscit, eos, qui bene se habent ad divina audaciores esse; additque, qui injuriam passi sunt, reddi audaciores, quod Deus injuriam passis auxilium ferat. Est præterea altera audaciæ causa ex parte materialis, calor scilicet cordis, qui roborat Imperium spirituum, ne ita facile ab apprehensione periculi retundantur: unde animalia, quæ habent cor parvum, sunt audaciora; quæ verò magnum, sunt timidiora, ut dicit Aristoteles lib. 3. de Partibus Animal. cap. 4. *Quia scilicet*, inquit D. Thom. 1. 2. q. 45. ar. 3. *calor naturalis non tantum potest calefacere magnam domum, sicut parvam*. Præterea quia timor opponitur audaciæ, ideo quæ timorem tollunt, audaciæ causant; unde homo fit auda-

audacior ex eo, quodd non habet inimicos, ac nemini nocet; illis enim, qui aliis nocuere, maxime imminere videntur pericula.

Inter hujus passionis effectus recenser Divus Thomas, tum revocare spiritum & calorem ad cor initio periculi, quasi ad irruptionem vehementiorem faciendam: unde audaces aliquando aggredientes periculum tremunt, ut de Alexandro Magno fertur, qui ante prælum tremore concuti solebat. Tum motus fortiores initio periculi facere, quàm in fine: unde Aristoteles 3. Ethic. cap. 7. *Audaces*, inquit, *prævalentes sunt, & volentes ante pericula, in ipsa autem discedunt*. Ratio est, quodd illa passio tegitur sensitivâ cognitione, quæ cum non sit collativa, non discutit singulas periculi circumstantias: unde illis ex improvviso occurrentibus succumbit. Cum è contra vis fortis sit in ipso periculo constantior, quàm ante, eo quodd singula præviderit; imò majora aliquando: unde ex occursum minorum non terretur, sed fit confidentior.

Timor opponitur Audaciæ, ex cujus explicatione proinde innotescere potest: unde sicut Audacia erigit animum contra mala, ex spe superandi, ita Timor dejicit eum, ob difficultatem evadendi; Ideoque definiri potest *Passio, qua appetitus succumbit ingruenti malo, terribili, ac via evitabili; seu, Dejectio animi vincta à gravitate periculi*. Ut enim observat Divus Thomas: dum malum imminens est in apprehensione, fit quadam veluti lucta inter appetitum & malum: nam appetitus vincere, ac fugare nititur malum; & rursus malum natum est fugare, ac vincere appetitum. Si ergo in hoc veluti conflictu animal sentiat, vires suas esse superiores malo, insurgit in illo imperus ad aggrediendum, expugnandumque malum, qui est Audacia. Si autem sentiat, vires suas esse minores, malum verò & periculum gravius, dejicitur, succumbitque victus appetitus, & sic fit Timor.

Ex his patet, quodd causæ Timoris sunt, tum defectus ex parte appetitus & appetentis, qui non sentit in se satis viriam ad expugnandum malum. Tum gravitas ex parte mali, quod ita ingruit, urgetque, ut vix evasions copia eluceat. Dico *vix*, nam si nullum prorsus effugium esset, timor in desperationem degeneraret: unde

unde ad timorem requiritur aliqua spes evadendi, non quidem orta ex excessu virium nostrarum ad vincendum malum, hæc enim ingenerat audaciam; sed ex quadam incertitudine mali eventus, quod non necessarium, sed contingenter imminet. His causis accedit corporalis dispositio, tum ex parte imaginationis, quæ fuliginosâ quadam nigredine horrorem rebus affingit: unde melancholici sunt timidi, (nisi quibus melancholia facillè inardescit; hi enim audaciores existunt) & tenebræ timorem, horroremque incutiunt. Tum ex parte cordis, in quo calor modicus, parciusque ac debilius spiritus existit: unde animalia, quibus cor magnum, & frigidus circum præcordia sanguis inest, sunt timidiora.

Effectus Timoris sunt in primis Contractio, exque duplex. Altera metaphorica, quatenus appetitus à malo victus profligatusque recedit, & in seipso colligitur. Altera propria & corporalis, quatenus in timore calor & spiritus exteriora relinquunt, & ad interiora, præcipuè ad cor, tendunt, ibique congregantur, non ut impetum faciant, sicut in Desiderio, Ira, & Audacia, sed ut salventur; ideoque ibi non æstuant, sed torpent, ac marcescunt, sicut victâ civitate cives ad interiora & munitiora fugiunt; non gratiâ eruptionis commodius faciendæ, sed gratiâ salutis & effugii. Imò urgente apprehensione mali & cor expugnante, calor & spiritus vergunt ad inferiora, quàm fugiendo apprehensionem mali à cerebro in cor derivantem. Idem ob eandem causam fit in morte, cujus timor gravis est quædam prælibatio, in qua calor & spiritus recedit ad interiora.

Verùm egregiè Divus Thomas 1. par. quæst. 44. art. 1. ad 3. notat verecundiam, quæ est quædam timoris species, hunc effectum non inducere, sed potius oppositum, eo quod verecundia non causetur à malo naturam destruente, sed solum à quadam turpitudinis apparentia animum confundente, ac turbante; & ideo sanguis, calor, & spiritus non fugiunt ad arcem vitæ, sed potius turbulentè ascendunt ad superiora, præcipuè ad faciem, ubi sentitur robur ex turpitudinis deprehensione causatus, quasi natura intenderet non solum parci laboranti ferre opem, sed etiam velum



velum quoddam inducere ad tegendam confusionem in ea relucens : unde in verecundia rubet vultus ex affluxu sanguinis & spiritus ad faciem.

Cæterum ex illo primo effectu plures alii sequuntur ; ut tremor , pallor , crepitus in destitutis calore , vigore , spirituque membris ; interclusa quoque vocis , quasi spiritum foras eructare ad formandam vocem refugiente ; erectio capillorum , compressis ob frigus porulis , ex quibus prodeunt , & quadam rigiditate ex frigore omnia membra invadente in illis causata ; Imò aliquando subita canities , vehementi scilicet timoris intra paucas horas in capillis id efficiente , quod lenta senectus per plures annos sensim operatur . Ex eadem etiam contractione fit deliquium animi , frigore præcordia invadente ; stupor , & quadam totius hominis rigiditas ob defectum caloris ; sitis & ariditas faucium , destitutis scilicet illis partibus solita sanguinis irroratione ; solutio alvi , propter contractionem ventris , & quod ex compressa fellis vesicula bilis copiosa influat in intestina , stimuletque ad ejectionem excrementi , interimque muscoli retentivi , *sphincteres* dicuntur , defectu spiritus debilitentur .

Ad effectus timoris spectant etiam turbatio mentis , stupor , & insensibilitas quadam , ita ut nimio timore perculsus neque audiat , neque videat , neque aliquid cogitet , eo quod nempe cogitatio mali totam phantasiam impleat , obruat , & impediat ; & sic ex ea parte timor consilium adimit , & operationem præpedit . Attamen etiam sollicitudo evadendi mali ex timore causatur , & ideo ex hac parte timor dicitur *facere bene consultivos* , & *operationem adjuvare* , quasi stimulando ad quærendum consilium , & adhibendam curam , ut evitetur malum , quamvis ex alia mentem turbando , ac confundendo consultationem impediat , & calorem , ac spiritum retrahendo , quæ sunt propria operationis adminicula , actionem retardet .

Ira , quam Gregorius Nissenus eleganter vocat *Armeram concupiscentia* , variè definitur . A Cicerone , *Inimicitia ulciscendi tempus observans* . Ab aliis , cum non unam simplicem passionem putent , sed certarum & plexum passionum ; *Affectus* , quo anima præ  
Philos. R. F. Gaud. IV. Pars. G. dolo-

dolore ob injuriam acceptam, ac odio in illius authorem concepto, pectoreque incalescente ad ulciscendum concitatur, ut auctorem facti poeniteat. Breviter definitur potest cum Aristotele lib. 1. de Anima, cap. 1. & lib. 2. Rhetor. cap. 2. *Appetitus ultionis aperta, cum fervore sanguinis circa cor*. Quatenus appetitus, convenit cum aliis passionibus, quæ sunt quidam appetitivi motus; reliquæ particulæ proprios Iræ characteres assignant: nam proprium Iræ objectum est vindicta, seu ultio injuriæ, non quævis, sed aperta. Unde lib. 7. Ethic. cap. 7. Aristoteles Iræ vocat *Affectum apertum, minimèque insidiosum*. Iratus enim vult innotescere ei, qui intulit injuriam, se esse, qui noceat, & ob illatam injuriam noceat, ut sic cum illatæ injuriæ poeniteat. Additur *cum fervore sanguinis circa cor*, ad significandum materiale Iræ, quæ quandam sanguinis ebullitionem circa præcordia excitat.

Inter causas Iræ primatē locum tenet parvipensio, seu injustus contemptus: quippe cum omnia Iræ motiva ad istud reduci possunt: Ira enim est appetitus vindictæ, id est, rependendi injuriam, non qualitercumque illatam, sed ex certa scientia & electione: unde contra eos, qui vel ignoranter, vel ex passione nobis nocuerunt, aut parum, aut nihil irascimur. Quoddam autem aliquis ex certa scientia & electione injuriam inferat, hoc perhinc ad parvipensionem, cuius tres species enumerat Aristoteles, scilicet *despectum*, quo aliquis tanquam nullā se dignus negligitur; *incommodationem*, qua quis alienæ voluntati se opponit, non ut aliquid sibi eveniat, sed ne illi; & *contumeliam*, qua quis nocet & molestus est in illis, qui cedunt in dedecus patientis, nullo alio quæsito fructu, nisi malignâ quadam voluptate, quam percipit, quatenus malefaciendo alteri, putat se excellere supra ipsum. Quidquid ergo auget has parvipensionis species, auget & iram; & ideo quia tanto parvipensio est gravior, quanto excellentior est persona, quæ contemnitur, excellentia offensus auget iram, excellentia vero offendentis supra-offensum eam minuit. Altera causa, disponens ad iram ex parte irascens, est defectus ejus proprius. Qui enim alicui defectui obnoxius est, facilius putat, se contemni, ideoque ad iram pro-

## De Pass. Part. Irasc. Ar. III. 147

promptior efficitur : nam ut ait Terentius in Adelphis, Scena 3. Actu 4.

*Omnes, quibus res sunt minime secunda, magis sunt  
nescio quo modo  
Suspiciosi, ad contumeliam omnia accipiunt ma-  
gis.  
Propter suam impotentiam se semper credunt ne-  
gligi.*

Effectus Iræ sunt primò quædam ei propria delectationes  
unde Homerus Iræ, inquit,

*Dulcior effuso qua melle in pectore crescit.*

Cujus delectationis causa est, quod per Iræ fiat spes  
vindictæ, quæ maximè jucunda est, eo quod sit pro-  
prium remedium doloris ob injuriam concepti. Secundò  
fervor quidam, non dulcis & lenis, qualis est in amo-  
re, quique correspondeat sanguini; sed amarulentus  
& ad consumendum exæstuans, qui correspondeat flava-  
bili. Terribè turbatio, tum rationis, quæ ut quietos,  
tranquillosque spiritus exigit, ita turbulentiam eorundem  
ab Iræ fervore causatâ maximè confunditur, obnubila-  
tur, obæcatur; tum etiam corporis, maximè mem-  
brorum illorum, in quibus, inquit D. Thomas, cordis  
vestigia relucunt, ut sunt oculi, facies, lingua, &c.  
quam perturbationem ita describit Gregorius 5. Moral.  
cap. 31. *Ira sua stimulis accensum cor palpitât, corpus tre-  
mit, lingua se præpedit, facies ignescit, exasperantur ocu-  
li, & nequaquam se cognoscunt noti; os quidem clamorem  
format, sensus, quid loquatur, ignorat.* Unde non im-  
meritò quidam pro aptissimo sedandæ Iræ remedio habuit  
ut iratus se in speculo inspiceret, ex illa exteriori tur-  
batione vultus, dimotum suâ sede animum deprehen-  
surus. Taciturnitas etiam reponitur inter effectus Iræ,  
quatenus turbata ratio, vel digna passione verba non re-  
perit; vel impedito organo satis ea exprimere nequit; vel

aliquid inordinatum, & scilicet providentiæ vindicandum proferre pertimescit.

Addi demum posset inter effectus Iræ Manifesta Operatio. Iratus enim non insidiosus est, sed apertus. Cujus rationem peregre repertit Divus Thomas 1. 2. quæst. 48. artic. 3. ad 2. partim quidem ex impedimento rationis, quæ non potest discernere, quid sit occultandum & quid manifestandum, nec etiam excogitare occultandi vias; partim ex ampliatione cordis, quæ pertinet ad magnanimitatem, quam facit ira. De magnanimo autem dicit Aristoteles 4. Ethic. capit. 3. *Quoddam est manifestus exoror & amator, & manifeste dicit & operatur.* Partim demum ex discrimine, quoddam est inter Concupiscentiam & Iram. Concupiscentia enim fertur circa delectabilia quædam, quibus adjungitur aliqua turpitudine & mollicies, ob quam homo vult latere: unde concupiscentia vocatur ab Aristotele *Latens*, & *insidiosa*. At verò Ira respicit vindictam, in qua virilitas & excellentia quædam relucet: unde iratus amat agere in aperto, tanquam præclare se agere putans. Addi præterea posset, quoddam Ira, cum subitos habeat impetus, quærit compendiosorem viam; viæ autem occultæ & insidiosæ sunt sinuosæ, anfractuosæ, ac prolixæ. Et denum hoc ipsum maximè pertinet ad amoliendam parvipensionem, ut omnibus innotescat, offendentem non impunè laxasse; & ideo iratus non occultum, sed apertum quærit inferre nocumentum, ut plenè sibi satisfaciatur. Sed de Passionibus satis hætenus.

## QUÆSTIO QUARTA

### *De Bonitate & Malitia Morum.*

**H**ANC Moralis partem eo pressius transcurrentes, quo fusiùs & accuratius illam Theologi expendunt. Unde missis aliis, quæ circa Bonitatem & Malitiam moralem in Theologia uberius discuti solent, quidquid in hac quæstione dicendum occurrit, tribus complectemur articulis. In 1. Agemus de Moralitate secundum se, de- que divisione illius in Bonitatem & Malitiam. In 2. Discutietur, sitne aliquis actus indifferens. In 3. de Regu- lis morum breviter differemus.

### ARTICULUS PRIMUS.

*Quid sit Moralitas, quomodo in Bo-  
nitatem & Malitiam di-  
vidatur.*

**I**N actu morali duo sunt, Entitas & Moralitas, qua- rum illa est veluti hujus materia & substratum. Entitatem actus moralis in eo sitam constat, quòd sit quæ- dam operatio vitalis & libera; nec enim alii actus mora- les habentur, quàm qui vitaliter & liberè fiunt, quia sublata libertate, non stat nec meritum, nec demeri- tum; nec laus, nec vituperium; nec bonum, nec ma- lum, saltem morale. Verùm in quo moralitas propriè sita sit, non omnes conveniunt. Aliqui eam cum liber- tate confundunt, quasi nihil addat supra illam. Alii solam denominationem extrinsecam addere censent. Alii

## 150 *Tertiae Partis Philosoph. Q. IV.*

esse merum ens rationis. Verum prima sententia materialis moralitatis confundit cum moralitate. Ut enim notat D. Thomas in proemio *Ethicarum*, quemadmodum ordo artificialis consistit in dispositione, quam ratio inducit in materia externa; ita ordo moralis situs est in dispositione, quam ratio facit in actibus voluntariis. Unde sicut lapides, ligna, ferrum, aut aliud huiusmodi, quod arte disponitur, est solum materia artificiositatis; ita & actus voluntariis ob libertatem tractabiles à ratione, non sunt ipsa moralitas, sed illius subiectum & materia. Secunda verò & tertia sententia, cum in aliis deficiant tum in hoc, quod non satis dignè sentiant de moralitate. Unde iis relidis,

Dico 1. Moralitas formaliter consistit in ordine, quem ratio facit in actibus liberis, eos disponendo conformiter, vel difformiter à regulis morum; seu, in respectu transcendentali, quem actus voluntatis dicit ad objectum suum, non præcisè sumptum, sed ut regulis morum subiectum.

Utrique modus exprimendi conclusionem in idem redit. Non enim aliter ratio ordinat actum voluntatis, quam mediante objecto, quatenus scilicet intellectus regulando objectum, in quod voluntas fertur, facit, ut & ipse actus voluntatis sit regulatus. Unde ordo, quem intellectus facit in actu voluntatis, est idem, ac ille respectus transcendentalis ipsius actus voluntatis ad objectum suum, ut regulatum. D. Thomas primo modo expressit moralitatem in proemio *Ethicarum*, cum dixit, ordinem, quem ratio facit in actu voluntatis, pertinere ad Philosophiam moralem. Secundo verò modo eam explicat 1. 2. q. 18. art. 8. dum ait, *Actus humanus, qui dicitur moralis, habet speciem ab objecto elato ad principium humanorum essentium, quod est ratio.*

Probatur conclusio 1. Idem est distinctivum, ac constitutivum: Sed moralitas distinguitur in bonitatem & malitiam per respectum conformitatis & difformitatis ad regulas morum: Ergo moralitas consistit in tali respectu.

2. Eodem modo proportionaliter loquendum est de entitate, ac de moralitate actus humani: Atqui actus humanus desumit suam entitatem ex tendentia in objectum suum in ordine entitativo consideratum: Ergo debet desumere suam moralitatem ab illo ordine moraliter sumpto,

*De Actu Indifferenti. Art. II. 151*

pro, id est, ad regulas morum comparato. Minor certa est. Actus enim specificentur per objecta, sed etiam ostendimus in Physica p. 4. qu. 1. art. ult. Major autem ex eo constare videtur, quod moralitas fundetur in entitate actus, tanquam modus quidem ei superadditus, ac veluti quædam ipsius proprietas.

3. Denique. Moralitas semper solet explicari per modum cuiusdam commensurationis: unde boni vocantur *recti*, & mali *perverti*, *obliqui*, *iniqui*: Sed commensuratio, rectitudo, perversitas, obliquitas significant quendam respectum rei ad suam regulam: Ergo signum est, moralitatem desumi à respectu ad regulas morales.

Dico 2. Moralitas essentialiter & adæquatè dividitur in Bonitatem, & Malitiam.

Probatur prima pars, illam Divisionem esse essentialem. Moralitas in communi debet dividi per aliquas differentias essentielles: Atqui nullæ videntur magis essentielles, quàm bonum & malum, siquidem moribus per se primò competit bonitas & malitia: Ergo bonitas & malitia sunt differentie essentielles. Unde D. Thomas 3. contra Gentes, cap. 9. *Bonum*, inquit, & *malum in moralibus ponuntur specifica differentia.*

Confirmatur. Moralitas, ut jam ostendimus, essentialiter consistit in respectu ad objectum prout subjacet regulis morum: Atqui objectum, ut subjacer regulis morum, dividitur in bonum & malum, seu in conforme & disforme illis regulis: Ergo etiam moralitas essentialiter dividitur in bonitatem & malitiam.

Secunda etiam pars, hanc scilicet divisionem esse adæquatam, suadetur. Nam inter illa duo membra nihil cadit medium: Ergo adæquatè dividunt moralitatem. Probatur antecedens. Si quid enim caderet medium, maximè actus indifferens: Atqui talis actus non constituit speciem moralitatis: Ergo nihil cadit medium inter præfata membra. Major constat. Declaratur minor. Nam ex D. Thoma 1. 2. q. 18. a. 3. In tantum actus dicitur indifferens, in quantum non includit aliquid pertinens ad ordinem rationis: Atqui quod non includit aliquid pertinens ad ordinem rationis, non est species moralitatis, cum tota sit in ordine ad objectum, ut subjectum rationi regulari: Ergo actus indifferens non est media quædam Moralitatis species. At de his fusiùs Theologi. Scilicet dicendum aliquid de actu illo indifferenti.

## ARTICULUS SECUNDUS.

*Revertit actus indifferens tam secundum speciem,  
quam in individuo.*

**A**ctus possunt dupliciter considerari, vel præcisè secundum se, & quasi in actu signato, seu secundum suam speciem, vel quatenus hic & nunc sunt in actu exercito, cum tali intentione, ac in talibus circumstantiis, seu in individuo.

Constat, dari plures actus secundum suam speciem indifferentes. Id probat S. Thomas 2. 2. q. 18. a. 3. evidenter ratione. Actus enim habet bonitatem & malitiam ex conformitate, vel difformitate ad regulas morum: Sed plures actus sunt, qui secundum se & in specie sua considerari nec conformitatem, nec difformitatem habent ad regulas morum, ut ambulare, saltare, comedere, loqui, &c. Ergo dantur plures actus, qui secundum se nec boni, nec mali sunt, sed indifferentes ad utrumque. Difficultas solùm est de Actibus in individuo spectatis.

## CONCLUSIO.

**N**ullus actus in individuo, seu prout sit hic & nunc, est indifferens, sed necessariò debet vel bene, vel malè fieri, proindeque esse vel bonus, vel malus.

Conclusio, quam expressè docet D. Thomas pluribus in locis, præcipuè 2. 2. qu. 18. art. 9. & cum eo innumeri alii contra Scotum, intelligenda est de solis actibus deliberatis, seu qui procedunt ab homine deliberante, ac sibi finem præstatuente; non verò de illis, qui procedunt ex sola imaginatione, vel appetitûs sensitivi imaginationem sequentis imperu, ratione nec jubente, nec satis advertente, sed permissivè se habente, ut sunt fricare manus, caput scalpere, spuere, tussire, membra corporis variè disponere, &c. De his enim certum est, esse indifferentes, quamvis si ratio eos nimis luxuriantes negligat corrigere, possint degenerare in leviuscula peccata, quia licet non teneamur hæc omnia deliberatè facere, attamen tenemur aliquem modum etiam in his corporis motibus imponere. Conclusio sic explicata probari in primis posset innumeris auctoritatibus Patrum, qui.



## De Actu indifferenti. Art. II. 153

quibus brevitatis gratia omisiss,

Probatnr 1. Authoritate ipsius Christi Domini, Matthæi 12. dicentis: *Quoniam omne verbum otiosum, quod locuti fuerint homines, reddent rationem de eo in die iudicii.* Quod ponderans Tertullianus lib. de Patientia, *Traditum est*, inquit, *in doctrina Christi, manere nos omnis vani & supervacanti verbi reatum.* Si ergo nec ipsa verba otiosa, id est, ut explicari solet ex Patribus, ad nullum bonum finem ordinata, indifferentia sunt, sed mala, quisnam erit actus indifferentis?

Respondebis. Ejusmodi facta, quæ vocantur *indifferentia*, non esse otiosa, quia non carent ratione justæ necessitatis; sunt enim propter naturæ commoditatem, ut dum deliberatè ambulamus, cubito nitimur, sedemus, &c. hæc sunt quidem indifferentia, quia non videntur laudabilia, aut vituperabilia; non sunt tamen otiosa, quia sunt ad secreandum corpus.

Sed contra. Nam si fiant propter naturæ commoditatem, absque excessu, sunt bona & honesta. Ut enim dicit D. Thomas 1.2. qu. 18. a. 9. ad 3. *Hoc ipsum, quod aliquis agit ordinatè ad sustentationem, vel quietem corporis, ad bonum virtutis ordinatur in eo, qui corpus suum ordinat ad bonum virtutis.*

Dices: Aliquando ejusmodi facta de se indifferentia referuntur ad solam corporis voluptatem, ut odorum perceptio, pulchritudinem rerum inspectio, &c. Nec tamen ista videntur mala: superest ergo, ut sint indifferentia.

Sed contra. Nam dupliciter intelligi potest, hominem agere propter voluptatem. Primiò, ita ut in sua actione bonum honestum excludat, nihil aliud intendendo, nisi sensibiliter delectari. Secundo, ita ut voluptatem secundum regulam rationis taxet, eam fumendo ad recreandum corpus, ne sit spiritui grave, aut ut postea sit aptius ad munera virtutis; voluptates enim sensibiles, ut notat D. Thomas, sunt remedia & solatia quadantenus necessaria ad vitam transigendam. Sed si hoc secundo modo agatur propter voluptatem, patet, actionem fore bonam & honestam. Quamvis enim delectatio sensibilis laudabilius, prætermittatur propter amorem Dei; at tamen & laudabiliter, immodè aliquando necessariò, percipitur propter recreationem ad solatium corporis. Si vero primo modo propter voluptatem agatur, nihil in ea querendo nisi ipsam, actio est mala. Nam pecudum so-

lo sensu prædicatum est in sensibili voluptate requiescere, eo quod voluptas sit bonum proprium appetitui sensibili. At verò rationalis natura non habet pro fine voluptatem, quem sensum delectat, sed honestatem, quam rationi convenit, & ideo, dum agit propter solam voluptatem, etiam si aliunde non agat contra honestatem, deficit à proprio fine, & ad brutale bonum inordinatè se curvat & deprimit, sicque peccat.

Replicabis: Ergo tota vita hominum est perpetua peccatorum textura; quoties enim propter solam delectationem agimus, nihil de honestate cogitantes?

Resp. 1. Non magnum inconveniens esse, si concedatur hac peccatorum leviora leviorum multiplicitas; cum Scriptura Proverb. cap. 24. insinuet etiam exquisitè, suos sæpius cadere.

Resp. 2. Nego consequens. Nam etiam minds rigide conscientie homines sufficientem curam plerumque adhibere solent, ut delectationi honestæ indulgeant. Ad hoc enim satis est, ut ex modo agendi modestiæ, temperantiæque limites hæc solaria non excedant, ac debito loco, tempore, & modo sumantur: hoc ipso enim regulari censentur & honesta, tanquam à ratione temperata.

Probat 2. conclusio ratione D. Thomæ. Quidquid deliberatè sit, vel ordinatur in debitum, honestumque finem, vel non. Si ordinetur est bonum; nisi ordinetur, est malum: Ergo quidquid deliberatè sit, est bonum, vel malum, proindeque nihil indifferens. Major patet. Ordinari enim in debitum finem, & non ordinari in illud, sunt contradictoria inter quæ nihil cadit medium. Minor verò probatur. Et in primis, quod si ordinetur in debitum, honestumque finem, sit bonum, de se patet. Quod verò nisi ordinetur, sit malum, suadetur. Malum est, quod deficit ab ordine rationis: Sed actio non ordinata in debitum finem, deficit ab ordine rationis: Ergo est mala. Major patet. Minor verò ex eo constat, quod ordo rationis in eo consistit, ut cuilibet debitus finis præstitatur.

Respondebis primò, malum esse, quod deficit ab ordine rationis, qui sibi debetur; non verò si careat ordine rationis sibi non debito. Plures autem esse leviores actiones, quibus ordo rationis non debetur, quæque proinde malæ non sunt, licet illo careant.

Sed contra. Homo debet ordinem rationis omnibus suis

## De Actu indifferenti. Art. II. 155

suis actionibus, quas deliberatè faciti. Ergo nulla respon-  
 sio. Probatur antecedens. Unicuique debetur ordo pro-  
 prius, à quo si deficiat, erit malum in suo genere; ut  
 artificiale carens ordine artis, & naturale carens ordine  
 naturæ, censentur in suo genere mala: Sed omnis actio  
 deliberata est actio rationalis: Ergo ei debetur ordo ra-  
 tionis, proindeque finis rationalis.

Dices secundò, rationem posse ordinare actum in fi-  
 nem indifferentem, proindeque illum in sua indifferen-  
 tia relinquere.

Sed contra 1. Cum nihil rationem finis habere possit,  
 nisi sub ratione boni, necesse est, huiusmodi finem, ad  
 quem refertur actus, esse bonum vel secundum sensum,  
 vel secundum rationem; seu vel apparenter, vel verè.  
 Si primum, reddet actionem malam & deordinatam,  
 quia, ut jam dictum est, dedecet creaturam rationalem  
 torpere, ac requiescere in bono sensibili. Si secundum,  
 actio erit bona & honesta: Ergo nullatenus indifferentis.

Contra 2. Finis ille indifferentis, si nullatenus sit bo-  
 nus, aut in bonum ordinatus, saltem erit otiosus: Atqui,  
 ut jam dictum est, actus otiosus est malus moraliter: Er-  
 go, &c. Probatur maior. Nam ex D. Gregorio à D. Tho-  
 ma relato 1. 2. qu. 18. art. 9. *Otiosum est, quod utilitate re-  
 sultantis, aut ratione iusta necessitatis, aut pia utilitatis  
 caret*: Atqui finis ille prorsus indifferentis, est talis, ut  
 de se patet: Ergo, &c.

Objectiones præcipuè insinuatæ sunt, ac solutæ refe-  
 rendo, refutandoque responsiones adversariorum. Solum  
 triplex superest. Prima desumitur ex illo vulgato Hiero-  
 nymi, *Bonum est continentia, malum luxuria, inter utrum-  
 que indifferentis ambulare, sperare, &c.* Secundò, nullum  
 est præceptum referendi omnes actiones ad finem hone-  
 stum: Ergo licet non referantur, non sunt malæ. Ter-  
 tiò, nulla species est, cujus aliquod individuum non  
 exeat: Sed sunt quidam actus ex specie sua indifferentes,  
 ut dictum est, Ergo debent dari individua, seu actus in  
 individuo indifferentes.

Resp. Ad 1. D. Hieronymum explicandum esse de  
 his actionibus secundum se sumptis abstrahendo ab in-  
 tentione. Nam certum est, quoddam ambulare propter bo-  
 nam intentionem, est bonum. Quia ergo ejusmodi actio-  
 nes, quas Hieronymus indifferentes vocat, sunt semper  
 ex intentione, vel ordinata, vel inordinata, necesse

## PRIMA CONCLUSIO.

**P**rima & remota regula humanorum actuum est lex aeterna, quæ proinde fons est & prima origo totius honestatis, ac bonitatis moralis. Ita D. Thomas 1. 2. qu. 29. art. 4.

Nomine *Legis aeternæ* intelligitur, ut definit S. Thomas 1. 2. qu. 93. art. 1. *Ratio divina sapientia omnia in finem debitum dirigens*; seu ut definit S. Augustinus lib. 1. de Lib. Arbit. c. 6. *Summa ratio, cui obtemperandum est*. Ut enim Architectus, qui toti præest edificio, ejus in mente rationem habet, cui inferiores, subjunctque artifices pro suo quisque modulo decent obtemperare; ut rectè agant; à qua si recedant, deficiunt: sic summus rerum omnium gubernator Deus rationem ordinis ab omnibus sibi subiectis observandi, ut rectè agant, mente, ac sapientia sua ab æterno præconcepit, secundum quam & ipse semper agit, & omnis inferior ratio, ut recta sit, agere debet; ac si ab ea declinet, peccat. Unde peccatum rectè definitur à S. Augustino contra Faustum c. 6. *Dissem, factum, vel concupitum contra legem æternam*.

Probatur sic explicata Conclusio ratione S. Thomæ 1. 2. qu. 93. art. 3. In omnibus moventibus ordinatis secundum regulatur à primo, ut in politicis inferiores judices à principe, in artificialibus inferiores artifices ab architecto: Sed lex aeterna est ratio superni omnium rerum principis & gubernatoris Dei: Ergo est prima regula omnium inferiorum rationum & actuum ab eis procedentium. Unde rectitudo aliarum legum, & bonitas actionum primò ac præcipuè censetur ex commensuratione ad illam legem, eaque verè bona, recta, honestaque habenda sunt, quæ illi concordant, quantumvis ratione humana primò fronte ineptà videantur. Nam sæpe hæc æterna lex eligit, quæ hominibus absurda videntur: ut dum æternæ salutis viam reposuit in adoratione hominis crucifixi, in contemptu amoris, in ultionis paupertate, honoris, famæque fugâ, spontanea laboris tolerantia, &c. Ea verò mala censenda sunt, quæ huic legi adversantur, quantumvis secundum humanam opinionem recta & admirabilia videantur. Unde tota illa politia hu-

## 158 Tertiae Partis Philosoph. Q. IV.

humanae solertia, quae adeo scitè rerum publicarum momenta procurat; pacis, armorumque negotia astutissimè administrat; regnorum conservari; amplitudini, prosperitati, dilatationi providentissimè invigilat; immò quidquid virtutis admirabilioris specimen aliquod præ se fert, nisi huic legi consonum sit, secundùm Deum & veritatem mera aut astutia, aut stulticia est & iniquitas fucis virtutis larvata.

Hanc æternam legem, eamque omnium legum, ac totius honestatis fontem & regulam esse, non modò sacri Doctores, sed ipsi quoque Philosophi naturali lumine pervidere, ut refert Cicero lib. 2. de Legibus: *Hanc, inquit, video sapientissimorum fuisse sententiam, legem neque hominum ingenio fuisse excogitatam, neque scitum aliquod esse populorum, sed æternam quiddam, quod universum mundum regeret imperandi prohibendique sapientiâ. Ita principem legem & ultimam, mentem esse dicebant, omnia ratione aut cogentis, aut vetantis Dei.* A qua deinde ait, omnibus rebus sanctis legibus vim inesse: *Quavis, inquit, non modò senior est, quàm ætas populorum & civitatum, sed æqualis illius eulm atque terras tuentis Dei. Neque enim esse Mens Divina sine ratione potest; nec Ratio Divina non hæc vim in rebus, præisq; sancientis habere. . . Quamobrem lex vera, atque princeps, apta ad jubendum & ad vetandum, ratio est vestra summi Jovis.* Ex quo infert, nullas leges esse æctas, nisi quæ huic concordant.

Hinc liquet, Honestum & Rectum non ex hominum opinione, aut consuetudine, aut utilitate pendere, sed ex natura & veritate. Nam figitur & constat eadem causâ, quæ natura ipsa; nec ex hominum arbitrio censetur, sed ex ipsa lege & ratione divina, cui omnia naturaliter subijciuntur: ut etiam loco citato agnoscit Tullius.

## SECUNDA CONCLUSIO.

**P**roxima, immediatæque moralitatis regula est ratio dicans voluntati, quid sit bonum, quidve malum. Conclusio est D. Thomæ 1. 2. q. 71. art. 6. *Regula, inquit, voluntatis humana est duplex: una propinqua & homogenea, scilicet humana ratio & alia verò est prima regula, scilicet lex æterna, quæ est quasi ratio Dei.*

Pro-

Probatur Conclusio, advertendo discrimen, quod est inter creaturas rationales & irracionales: nam creaturæ irracionales non se regunt, sed ab Authore naturæ reguntur; ideoque in se operis sui regulam habere non debent, sed in mente Authoris sui tantum supponere, sicut regula dirigens sagittam in scopum non est in sagitta, sed in sagittante. At verò creatura rationalis, sicut homo, habet jus regendi se, actusque suos ordinandi. Cum igitur omnis ordo sit secundum aliquam regulam in mente ordinantis existentem, ut ordo artificialis secundum regulas artis, quæ sunt in intellectu artificis; ordo politicus, secundum regulas in mente principis conceptas, &c. debuit homini inferi aliqua regula, qua se regeret, & actus suos bene ordinare posset. Et hæc regula est ratio, quæ, ut inquit D. Thomas 1. 2. q. 19. art. 4. ad 3. *Derivatur à lege aeterna tanquam propriæ ejus imago*. Unde cum Psalmista Psal. 4. dimisser, *Sacrificate sacrificium justitiæ*, id est, bona opera; postea quasi obijciendo addit, *Multi dicunt, quis ostendit nobis bona?* Cui objectioni respondet, *Signatum est super nos lumen vultus tui, Domine quasi diceret, inquit D. Thomas 1. 2. q. 19. art. 4. Lumen rationis, quod in bonis est, in tantum potest ostendere nobis bona, in quantum est lumen vultus tui, id est, à vultu tuo derivatum*.

Dices. Præter illas duas morum regulas dantur plures aliæ, scilicet leges, tum Ecclesiasticæ, tum Civiles. Et præterea conscientia maxime regulat actuum moralitatem: Ergo insufficiens est præfata divisio.

Resp. Leges ejusmodi & conscientiam comprehendere sub duabus regulis à nobis assignatis. Conscientia enim nihil aliud est, quam ratio actu dictans, quid fugiendum sit, quidve prosequendum. Cæteræ verò leges nihil aliud sunt, quam quædam æternæ legis participationes, ac determinationes rationis Principis, qui communitati præest. Verùm de Conscientia & Lege aliquid dicendum.

#### De Conscientia.

**C**onscientia variè à Patribus describitur. Origenes eam vocat *Spirituum correctorem, & pedagogum animæ sociatum, quo separatur à malis & adhaeret bonis*. Basilus *Naturale iudicatorium*. Damascenus *Lumen intell.*

## 160 Tertiæ Partis Philosoph. Q. IV.

*Res nostri, supple, praxiri.* Verum exactius definiri potest ex D. Thoma 1. p. q. 79. art. 13. *Judicium intellectus, quo quis applicat suam scientiam practicam ad actum particularem*; unde *conscientia* dicitur, quasi *eum alio scientia*. Cum enim, ut jam dictum est, ratio dictans sit regula morum, in ratione duo considerari possunt. Primum universalis notitia principiorum practico- rum, & hæc dicitur *synderesis*. Secundò applicatio illius generalis notitiæ ad actum particularem, & hæc dicitur *conscientia*.

Huic tribuntur varia munera, scilicet *testificari, ligare, instigare, excusare, seu remordere*. Quorum omnium ratio est, quod applicatio scientiæ practicæ ad actum possit tripliciter fieri. Uno modo per modum interioris convictionis, in quantum interiorius agnoscimus, nos aliquid egisse; & sic conscientia dicitur *testificari & convincere*. Alio modo per modum judicii agendorum discernentis honestum à turpi, & hoc modo conscientia dicitur *instigare* dictando, quid agere oporteat, & *ligare* proponendo id, ad quod agendum obligamur. Postremò demum applicatur scientia operi, in quantum ea, quæ turbulentè agimus, ad tranquillum rationis tribunal examinanda revocamus; & hoc modo conscientia dicitur *excusare*, si id, quod factum est, bene factum interius judicemus; *accusare* verò & *remordere*, si dissonum lumini rationis deprehendatur.

Conscientiæ sic explicatæ septem præcipui status distingui solent à Theologis, scilicet Conscientia Recta, Prava, Probabilis, Dubia, Certa, Scrupulosa, & Erronea. Conscientia recta est, quæ debite judicat de honestate actionum secundum rationis sincerum, incorruptumque lumen & principia; & hæc est semper principium boni actus. Conscientia prava est, quæ judicat de agendis secundum passionis, aut voluntatis malè affectæ, ac per malitiam corruptæ libitum & gustum; & ista semper est principium mali actus. Probabilis est, quæ judicat de agendis secundum principia verosimilia, ut sunt autoritas aliquorum Doctorum, exempla virorum timoratorum, rationes quadantenus suadentes; retinendo tamen formidinem partis oppositæ, quod tripliciter fieri potest. Primum, ita ut probabilitas major sit de pravitate actus, quàm de honestate. Secundò è contra, ita ut sit major pro-  
ba-

bilitas de honestate in hunc, quàm de pravitate. Tertio,  
 itaut æqualis sit utrinque probabilitas. Receptum est,  
 conscientiam probabilem posse esse boni actus regulam, si  
 probabilitas plus inclinat in honestatem actus, quàm in  
 ejus pravitatem; quia cum de agendis raro habere possi-  
 mus exquisitam certitudinem, satis est, ut verosimilliora  
 sectemur. Verùm an probabilitate utrinque æquali, vel  
 etiam in condemnationem actus magis vergente, nihilo-  
 minus ad eum procedere possimus, determinando, esse  
 nobis licitum in tali casu, eo quòd probabilis illa bonitas  
 eum eximat à pravitate: res est, quam pro merito expen-  
 dendam sibi reservant Theologi. Solùm dixisse hìc suffi-  
 ciat, non videri virum sincerè bonum, ac rectum, qui  
 has probabilitatis umbras avidius sectatur, quo laxius vi-  
 vat; quique actum non prætermittit, quem gravissimæ  
 rationes condemnant, etsi non ita evidentes sint, quin  
 aliquem excusationis locum retingant. En tutam hac in  
 parte regulam, quam præscribit Apostolus 1. ad Thessa-  
 lon. 5. *Omnia probate*, seu, ut est in Græco, *δοκιμαζετε*,  
*explorantes. Quod bonum est tenete. Ab omni specie mala*  
*abstinete vos*. Conscientia dubia est, quæ inter duo judi-  
 cia opposita fluctuat, nec habet, quòd se determinet; &  
 hæc non potest esse regula boni actus, eo quòd proponat  
 voluntati actum manifestè periculosum, à quo proinde  
 prudentia judicat abstinendum. Conscientia certa est,  
 quæ sic adhæret iudicio honestatis actus, ut nullam ha-  
 beat formidinem de ejus pravitate, idque vel quia evi-  
 denter de rei agendæ bonitate convincitur; & tunc di-  
 citur *certitudo physica*; vel si rei agendæ bonitas non sit  
 ita certa & evidens, saltem ponderatis ponderandis cer-  
 tò concludit, licitè posse elici talem actum; & hæc dici-  
 tur *certitudo prudentialis*, seu *moralis*. Conscientia scrup-  
 ulosa est, quæ levibus fundamentis ut magni momenti  
 rationibus morosius adhærens, iis in iudicio agendorum,  
 fugiendorumque nititur, præcipuè verò fugiendorum.  
 Conscientia demum erronea est, quæ ex falsis principiis  
 format dictamen de agendis, & ipsam tanquam certissi-  
 mam bene agendi regulam proponit; ut si gentilis firmi-  
 ter tenens, Jovem esse Deum, ex hoc certò concludat,  
 ipsum esse adorandum. Hæc obligat quidem, adeo ut ille  
 peccet, qui contra illam agit; at tamen non excusat in  
 his, quæ juxta illam sunt, nisi error sit invincibilis.



*De Lege.*

**L** Ex dicta videtur à *ligando*, quodd liget, seu obliget, ex Sancto Thoma 1.2. quæst. 90. art. 1. Vel à *legendo*, quodd legi & promulgari debeat, ut vult Isidorus; aut potius, quodd in ea *iustum & ius legatur*, ex Cicerone lib. 2. de Legibus. Vel demum ab *eligendo*, ut idem ait lib. 1. quodd convenientiora eligat.

Definitur à Sancto Thoma 1.2. quæst. 90. art. 4. *Ordinatio rationis ad bonum commune, ab eo, qui præest communitati, promulgata*. Est *ordinatio rationis*, seu ordo agendorum à ratione præscriptus; rationis enim est agenda dirigere. Additur *ad bonum commune*, quia ordo agendorum sumitur à fine ultimo; ultimus autem finis est bonum commune, cui particularia subduntur: unde lex bonum commune spectat, ac particularia in illum dirigit. Dicitur *ab eo, qui præest communitati*, quia dirigere in bonum commune subditos ad eum, qui præest communitati, spectat; proindeque ius legis statuendæ ad illud procurandum. Additur *promulgata*, quia lex habet rationem regulæ; porro mensura & regula imponitur, cum mensuræ applicatur; lex autem applicatur, cum subditis promulgatur, seu intimatur: unde promulgatio ad rationem legis & præcepti pertinet, sine qua non obligat.

Dividitur Lex in Naturalem, & Positivam. Naturalis est, quæ in ipsa rerum natura continetur. Positiva verò est, quæ huic veluti apponitur, quædam naturaliter indifferentia determinando.

Lex naturalis dividitur in Legem æternam, quæ veluti lex essentialis est; & Legem naturalem participatam, quæ est ejus quædam derivatio. Lex æterna, ut dixi, est Recta ratio agendorum in Mente Divina ab æterno existens. Lex naturalis participata est Æternæ legis impressio in creatura rationali, seu Lumen naturale prædicum à divino lumine derivatum, quo honestum à turpi discernitur. Hæc lex nemini rationis compati deest, ac per illam, ut dicitur Joan. 1. *Deus illuminat omnem hominem venientem in hunc Mundum*. Aliquando tamen passionibus, vitiosâ consuetudine, pravâ educatione ita

cor-

corrumpitur homo, ut non extincto quidem, sed velato illo lumine puret bonum malum, & malum bonum. Fulget tamen vel in tenebris illis hujus loci inextinguibilis splendor, dum malignum animum tacite arguit, increpat, damnat, flagellat, & corrodit.

Legis naturalis hæc summa est, *Declina à malo & fac bonum*. Porro bonum hominis principaliter attenditur secundum mentem, quæ in eo præcipua est; tum verò secundum alia menti subiecta. Et ideo lex naturalis est, ut primò mens hominis se rectè habeat ad bonum suum, seu finem ultimum, nec in alio illum figat, quàm in Deo, qui verè est bonum, & finis ultimus mentis. Unde primam legis æternæ impressionem, proindeque primum legis naturalis præceptum dicit Sanctus Augustinus lib. 3. de Lib. Arbit. *Avertere amorem à temporalibus, & eum mundatum convertere ad æternæ*; seu, *Diligere Deum ut summum bonum*, ac ad eum omnes mentis affectus dirigere.

Deinde verò ad hanc legem pertinet, ut homo rectæ rationis ordinem servet tum in conservatione propriæ esse, tum in propagatione sui speciei, tum in passionum moribus, tum denum in convictu cum aliis hominibus, quibus naturali societate jungitur: ut, Parentes colat; Filios rectè educet & instruat; Pacta servet; Bono communi collaboret; unicuique, quod suum est, tribuat; Aliis non faciat, quod sibi fieri noster, &c. quibus præceptis naturaliter notis omne jus humanæ societatis nititur.

Quæres, An lex naturalis mutari possit, & ab ea dispensare quandoque liceat.

Respond. Cum Sancto Thoma 2.2. quæst. 94. præcepta legis naturalis esse duplicis ordinis. Quædam enim sunt primaria, ac ut universalia principia practica per se notat ut, Deum colendum; Parentes esse honorandos; Jus unicuique servandum, &c. Quædam verò se habent ut secundaria, nempe, ut particulares conclusiones ex illis derivatæ: ut, deposita esse reddenda, secretum esse servandum, &c. Quantum ad prima, quæ propriè & per se naturalem legem constituunt, ea nec mutari queunt, nec ullâ dispensatione solvi sunt enim quædam impressiones legis æternæ, quæ immutabilis est; & superiorem, à quo solvi possit; non habet, cum sit ipsa Dei ratio. At verò quantum ad secundaria præcepta, quandoque mutari queunt,

queunt, ac ab his dispensari potest: ut enim in speculat-  
 ivis conclusiones regulantur per principia, ita & hæc se-  
 cundaria præcepta per prima. Porro contingit aliquando  
 propter extraordinarias circumstantias hæc secundaria  
 præcepta repugnare primis, aut non ita necessariò his  
 connecti, quin primis illæis omitti possint. In primo ca-  
 sui, mutantur. In altero dispensationem admittunt à  
 Deo, qui est legis naturæ author. Sic arma deposita furio-  
 so Domino reddenda non sunt. Sic olim circa quosdam  
 dispensatum à Deo fuit, ut plures uxores haberent: nam  
 etsi naturæ humanæ, ac fini matrimonii congruat, ut  
 unius viri una sit tantum uxor; adeoque pluralitas uxo-  
 rum secundo naturæ præcepto repugnet, cui firmando  
 appositum fuit præceptum divinum positivum Gen. cap.  
 2. attamen uxorum pluralitas non ita fini matrimonii re-  
 pugnat, nec proinde primis naturalis legis præceptis,  
 quin his illæis à Deo permitti potuerit, quò citius popu-  
 lus fidelis propagaretur.

Obj. Occisio innocentis, adulterium, ablatio rei ali-  
 enæ, etiam primis naturalis legis præceptis prohibentur  
 Sed Deus in istis dispensavit, cum præcepit Abraham, ut  
 filium occideret, Gen. 22. Judæis, ut mutuata ab Ægy-  
 ptiis vasa auferrent, Exodi 22. Oseæ ut uxorem fornica-  
 tiam duceret, Oseæ 3. Ergo à lege naturali dispensari  
 potest.

Respond. Cum Sancto Thoma 2.2. quæst. 94. art. 5. In  
 his propriè dispensationem non fuisse, sed solùm appositâ  
 præcepti divini circumstantiâ, id, quod absque illa fuis-  
 set contra jus naturale, jam ei conforme factum fuisse.  
 Nam cum Deus sit omnium Dominus, non est contra  
 jus naturæ ex ejus præcepto hominem interimere; aut  
 rem, quæ prius ad alium pertinebat, sibi attribuere; aut  
 ad aliquam mulierem, non servatâ ordinatâ connubii  
 formâ, accedere; tunc enim sit legitima uxor ex assigna-  
 tione Dei.

Lex positiva dividitur in Humanam, & Divinam.  
 Nam præter ea, quæ naturaliter iusta & recta sunt, quæ-  
 dam & ab hominibus & à Deo sunt determinata, quæ  
 prius erant indifferentia.

Lex Humana definitur Ordinatio rerum agendarum  
 in mente principis præconcepta, & multitudini promul-  
 gata. Hæc lex omnino necessaria est ad faciendam publi-  
 cam tranquillitatem, quæ stare non posset, nisi humana  
 so-

societas alicui potestati subesset, quæ per leges malos frangeret, bonos dirigeret, omnibus provideret. Isidorus describit omnes humanæ legis conditiones; dum ait lib. 5. Etym. cap. 21. *Erit lex honesta, justa, possibilis, secundum naturam, secundum consuetudinem patriæ, loco temporisque conveniens, necessaria, utilis; manifesta quoque, ne aliquid per obscuritatem in captione contineat; nullo privato commodo, sed pro communi utilitate civium scripta.* Dividitur præcipue in Jus gentium, & Jus civile. Jus gentium est, quo utuntur omnes gentes, quasi sub naturæ, rationisque authoritate viventes. Jus vero civile, quod quælibet respublica suis præscripsit.

*Lex Divina est ordinatio à Deo constituta rerum agenda- rum à populo fidei, ad placendum Deo, & consequendam supernaturalem felicitatem. Omnes enim homines, ut associantur in prosecutione veræ felicitatis, constituunt quandam rempublicam, cujus princeps est Deus, à quo proinde ordinari debent ea, quæ ad regendam talem rempublicam conveniunt. Hæc lex dividitur in Veterem, & Novam; seu in legem scriptam, & legem gratiæ. Lex vetus, seu scripta, versabatur circa figuras futuræ redemptionis. Lex vero nova, seu gratiæ, non figuras, sed apertam salutis viam continet.*

Actus legis quatuor enumerantur, scilicet præcipere bona, vetare mala, permittere indifferentia, punire transgressores. Sed de his hætenus. Videri potest Divus Thomas 1.2. à quæst. 90. ad 109. ex quo hæc pauca desumpsimus.

## QUÆSTIO QUINTA

*De Virtute Morali in genere.*

**C**UM celebris sit divisio Virtutis in Intellectualem, quæ residet in intellectu, eumque perficit ad attingendam veritatem; & Moralem, quæ perficit appetitum circa bonum, de Intellectualibus dicturi in Metaphysica, hic Morales duntaxat paucis attingemus, inter quas complectimur & Prudentiam, quæ quævis in intellectu sit, eumque ad attingendum verum perficiat, & ob id inter intellectuales censeri possit, attamen ad morales etiam maxime pertinet, quatenus nritur rectâ dispositione appetitus circa fines agendorum, ac in eo regendo unice versatur. Quæ verò de Morali Virtute in genere differenda occurrunt, tribus complectemur articulis. In 1. agendum de ejus Natura & Proprietatibus. In 2. De ejus Causis & Divisione. In 3. De Contrario Virtutis, seu de Vitio.

## ARTICULUS PRIMUS.

*De Natura & Proprietatibus Virtutis.*

**Q**uatuor Virtutis definitiones variis in locis tradidit Aristoteles Lib. 2. de Cælo, c. 12. Virtutem in genere definit *Ultimum potentia*, id est, statum ejus perfectissimum. Quæ definitio etiam virtutis obiecto tribui solet: nam obiectum, ad quod maximus potentiaæ conatus assurgere queat, *ultimum potentia* vocitatur.

Lib. 3. Physic. c. 3. eam definit *Dispositionem perfectam ad optimum*. Quo in loco sumitur *dispositio* paullo latius, prout

prout habitum etiam comprehendit. Virtus dicitur *disposito perfecta*, id est, potentia, quæ dum habet virtutem, perfecta est: *ad optimum*, id est, ad actus primo optimo modo efficiendos.

Specialius ab eo definitur Virtus moralis a. Ethic. c. 6. *Habitus, qui bonum facit habentem, & opus ejus bonum efficit.* *Habitus* est genus; cætera particula discernunt Virtutem moralem ab aliis rum habitibus, rum virtutibus. Hujus enim proprium est efficere hominem bonum, & ejus actum ex omni parte perfectum. Cætera enim vigentes dant solum facultatem perfectam agendi, sed bonum illius facultatis usum non tribuunt: ut scientia dat facultatem rectè attingendi verum, at bonum usum illius facultatis non tribuit: potest enim vir doctus malè uti suâ scientiâ. At verd Virtus moralis ipsum usum eorum, quæ in nobis sunt, rectificat. Usus enim ad appetitum & voluntatem spectat, cujus est applicare alias potentias. Chim ergo virtus moralis appetitum rectificet, non solum dat facultatem rectè agendi, sed etiam efficit, ut omnibus, quæ in nobis sunt, facultatibus, rectè utamur. Unde homo simpliciter *bonus* non dicitur ex aliis virtutibus, ut quia doctus est, quia peritus artifex, &c. sed ex sola virtute morali.

Exactius ibidem definitur ab Aristotele Virtus Moralis, *Habitus electivus, in mediocritate consistens, definita ratione quoad nos, prout vir prudens definerit.* Cujus definitio hic sensus est, Virtutem moralem esse habitum rectificantem electiones, id est, inclinavrem appetitum ad eligendum objectum rectè rationi conformem; proindeque in mediocritate situm. Conformitas enim ad regulam est medium quoddam inter excessum & defectum. Additur *definita ratione quoad nos, prout vir prudens determinaverit*, quia hæc mediocritas censerī debet per respectum ad eligentem, ita ut quisque eligat, quod sibi congruit juxta rectam rationem, nec plus nec minus, prout prudentia præscripserit, cujus est eligibilia ponderare, ac quid conveniat, aut deficiat determinare.

Celebris est etiam hæc alia Virtutis definitio ex S. Augustino lib. 2. de Lib. Arbit. cap. 18. & 19. *Bona qualitas mentis, quæ rectè utitur, & nemo malè utitur.*

In ea definitione, *qualitas* est genus. *Bona* incipit discernere virtutem à vitis. *Mentis*, explicat subiectum virtutis, & sumitur hic paullo latius pro omni eo, quod est

## 168 Tertia Partis Philosoph. Q. V.

est rationis particeps, id est, pro intellectu, voluntate, imò appetitu sensitivo, quo participativè rationalis dici potest, quatenus fulgor, directioque rationis etiam ad ipsum descendit. *Qua rectè videtur*, explicat finem moralis virtutis, qui est vitam hominis rectam & optimam efficere. Addit, *Qua nemo male utitur*, quia cum, ut explere, perficiat ipsum usum, ei repugnat abusus.

Ex his duæ colliguntur Virtutis moralis proprietates, nempe prima, ut sit posita in medio; secunda, ut est nemo per se abuti possit. Addi posset tertia, scilicet mutua connexio. De hac dicemus in fine quæstionis sequentis, quod vix intelligi queat, nisi explicata sit singularum virtutum natura. Ut prima & secunda explicentur,

### PRIMA CONCLUSIO.

**O**mnis virtus moralis est in medio posita.  
 Probatnr. Bonum virtutis moralis consistit in adæquatione ad suam regulam, nempe ad rectam rationem: Sed adæquatio est media inter excessum & defectum, ut per se notum est: Ergo omnis virtus moralis est in medio quodam posita.

Obj. 1. Virtus est ultimum potentie: Sed ultimum repugnat medio: Ergo virtus non est posita in medio.

Resp. Distinguo majorem: virtus est ultimum potentie, secundum perfectionem actus, concedo; secundum quantitatem materie, circa quam versatur, nego. Itaque de ratione virtutis est, ut actum respiciat perfectissimè conformem regulæ rationis, & sic habet rationem ultimi. At ei repugnat excessus, aut defectus materie à regula rationis, & sic habet rationem medii.

Instabis. Pleræque virtutes tendunt ad extremum suæ materie, ut Magnanimitas respicit maximos honores, Magnificencia maximos sumptus, Virginitas abstinet ab omni venerea delectatione, voluntaria Paupertas ab omni possessione: Ergo nec ex parte materie versantur in medio.

Respond. Distinguo: hæc virtutes tendunt ad extremum materie suæ, absolute consideratæ, concedo; comparatæ ad circumstantias, nego. Magnanimus enim tendit ad summos honores, sed ubi oportet, & quan-

## De Natura Virtutis. Art. I. 169

quando oportet, & propter quod oportet: quod quidem medium inter excessum est, nempe tendere quando, ubi, & propter quod. non oportet; & defectum, scilicet non tendere etiam quando, ubi, & propter quod oportet. Unde Aristoteles 4. Ethic. c. 3. *Magnanimus*, inquit, est quidam magnitudine extremus; eo autem, quo oportet modo. Idem dicendum de Magnificencia, Virginitate, Paupertate Evangelica.

Colligitur, Virtutem moralem esse positam inter duo extrema vitia, sicque consistere in medio non solum casualiter, quatenus medium in sua materia attingit; sed etiam formaliter, quatenus ipsa mediat inter duos oppositos habitus vitiosos. In inductione declarat Aristoteles 2. Ethic. cap. 7. Sic Fortitudo est inter Temeritatem & Ignaviam. Temperantia inter Intemperantiam & Insensibilitatem. Liberalitas inter Avaritiam & Prodigalitatem. Magnificencia inter luxum & sorditiam. Magnanimitas inter Fastum & Pusillanimitatem. Prudentia inter Stultitiam & Calliditatem. Iustitia vindex inter Crudelitatem & nimiam Indulgentiam. De aliis Iustitiæ speciebus minus liquet esse inter duo vitia. Nam si quis alteri reddat minus, quam debet, injustus est per defectum. At si plus alteri de suo tribuat, quam debet, excessus ille iustitiam non lædit, nec spectat ad vitium ei oppositum; sed si immoderatus sit, ad prodigalitatem. Verum dici potest, hunc excessum, cum sit in ipsa commutatione, ac distributione, negligendo æqualitatem attendere, videri pertinere ad vitium iustitiæ contrarium per excessum, quo aliquis potius eligit plus dare, quam æqualitatem servare. Quamquam eo vitio vix laborent homines ad sibi plus æquo retinendum longè promptiores.

## SECUNDA CONCLUSIO.

**V**irtute morali nemo per se, ac propriè abuti potest.

Probatur. Tum ex definitione S. Augustini. Tum ratione: nam virtus moralis perficit appetitum, ut rectè utatur illis, quæ sunt in sua potestate: Ergo ei repugnat abusus.

Obji. Qui de sua virtute superbit, ea abutitur: At

*Philos. R. P. Gaud. IV. Pars.*

H

plc.



## 170 *Tertiæ Partis Philos. Qu. V.*

plerique de propriis virtutibus superbiunt : Ergo.

Respond. Eâ abuti, non ut agendi principio, sed ut actionis objecto. Unde non est boni habitus malus usus, sed malus actus occasione bonæ rei elicitus.

Instabis. Qui habitu virtutis præditus est, ob malum finem ex eo potest operari : Ergo & eo abuti.

Resp. Qui agit propter malum finem, jam non agere ex habitu virtutis, sed potius eum corrumpere. Nam habitus virtutis inclinatur ad agendum juxta dictamen rectæ rationis ; est enim facilitas quædam in appeteri ad obtemperandum rationi. Et ideo, cum recedatur à recta ratione, ab ipso virtutis habitu receditur.

## ARTICULUS SECUNDUS.

### *De Causis Virtutis moralis, ejusque Divisione.*

**C**ausa finalis virtutis moralis ex dictis constat ; est enim recta vita, seu actus bonus. Item formalis ; est enim commensuratio ad rectam rationem, quæ à vitiosis oppositis distinguitur. Superest Materialis & Efficiens. Materialis est duplex, nempe materia circa quam, & materia in qua, seu subjectum. Materia circa quam sunt actiones voluntatis & passionis appetitus. Eam specialiter explicabimus agendo de singulis virtutibus. Itaque hic solum agemus de causa effectrice Virtutis moralis, deque ejus subjecto.

## PRIMA CONCLUSIO.

**V**irtutum semina insunt nobis à natura, sed habitus ipsi actibus iteratis producuntur.

Prima pars constat. Nam insunt intellectui naturaliter quædam principia naturalia honesti & recti, ex quibus omnis virtus manat. Voluntati etiam inest propensio quædam ad bonum honestum, immò ipsi appetitui sensitivo insita est propensio quædam ad aliquas virtutes, quæ  
bonæ

## De Causis Virtutis, &c. Ar. Π. 171

*Bona indoles* dicitur: ut videmus, alios ex sua complexionē ferri ad misericordiam, alios ad castitatem, alios ad fortitudinem, &c.

Secunda quoque pars ipsā experientiā constat. *Nam ut fabricando fabri, ita & iustas & temperatas actiones exercendo iusti & temperantes fiunt*, inquit Aristoteles 2. Ethic. cap. 2. Itaque Virtus assuetudine formatur, cuius tanta vis est sive ad bonum, sive ad malum, ut in alteram naturam transeat.

Verū cum ex actu virtutis ejus habitum fieri ferè omnes concedant, non ita facilè explicatur hujus formationis modus. Unde, ut res scitu dignissima explicetur, advertendum ex D. Thoma 1. 2. quæst. 51. art. 2. & Quid de Virt. in communi, art. 9. agentium quādam habere solū in se principium activum sui actūs, sicut in igne est solū activum principium calcfactionis: & in his non habet locum generatio habitūs, & inde est, quoddam res naturales non possunt aliquid consuescere, vel disuescere, ut dicitur in 2. Ethicor. Alia verò habent in se simul principium activum & passivum tot actūs, quatenus immediatum elicetivum principium non prorumpit in actum, nisi ut motum ab alio altiori existente etiam in eodem agente: & in his habet locum formatio, habitūs, in quantum à principio altiori movente derivatur in principium inferius aliqua impressio habitualiter permanens & facilitans ad ea peragenda, quæ facit ex motione superioris; sicut videre est in manu, quæ, quia scribit, ut mota ab intellectu & voluntate, arte dirigente, ideo susceptiva est cujusdam impressionis ab illis principiis eam moventibus derivatæ, quæ sit habilior ad scribendum. Manifestum est autem, quoddam respectu actuum seu intellectūs, seu appetitūs, est in homine duplex principium, unum activum, & aliud passivum. In primis enim cum distinxerimus in fine Physicū duplicem intellectum Agentem & Passibilem, passibilis non exit in actum, nisi quatenus sibi impressus movetur, ac perficitur ab intellectu agente. Similiter voluntas non prorumpit in actum suum, nisi mota ab intellectu dirigente ac regulante. Appetitus verò irascibilis, & concupiscibilis natus est moveri à voluntate, eaque mediante ab intellectu: Unde his omnibus potentis gigni possunt habitus, quatenus motus superioris imprimatur in inferiori moto, ac in eo manet, firmaturque in habitum.

## 172 Tertiae Partis Philosoph. Qu. V.

Verum cum ex illa D. Thomae doctrina præclare, ac radicitus elucescat habituum omnium formatio, ut eam eodem Quaest. cit. de Virtutibus declarem cujuslibet habitus intellectualis scilicet ac moralis, propriam generationem observandum est discrimen inter actum intellectus passibilis ab intellectu agente, & appetitus ab intellectu. Actio enim intellectus fit per assimilationem intellectus cum re intellecta, moveturque intellectus passibilis ab intellectu agente, quatenus ab illius imprimuntur species, quibus intelligat, ac objecta manifestentur. Unde virtus intellectualis fit, quatenus species illae, notionesque per illas formatae, permanenter firmantur in intellectu passibili, qui non fugaci, facileque deletibili impressione hos characteres excipere natus est, sed eos semel impressos stabili, perennique tenacitate per se conservat. Quippe experientia constat, notiones, quas de rebus antea nobis ignotis semel formamus vel per alteram instructionem, vel per propriam ratiocinationem, non fugaci labilique fulgore statim evanescere, sed altam mente reponi, adeo ut quotiescumque illius rei cogitatio inviderit, in eam intellectus feratur, non ut in ignotam, sicut antea, sed ut in rem claram, sibi que jam manifestam. Haec stabilis, tenaxque impressio in intellectu passibili conservata vocatur *virtus intellectualis*: ex quo obiter intelligitur, has virtutes intellectuales in instanti unico actu formari, eo quidd species, notionesque semel impressae intellectui stabiliter in eo figantur.

At verò actio appetitus in appetibili per modum inclinationis; moveturque intellectus appetitum, quatenus eum ad aliquid inclinat. Quamquam enim appetitus ex propria sui ratione feratur ad bonum, attamen ex se indifferens est ad tendendum in illud, vel istud bonum, & ad ipsum ordinatè, vel inordinatè prosequendum; ideoque expectat intellectum proponentem bonum, in quod tendat, & determinantem, ac regulantem modum tendendi, sicque appetitus dicitur determinari ac regulari per rationem, ut per proprium movens. Quemadmodum ergo tenera arbor de se indifferens, ut incutitur ad dexteram vel ad sinistram, & ob id expectans manum agricolae flectentis, cum multoties inclinata fuerit in unam partem, determinatur tandem ad hoc, ut sponte sua in eam vergat, sicque transiens illa motio firmatur, in dispositione constantem. Ita quoque ap-  
pe-

## De Causis Virtutis, &c. Art. II. 173

petitus de se indifferens ad honestum, vel turpe, cum multoties à ratione regulante inclinatus, determinatusque fuerit ad bonum honestum in aliqua materia, puta iustitiæ, motio illa regulativa transiens, ex assuetudine figitur, firmaturque in dispositionem stabilem, ac in appetitu permanentem: ita ut, qui prius extrinsecè solum, & cum difficultate flectebatur ad bonum ordinatè prosequendum, nova illa dispositione contracta, faciliè, jucundè, fortiterque in illud prodeat. Hæc stabilis, constansque dispositio vocatur *virtus moralis*.

### SECUNDA CONCLUSIO.

**T**Riplex est subjectum moralis Virtutis, Intellectus practicus. Voluntas, Appetitus sensitivus. Ita S. Thomas 2.2. qu. 56.

Probat. Cum virtus moralis sit, qua rectè vivitur, seu qua mores rectificantur, in ipsis rectæ vitæ, seu morum principiis collocanda est: Atqui vitæ rectæ, ac morum principia sunt, primò Ratio practica, quæ vitam & mores dirigit; deinde Voluntas, qua, inquit S. Augustinus, bene, vel malè vivitur; tum denum, Appetitus sensitivus, qui & ipse ad rectam vitam & mores maximè pertinet, quippe cum trahat voluntatem, eique in bonis, aut malis effectibus collaboret, ac sit principium passionum, circa quas virtutum magna pars versatur: Ergo in his tribus virtus moralis constitui debet. Horum enim quodvis si non rectè se habeat, vitam, ac mores vitari necesse est. Porro membra exteriora & ceteræ facultates virtutis moralis subjecta non sunt, quia cum eorum usus pendeat ex appetitu & ratione illum dirigente, modò hæc bene se habeant, illis rectè utemur.

Confirmatur conclusio de appetitu sensitivo, quem propriè subjectum virtutis esse plerique negant, cum de ratione practica & voluntate omnes conveniant. 1. Ubi moribus, ibi remedium apponi debet: Sed deordinatio passionum, proindeque morum, est ex appetitu sensitivo: Ergo ordo virtutis, ut remedium, et ap.

poni debet. 2. Igniculi & semina virtutum insuper appetitui sensitivo; nam in pueris sese exerunt ante usum rationis: At virantes, & eorum rudimenta in diversis collocare subiectis absonum planè videtur. 3. Denum. Virtus moralis, ut mox explicui, est ut in pressio rectæ rationis in potentia, quæ ab ea regulatur & movetur: Sed etiam appetitus sensitivus regulatur & movetur à recta ratione, eaque morio in eo figi potest, ut permanens, ac constans inclinatio, quæ est ipsissima virtus moralis: Ergo etiam in appetitu sensitivo residet virtus moralis.

Objic. 1. virtus est bona qualitas mentis: Sed appetitus sensitivus non pertinet ad mentem: Ergo in eo propriè virtus non inest. 2. Virtus est habitus electivus: Atqui electio ad voluntatem spectat, non ad appetitum sensitivum: Ergo hic subiectum virtutis non est. 3. Virtutis moralis obiectum est bonum honestum: Sed bonum honestum, cum sit bonum rationis, ad voluntatem spectat, non ad appetitum, qui tendit in bonum sensibile: Ergo ad eum virtus moralis non spectat.

Resp. ad 1. Mentem laus hic sumi pro ea omni facultate, quæ mente regitur, ac rationis impressionem stabilem excipere potest; ut supra annexavimus.

Respond. ad 2. Appetitum duobus modis spectari posse. 1. Ut est in brutis, separatus à ratione. 2. Ut est in homine, conjunctus rationi. Hoc posteriori modo participativè est electivus: nam electio est appetitus præconscriptus. Porro non sola voluntas hominis, sed etiam ejus appetitus sensitivus fertur in bonum præconscriptum. Unde & ipse capax est virtutis, cum inclinantis ad appetendos actus consilio rationis conformes, puta ad cibum juxta consilium prudentiæ præscriptum. Et sic ad eum spectat electio, & habitus ad hanc honestam electionem inclinant.

Ad 3. Idem dicendum, appetitum sensitivum ex conjunctione cum ratione in homine habere, ut etiam bonum sensibile juxta rationis præscriptum appetere possit, & habitu quodam ad id inclinari. Porro bonum sensibile à ratione regulatum induit rationem honesti.

In-

## De Causis Virtutis, &c. Art. II. 175

Instabis . Membra exteriora , etiam ut rationi conjuncta in homine , non sunt capacia virtutis : Ergo nec appetitus sensitivus .

Respond. Nego paritatem . Ut enim notat S. Thomas 1. 2. quæst. 56. art. 4. ad 3. *Aliter regitur corpus ab anima , & appetitus sensitivus à ratione . Corpus etiam ad nutum obedit anima absque conditione in his , in quibus natum est ab anima moveri . Unde Philosophus dicit 2. Politic. cap. 4. quoddam anima regit corpus despotico principatu , id est , sicut dominus servorum . Et ideo totus motus corporis refertur ad animam , & propter hoc in corpore non est virtus , sed solum in anima . Sed appetitus non obedit ad nutum rationis , sed habet proprios motus suos , quibus interdum rationi repugnat . Unde ibidem dicit Philosophus , quoddam ratio regit irascibilem & concupiscibilem principatum politico , quo scilicet reguntur liberi , qui habent in aliquibus propriam voluntatem . Et propter hoc oportet in irascibili & concupiscibili esse aliquas virtutes , quibus bene disponantur ad actum .*

Urgebis . Ibi remedium inesse debet , ubi origo mali : Sed deordinatio appetitus est in mala voluntate . Ergo voluntas , non ipse appetitus , est subjectum virtutis rediscantis motus appetitus .

Respond. Potius appetitum deordinatum esse radicem malæ voluntatis circa appetibilia sensibilia . Quoddam enim quis inordinate velit delectationem sensibilem , non ex ipsa voluntate , sed ex effræni concupiscentia provenit . Unde non labes appetitus inest circa illa ex voluntate , sed voluntati ex appetitu sensitivo ; & ideo virtus emendans hanc deordinationem appetitus inesse debet , qui , si sit recta voluntatis actio circa illa , facile consequitur .

Dices . Quoties ad actum duæ sunt facultates , quarum una est movens & altera mota , habitus princeps habet potius esse in facultate movente , quam in mota , ut patet in arte , quæ est in mente , non autem in membris : Arqui in opere virtutis moralis , puta in intemperantia duæ concurrunt facultates , scilicet appetitus sensitivus & voluntas ; voluntas autem in eo actu est ut movens , appetitus ut motus . Ergo virtus princeps temperantiae residere debet in voluntate ; in appetitu verò solum quidam habitus

huic famulans, qui virtutis propriè rationem non obtinet.

Respond. 1. Argumentum nimis probare. Nam cum voluntas moveatur ab intellectu, in eo solum virtutem residere eo argumento suaderetur.

Respond. 2. Distinguo majorem: si facultas mora purè passivè se habeat, ut contingit in membris, concedo; si facultas mora & ipsa quoque activè se habeat, immo vicissim aliam moveat, nego. Porro etsi appetitus à voluntate moveatur in negotio virtutis; at nec purè passivè se habet, immò & ipse voluntatem movere & inclinat. Unde ut rectus sit motus erga materiam temperantiæ v. g. non satis est, immò parum est, ut voluntas rectè se habeat ad delectationem; sed maximè requiritur appetitus rectitudo, & habitus eam tribuens, qui proinde non ut famulans censeri debet, sed ut ipse actus principium, proindeque ut princeps habitus. Unde temperans non dicitur, qui appetitum erga cibum deordinatè se habentem voluntatis imperio violentè retinet; sed ejus appetitus consuetudine ad cibum temperatè se habet. Itaque virtus temperantiæ est propriè & consummatè in appetitu, licet in voluntate, & mente quandam dispositionem requirat.

*Divisio virtutis moralis.*

**V**irtus moralis vulgò & rectè dividitur in quatuor generales species, Prudentiam, Justitiam, Temperantiam, & Fortitudinem. Hæ dicuntur *Virtutes Cardinales*, quod non solum principes sint, ad quas aliæ reducuntur; sed his veluti cardinibus omnis bona, honestaque vita vertatur.

Probatur divisio. Primò ex subjecto moralis Virtutis. Quatuor enim facultates sunt, quibus rectè vivitur, Intellectus practicus, qui est prima rectè vivendi regula, Voluntas, & Appetitus sensitivus, qui in Concupiscibilem & Irascibilem dividitur: Ergo dari debent quatuor veluti principes virtutes his  
cor-

correspondentes. Prudentia mentem erga agenda rectam efficit. Iustitia Voluntatem erga bonum alienum; nam circa proprium non eget virtute, quia ad illud feratur, quia illud ex se satis appetit, nec in ejus amore excedit, nisi quatenus propter ipsum eurbat alienum. Temperantia perficit partem Concupiscibilem, ut moderatè se habeat ad bonum sensibile. Fortitudo demum perficit partem Irascibilem circa bonum & malum arduum, ne aut ignaviâ succumbat, aut temeritate inordinatè insurgat.

Probatur 2. Ex objecto moralis Virtutis. Hæc enim respicit bonum honestum, id est, conforme ordini rationis. Tale autem bonum spectari potest, primò in suo fonte, ut scilicet à ratione regulatur, & hoc modo spectat ad Prudentiam. Secundò, ut applicatur actionibus voluntatis, & sic pertinet ad Iustitiam. Tertio, ut reperitur in passionibus partis Concupiscibilis, & sic pertinet ad Temperantiam. Quarto demum, ut reperitur in passionibus partis Irascibilis, ac sub ea ratione respicitur à Fortitudine. Ergo hæc sunt quatuor principes virtutes, ad quas alia omnes referuntur, ut sequenti conclusione explanabimus; nulla enim est, quæ ad hocce bonum non tendat.

## ARTICULUS TERTIUS

### *De Contrario Virtutis, scilicet Vicio.*

**E**tsi ea, quæ de Vicio dici possunt, ex his, quæ circa Virtutem dicta sunt innotescant, quippe cum unum contrarium per aliud cognoscatur, non pigebit tamen uberius doctrinæ gratiâ quædam breviter attingere circa vitiolorum naturam divisionem, causas & actum, qui propriè peccatum dicitur.

Vitium definitur, *Mala qualitas mentis, qua male vivitur, & bene vitatur.*

H ; Hæc



### 178 *Tertia Partis Philosoph. Q.V.*

Hæc definitio satis constat ex dictis circa Virtutis definitionem . Ut enim virtutis proprium munus est dare bonum usum , & vitæ nostræ cursum dirigere , ita & vitii est inclinare ad malè utendum scilicet cultatibus nostris , ac vitæ nostræ ordinem corrumpere . Definiri præterea potest vitium , Dispositio imperfecti ad pessimum . Vitium enim significat dispositionem potentie corruptæ , ac malè se habentis , estque veluti quædam spiritalis ægritudo , inclinaturque ad peccaminosum actum , qui est pessimus.

Ex hac definitione colligitur , omne vitium esse contra naturam hominis , non modò quia est corruptio quædam , ægritudoque animi ; cujus potentias à debito statu dimovet , ac pervertit ; sed etiam quia est contra rationem , qua homines sumus , & à brutis distinguimus .

Vitia dividi possunt , non secus ac virtutes , in quatuor generalia , Imprudentiam scilicet , Injustitiam , Intemperantiam , & Vitium contra fortitudinem , quod generico nomine carere videtur .

Divisio probari potest . Tum quia contrariorum sicut est eadem ratio , ita & idem proportionaliter divisionis modus . Tum ex parte subjecti vitii , quod est quadruplex , non secus ac virtutis ; intellectus scilicet , voluntas , appetitus concupiscibilis , & appetitus irascibilis . Tum demum ex parte objecti . Vitium enim cum habeat pro objecto bonum deordinatum , corrumpit bonum rationis . Tale autem bonum potest quadrupliciter turbari ac corrumpi . Primò , ut est in fonte suo , scilicet in intellectu , & circa hoc versatur Imprudentia . Secundò , ut est in voluntate derivatum , & talis corruptio fit per injustitiam . Tertio , ut extenditur ad regendos partes concupiscibilis affectus , & sic turbata per intemperantiam . Quarto demum , ut moderantur passionnes irascibilis , & sic destruitur per vitium fortitudini oppositum .

Præter hanc partitionem dividi potest vitium , Primò in illud , quod consistit in defectu : & illud , quod consistit in excessu . Cum enim virtus medium teneat , omnis recessus à medio est vitiosus . Duplíciter autem recedi potest à medio . Primò per excessum ,

ut

## De Contrario Virtutis, &c. A. III. 179

ut si quis plus comedat ; quàm oporteat . Secundo per defectum , ut si quis minus de cibo sumat , quàm exigit recta ratio .

Secundò vitium dividi potest in vitium spirituale , & vitium corporale . Objectum enim vitii est bonum deordinatum . Ex bonis autem deordinatis quædam possidentur modo aliquo spirituali , ut fama , honor , scientiæ , &c. alia verò possidentur , & delectantur per corporeum contactum , ut voluptates , gulæ , & tactus . Vitia spiritualia sunt , quæ in bona primi generis deordinate tendunt : vitia verò corporalia , quæ versantur inordinate circa bona secundæ generis .

Tertiò demum ex vitis quædam dicuntur *radices altorum* , ut Cupiditas , quam Paullus vocat *radicem omnium malorum* , eo quòd , ut peregre notat D. Thomas , sicut radix trahit & suggerit alimentum toti arbori , sic cupiditas colligendo divitias præbet nutrimentum toti arbori iniquitatis : Quædam verò dicuntur *capitalla* , eo quòd sicut caput insuit vitam , motum , vigoremque aliis membris , & ipsa ducit ac dirigit , ita quoque ista vitia influant in alia , & ipsa veluti ducant : sic superbia est initium , & origo omnis peccati , quòd omne peccatum in eo consistat , ut homo se subtrahat à subiectione Dei , propriamque voluntatem divinæ anteponat , quod est sine dubio summæ superbie . Similiter avaritia , luxuria , gula , pigritia , ira , & invidia , ducunt , foveant , reguntque agmen vitiorum , & ideo *vitia capitalia* vocantur .

Causæ vitiorum , cum sint variae , omnes possunt ad duas classes reduci , extrinsecas scilicet , & intrinsecas . Causæ vitii extrinsecæ sunt in primis malignus quidam genius tentans , instigans , & concupiscentiam inflammandus . Secundò occasionēs , & objecta sollicitantia . Tertiò pravi homines , qui verbis , factis , exemplisque alios ad iniquitatem trahunt . Causæ verò interiores vitiorum sunt in primis ignorantia , quæ extinguit lumen rationis dirigentis , sicque nos innumeris offendiculis exponit , non secus ac si quis lucernam extingueret homini in obscuro , lubrico , periculosoque tramite gradienti . Secundò malitia ipsius voluntatis , quæ habens intentionem

corruptam circa finem, facile peccat circa media. Tertiò passio, quæ sollicitat voluntatem & excæcat rationem. Quare demum, præcedens peccatum, quod nisi per penitentiam deleatur, pondere ad alia trahit.

Peccatum est propriè actus à vitioso habitu elictus, & definitur à S. Augustino, *Distum*, vel *factum*, vel *conscriptum contra legem æternam*. Dividi posset eodem modo, ac vitium, cuius proles est. Sed præterea varias speciales divisiones habet. Primò enim dividi potest in mortale & veniale, inter quæ id discriminis assignat D. Thomas, quodd mortale corrumpat vitæ spiritualis primum principium, scilicet ordinem in finem ultimum. Veniale verò duntaxat peccet contra media, retinendo tamen intentionem & ordinem finis ultimi. Siquidem in peccato mortali homo præfert creaturam Deo; in veniali verò, licet semper Deum omnibus præferat, attamen aliis non ita omnino utitur, sicut ordo finis ultimi exigeret, in quantum vel illis morosius adhæret, vel negligentius incumbit, vel aliquo alio modo minus ordinatè ad illa se habet.

Secundò dividitur in peccatum cordis, oris, & operis, non quidem ut in distinctas species, sed ut in tres veluti gradus, quibus acceditur ad consumptionem actus vitiosi, qui primò corde concipitur, secundò ore exprimitur, tertiò perficitur opere: ut ira primò concipitur corde, secundò contumeliosis verbis se prodit, tertiò usque ad facta injuriosa proredit. Annotat verò D. Augustinus lib. 12. de Trinitate, peccatum in corde tribus quoque gradibus perfici, nam primò cogitatione lachœatur, delectatione nutritur, consensu completur.

Tertiò dividi potest in peccatum contra Deum, contra proximum, & contra se ipsum. Peccatum enim turbat ordinem rationis. Triplex autem est ordo in homine, ad Deum, ad se ipsum, & ad proximum. Peccata, quæ lædunt ordinem, quo homo immediatè respicit Deum, ut blasphemia, sacrilegium, &c. dicuntur esse contra Deum. Peccata, quæ turbant ordinem, quæ homo tenere debet in propria bonis, dicuntur peccata hominis in se ipsum, ut gula, luxuria, &c. Peccata denique, quæ lædunt or-

## *De Contrario Virtutis, &c. A. III. 181*

dinem erga proximum observandum, dicuntur esse in proximum, ut homicidium; furtum, &c. attamen quia ordo, quem homo habet ad seipsum, & ad proximum, continetur sub ordine ad Deum, ideo omne peccatum est contra Deum.

Porro in calce articuli, ut deformitas peccati profundius innotescat, non pigebit annotare octo præcipue modos, quibus peccatum est contra Deum. 1. Deum offendit, ut supremum legislatorem, ejus præcepta contemnendo, & debitam obedientiam denegando. 2. Ut justissimum judicem, cujus judicium non formidat, & indignationem audacissime provocat. 3. Ut testem fidelissimum, non reverendo ejus præsentiam, & in oculis ipsius male agendo. 4. Ut summum bonum ei vilem satisfactionem præponendo. 5. Ut amicum & benefactorem, ipsi odium pro amore, injurias pro beneficiis rependendo, immo ejus beneficia convertendo in instrumenta injuriæ, quod est ingritudinis culmen. 6. Ut supremum Dominum, contra ejus legitimum dominium protervè rebellando. 7. Ut primum principium à quo deficit & sese subtrahit. 8. Demum, ut ultimum finem, ab eo aberrando ac sponte recedendo, sibi que cum insigni ejus contumelia finem ultimum in creatura præstituendo.

## QUÆSTIO SEXTA

### *De Virtutibus in particulari.*

**N**umerosam Virtutum familiam ita distribuit D. Thomas, ut omnes omnino virtutes morales reducat ad quatuor illas principes, quas *Cardinales* vocatas supra memoravimus. Neque enim in moralibus virtutibus ulla esse videtur, quæ non sit altius ex quatuor cardinalibus vel species, sub ea tanquam suo genere contenta; vel pars integralis, concurrens scilicet ad actum ejus perficiendum, vel demum, ut vocat D. Thomas, *pars potentialis* principali adjuncta, non secus ac potentia suæ essentia, ut per eam minus principales actus perficiantur: sicut essentia per se, quod præcipuum est, præstat, alia verò per suas potentias perficit. Unde in hac quæstione has quatuor virtutes precipuas quatuor articulis breviter attingendas suscipimus, in quibus etiam de adjunctis, integrantibusque virtutibus dicetur, deque earum speciebus, ut sic omnium moralium virtutum seriem aliquatenus delibemus.

## ARTICULUS PRIMUS.

De Prudentia, & Virtutibus sub ea  
contentis.

**P**rudencia lux agendorum, ars rectè vivendi, vofun-  
eatis oculus, cæterarum virtutum dux, fons, ca-  
put, norma, princeps, definitur à Platone *Scientia felici-  
tatis æternæ*, eo quod ad hunc scopum omnes actiones  
dirigat; à Cicerone verò, *Rerum expetendarum scientia*,  
(porò hîc sumitur *scientia* non stricte, sed latè, pro qua-  
vis certa & infallibili notitia) ed quodd hujus virtutis  
munus sit discernere, quid eligi debeat, quidve repu-  
diari. Aristoteles 6. Ethic. cap. 3. aptissimè illam definit  
*Rectam rationem agibilem*, id est, virtutem rectificantem  
intellectum ad bene se habendum circa agibilia, seu eli-  
gibilia; coincidunt enim. Quippe cum intellectus sit  
regula & dux appetitus, ut bene hoc munere fun-  
gatur, rectèque se habeat ad judicandum de his, ad quæ  
appetitus fertur, & ea, quæ decent ac expediant, præ-  
cipiat, eget aliquâ virtute, quæ *Prudentia* nuncupatur.

Ex hac Prudentiæ definitione quædam ad pleniorẽ  
ejus notitiam deduci possunt. Primò, principium, quo  
prudencia nititur esse rectam finis intentionem. Pru-  
dencia enim negotiatur circa agibilia & eligibilia, in  
quibus finis se habet ut principium in speculabilibus;  
unde, ut conclusionum cognitionem supponit primorum  
principiorum, & in ea fundatur; ita tota prudentialis  
negotatio circa agibilia fundatur in appetitu recto finis,  
cui agendo commensurat: Ideoque appetitu circa finem  
corrupto, impossibile est, subsistere prudentiam, sed ne-  
cesse est, ut degeneret in malignam quandam astutiam.  
Et quia in humanis ultimus totius vitæ finis est aliorum  
mensura, quamvis ille, qui ad aliquem particularem fi-  
nem bene ratiocinatur, ut ad victoriam, dicatur secun-  
dum quid *prudens*, scilicet in bellicis; attamen ut quis  
sit simpliciter prudens, necesse est, bene se habeat circa  
finem ultimum vitæ, ac rectè ratiocinetur de rebus agen-  
dis per ordinem ad ipsam.

Secundò deducitur, Prudentiam non hærere in universalibus, sed maximè respicere singularia. Unde qui vacat sublimiorum, universaliumque rerum cognitioni, sapiens quidem habetur, non tamen *pendens*, nisi ad singularia descendat, ut observat Aristoteles 6. Ethic. cap. 7. Hujus ratio est. Tum quia prudentia perficit rationem practicam ad regulandas actiones: de ratione autem regulæ est, ut applicetur regulandis, ideoque ad prudentiam maximè pertinet applicatio rationis ad singulas actiones. Tum etiam quia prudentia versatur circa agibilia; actio autem est in singularibus, & ideo singularibus maximè attendit prudentialis consideratio.

Verùm, cum virtus certa, infallibilisque esse debeat, & aliunde singularia sint maximè incerta, dubitari posset, qua ratione. Prudentia possit certò & infallibiliter objectum suum attingere, si versetur circa singularia. Sed id facile patebit, avertendo, quidd licèt ratio vix possit certò & infallibiliter attingere quid verum sit in rebus singularibus potest tamen certis & infallibilibus regulis discernere, quid in quolibet particulari negotio, quantum volueris incerto ac dubio, agere debeat homo, ut secundùm virtutem in illo se gerat, vitique deformitatem vitet. Prudentia non quærit quid verum sit in ipsis rebus particularibus, immò plerumque vir prudens quantum ad hoc errat; sed solum quid amplectendum sit, omnibus expensis secundùm exigentiam rei, loci, personæ, temporis, &c. Et quantum ad hoc prudentia est certa & infallibilis.

Tertio inferitur, proprium Prudentiæ actum esse *Præcipere*, seu *Imperare*. Cum enim rectificet rationem practicam, debet illam perducere ad id, quod est perfectum, ultimumque in ratione practica: hoc verò est præcipere, seu imperare. Imperium enim statim infert executionem, quæ est finis rationis practicæ; ideoque cæteri rationis practicæ actus, scilicet consultare, ac de consultatis rectè judicare, censentur imperfecti & steriles, nisi per efficax imperium applicentur ad opus. Unde præclare notat D. Thomas, perfectionem artis consistere in judicando, prudentiæ verò in præcipiendo. Et ideo, inquit Sanctus Doctor 1. 2. q. 47. a. 3. *reputatur mollior artifex, qui volens peccat in arte, quasi habens rectum judicium, (quod tamen sequi non curat) quam qui peccat, quod procedit ex defectu judicii. Sed in prudentia est e converso: imprudentior enim*

*enim est, qui volens peccat, quasi deficiens in principali actu prudentia, qui est præcipere, quam qui peccat nolens.*

Quartò deducitur, Prudentiam aliis virtutibus medium præstituerè. Quamquam enim omnis virtus moribus ex se inclinè ad medium in sua propria materia, neque hoc habeat à dictamine Prudentiæ, sed ab ipso synderesis lumine dictante, vivendum esse secundum rationem, ideoque nec plus, nec minus in unoquoque assumendum, quam ratio præscripserit; in quo medium virtutis consistit; atramen in quo situm sit illud medium in hoc particulari agibili, v.g. in eligenda comestione, synderesis immediatè non præscribit, sed hoc deducere ac determinare ex principis synderesis pertinet ad prudentiam. Unde ut notat Cajetanus, prudentia præstituit finem, mediumque virtutis non in abstracto, dictando v.g. non esse recedendum à medio rationis in cibis propter delectationem, (ad hoc enim duce synderesi inclinatur temperantia) sed in concerto, dictando, ubi sit medium rationis, quod quærit temperantia in hoc particulari actu comestionis.

Verùm his circa Prudentiam declaratis, ad pleniorè adhuc hujus virtutis explicationem operæ pretium fuerit, singulas ejus partes, tum integrantes, tum subjectivas, tum potentiales, singulis Paragraphis attigere.

## S. I.

## De Partibus quasi integralibus Prudentiæ.

**O**bservat D. Thomas 2.2.q.48.a.2. quòd cum triplex distingui possit partis genus, scilicet integralis, ut paries tectum, & fundamentum respectu domus; subjectiva, quæ scilicet subjicitur toti tanquam species generis, ut bos, & leo animali, potentialis, quæ adjungitur toti, per modum potentiæ virtutem ejus participantis, sicut nutritivum & sensitivum dicuntur partes animæ, cujus virtutem inter se dividunt & inadæquatè participant, omnes hi partium modi in qualibet Virtute Cardinali distinguuntur, sicque triplex partium genus ei attribuitur. Uno modo, ad similitudinem partium integralium, non quòd ipsa virtus sit aliquid in se compositum, (est enim quælibet virtus una, simplexque qualitas) sed ita ut illæ dicantur *partes integrales* virtutis alicujus principalioris, quas



quas necesse est concurrere ad perfectum illius actum, & sine quibus mancum, defectuosumque censeretur opus talis virtutis. Alio modo ad instar specierum sub ea, ut sub suo genere, contentarum; nam ut dictum est in *Logica*, genus est totum aliquod commune, cujus partes sunt species ei subjectae. Tertiò ad instar partium potentia-  
 lium, ita ut partes potentiales alicujus principalioris virtutis dicantur aliae virtutes cum ea connexae, illique adjunctae, quae ordinantur ad aliquos secundarios actus, vel materias, in quibus ratio principalis virtutis plenè, perfectè, exactèque non reperitur, quæque proinde totam ejus potentiam non adæquant, sed solùm aliquam illius particulam sibi vendicant, sicut nutritivum non adæquat totam virtutem animæ vegetativæ, sed solùm aliquid illius sibi assumit. Hoc ita constituto in hoc §. quæritur, quot & quales sint partes integrales prudentiæ.

Partes integrales prudentiæ sunt octo, scilicet, *Ratio, Intellectus, Circumspectio, Providentia, Docilitas, Cautio, Memoria, & Solertia, seu Eusebia*. Has omnes recenset D. Thomas 2.2. q. 48. art. 2. sex quidem primas ex Macrobio, septimam ex Tullio, octavam ex Aristotele: Quarum octo, quinque pertinent ad prudentiam quatenus est cognoscitiva, scilicet Memoria, Ratio, Intellectus, Docilitas & Solertia; aliae vero tres pertinent ad eam, secundum quod est præceptiva, scilicet Circumspectio, Providentia, & Cautio.

Divisio non posset luculentius declarari, quàm ipsis D. Thomæ verbis, qui hujus diversitatis rationem ex eo assignat. *Quoddam circa cognitionem (practicam, & actus moralis regulativam) tria sunt consideranda. Primum quidem ipsa cognitio, quæ si sit præteritorum, est Memoria; si autem præsentium, seu contingentium, seu necessariorum, vocatur Intellectus. Secundum ipsa cognitionis acquisitio, quæ fit vel per disciplinam, (discendo scilicet ab alio) & ad hoc pertinet Docilitas; vel per inventionem, (inquirendo scilicet per seipsum) & ad hoc pertinet Eusebia, quæ est bona conjecturatio. Hujus autem pars, ut dicitur 6. Ethic. est Solertia, quæ est velox conjecturatio mediæ, ut dicitur 1. Poster. Tertiò considerandus est usus cognitionis, secundum quod scilicet ex cognitis aliquis procedit ad alia cognoscenda, vel prædicanda, & hoc pertinet ad rationem. Ratio autem ad hoc quoddam rectè præcipiat, tria debet habere. Primum quidem, ut ordinet aliquid accommodatum ad finem, & hoc pertinet ad*  
 Pro

*Providentiam . Secundò , ut attendat circumstantias negotii , quod pertinet ad Circumspeditionem . Tertiò , ut avertat impedimenta , quod pertinet ad Cautionem : Ergo aptissime affigantur hæ octo partes integrales prudentiæ , de quibus ut quidpiam sigillatim ex Angelico Doctore dicamus ,*

*Memoria hic sumitur , non pro potentia memorativa nudè sumpta , sed instructa pluribus experimentis , quæ circa negotia præterita facta sunt , vel ab aliis audita , quibus magnoperè adjuvatur prudentialis consultatio , quatenus ex his futura conjectamus . Cùm enim , ut ait Aristoteles 6.Ethic. oportet principia conclusionibus proportionata esse , & ex talibus talia concludere ; per experimentum negotiorum quid in pluribus eveniat discimus , sicque de agendis melius judicamus . Sed egregiè observat D. Thomas 2.2.q.49.a.1. quod cùm , ex Tullio lib.3. Rhetor. memoria non solum à natura perficiatur , sed etiam habeat plurimum artis & industriæ , Quatuor sunt , verbis ejus utor , per quæ homo proficit in bene memorando . Quorum primum est , ut eorum , quæ vult memorari , quasdam similitudines assumat convenientes , nec tamen omnino consuetas , quia ea , quæ sunt inconsuetas magis admiramur , & sic in eis animus magis & vehementius detinetur . Ex quo fit , quod eorum , quæ in pueritiâ vidimus , magis memoremur . Ideo autem necessaria est hujusmodi similitudinum vel imaginum adiuvatio , quia intentiones simplices & spirituales facilius ex animo elabuntur , nisi quibusdam similitudinibus corporalibus quasi alligentur ; quia humana cognitio potentior est circa sensibilia . Secundò oportet , ut homo ea , quæ vult memoriter retinere , ordinatè disponat , ut ex uno memorato ( quasi deducente aptâ compage , ac concatenatione rerum sese excipientium ) faciliè ad aliud procedatur : unde Aristoteles dicit lib. de Mem. cap.3. & locis videmus rememisci aliquando . Causa autem est , quia velociter ab alio in aliud veniunt . Tertiò oportet , ut homo sollicitudinem apponat & affectum adhibeat ad ea , quæ vult memorari ; quia quanto aliquid magis fuerit impressum animo , tanto minus elabitur . Unde Tullius dicit in sua Rhetorica , quod sollicitudo conservat integras simulacrorum figuras . Quartò oportet , quod ea frequenter meditatur , quæ volumus memorari . Unde Philosophus dicit de Mem. cap.3. quod meditationes salvant memoriam , quia ut ibidem dicitur , consuetudo est quasi natura . Hæc ille appositè omnino .*

*Hic obiter nota deducam ex his principiis artem , quæ*

aliqui miro, ut videtur Imperitis, memoria conatu plurima verba quantumvis barbara ordinatè reddunt, immo ordine inverso. Nempe Animo disponunt seriem aut cellarum, aut hominum, aut aliarum rerum, quarum ordinem frequenti exercitatione probè tenent. His rebus hæc nomina alligant, prodigiosâ quadam ac insolitâ connexionione confictâ inter nomen & rem, ac multoties id repetunt, dum barbara hæc scribuntur nomina. Eâ connexionione fit, ut nomen retineant, & ejus seriem. Hinc Utrumquo facillè reddunt.

*Intellectus* sumitur hic, non pro potentia intellectiva, nec pro habitu, quo principia universalia per se notum, speculabilia, tum practica, tenemus; sed pro evidenti, ac penetrativa notitia singularis negotii, circa quod versatur electio. Cum enim prudentia concludat aliquid singulare agibile, non sufficit intellectus universalium principiorum, quæ tenent locum majoris, sed præterea necesse est habere cognitionem singularis negotii, quod in consultationem vocatur, ut sit loco minoris & hæc cognitio dicitur *intellectus*, quomodo etiam quæ probe tenet aliquod particulare factum, solet dici *intelligens in illo*.

*Docilitas* est, qua aliquis fit, alienæ instructionis benè susceptivus; ideoque importat & affectum, & promptitudinem ad discendum. Hæc ad prudentiam summè necessaria est, quia cum prudentia versetur circa agibilia, in quibus sunt infinitæ diversitates, quæ non possunt facile ab uno perspicui, homo ad illam eget ab aliis erudiri; præcipuè à senibus, quos tempus & experientia in agibilibus doctos facere. Unde ut ait Aristoteles 6. Ethic. c. 2.1. *Oportet attendere expertorum, & seniorum, & prudentium indemonstrabilibus enuntiationibus & opinionibus, non minus quàm demonstrationibus propter experientiam enim vident principia*. Hoc autem pertinet ad docilitatem.

*Solertia*, seu *Eustochia* (pro eodem enim hic usurpatur, quamvis aliquatenus differant) definitur, *facultas subitò reperiendi, quod expedit*. Unde ad prudentiale iudicium maximè necessaria est; præcipuè quia plerumque negotia non relinquunt copiam diuturnæ consultationis, nec patiuntur, ut aliorum consilium requiramus.

Ex solertia derivatur *Sollicitudo*, sollicitus enim est quasi *solers citus*. Unde sollicitudo importat supra solertiam, quandam ad citò exsequendam animi applicationem.

quæ etiam prudentiam spectat. Ut enim dicit Aristoteles 6. Ethic. cap. 9. *Oportet operari quidem velociter consiliata, consilium autem tardè.* Sed cum sollicitudo sit adeo commendabilis, nec virtutes inter se pugnent, paradoxum videtur id, quod dicit Aristoteles 4. Ethic. cap. 3. *Quid ad magnanimum pertinet pigrum esse & otiosum,* quod tamen capitaliter sollicitudini oppouitur. Verum, ut præclare D. Thomas explicat, *Magnanimus dicitur piger & otiosus, non quia de nullo sit sollicitus, sed quia non est superflue sollicitus de multis, sed confidit in his, in quibus confidendum est, & circa illa non superflue sollicitatur.* Superfluitas enim timoris & diffidentia facit superfluitatem sollicitudinis. Unde in tantum magnanimitas excludit nimiam sollicitudinem, in quantum excludit timorem & diffidentiam.

Ratio sumitur hic, non pro facultate inferendi. unum ex alio, sed pro quadam illius facultatis perfectione circa agibilia, seu pro bono illius usu.

Providentia quendam futurorum prospectum importat; est enim *providere quasi procul videre.* Et hæc ad prudentiam necessaria est, quia cum prudentia in finem assequendum omnia dirigat, id est, præsentia agibilia in futurum, debet & futurorum prospectum habere.

*Circumspectio* dicit attentionem quandam vigilantem ad observanda omnia, quæ negotium circumstant, & collationem illorum ad ea, quæ in finem ordinantur, ne quid ex necessariis operi desit.

*Cautio* denique veluti excubias agit ad præcavenda mala, quæ operi admisceri possunt, & vitanda pericula, quæ rem turbare, vel ex re consequi possunt.

S. I I.

*De partibus subjectivis Prudentiæ, seu de illius speciebus.*

**P**artes subjectivæ Prudentiæ sunt quædam specialiores virtutes, quæ sub generali ratione prudentiæ continentur, ut species sub suo genere, de quibus proinde prudentia essentialiter & directe prædicatur, ut animal de bove, & leone. Pro illarum explicatione.

Dico 1. Prudentia dividitur tanquam in suas partes subjectivas, seu propriè dictas species, in Prudentiam, qua

## 190 *Tertiae Partis Philosoph. Q. VI.*

qua quis regit se ipsum; & Prudentiam, qua quis multitudinem regit: seu in prudentiam monasticam, id est, privatam, personalem, ac quasi solitariam; & in prudentiam gubernatricem, moderatricemque, qua quis regit corpus politicum ex plurium conventu constitutum.

Declaratur bonitas divisionis. Cum enim Prudentia sit recta ratio agibilium, ibi diversae sunt species prudentiae, ubi diversa sunt formaliter agibilia: Atqui agibilia circa privatam personam & circa multitudinem sunt diversa: Ergo pertinent ad diversas species prudentiae. Major patet. Probatur minor. Cum enim agibilium ratio desumatur ex fine, sicut conclusionum ratio ex principiis, agibilia in diversos fines ordinata sunt formaliter diversa, sicut conclusiones ex diversis principiis illatae sunt diversae formaliter: Atqui agibilia circa propriam personam, quae pertinent ad monasticam prudentiam, habent pro fine bonum propriae personae, seu privatum; agibilia vero circa communitatem, quae respiciunt prudentia gubernatrix, habent pro fine bonum publicum totius communitatis: Ergo sunt formaliter diversa.

Dices. Virtus proprie dicta debet versari circa bonum proprium, ut faciat bonum habentem: Atqui prudentia illa gubernatrix non querit bonum proprium, immo propter commune negligit proprium, ut videre est in optimis principibus & magistratibus: Ergo non est virtus proprie dicta, nec proinde species prudentiae.

Resp. Cum D. Thoma 2. 2. q. 47. a. 10. ad 2. *Quid ille, qui querit bonum commune, ex consequenti etiam querit bonum suum, propter duo. Primum quidem, quia bonum proprium non potest esse sine bono communi vel familiae, vel civitatis, vel regni. Unde Paterius Maximus de Antiquis Romanis dicit, quod malebant esse pauperes in divite imperio, quam divites in paupere imperio. Secundum quia homo, cum sit pars domus, vel civitatis, oportet, quod consideret, quid sit sibi bonum ex hoc, quod est prudens circa bonum multitudinis. Bona enim dispositio partium accipitur secundum habitudinem ad totum; quia, ut Augustinus dicit lib. 3. Confess. cap. 8. Turpis est omnis pars suo toti non conveniens, vel non congruens.*

Dico 1. Prudentia gubernatrix, seu moderatrix communitatis, dividitur in Oeconomicam, Politicam, & Militarem.

Declaratur divisio. Cum enim gubernatrix prudentia respici-

respiciat regimen multitudinis, distinguenda est secundum varias species socialis multitudinis, & fines diversos, in quos tendit: Atqui triplex est species multitudinis, triplexque finis, propter quem convenit: Ergo & triplex distingui debet prudentia gubernatrix. Declaratur minor. Est enim in primis multitudo adunata ad constituendam familiam & ad convivendum, cujus finis est vel educatio liberorum, vel paullo generalius, pacificus, tranquillisque convictus, nec dissidiis domesticis turbatus, nec necessariorum inopiâ molestus, nec possessionum malâ administratione in brevi dissipandus: & ad hanc multitudinem regendam, illamque finem procurandum datur prudentia œconomica cujus est filios ritè educari, servis bene uti, possessiones conservare, quæstui legitimo studere. Est autem alia multitudo, non hominum sub uno tecto convictuque associatorum, sed plurium familiarum convenientium sub iisdem legibus ad constituendam civitatem, vel regnum, cujus finis est pax, tranquillitasque publice: & ad hanc multitudinem regendam, ac in pace servandam datur prudentia politica. Est denum aliud multitudinis genus ad unum particulare negotium, scilicet victoriam, congregatæ: & hujus multitudinis regula est prudentia militaris.

Prudentia politica dividi præterea potest in *Architectonicam*, & *Politicam simpliciter dictam*. Prudentia architectonica est, qua, qui præest, regit multitudinem, possetque subdividi in *Monarchicum*, *Aristocraticum*; & *Democraticum*, juxta tres celebres regiminum formas; in quarum prima unus est, qui cæteris omnibus imperat, in secunda optimates supremum regiminis clavum tinent, in tertia populus se ipsum regit. Prudentia vero politica simpliciter dicta est, qua civis pro sua virili parte collaborat principi, seque disponit, quatenus est membrum reipublicæ, in ordine ad bonum publicum: sequi aliis rectè convivit in ordine ad bonum publicum.

## 9. III.

*De Partibus potentialibus Prudentia, seu de  
virtutibus ei adjunctis.*

**P**ars potentialis sumitur hic non pro correlativo totius potentialis, de quodiximus in Logica minoribus, sed secundum analogiam ad divisionem virtutis rei in quasdam potentias essentialiter adjunctas, in quibus inadaquate reperitur, sicut supra dictum est §. 1. Unde virtutes illae dicuntur *partes potentiales prudentiae*, quae illi adjunguntur ac ministrant in quibusdam actibus minus principalibus, nec plenè rationem prudentiae assequuntur sicut subjectivae.

Tres sunt ejusmodi partes potentiales prudentiae, seu virtutes adjunctae, ut ei inserviant ad actus minus principales circa materiam prudentialem, scilicet Eubulia, Synesis, & Gnome. Ita D. Thomas 2.2. q. 51.

Declaratur, ratio practica, quae dirigitur per prudentiam, tres actus habet circaabilia, scilicet consilium de agendis, judicium de consiliatis, imperium applicans consiliata ad executionem: quorum primum actuum, ut patet, imperium est principalior. Ergo necesse est, prudentiam quidem immediate respicere imperium, ut actum principallorem; habere verò virtutes sibi adjunctas, quae immediate procurent alios duos actus minus principales, consilium scilicet & judicium. Virtus quae rectificat consilium, dicitur à Græcis *εὐβουλία*, *eubulia*, id est latine *bene consiliativa*, seu *bona consultatio*, cui opponitur *πανουργία*, *panurgia*, quasi latine *calliditas*, *astuties*, seu *astutia*, quae malignis consiliis procurat assecutionem finis. Quae verò rectificat judicium circa consiliata, duplex est. Altera enim de consiliatis judicat secundum communes leges, & haec dicitur *συνεσις*, *synesis*, à verbo *συνεσσαι*, quod est latine *intelligere*, seu, *bene sentire*, aut secundum alios *sensati* discernere. Unde, inquit D. Thomas, secundum *synesim* dicuntur aliqui *synetici*, id est, *sensati*; vel *eufynite*, id est, *boni sensus*. Huic op-

opponitur *Acuria*, *Asynesia*, id est, *Stoliditas*, ac *Stultitia*. Altera deum de consiliatis, in quibus leges communes deficiunt, iudicat secundum altiora principia: sunt enim quandoque casus insoliti, quos aut lex non attingit; aut si attingat, patitur tamen exceptionem in illis propter aliquod circumstans, & ideo necesse est recurrere ad altiora principia, ut de illis rectum feratur iudicium. Virtus, quæ id præstat, dicitur *ᾠδῆς*, *gnome*, quæ licet apud Græcos sonet simplicem sententiam, ex usu tamen sumitur pro aliqua iudicii excellentia, importatque quandam animi sublimem perspicacitatem altioribus attendentem.

Enbulla, ut de singulis quidpiam dicatur, duobus maximè corrumpitur, malo fine, vel malis mediis. Ut enim ait D. Thomas 2. 2. quæst. 51. art. 1. ad 1. *Non est bonum consilium, siue aliquis malum finem in consiliando præstituat, siue etiam ad bonum finem malas vias adinveniat; sicut etiam in speculativis non est bona ratiocinatio, siue aliquis falsum concludat, siue etiam concludat verum ex falsis, quia non utitur convenienti medio.* Requiritur insuper ad hanc virtutem non solum adinventio, solersque excogitatio eorum, quæ sunt opportuna ad finem, sed etiam aliarum circumstantiarum accessus, scilicet tempus congruum, ut nec nimis tardè, nec præcipiti velocitate consultatio fiat, modus consiliandi, ut scilicet firmum, constantque sit consilium, &c.

Synesis, cum sit arbitra & pondetratrix consiliatorum, est maximi momenti in agendis; quippe cum multi sint bene consiliativi, qui tamen de consiliariis, inventisque nesciunt rectè iudicare: Sicut etiam in speculativis quidam solerter, sagaciterque inquirunt, eo quoddammodo ratio eorum promptè sit ad discurrendum circa diversa propter excellentiam imaginationis diversa phantasmata facilè, aptèque formantis; qui tamen non possunt iudicio discernente, & quid cuique congruat appositè distans, propter defectum intellectus, qui maximè provenit ex mala sensus communis dispositione, ut notat D. Thomas 2. 2. quæst. 51. art. 3. Ad hanc verò virtutem tria maximè requiruntur. Primum recta virtutis cognoscitiva dispositio, ad recipiendas res, ut sunt in se ipsis. Hæc



## 194 *Tertiae Partis Philosoph. Q. VI.*

enim comparatur speculo, quod si fuerit rectè dispositum, species rerum fideliter reddit, si autem male disponatur, omnia subversa, distortaque repræsentat. Secundò, ut animus non sit falsis, pravisque judiciis præoccupatus, sed veris & rectis imbutus. Tertiò denique, ut appetitus non sit vitilis depravatus, nam de eligibilibus maximè judicamus secundum appetitus dispositionem; quippe, inquit Aristoteles, *Qualis unusquisque est, talis ei finis videtur.*

Gnome, cum easdem requirat dispositiones, ac Synesis, insuper exigit quandam animi, judicique sublimiorem perspicacitatem, quam non solum intentionem legis penetraret, ut videat in quibus casibus ab ea sit aliquando recedendum, propter quasdam speciales circumstantias; sed etiam sublimiora juris principia comprehendat, ut juxta ipsa de illis casualibus possit aptè decernere.

## ARTICULUS SECUNDUS,

### *De Justitia, & Virtutibus sub ea contentis.*

**J**USTITIA inter virtutes post Prudentiam prima est. Hæc rerum publicarum genitrix custos, ac moderatrix existit, legum optimarum parens, perpetuum humanæ societatis vinculum, malorum domitrix, bonorum præsidium, injuriarum propulsatrix, discordiarum arbiter, civitatum anima, humanorum bonorum æqua dispensatrix, & ut uno verbo dicam, publicus quidam pacis, tranquillitatis, coetusque publicæ boni thesaurus; ex quo cuilibet, quod sibi congruit, tribuitur. Unde illius elogium est apud Aristotelem libi 5. *Ethic. Quidam sit præclarissima virtutum, & neque Hospitii, neque Lucis sit adeo admirabilis: cujus, ut inquit Cicero 1. Offic. tanta vis est, ut ne illi quidem, qui maleficio & scelere pascuntur, possint sine illius particula vivere. Nam quæ eorum culpam, qui una latrocinantur, furatur aliquis, aut etiam eripit, id sibi ne in latrocinio quidem relinquit locum. Ille autem, qui Archipirata dicitur, nisi æqualiter*

*libiter pradam disperdat, aut occidatur, aut à facili re-  
linquetur.*

Sumitur Iustitia, præcipue in sacris Letteris, paul-  
lo latius pro omni virtute, ita ut *vir justus* idem sit,  
ac omnium virtutum doctoribus instructus. Cujus qui-  
dem acceptionis ratio est, quia si ut in omni vitio  
quidpiam injustitiæ repetitur, quatenus vel Deo, vel  
proximo, vel nobis aliquid debitum subtrahitur, vel  
indebitum tribuitur; ita in omni virtute aliquid iusti-  
tiæ relucet, quatenus per eam unicuique, quod  
æquum est, tribuitur; aut secundum quod omnis vir-  
tus in adæquatione cum rationis regula consistit,  
quæ æquario, iustitia quædam est, secundum quod  
*Iustum* idem est, ac *adæquatum*. Sed propriè sumpta Ju-  
stitia speciem quandam virtutis constituit, cujus  
est æqualitatem inter personas diversas, aut inter perso-  
nam & aliquid gerens minus personæ, constituere, quæ-  
que proinde semper est ad alterum.

Hoc modo sumpta Iustitia definitur, *Constans & per-  
petua voluntas jus suum unicuique tribuendi*; quæ de-  
finitio à Juristis desumpta est, reduciturque à D.  
Thoma ad hanc exactiorem formam, *Iustitia est habitus,  
secundum quem aliquis constanti & perpetuâ volunta-  
te jus suum unicuique tribuit*. *Habitus* tenet locum  
generis; cæteræ particulæ proprios characteres iusti-  
tiæ exprimunt. Hæc enim in hoc tota versatur, ut  
unicuique, quod suum est, rependat. Verum ut huic  
definitioni, ac iustitiæ notioni major lux affera-  
tur.

Ex hac definitione habetur primò, Iustitiæ obje-  
ctum formale esse Jus; materiam verbò, res illas, in  
quibus jus constituitur, puta venditiones, emptio-  
nes, distributiones, &c. Sumitur autem jus tripli-  
citer. Primò regulativè, pro lege determinante, quid  
ex iustitia unicuique tribuendum sit, & sic sumptum  
jus dividitur in *positivum*, *naturale*, *divinum*, *huma-  
num*, *civile*, *canonicum*, &c. Secundò sumitur jus  
quasi fundamentaliter, pro potestate in lege funda-  
ta, qua nobis aliquid vindicamus; & sic sumptum  
describitur, *Legitima potestas ad rem obtinendam, vel  
ad aliquam functionem, aut quasi functionem, cujus  
violatio constituit injuriam*. Tertio sumitur jus forma-  
liter & propriè, prout idem est, ac *justum*, seu *æqua-*

*le ad alterum*. Quamvis autem his tribus modis sumptum jus pertineat ad iustitiam, attamen primo modo pertinet ut regula, secundo modo ut quid praesuppositum, tertio vero modo, ut proprium obiectum. Iustitia enim facit aequalitatem ad alterum, quae aequalitas regulatur à lege, & fundatur in potestate, qua aliquis sibi rem debitam, id est, suam facit.

Habetur secundò, medium Iustitiae esse, non solum medium rationis, sed etiam medium rei. Medium rationis, dicimus *Adequationem rei cum ratione*; medium vero rei *Adequationem rei cum re*. Primum ergo medium faciunt ceterae virtutes morales, adequando operationem regulae rationis; nec curando an res rei adequetur: ut temperantia non curat, an res, quibus vescimur, sint aut inter se, aut ad alterum adequatae, sed quòd ipsa comestio sit adequata rationi. At vero iustitia non solum attendit medium rationis, ut scilicet operatio adequetur rationi, sed etiam medium rerum, puta aequalitatem dati & accepti.

His circa Iustitiam declaratis, ad pleniorum illius explicationem superest, ut singulas ejus partes, scilicet integrales, subjectivas, & potentiales singillatim attin- gamus.

## S. I.

*De Partibus integralibus Iustitiae nec, non de  
ejusdem speciebus, seu partibus  
subjectivis.*

**P**artes integrales, & subjectivas Iustitiae sub uno titulo comprehendimus, quòd pauca admodum de primis dicenda occurrant. Duplex assignatur pars integralis iustitiae, scilicet, declinare à malo, & facere bonum. Verum observandum, quòd bonum & malum sumuntur aliquando in communi & generaliter: & hoc modo facere bonum & declinare à malo, non sunt partes integrales iustitiae, sed ad omnem virtutem pertinent. Sed aliquando bonum & malum specialius sumuntur, prout sunt ad alterum, sub qua ratione aliquis dicitur *maleficus*, eo quòd in.

Injustè malum alteri inferat, aut *beneficium*, eo quod bonum alteri procurat: & hoc modo facere bonum & declinare à malo, quatenus scilicet sunt ad alterum, sunt partes integrales justitiæ.

Hujus verò divisionis ratio est, quia partes integrales alicujus virtutis sunt, quæ ad integritatem actus illius faciunt. Actus autem justitiæ, ut patet ex ejus definitione, est, unicuique jus suum tribuere, seu medium æqualitatemque ad alterum facere. Manifestum est autem ad hoc, ut æqualitas ad alterum perfecte statuatur, duo concurrere debere. Primum ut bonum fiat, seu, ut quiddam alicui deberetur, tribuatur. Secundò ut arceantur nociva & injuriosa, quibus bonum illud jam constitutum violaretur: Ergo partes integrales justitiæ sunt & bona facere, & mala arcerere.

Quantum ad partes subjectivas, Justitia universaliter sumpta dividitur in Commutativam, Distributivam, & Legalem, tanquam in species suas. Prima est partis ad partem. Secunda totius ad partes. Tertia partium ad totum.

Declaratur Divisio. Cum proprium Justitiæ munus sit, æqualitatem inter aliqua constituere, ut scilicet unusquisque alteri reddat, quod ipsi debetur, juxta diversas habitudines eorum, inter quæ ponitur æqualitas, diversæ statuendæ sunt species Justitiæ, Atqui hujusmodi habitudo est tantum triplex: Ergo triplex quoque statuenda est species justitiæ. Declaratur minor. Cum enim homines constituent inter se societatem aliquam politicam, quæ est quoddam corpus morale, triplex est habitudo inter homines, non secus, ac inter membra corporis naturalis. Primum enim homo dicit habitudinem ad alium hominem, tanquam ad eam partem corporis politici, cui tenetur rependere quod suum est: & hoc respicit Justitia Commutativa, cujus est statuere æqualitatem inter duos æquales homines in venditionibus, emptionibus, commutationibus, à quibus & nomen trahit, contractibus, cæterisque officiis, quibus pars parti obligatur. Ad hanc spectat Justitia punitiva, ut à Magistrato exercetur, hujus enim est æquare poenam cum offensa. Secundò respublica, seu corpus illud politicum ex hominibus tanquam membris constitutum, dicit habitudinem ad singulas suas partes, quibus debet aliquid

quid rependere pro cuiusque conditione, largiendo per magistratus, & eos, qui reipublice præsunt de publicis bonis unicuique pro meritis: & hoc respicit *Distributiva Justitia*, ad quam spectat æqualitatem facere in distributione dignitatum, honorum, bonorumque communium. *Terrib* tandem qualibet hujus politici corporis pars dicit habitudinem reciprocam ad totum, cui aliquid vicissim debet, ut scilicet talem se illi exhibeat pro sua virili parte, qualem decet, & bono totius convenit; & hoc respicit *Legalis Justitia*, cujus est æqualitatem statuere in officiis, quæ bonus civis impendere tenetur erga rempublicam.

Ceterum, licet omnes istæ species justitiarum respiciant æqualitatem, attamen non eodem modo illam constituunt. Nam *justitia* quidem *Communitativa* respicit & constituit æqualitatem quasi quantitativam, seu, ut vocant *Arithmetica*, quæ in hoc consistit, ut tantum detur, quantum acceptum est, v. g. si quis tres nummos mutuos accepit, tres nummos creditori rependere teneatur. Cum enim hæc justitia sit inter partes, quæ sunt omnino inter se æquales, non est alia ratio, cur una det alteri, nisi quia accepit ab ea; vel quod illi est, retinet, ideoque tantam quantitatem reddere debet, quantum accepit, in quo consistit æqualitas quantitativa. At verò *Justitia Distributiva* non attendit æqualitatem quantitativam, sed æqualitatem proportionalem, seu, ut vocant *Geometricam*, quæ in eo sita est, ut unicuique detur juxta merita, seu, ut serveretur eadem proportio inter præmia data, quæ est inter merita accipientium, ut si habenti sex gradus meritorum dentur tres nummi; habenti duodecim gradus meriti, dentur sex nummi. Eadem enim est proportio trium ad sex, quæ sex ad duodecim. Hujus verò modi procedendi in justitia distributiva ratio est, quia ratio dandi est habitudo partium ad totum. Unde cum non omnes partes eandem habitudinem dicant ad totum, sed quædam sint in eo principaliores, non omnes idem debent recipere à toto, sed qualibet juxta dignitatis meritiq; sui proportionem. *Justitia* verò *Legalis* attendit ad æqualitatem aliquam ex utraque prædicta temperatam, quatenus enim qualibet pars dat toti, v. g. qualibet civis civitati, juxta proportionem

nem virium suarum, quæ non in omnibus eadem sunt, videtur servare æqualitatem proportionis: Sed quatenus quælibet pars in reddendo toti non debet attendere, quid reddat alia; nec proinde debet servare proportionem inter id, quod alia dat, & id, quod ipsa rependit, sed quælibet nullâ habita ratione aliarum dare debet quantum potest & ab ea exigitur, sic videtur esse quædam æqualitas quantitatum, seu *Arithmetica*.

*Legalis* justitia dividitur in *Legalem justitiam specialiter dictam*, & *Epithiam*: seu in eam, quæ in operationibus ad verba legis attendit; & eam, quæ ubi lex deficit propter speciales quasdam circumstantias à legislatore non prævisas, omittis verbis legis attendit legislatoris intentioni.

Declaratur. Cùm enim Justitia Legalis id procuret, ut quælibet pars tribuat toti, quod debet secundum leges; aliquando debitum illud rectè regulatur per verba legis, ut fieri solet in casibus ordinariis; & respectu hujus debiti reddendi locum habet Justitia Legalis simpliciter dicta. Aliquando tamen quidam casus insoliti & a legislatore non prævisi occurrunt, in quibus si verba legis servarentur, apertè ireretur & contra bonum commune, quod est finis legis, & contra mentem legislatoris: v.g. Lex est, ne laicus sacra vasa contraheret, quæ si ad literam servaretur, dum furentes Hæretici irrumpunt in Ecclesiam, nullo alio præsentente nisi laico, sine dubio, ireretur contra bonum à legislatore intentum, scilicet mysteriorum reverentiam. Ad hos casus ordinatur sublimior quædam justitiæ species à Græcis dicta *ἐπιδικαστική*, epithia, Latini *Æquitatem* reddunt, cujus munus est in insolitis casibus, prætermittis legis verbis, quid juxta legislatoris intentionem æquum sit, statuere. Et hæc justitiæ species dirigitur per *Gnomen*, quæm superius diximus, non judicare de agendis secundum leges communes, sed secundum altiora principia.

Verùm non pigebit hic monere, hanc justitiæ partem, ne deficiat, egere magnâ discretionem, perspicacitatem, ac sublimitatem judicii non secus, ac de *Gnome* supra diximus: & quod præcipuum est, diligenter cavendum, ne ob aliquod particulare bonum legis præceptum dimittatur. Cùm enim legis exacta, litera-

Illique observatio sit magnum, publicumque bonum, non debet ob quamvis utilitatem prætermitti, præcipue ob privatum commodum, sed solum ob insignem, evidentemque causam, eo quod nempe non possit observari sine præjudicio boni à legislatore magis intenti. Unde peccavit Saul contra epikiam, prætermittendo exactam, literalemque executionem mandati, quo jubebatur interficere omnes Amalecitas, rege ad pompam triumphi, & gregibus ad sacrificium, reservatis; melior enim erat exacta obedientia, quam sacrificium & triumphi apparatus. At verò David eluxiens usus epikiæ, sine culpa panes propositionis comedit, quos tamen lex solis Sacerdotibus ad cibum permittebat: quia vita hominis est majus bonum, magisque à Deo legislatore intentum, quam ceremonialis observantia.

Circa Justitiam, ut exercetur in Judiciis publicis, queri solet, an Judex teneatur judicare secundum allegata & probata, etiam contra propriam scientiam.

## C O N C L U S I O.

**J**udex tenetur judicare juxta allegata & probata, etiam contra propriam scientiam. Ita S. Thomas 2. 2. q. 67. ar. 2.

Probatur ejus ratione. Judicare pertinet ad judicem, secundum quod fungitur publicâ potestate: Atqui publica potestas non attendit ad privatam scientiam, sed ad id, quod publicè constat depositione testium, secundum formam juris facta: Ergo non ad suam privatam scientiam, sed ad hanc publicam probationem attendere debet Judex, juxta illud Deuteronomii 19. *In ore duorum, aut trium stabit omne verbum.*

Obj. 1. illud Exodi cap. 13. *Non suscipies vocem mendacii, nec sequeris turbam ad faciendum malum, neque in judicio plurimorum acquiesces sententia, ut à reſta deſicias.*

Resp. Mendacium non esse suscipiendum, cum constet esse tale. At depositio testium, quæ secundum formam juris refelli nequit, publicè mendax non habetur

betur, sed vera censetur. Aliis verbis cavetur, ne iudex iniquis accedat sententiis, quæ scilicet legi palam repugnant, etiam si plures in eas eant; ac non ut privatam scientiam publicæ probationi anteponat.

*Instabis.* Homo in iudicando tenetur se conformare divino iudicio: Sed iudicium Dei est secundum veritatem: Ergo homo eam sequi debet, non falsam testium depositionem.

*Resp.* Cum S. Thomas 2. 2. quæst. 67. art. 2. ad 2. Deum iudicare propriâ potestate, ac informari propriâ scientiâ. At iudex publicè iudicat autoritate, quæ attendit ad publica testimonia, non ad privatam cuiusque scientiam: unde iudex nequit punire, quæ ipse puniendâ novit; sed solum, quia publicè probata sunt.

*Urgebis.* Agere contra propriam scientiam est agere contra conscientiam: Sed iudex non debet agere contra conscientiam: Ergo nec iudicare contra propriam scientiam.

*Resp.* Scientiam iudicis, ut iudex est, esse eam, quæ iuridicis probationibus nititur; & ideo in hypothesi non agit contra eam scientiam, qua regulari debet in eo actu, nec proinde contra conscientiam.

*Dices.* Jus naturæ non est violandum propter ius positivum: Sed si iudex eum, quem certò novit esse innocentem capitalis criminis, qui tamen testibus reus convincitur, morti addiceret, violaret jus naturæ: Ergo eum condemnare non debet.

*Resp.* S. Thomas 2. 2. quæst. 64. art. 6. ad 3. *Quidam iudex fecit aliquem innocentem esse, qui falsis testibus convincitur, debet diligentius examinare testes, ut inveniat occasionem liberandi innocentem, sicut Daniel fecit. Si autem hoc non potest, debet eum superiori iudici relinquere iudicandum. Si autem nec hoc potest, non peccat secundum allegatam sententiam ferens, quia ipse non occidit innocentem, sed illi, qui eum afferunt nocentem. Itaque in hypothesi, quod iudex, testes sequi debet: nec refert exinde consequens inconveniens, quia si iudex sic liberè iudicaret juxta proprium arbitrium, ac publicis non stare probationibus, pejora sequerentur. At tenetur tamen, quantum potest, ab eo abstinere iudicio. Unde si sit summus iudex, cui jus gratiæ competat, tenetur*



penam relaxare, si inferior, rem ad superiorem remittere. At si neutrum fieri queat, quod vim contingit, an potius teneatur officium deponere, alia questio est ad Theologos morales spectans.

## S. 11.

*De Partibus potentialibus Justitiæ, seu  
de Virtutibus ei  
adjunctis.*

**N**umerosus virtutum comitatus adjungitur Justitiæ. Cum enim ejus sit æqualitatem consistere in operationibus ad alterum, plures actiones sunt, in quibus hæc æqualitas exactè observari nequit, quæ proinde non ab ipsa justitiâ, sed à virtutibus ei adjunctis regulantur. De illis ergo ut speciatim aliquid attingamus.

Virtutes, quæ adjunguntur Justitiæ, quæque proinde partes ejus potentiales habentur, sunt octo, scilicet *Religio, Pietas, Observantia, Veritas, seu Veracitas, Gratiitudo, Justitiâ vindicativa, Liberalitas, Amicitia*. Ita S. Thomas 2. 2. quæst. 80.

Declaratur ex D. Thoma ibidem. Virtutes adjunctæ Justitiæ sunt; quæ cum aliquatenus cum ea conveniant, in quantum sunt ad alterum, deficiunt tamen à perfecta ratione illius: Atqui octo enumeratæ virtutes, etsi cum justitiâ conveniant, quatenus sunt ad alterum, ac rectificant voluntatis operationes in reddendo debito alteri, ut de se patet; deficiunt tamen à perfecta ratione illius. Ergo sunt habendæ pro adjunctis justitiæ. Declaratur minor. Cum enim ratio justitiæ in eo sita sit, ut reddatur alteri secundum æqualitatem, quod ipsi debetur, dupliciter virtus ad alterum potest à justitiæ ratione deficere, uno modo ex parte æqualitatis, quam non exactè facit; alio modo ex parte debiti, quod non est rigorosum & perfectum. Virtutes, quæ deficiunt à rigorosa justitiâ ex parte æqualitatis sunt in primis *Religio*, quæ solvit quidem debitum Deo, sed

non

non æquale. Secundò Pietas, quæ debitum cultum parentibus rependit quidem, non ita tamen exsolvit, quin semper remaneamus obligati, ut dicit Aristoteles 8. Ethic. cap. 26. Tercia Observantia, quæ virtuti, dignitatique in altero existentis debitam reverentiam exhibet, sed non plene ad æqualitatem attingit, quia, ut inquit D. Thomas ex Aristotele 4. Ethic. cap. 5. *Non potest secundum æquale præmium recompensari ab homine virtus.*

Ex parte verò debiti eas virtutes deficiunt à rigorosa justitia, quæ reddunt alteri id, quod ipsi debetur, non quidem debito rigoroso, ac legali, ad quod scilicet reddendum lex ipsa compellat; sed debito quodam morali & in sola honestate morum fundato. In quo quidem debito duplex est gradus. Quodam enim debitum ita est ad honestatem servandam necessarium, ut sine eo talis honestas esse non possit: & ad hoc debitum reddendum ex parte debentis ordinatur Veritas, seu Veracitas, qua quis se talem in dictis & factis exhibet aliis, qualis est. Ex parte verò ejus, cui debetur, ordinantur duæ virtutes, scilicet Gratitude, seu gratia, qua vicem rependimus pro acceptis beneficiis; & Vindicatio, qua pro malis illatis servato legitimo ordine pœna auctori infligitur. Est autem aliud debitum morale minus necessarium, sine quo morum honestas stare potest: & ad hoc reddendum duplex ordinatur virtus, Amicitia scilicet, qua dictis, factisve quis se alteri gratiosum amabilemque exhibet; & Liberalitas, qua ultrò bona sua aliis moderatè largitur. De his omnibus, ut verbo dicamus.

In primis Religio à relegendo dicta, ut vult Cicerone, eo quòd ea, quæ sunt Divini cultus, relegat & inculcet; vel secundum Augustinum à reeligendo, quòd per eam reeligamus Deum, quem per peccatum amiseramus; vel tandem, ut etiam deducit idem Augustinus, à religando eo quòd nos uni vero Deo liget ac jungat: Definitur à Cicerone, *Virtus, quæ superiori cuiusdam naturæ, (quam divinitatem vocant) curam, ceremoniamque, vel cultum offert: seu melius secundum Theologos, Quæ debitum cultum Deo tribuit, tanquam primo rerum omnium principio; cultum, inquam, cum quadam submissione,*  
ac

ac propriæ dependentiæ protestatione, tum interioribus actibus tum exterioribus signis. Hujus virtutis actus sunt, primò, Devotio, quæ est quedam promptitudo & alacritas voluntatis ad ea, quæ Dei sunt, ac ad ipsius cultum spectant. Secundò Oratio, quæ est petitio decentium à Deo, seu desiderii coram Deo explicatio ad aliquid ab eo impetrandum. Tertiò Adoratio, quæ est honor externo corporis gestu exhibitus. Quartò Oblatio, quæ res sensibiles Divino cultui mancipat, cujus sacrificium quedam species est, superadditque simplici oblationi immutacionem rei, quæ offertur, ad protestandum Dei in omnia summum dominium. Quintò Votum, quod propriè significat, non solum simplex propositum, sed promissionem, qua homo se Deo ad aliquid præstandum obligat. Sextò Juramentum, quod est invocatio Divini testimonii, seu attestatio Divini nominis ad fidem faciendam. Septimò tandem Laus Divini nominis, quæ per sermonem Dei excellentiam delineat.

Pietas descriptur à D. Augustino lib. 23. 99. quest. 23. ex Cicerone, *Virtus, per quam sanguine conjunctis patriæque benevolis officium, & diligens, tribuitur cultus*. Unde primò respicit patrem, & matrem tanquam conjunctiores. Secundò patriam, quæ nos, parentesque continet. Tertiò, consanguineos, quibus ratione parentum conjungimur.

Observandum desinit, ex eodem Cicerone S. Augustinus, *Virtutem, per quam homines, aliquâ dignitate antecessentes, cultu quodam & honore dignantur*. Hæc inter virtutes maxime necessaria ad servandam subordinationem inter homines, in primis quidem respicit personas, quæ nobis ex officio præsunt, scilicet superiores; sed præterea extenditur ad omnes, virtute, sapientiâ, dignitate, aut aliquâ aliâ dote veneratione dignâ insignes. Comprehendit autem varios gradus pro meritis Personarum, quas respicit, sed præcipuè obedienciam respectu superiorum, quæ nos ad eorum implenda mandata exactos efficit.

Veritas, seu Veracitas est virtus, qua nos tales dicis, factisque exhibemus quales re ipsâ sumus. Hæc virtus non modò ad humanum convictum moralit

## De Justitia, &c. Art. II. 205

no necessaria est, cum sine illa nulla fides stare possit, sed etiam adeo efficax ad conciliandum aliorum amorem, ut adnotante Aristotele Rhetor. 2. cap. 4. etiam eos, qui vita sua ingenuè fatentur, amemus.

Gratitudo definitur ex Cicerone, *Vitium, in qua amicitiarum, & officiorum alterius memoria, remunerandique voluntas continetur.* Hujus virtutis tria munera recenset D. Thomas. Primum beneficiū agnoscere. Secundū pro eo gratias agere. Tertiū retribuere loco & tempore pro facultate recipientis.

Vindicta definitur à Cicerone, *Virtus, per quam vis, aut injuria, & quicquid obscurum est, defendendo, aut al. ascendo, propulsatur.* Hæc virtus magnā cautelā indiget, cum ab ea in vitium facilis, lubricusque sit gradus. Ejus enim munus est modum statuere in rependendis injuriis, quæ repensio in primis si fiat animo nocendi alteri, etiam qui injustè nobis nocuit, manifestè est contra caritatem, cujus est velle, ac procurare bonum etiam inimicis. Præterea si fiat propriā, privatæque authoritate, est vitiosa: quia vindictæ executionem Deus sibi reservavit, juxta illud, *Mibi vindicta, & ego retribuam,* & ideo non pertinet ad privatas personas, sed ad ipsum Deum, & ad eos, qui locum Dei tenent in republica, apud quos residet publicæ authoritas, quique ob id gladium portant, ut ait Apostolus. Unde hujus virtutis objectum est vindicta à legitimo judice requisita, non animo nocendi, sed vel studio reperendi honorem injustè ablatum, vel amore illius honestatis, quæ splendet in punitione malefactoris, cui per se convenit, & debetur pœna; sicut benefactori gratia; ut sic serverur ordo, in quantum qui per culpam ab ordine recti prolapsus est, ad illum per pœnam suam modo revocatur. Attamen quemadmodum virginitas conjugali continentie præstat, ita & condonatio injuriæ præ virtute vindicationis longè commendatur. Non enim tenemur injuriarum propriarum ultionem prosequi, ideoque ad exemplum Salvatoris eas ulterius remittere laudabilis est, si nihil exinde mali emer-  
gat.

Liberalitas est virtus, qua homo sit pecuniarum, aliarumque rerum pecuniā æstimabilium bene profusivus. Quippe in tali largitione excessus esse potest vel nimia parcitate, vel immoderata prodigalitate; ideoque, ut decenter fiat, eget virtute liberalitatis. Ad hanc virtu-

tem tres cautiones exigit Cicero. Prima est, *Ne ob sit benignitas, ex iis ipsis, quibus benignè videbitur fieri, & ceteris.* Secunda, *Ne benignitas major sit, quàm facultas.* Tertia, *Ut beneficium non sine detractū tribuatur.* Ut enim ait Ennius.

*Benefacta malè locata, malefacta arbitror.*

**A**micitia duobus modis sumi potest. 1. Strictius, pro affectu quodam benevolo ad alios, qui est cum reciprocatione. 2. Latius pro affabilitate, qua aliquis in exteriori conversatione ad omnes sese amabili- ter habet. Primò modo amicitia videtur magis aliquid consequens virtutem, quàm virtus, ut dicie D. Thomas 2. 2. quæst. 23. art. 3. ad 2. Nam, ut ipse ait ibidem, *non habet rationem laudabilis, & honesti, nisi ex objecto, secundùm quod scilicet fundatur super honestatem virtutum.* At secundò modo amicitia constituit specialem virtutem. Cùm enim, ut ait 2. 2. quæst. 124. art. 1. *Virtus ordinetur ad bonum, ubi occurrit specialis ratio boni, ibi oportet esse specialem virtutem.* Bonum autem in ordine consistit. Oportet autem, hominem convenienter ad alios homines ordinari in communi conversatione, tam in factis, quàm in dictis, ut scilicet ad unumquemque se habeat ut de- cet; & ideo oportet, esse quandam specialem virtutem, qua hanc convenientiam ordinis observet. Et hac vocatur *amicitia, seu affabilitas.*

## ARTICULUS TERTIUS.

De Temperantia & Virtutibus sub ea  
contentis.

**U**T Prudentia rationem in agendis regit, Justitia voluntatem in operationibus ad alterum perficit, sic Temperantia illam parrem appetitûs nostri, quæ *concupiscibilis* dicitur, moderatur. Unde ordinem ipsarum potentiarum secuti, postquam de duabus primis virtutibus egimus, nunc dicendum de Temperantia, ac de Fortitudine deinceps articulo sequenti.

Temperantiæ elogia nemo unquam omnia complectetur. Hæc optima generis humani commensalis est, corporis & animæ salus, honestatis, dignitatisque hominis supra pecudes vindex; delectationum noxtiarum rigida propulsatrix, innocentium verò æqua dispensatrix & veluti sal, quo conditæ sapiunt, & à putredine præservantur, passionum incorruptissimarum domitrix: In qua, ut ait Ambrosius 1. Offic. cap. 43. *maximè honesti cura, decorisque consideratio spectatur & quaritur*; quam Græci Σοφροσύνη, Σοφροσύνη, quasi servatricem Prudentia appellant: unde ab Homero expressius dicitur σὺν σφρόνῳτῃ Salva prudentia; à Pythagora verò, Robur animæ; à Socrate, Fundamentum virtutis; à Platone, Omnium bonorum ornamentum. Dupliciter sumi potest. Primò paullo latius pro animi moderatione actiones omnes ad quandam temperiem reducente; & sic non una virtus est, sed modus quidam in omni virtute imbibitus. Secundò specialiter, pro illo habitu, quo temperatè nos habemus in usu delectabilium sensibilium; & sic specialem virtutem constituit inter alias cardinales repositam.

Definitur Temperantia à Cicerone lib. 2. de Invent. *Rationis in libidinem, atque alios non rectos impetus animi (qua parte scilicet rapitur ad sensibiles voluptates) firma & moderata dominatio*. Paulo latius verò 5. Tuscul. *Moderatrix omnium commotionum*. Ab Aristotele 3. Ethic. cap. 13. *Mediocritas in voluptatibus corporalibus*; seu Virtus, secundum quam modus ponitur in perceptione vo-

lupratum corporalium, id est ad corporis conservationem pertinentium, quales sunt voluptates tactûs & gustûs. Ut enim ibidem observat Aristoteles, cum duo genera sint delectationum, quatenus quædam ad animum pertinent; ut delectatio honoris, scientiæ cupiditas, discendi studium, quædam verb ad corpus, ut delectatio cibi, & potûs, primæ ad temperantiam propriè non attinent, sed solum secundæ, scilicet corporales ac sensibiles. Immo in corporalibus cum quædam sint, in quibus aliquid spiritualitatis relucet, quæque proinde soli homini propriæ sunt, ut delectatio, quæ percipitur ex florum, pulchritudinisque rerum aspectu, ex musico concentu, ex suavitate odorum, hæ non pertinent directè, ac primariò ad temperantiam, sed solum illæ, quæ purè corporeæ sunt, quæque corporeo contactu percipiuntur, nobisque cum pecudibus communes sunt, scilicet voluptates gustûs & tactûs, quas idem Aristoteles vocat *jeunes & bellinas*.

Verùm pro luculentiori hujus virtutis explicatione, aliquid de partibus ejus tum integralibus, tum subjectivis, tum potentialibus est attingendum.

## S. II.

De Partibus Integralibus & Subjectivis  
Temperantia.

**U**T partibus integralibus Temperantiæ insistantur, duas assignat D. Thomas, *Verecundiam*, & *Honestatem*. Verecundia ex Damasceno est timor turpis actûs, confusioisq; ex illo provenientis. Non est propriè virtus, sed potius quædam passio, bona tamen ac laudabilis. Nam timere turpitudinem exprobrationemque eam consequentem est bonum, eo quod fundetur in amore boni honesti. Unde verecundia non cadit, nec in pessima, nec in optimos: in pessimos quidem, quia turpia non amplius apprehenduntur ut mala, nec proinde ex illis afficiuntur timores: in optimos verb, quia cum longè sint ab omni actu turpi, nihil in se habent, de quo verecundentur.

Honestas famitur dupliciter. Primò objectivè, pro ipsa scilicet pulchritudine, ac summitate spirituali rel-

petita ex commensuratione ad regulas rationis; in quo sensu D. Augustinus lib. 83. qq. qu. 30. dicit, *Honestatem voco intelligibilem pulchritudinem*. Cujus vim incredibilem ad incendendos animos celebrans Cicero lib. 2. Tuscul. Sumus, inquit, *natura studiosissimi, appetentissimi que honestatis*; *cujus si quasi lumen aliquod aspexerimus, nihil est, quod, ut eo potiamur, non parati simus & ferre & perpeti*. Hoc modo sumpta honestas non est pars temperantiae, sed omnis virtutis objectum. Secundò formaliter pro amore talis pulchritudinis spiritualis; & sic sumpta specialiter pertinet ad temperantiam, ut pars ejus integralis.

Ratio, cur Verecundia & Honestas ponantur ut partes integrales temperantiae reddi potest ex D. Thoma 2.2. qu. 143. a. 1. quia *Temperantia inter virtutes vindicat sibi quendam decorem, & vitia intemperantia maximè turpitudinem habent*. Unde ut animus perfectè firmetur in hujus virtutis actu, necesse est, ut turpitudinem, exprobrationemque refugiat, quod fit per verecundiam, quæ proinde, ut ait Ambrosius lib. de Officiis, cap. 45. *jacet fundamenta temperantiae*; decorem verò pulchritudinemque spirituales in moderatione corporaliū voluptatum, ut sidus quoddam in tenebris, præclaris fulgentem amec & amplectatur, quod fit per honestatem.

Partes subjectivæ temperantiae, seu species ejus, quatuor enumerantur; Abstinencia, Sobrietas, Castitas, & Pudicitia.

Ratio hujus divisionis est ex eodem D. Thoma, quia species alicujus virtutis attenduntur juxta diversitatem formalem materiam, circa quam versatur. Est autem Temperantia circa illas delectationes sensibiles, quæ ad naturæ conservationem pertinent, quæ dividuntur in duo genera. Quædam enim ordinantur ad conservationem individui per nutrimentum; & in his quantum ad cibum est Abstinencia, quantum verò ad potum Sobrietas. Quædam verò ordinantur ad conservationem speciei per generationem, & in his quantum ad principalem actum est Castitas; quantum verò ad quosdam actus præambulos, aut circumstantes, ut sunt oscula, tactus, amplexus, aspectus libidinis incentivi, est Pudicitia. De his ut specialitè dicamus,

Abstinencia est virtus moderatrix cupiditatum, voluptatumque, quæ circa esculenta versantur. Ad quam



## 210 Tertia Partis Philosoph. Q.VI.

verò mensuram tenetur modus in cibis constituendus. luculenter explicat S. Augustinus lib. de Moribus Ecclesie cap. 21. his verbis : *Habet vir temperans in hujusmodi cibus vitæ regulam in utroque testamento firmatam ; ut eorum nihil diligit , nihil per se appetendum putet ; sed ad vitæ hujus , atque officiorum , necessitatem quantum satis est assuset , utentis modestiâ , non amanti affectu .* Et lib. 20. Confess. cap. 32. *Hoc me , inquit , docuisti , ut quemadmodum medicamenta , sumpturus accedam .*

Sobrietas est virtus moderatrix affectûs & usûs cuiuscunque potûs inebriare valentis . Ad hanc enim virtutem spectat , non solum valetudini corporis consulere in moderatione talis potûs , sed specialiter mentis serenitati præcavere .

Si autem quæras , cur sobrietas consecratur specialis virtus ab abstinence distincta , cum cibus & potus eodem modo delectent , ac nutrant ? Resp. cum D. Thoma 2. 2. q. 149. art. 2. quia ubi est speciale bonum rationis , ibi specialis constitui debet virtus illius boni custos . Cum igitur potus inebrians speciali modo aliis alimentis nomine communi bonum rationis perturbet , ejus organum subvertendo , ideo specialem exigit virtutem , à qua ejus abusus temperetur .

Castitas est virtus moderatrix illius concupiscentiæ , quæ est circa actum propagandæ speciei destinatum . Hæc virtus tanto excellentior est , ac pulchrior , quanto ille affectus est insolentior , fortior , ac rationis minus audiens . In illa enim ob id præclarior elucet ordo , vigor , imperiumque rationis supra insanientem appetitum . Dividitur in Castitatem specialiter dictam , & Virginitatem , Castitas specialiter dicta est , quæ solum coercet impetum ad delectationes illas illicitas , licet eas verò moderatur , ut fiant sine , modo , tempore , aliisque servandis servatis : potestque dividi in Juvenilem , quæ legitimas nuptias expectat ; Conjugalem , quæ nuptiis moderatè utitur ; & Vidualem , quæ pro illo statu se continet . At verò Virginitas est heroica quædam castitas ita concupiscentiam domans , ut ne licitarum quidem voluptatum experientiam voluntariam ei concedat , ut sic abdicatis omnibus carnis illecebris , ac delectationibus , curisque ex illis consequentibus , Divinis commodis , liberis , expeditisque animus vacet . Unde ad Virginitatis virtutem tria requiruntur . 1. Integritas  
cor-

## De Temperantia, &c. Art. III. 211

corporis, omnis voluntariæ delectationis, quæ ex adu generationis causatur, expers. 2. Propositum mentis ab hac delectatione perpetuè abstinere se eligentis. 3. Bonus finis, propter quem talis carentia, quæ de se nullam honestatem dicit, eligatur. Unde S. Augustinus lib. de Virginit. cap. 8. *Nec nos, inquit, hoc in virginibus prædicamus, quod virgines sunt, id est fecunditatem omnem abdicant, spontaneamque sterilitatem corporis eligunt, sed quod Deo dicata piam continentiam virginis sunt, id est, in finem religionis & divini cultus à nuptiis se abstinere.*

Pudicitia est virtus moderatrix quorundam actuum minus principalium ad prædictam concupiscentiam periculum, ut sunt oscula, tactus, aspectus, amplexus, sermones lascivi, &c. Non est tamen juxta D. Thomam specialis virtus à castitate distincta, sed solam eandem castitatem exprimens, quatenus versatur circa circumstantias aliquas. Siquidem omnes illi actus libidinosi antecedentes, ac concomitantes principaliorem, eandem regulam, ob eundem finem, ac eodem modo à ratione coercentur. Dicitur autem *Pudicitia* à pudore, eo quod de his actibus, etiam dum licite sunt, honestus animus maxime verecunderetur, cum quod minus rationi subjaceant; cum quod in eis homo ad conditionem beatorum proximis accedat.

### §. II.

#### De Partibus potentialibus Temperantia.

**C**um proprius character virtutis Temperantiæ sit appetitum refrigare ac coercere, ne prorumpat, immoderate in hæc sensibilia bona, in quæ propendet, principalis quidem virtus, quæ nomine *Temperantiæ* intelligitur, id quod in hac materia præcipuum est ac difficillimum, ubi moderandum assumit, tanquam proprium objectum, delectationes scilicet ad individui conservationem & speciei propagationem pertinentes, quarum ad irrahendum affectum, turbandamque rationem insignis est vehementia. Quæ verò virtutes affectuum molitorum impetum minus ex se vehementem coercent

ac moderantur, habentur pro partibus potentialibus Temperantiæ, seu pro virtutibus ei adjunctis.

Hæ verò virtutes adjunctæ tres enumerari possunt, scilicet, Continentia; Mansuetudo, Modestia. Cujus divisionis ratio est, quod cum temperantia versetur circa difficiliore motus, appetitûs retinendos, eæ virtutes tanquam minûs principales ei adjunguntur, quæ moderationem adhibent in aliqua minûs difficili materia, & appetitum protumpecentem in quædam bonâ minûs efficacia ad ipsum rapiendum refrenant. Hoc verò tripliciter contingit. Uno modo in ipsis motibus voluntatis commotæ ex impetu passionis, nam propter connexionem voluntas nata est moveri, ac sollicitari motibus appetitûs sensitivi: & ad hoc ponitur continentia, ex qua fit, ut licet homo immoderatas passiones patiatur, voluntas tamen non vincatur. Alio modo in motibus appetitûs paullo vehementioribus, ac rationem conturbantibus, quales sunt motus iræ, appetitusque vindictæ; qui licet non ita dururni, importuni, & illecebrosi sint, ac motus libidinosi, subito tamen impetu rationem obnubilant, voluntatemque fortiter impellunt: & pro his moderandis ponitur Mansuetudo. Tertiò modo hæc refrenatio fieri potest in motibus pacatioribus, ac rationi vicinioribus, quales sunt amor excellentiæ, gestûs corporis, &c. & pro his ponitur Modestia, quæ hæc paullo generalius usurpatur pro moderatione cujuscunque motûs sive interioris, sive exterioris, in quo & vehementia minor existit, & cum ratione major connexio relucet. De his ut sigillatim dicamus,

Continentia hæc sumitur, non generaliter pro retractione appetitus ab eo omni, in quod immoderatè tendit; nec pro virtute appetitum à libidinosis delectationibus coercente, quo pacto coincidit cum castitate; sed specialiter pro habitu residente in voluntate, eamque adversus passionum insurgentium impetus ita obfirmante, ut quantumvis intumescant, non trahatur ab illis in prævum consensum. Hæc non censetur perfecta, sed solum dimidiata virtus: quia virtutis est opus perfectum facere, quod tamen continentia non facit. Hæc enim obfirmat quidem voluntatem contra rebellantes passionum motus, non tamen eos, ne immoderatè insurgant, coercere sufficit; ideoque non plenè subiecit appetitum rationali, sed solum ex duobus principiis, quæ concurrunt ad actum,

## De Temperantia, &c. Art. III. 213

actum, principalius, scilicet voluntatem, in officio continet; minus principale verò insinire permittit.

Manfuetudo est virtus iræ moderatrix. Verùm quia in ira duo sunt, motus iræ, ac vindicta insinista hæc virtus duas sub se continet; alteram, quæ internam iræ motum moderatur, & ad illam redigit mediocritatem, quæ rationi congruit; & hæc tenet nomen commune Manfuetudinis, vocaturque præterea *Militas*, seu *Lenitas*. Alteram verò, quæ externam vindictam, seu penam ob injuriam insinendam temperat, quantum iustitia fuit, vocaturque *Clementia*. Hanc definit Seneca, *Temperantiam animi in potestate ulciscendi; seu Moderationem aliquam ex pena debita remittentem*. Quod, inquit D. Thomas 2. 2. quæst. 157. art. 3. ad 3. *provenit ex quadam dulcedine affectus, quæ quis abhorret omne illud, quod potest alium contristare*.

Modestia, prout hic paullo latius sumitur, definitur potest. Virtus, quæ quis in motibus internis, & externis, exteriorique apparatu modum conditioni suæ consonum tenet: unde dicitur *modestus*, quasi *modum tenens* aut *in modum stans*. Dividi potest in Humilitatem, Studiositatem, Modestiam morum, Eutrapeliam, & Modestiam cultus. Hujus divisionis ratio est, quia ea, in quibus moderandis mediocritas tantum difficultas existit, quæque proinde ponuntur objectum modestiæ, sunt quatuor. Primum est motus animi ad quandam excellentiam, & circa illud ponitur Humilitas, cujus est ita moderari appetitum, ut in affectu, amoreque excellentiæ suam sortem non excedat. Secundum est desiderium eorum, quæ pertinent ad cognitionem, & circa illud ponitur Studiositas, quæ opponitur Curiositati, efficitque, ut appetitus moderatè se habeat in discendo. Tertium autem pertinet ad corporales motus & actiones, ut scilicet decenter & honestè fiant, tam in his quæ seriò, quàm in his, quæ ludo aguntur. Pro seriò ponitur Modestia morum, cujus est debitam gravitatem apponere gestibus, nutibus, aliisque motibus exterioribus. Pro ludicris verò ponitur Eutrapelia, cujus est temperatam festivitatem, lepiditatemque miscere in ludis, jocis, aliisque, quæ relaxandi animi gratiæ fiunt. Quartum denum pertinet ad exteriorum cultum & apparatus: & circa illud versatur modestia cultus, cujus est in exte-

rio.

stori ornatum modum statuere, ut & salus vitetur, & decorum tamen observetur.

## ARTICULUS QUARTUS.

*De Fortitudine, Virtutibusque sub ea contentis.*

**S**uperest: ut de fortitudine dicamus; quæ irascibilem appetitum perficit, ac rationi commensurat. Hæc virtus, licet nobis ordinem potentiarum observantibus ultimo reponatur loco, dignitate tamen Temperantiam antecedit, quippe cum sit Heroum propria dos, ac præcipuum decus, oppressorum opitulatrix, publici boni monumentum, virtutum omnium armigera, *quorum, inquit Valerius Maximus lib. 3. cap. 2. ponderosissima vis, & efficacissimi lacerti in fortitudine consistunt.*

Definitur à Cicerone 2. de Invent. *Considerata periculorum susceptio & laborum perperio*; vel ut habet 4. Tuscul. *Scientia præferendarum rerum*; seu *Affectio animi in patiendo*, ac *perferendo summa legiparens sine timore*; vel, ut idem ibidem habet ex Chrysippo, *Constitutio stabilis iudicii in eis rebus, quæ formidolosa videntur, subeundis & repellendis*. Ab Aristotele vero 3. Ethicorum cap. 9. *Mediocritas inter timorem & præfidentiam constituta*, id est, Virtus, quæ in metu & audacia moderandis posita est. Quemadmodum enim Temperantiæ est appetitûs imperium, quo in bona sensibilia irrumpit, frænare & ad mediocritatem reducere; sic proprius Fortitudinis character est, cum in malis arduis ac periculis ita confirmare, ut non succumbat, nec à bono rationis recedat, sed, prout recta ratio jubet, sese habeat.

Huic virtuti duo actus assignantur, *aggredi* scilicet & *sustinere*. Primus admirabilior, splendidior, honorabiliorque videtur; sed secundus ut difficilior, sic præstantior est, & in quo vera, germanæque virtutis opera impensius adhibetur. Ratio est, quia aggressio iræ, audaciæque stimulis incitatur, & excellentiæ cuiusdam, quæ in hoc actu relucet, illecebris nu-

## De Fortitudine, &c. Art. IV. 215

tritur, & spe victoriæ confortatur, ne deficiat; ab ipso verò periculo satis reprimatur, ne immoderato impetu, nimisquæ animositate irruat. At verò in substinendo animus his omnibus solaciiis, subsidiiisque defraudatus solâ virtutis firmitate, ne succumbat, solacitur, solo boni honesti amore stabilitur; solo rationis vigore erigitur. Adde præterea, quoddam aggressio sit repentino impetu, respicitque malum abiens; per pressio verò durabili conatu cum præsentem malo luctatur.

Quantum ad partes Fortitudinis, nullæ subjectivæ illi assignantur, sed ipsa censetur species atomia, eo quoddam circa materiam admodum specialem versetur, id est, circa mortis pericula adeunda, maximosque dolores substinendos. Partes verò quasi integrantes quatuor habet, scilicet Magnanimitatem, Magnificentiâ, Patientiam, & Perseverantiâ. Cum enim duos actus habeat, scilicet aggredi animosè, & constanter substinere, ut primus integrè, perfectèque fiat, duo requiruntur, scilicet magnitudo quoddam animi, quam præstat Magnanimitas; & magnorum externa exsecutio, quæ pertinet ad Magnificentiâ. Ut verò mala perfectè substineantur, duo etiam concurrere debent. Primb, ut animus magnitudine malî non franguntur; & hoc pertinet ad Patientiam. Secundò, ut diuturnitate ejusdem malî non fatigetur; & hoc pertinet ad Perseverantiâ.

Porro eadem virtutes prædictæ, quæ, dum attingunt materiam fortitudini propriam, versanturque circa gravissima pericula, habentur, quasi partes integrantes fortitudinis; in quantum versantur circa pericula minoris momenti, sunt distinctæ virtutes, fortitudini adjunctæ tanquam partes ejus potentiales. Unde ut de illis quidpiam speciatim dicamus,

Magnanimitas, ut ex ipsa voce patet, est quoddam animi magnitudo, & quasi dilatatio, seu extensio ad magna & ardua; ideoque definiiri potest, Virtus inclinans ad magna & heroica in omni genere virtutum. Unde idem objectum, quod ut bonum ad specialem virtutem attinet, sub ratione magni, ardui, sublimisque ad Magnanimitatem trahi potest. Immo quia honorabilia quæcunque ad virtutem attinent, ideo non in solis virtutibus, sed in aliis honorabili-

libus

## 216 Tertiæ Partis Philosoph. Q. VI.

libus rebus, quæ ad virtutis materia esse possunt, ut dignitates ac functiones; vel ejusdem virtutis quantatenus præmia sunt, ut honor, fama, gloria; &c. magnitudinem convenientem operari pertinet ad magnanimitatem.

Hujus verò virtutis characteres & munia cum præclare describit Aristoteles 4. Ethic. cap. 7. & 8. non abs re fuerit quædam ex illo hic apponere. Primus ergo Magnanimi character est, *Dignum se magnis existimare*, supposito tamen merito, alioquin, ut observat Aristoteles, non magnanimitas erit, sed stoliditas. Secundus, *Magnis honoribus, & qui à viris probis deferuntur moderatè delectari*: illos verò, qui à vulgo, & ob res parvas deferuntur, contemnere: quippe cum sint infra ejus meritum. Tertius, *In prosperis & adversis æquanimem, ac moderatum se præbere*: Magnanimus enim de celsitudine animi sui utriusque fortunæ vicissitudines, tanquam de cælo nubes, despicit, proindeque illis non movetur. Quartus est, *Queribandum, ac supplicem non esse*: Hoc enim animi dejecti, oppressique judicium est. Quintus, *Accepta beneficia cumulatiùs reddere*: Nam magnanimus dare mavult, quàm accipere, quia illud melius, majusque est. Sextus, *Vix quemquam rogare*. Tum quia paucis eget, eaque, quæ ab hominibus dari possunt, non magni facit. Tum quia non vult aliis debere. Septimus, *Ad magnos magnum se præbere*: erga mediocres verò moderatum, ut Deum scilicet imitetur, qui humilia respicit, & alta à longe cognoscit. Octavus est, *in amore & odio, dilis & fastis apertum esse*: Timentis enim est, & de claritate, honestateque illorum, quæ agit dissidentis, latere velle. Nonus est, *Non meminisse malorum & injuriarum*: Quippe, inquit Aristoteles, *Viri magnanimi non est memorem esse, præsertim verò malorum, sed ea potius pro nihilo putare*. Decimus est, *Non multis se ingerere, sed cessatorem & cunctatorem esse, nisi ubi de magnis agitur*: Magnanimus enim studet magnis, quæ rata sunt. Undecimus, *Non faciliè admirari*: nihil enim ei magnum est. Duodecimus, *Motum tardum habere, vocem gravem, orationem stabilem ac sedatam*. Neque enim, inquit Aristoteles, *festinare solet is, quæ paucis rebus studet, neque vehementer contendit, cui ni-*

*nil magnum esse videtur : propter has causas autem & vix ardua , & celer ingressus esse solet.*

Si verd quæras, qua ratione stare possint, hæc omnia cum virtute humilitatis, cui è diametro videntur opponi? Respondeo ex D. Thoma 2. 2. quæst. 129. arr. 5. *Quoddam in homine invenitur aliquid magnum, quod ex dono Dei possidet, & aliquis defectus, qui competit ei ex infirmitate nature. Magnanimitas ergo facit, quoddam homo se magnis dignificet, secundum considerationem donorum, quæ possidet ex Deo, Sicut si habet magnam virtutem animi, magnanimitas facit, quoddam ad perfecta virtutis opera tendat. Et similiter dicendum de usu cuiuslibet alterius doni, puta scientia, vel exterioris fortuna. Humilitas autem facit, quoddam homo seipsum parvipendat secundum considerationem proprii defectus. Similiter magnanimitas contemnit alios, secundum quod deficiunt à donis Dei; non enim tantum eos appetiatur, quoddam pro eis aliquid inderens faciat. Sed humilitas alios honorat, & superiores æstimat, in quantum in eis aliquid inspicit de donis Dei. Ex quo concludit, quoddam magnanimitas & humilitas non sunt contraria, quamvis in contraria tendere videantur, quia procedunt secundum diversum considerationem.*

Ex hac S. Thomæ doctrina haberi potest, has duas virtutes, Magnanimitatem, & Humilitatem, etsi è diametro opponi videantur, nilum in modum tamen consentire, haberique posse, ut duos polos, quibus vira præclara & optima verti debet. Nempe dum recogitamus, quàm ex nobis nihil simus, quamque nihil nobis debeatur, innasci debet affectus quidam modestus, ex quo, ut ex fonte quoddam, effunditur moderatio in omnia vitæ officia, qua de manu Dei læti & grati suscipimus etiam minima beneficia, qua leniter & placidè subtractionem eorum ferimus, qua sorte nostrâ contenti vivimus, qua ferocientem arrogantiam radicitus extirpamus. Sed rursus cum in mentem venit, ad quàm magna nos vocaverit Deus, quàm capacem & amplum animum nobis indiderit, quàm modica sint hæc peritura comparatione bonorum æternorum, ad quæ geniti sumus, emergit alius quidam excelsus, ac splendidus affectus, ex quo, proprio fonte, effunditur quicquid germanæ magnitudinis splendet in actionibus, quo humana despiciamus, ad ampla & illustria erigimur, servilis abje-



## 218 *Tertiæ Partis Philosoph. Q. VI.*

Atque animi labem expungimus, in omnibus nos Deo Patre dignos Filios exhibere conamur.

Magnificentiâ, ut ipsum nomen sonat, est magnarum rerum factiva. Unde differt à Magnanimitate, quoddam quidem animum ita obfirmet, ut tendat constanter ad ardua & sublimia; illa verò ipsum roboret in executione magnarum rerum. Cicero eam definit lib. 2. de Invent. *Rerum magnarum & excelsarum cum animi amplâ quadam & splendida propositiōe cogitatio, atque (quod ei principalitè competit) administratio.* Porro cum res illæ exteriores splendidæ, ac magnæ, sine magnis sumptibus constare nequeant, magnificentia versatur circa magnos sumptus, roboratque animum, ne metu impensarum in executione deficiat.

Patientiam definit Cicero, *Honestatis, aut utilitatis causâ, rerum arduarum, ac difficillimâ voluntaria & diuturna perpassio.* Hujus enim virtutis munus est sic obfirmare animum, ut in rebus molestis perpetiendis non succumbat, nec nimiam dejiciatur, aut à bono rationis recedat. Verùm cum dilatio magni boni affligat animum, eique molesta sit, expectatio quoque bonorum futurorum ad patientiam attinet, quæ ob id etiam Longanimitas nuncupatur.

Perseverantia definitur, *In ratione bene consideratâ stabilis & perpetua permissio.* Cum enim animus non solum gravitate molestiarum frangatur, sed etiam diuturnitate cujuscumque ardui fatigetur, præcipuè quia & ipse instabilis est, ac vicissitudinis amans, eget quadam virtute, qua roborerur, ac stabilietur in arduis diuturnis, & hac est Perseverantia.

An sit actus fortitudinis in quibusdam casibus sibi ipsi mortem inferre, olim inter Antiquos celebris quæstio fuit, quæ modo nulla esse potest inter Christianos, cum lege divinâ vetitum sit homicidium, ac qui seipsum occidit, homicida manifestè sit. Unde S. Augustinus de Civit. Dei lib. 1. cap. 20. *Restat*, inquit, *ut de homine intelligamus illud, quod dictum est, Non occides; nec alterum; Ergo neque te; neque enim aliud, quàm hominem occidit, qui seipsum occidit.* At quæri potest, an etiam naturali rationi, proindeque fortitudini in ordine naturali spectatæ, id repugnet.

CON.

## C O N C L U S I O.

**L**Egi naturali repugnat occisio sui ipsius; nec proinde actus fortitudinis esse unquam potest, sed furoris, aut ignaviae.

Probatur prima pars contra Stoicos. tribus S. Thomae rationibus 2. 2. qu. 65. art. 3. Primo. *Qualibet res naturaliter se ipsum amat, & ad hoc pertinet, quod conservat se inesse, & corruptentibus resistit, quantum potest: Ergo quod aliquis se ipsum occidat, est contra inelinationem naturalem, & contra charitatem, quia quilibet debet se ipsum diligere, proindeque contra naturalem legem & charitatem.*

Secundo. *Qualibet pars id quod est, est totius. Quilibet autem homo est pars communis. Unde in hoc, quod se ipsum interficit, injuriam communitati facit. Ea ratione utitur Aristoteles 3. Ethic. cap. ultimo.*

Tercio. *Vita est quoddam donum divinitus homini attributum, & Dei potestati subiectum; & ideo quod se ipsum vitam privat, in Deum peccat. Sicut qui alienum servum interficit, peccat in dominum, cujus est servus; & sicut peccat ille, qui usurpat sibi iudicium de re sibi non commissa. Quam rationem naturali lumine ipse Cicero perspexit, ac in somnio Scipionis sic exprimit: Pius omnibus retinendus est animus in custodia corporis, nec injussu ejus, a quo ille est vobis datus, ex hominum vita migrandum est, ne munus humanum assignatum a Deo defugisse videamini. Eadem ratione usus est Plato in Phaedrone.*

Secunda pars sequitur ex prima. Nam cum virtutis actus consistat in commensuratione ad regulam, seu legem, actus naturali legi repugnans, quae est morum in ordine naturali spectatorum regula, non ad virtutem, sed ad vitium pertinet. Cum itaque occisio sui ipsius repugnet legi naturali, nec ad fortitudinem, nec ad aliquam virtutem spectare potest; sed vel ad furorem, cum quis impotenter concitus imperu in hoc facinus prorumpit. Aut si sedato animo fiat, ad fugienda quadam mala, quae quis ferre nequit, ad ignaviam pertinet. Ut factum Democriti, qui se ipsum sponte inedia peremit, ut decrepitae senectutis in-

## 220 Tertia Partis Philos. Qu. VI.

commoda effugeret. Item Lucretiæ, quæ se gladio peremit, ut illati stupri infamiam dilueret. Attici Pomponii, qui insanabili morbo laborans, eidem mediâ sponte periit. Caronis, qui se occidere maluit, quàm Cæsari victori subesse, &c. Ur enim ait S. Thomas 2. 2. quæst. 64. art. 5. *Quoddam aliquis sibi ipsi inferat mortem, ut vitet mala, habet quidem quandam speciem fortitudinis, propter quod quidam seipsum interfecerunt, estimantes seipsum fortiter agere. Non tamen est vera fortitudo, sed magis quadam mollietis animi non valentis mala subfinere.*

Objic. 1. Homicidium naturali legi repugnat, quatenus est contra iustitiam: Sed qui se occidit, sibi non est injurius, cum volens id faciat; volenti enim non fit injuria: Ergo id non repugnat legi naturali.

Resp. Cum S. Thoma quæst. cit. ad 2. *Homicidium esse peccatum, non solum quia contrariatur iustitiæ, sed etiam quia contrariatur charitati.* Unde peccat, qui se occidit, non quoddam in seipsum injustus sit, sed quoddam contra naturalem charitatem agat. At ex eodem ibid. & quæst. 59. art. 3. ad 2. aliunde etiam peccat contra iustitiam, quatenus injuriam facit, non sibi propriæ, sed civitati, cujus pars est, & Deo, cujus est servus & creatura. Sicut de Christiano fornicante ait Apostolus, Deo esse injurium, quia templum Dei, id est, proprium corpus Deo per baptismum consecratum, violat.

Instabis. Licet vitare majus malum, minore malo; ut membrum amputare, ad salvandum corpus: Sed quandoque homo per occisionem sui ipsius vitat majus malum, ut miseram vitam, infamiam, stuprum, &c. Ergo ei licet seipsum perimere ad vitanda hujus vitæ pejora morte mala. Imò ad eundam felicioram vitam, ut ille Cleombrotus Ambraciota, qui ut citius ad beatorum cætum perveniret, cum nihil ei accidisset adversi, à muro se in mare abjecit, lecto Platonis libro de Immortalitate Animarum, aut potius cujusdam Hegesiæ, quo hujus vitæ mala, & alterius bona ita patheticè describebat, ut prohibitus sit à rege Prolo-mæo illæ in Scholis dicere, quoddam multi his auditis mortem sibi ipsi consciscerent, ut refert Tullius 1. Tuscul.

Resp.

Resp. Cum S. Thoma quæst. cit. Quid homo consistitur Dominus sui ipsius per liberum arbitrium; & ideo licitè potest de seipso disponere, quantum ad ea, quæ pertinent ad hanc vitam, quæ hominis libero arbitrio regitur. Sed transitus de hac vita ad aliam feliciorē non subjacet libero arbitrio hominis, sed potestati divinæ; & ideo non licet homini seipsum interficere, ut ad feliciorē transeat vitam. Itaque, inquit, Cicero Tuscul. 1. Vir sapiens latus quidem ex his tenebris in lucem illam, alterius nempe vitæ, excolit. Nec tamen illa vincula carceris superit; (leges enim vetant) sed tanquam à magistratu, aut aliqua potestate legitima, sic à Deo evocatus, atque emissus exhibet. Vetat enim dominans in nobis Deus, injussu hinc nos suo demigrare. Hæc ille, & præclare quidem.

Similiter, ut pergit S. Thomas, nec cuiquam licet se occidere, ut quaslibet miseras præsentis vitæ evadat. Quia ultimum malorum hujus vitæ est mors: & ideo inferre sibi mortem ad alius hujus vitæ miseras evadendas, est majus malum assumere ad minoris mali vitætionem. Nec etiam licet seipsum interficere propter aliquod peccatum commissum. Tum quia in hoc sibi homo maxime vocet, quod sibi admittit necessarium penitentia tempus. Tum etiam, quia malefactorē occidere non licet, nisi per judicium publicæ potestatis. Similiter non licet mulieri seipsam occidere, ne ab alio corumpatur: quia non debet in se committere crimen maximum, quod est sui ipsius occisio, ut vitet minus crimen alienum. Non enim est crimen mulieris per violentiam violatæ, & consensus non adit, quia non inquinatur corpus, nisi de consensu mentis, ut Lucia dixit. Similiter nulli licet seipsum occidere ob timorem, ne consentiat in peccatum: quia non sunt faciendæ mala, ut eveniant bona, vel ut vitentur mala, præsertim minora & minus certa. Incertum enim est, an aliquis in futurum consentiat in peccatum. Potens enim est Deus hominem quacumque tentatione superveniente liberare à peccato.

Dices. Samson seipsum interfecit, ut habetur Jud. 16. qui tamen connumeratur inter Sanctos. Hebræ. 11. Apollonia sponte in rognū irruit. Pleeræque Christianæ feminae tempore persecutionis seipsas occiderunt, ut Pelagia cum filiabus, quas S. Ambrosius lib. 3. de Virgin. memorat, ut Impudicos

## 222 Tertia Partis Philosoph. Q. VI.

persecutores fugerent, in altum fluvium irruisse. Item Razias quidam 2. Macab. 14. se ipsum interfecit, eligens nobiliter mori potius, quam subditus fieri peccatoribus, & contra natales suos injuriis agere.

Resp. Cum S. Thoma cit. & S. Augustino 1. de Civit. cap. 21. hæc facta fuisse interiori quodam Spiritus Sancti instinctu; nec enim aliter excusari possent. Et quidem de Samisone ita censendum. Item de his feminis, quas Ecclesia, ut sanctas colit. De Razia verb, cum ejus facinus eo instinctu factum non constet, *Magnum fuit*, inquit S. Augustinus Epist. 61. *non tamen bonum*. Quippe fortitudinis speciem, non rectitudinem habuit; unde, ut ipse ait, *Scriptum est, quidam voluerit nobiliter mori: sed nunquid ideo sapienter?*

Repones. Potest homo manifesta adire pericula, ex quibus, evidenter videt, se non emerfurum, propter bonum publicum: Ergo seipsum etiam interficere, saltem propter bonum publicum.

Resp. Nego consequentiam. Nam qui adit pericula, non seipsum interfecit, sed cum id efficit officium & virtus, actionem per se bonam facit, cui per accidens adiungitur ejus mors ab alia causa illata. Porro non est contra virtutem, sed ei congruit recte operari etiam propriæ vitæ periculo. At propter nullum bonum licet male facere, ut facit, qui jus in propriam vitam usurpat, seipsum petimendo.

## ARTICULUS QUINTUS.

### De Connexione Virtutum.

**P**rimates illæ quatuor virtutes, quæ à nobis singulis articulis explicatæ sunt, aliquando sumuntur ab Authoribus pro quibusdam generalibus conditionibus ad quodcumque perfectum virtutis opus concurrentibus, ita ut discretio pertineat ad Prudentiam, rectitudo ad Justitiam, moderatio ad Temperantiam, firmitas animi ad Fortitudinem. Et in hoc sensu manifestum est, illas virtutes esse connexas, Tum quia perfectum virtutis opus debet esse discretum,

rum, rectum, moderatum, & stabile. Tum etiam quia firmitas animi non habet laudem, rationemque virtutis, si sit sine moderatione, rectitudine, & discretionem. Et eadem ratio est de aliis. Sed præterea eadem virtutes sumi solent magis propriè pro specialibus habitibus, quorum quilibet sibi proprium vindicat objectum, circa quod affectum rectificet. De virtutibus illis hoc modo sumptis egimus præcedentibus articulis, & nunc de iisdem quaeritur, utrùm sint connexæ, ita ut sine altera non possint haberi.

Observandum, quod virtus in duplici statu haberi potest, perfecto scilicet, & imperfecto. Virtus in statu imperfecto dicit aliquam inclinationem in nobis existentem ad opus aliquod de genere bonorum faciendum, si-ve talis inclinatio sit à natura, si-ve ex assuetudine; sed quæ inclinatio sit, vel debilis & crebris obnoxia tentationibus; vel fortis quidem, sed per prudentiam, quæ est virtutum moralium anima, non satis regulata. Exemplum primi est in eo, qui incipit virtutem colere. Talis enim post unum, aut alterum actum, sentit quidem in se inchoari virtutis habitum, sed qui adhuc tener est, & ad plenæ virtutis maturitatem non attingit. Exemplum secundi est in eo, qui vel naturali pronitate, vel longâ assuetudine in bono cuiusdam virtutis solidatus, prudentiæ discretionem hunc affectum non regit. Id videre est in Paulo nondum à Christo vocato, qui Mosaicæ legis observationibus bonis, & piis imbutus, summo religionis zelo eas propugnabat, & bene. Postea verò propalato Evangelio culpabilis ignorantiae tenebris involutus, amisso prudentiæ regimine, laudabilem zelum in perniciosum furorem commutavit. Virtus in statu perfecto est, quæ utraq; istâ dote præstat, perfectâ scilicet subjectione ad prudentiam, & stabili firmitate contra omnes tentationes, seu ut desinit D. Thomas, *quæ inclinât in bonum opus bene agendum.*

## C O N C L U S I O.

**V**irtutes morales in statu quidem imperfecto non connectuntur invicem, bene tamen in statu perfecto.

Prima pars conceditur ab omnibus, & manifestè patet. Videmus enim etiam in hominibus perditissimis aliquod imperfectæ virtutis vestigium relucere; eumque, qui injustus est, aliquando temperatum se præbere in voluptatibus, vel fortem in periculis.

Secunda verò & præcipua pars receptissima semper doctrina fuit, tam apud Patres Ecclesiæ, tum apud antiquos Philosophos, licet eam Scotus negaverit.

Probari autem potest primò authoritate. Tum D. Ambrosii super Lucam cap. 6. *Connexæ, inquit, sibi sunt concatenataque virtutes, ita ut, qui unam habeat, plures habere videatur.* Tum S. Augustini 6. de Trinit. cap. 4. *Virtutes, inquit, quæ sunt in anima humana, nullo modo separantur ab invicem.* Tum Gregorii 21. Moral. dicentis, *Quid una virtus sine aliis aut omnino nulla est, aut imperfecta.* Unde Cicero 2. Tuscul. Si unam, inquit, virtutem confessus es te non habere, nullam necesse est te latitum.

Probatur 2. ratione D. Thomæ 1. 2. quæst. 65. ar. 2. Perfecta virtus esse nequit sine perfecta prudentia: Sed perfecta prudentia secum importat omnes virtutes morales: Ergo virtutes morales invicem ita connexæ sunt, ut una sine omnibus perfectè haberi non possit. Major patet. Nam prudentia est regula virtutis moralis, quæ dicitur *Habitus elativus pro ut prudentia distaverit*, quæ proinde remotà omnis bona inclinatio imperfecta est; ut patet in zelo Pauli ante conversionem, in generositate Alexandri, in constantia quorundam Hæreticorum. Minor verò probatur. Principium, quo fundamentaliter nititur perfecta prudentia, est appetitus perfectè rectificatus circa fines: Sed appetitus non potest esse perfectè rectus circa fines, nisi adsint omnes virtutes morales: Ergo

## *De Connexione Virtutum. A.V. 225*

go nec perfectum fundare prudentiam. Minor patet. Nam omnes virtutes concurrunt ad integram appetitus rectitudinem, quæ proinde claudicat, si unica deficiat. Major verò declaratur. Prudentia enim, ut supra dictum fuit, est recta ratio agibilia: Atqui ratio non potest esse recta circa agibilia, nisi appetitus sit rectè affectus circa fines: Ergo prudentia fundamentaliter nititur appetitu perfectè rectificato circa fines. Declaratur minor. Quia agibilia, seu eligibilia dependent ab intentione finis, sicut in speculativis conclusiones dependent à principiis: nam sicut adhæremus conclusionibus propter principia, ita & eligimus agibilia propter intentionem finis: Ergo sicut ratio non potest rectè se habere circa conclusiones, nisi intellectus bene se habeat circa principia, ita & in practicis eadem ratio recta esse non potest circa agibilia per prudentiam, nisi appetitus benè se habeat circa fines per alias virtutes, quæ rectificant ejus intentionem, quælibet circa proprium bonum.

Responderi potest cum Scoto, Prudentiam non esse unicum habitum, sed plures partiales. Unde potest esse prudentia particularis perfecta circa castitatem, sine prudentia circa materiam iustitiæ.

Sed contra. Nam ( præterquam quodd falsum est, habitum prudentiæ multiplicari, juxta multiplicationem materiæ aliarum virtutum ) quælibet virtus perfecta necessariò exigit prudentiam fundam. in appetitu circa omnem materiam moralem rectificato: Ergo nulla responsio. Probatur antecedens. Judicium enim prudentiale circa materiam cujuscunque virtutis potest corrumpi à quocunque pravo affectu: Ergo ut tale judicium sit perfectum, virtusque per ipsum regulata censeatur perfecta, debet supponere appetitum omni ex parte rectum. Consequentia patet. Nam perfecta virtus debet excludere omne corruptivum, & regulari per judicium perfectum. Antecedens verò probatur, tum ratione, tum inductione. Ratione quidem, Quia materiæ morales sunt ita inter se connexæ, ut frequentissimè invicem concurrant, defectusque unius redundet in aliam. Inductione verò. Sic enim videmus, mitem ex libidine fieri crudelem; ut David nitissimus ob amorem Beth-



## 226 *Tertia Partis Philosoph. Q. VI.*

sabæ maritum ejus neci exposuit. Sic quotidie judex circa justitiam, benè affectus, sed pecuniarum avidus, à recto judicio muneribus deturbatur: unde munera dicuntur *exacare oculos sapientum*. Sic mulier pudica, sed ambitiosa, meru infamiæ potest effici adultera, ut Lucretia, quæ, teste Livio, mortis metu non fracta, timore infamiæ victa consensit adulterio. Sic fortis, sed voluptuosus, potest emolli voluptatum illecebris, ut patet in Annibale, quem non Romana virtus, sed Campanæ deliciæ frægerunt. Et apud Poetas Hercules, ipse Omphalæ Lydiorum reginæ amore captus, fertur, ejus jussu laniatio dedisse operam; & qui mundi terror fuerat, istius mulierculæ indignationem formidasse. Ergo, ut prudentia sufficiat ad perfectè regulandam quamlibet virtutem, debet fundari in appetitu omni ex parte recto, & contra cujuslibet vitii impugnationes obfirmato; sicut urbs, ut sit perfectè securæ, debet claudî muris nulla ex parte hostibus apertis.

Objic. 1. Impossibile est, ut homini occurrant objecta omnium virtutum: Ergo impossibile est, ut omnes acquirat; proindeque si connexæ sint, nullam perfectè habere potest. Probatur antecedens in paupere, cui non occurrit objectum liberalitatis & magnificentiæ. In felice, cui nullum patientiæ objectum sese offert. In innocente, cui prænitentiæ materia non suppetit, &c.

Resp. cum D. Thoma, materiam præcipuarum virtutum, & omni statui communem facillè nobis occurrere; in d. scilicet in unico negotio virtutum principalium objecta conglobari possunt. Quantum verò ad illas virtutes quarum materia non occurrit nisi in certo statu, vel sufficiunt actus conditionati ad eas, quantum necesse est, ut ceteræ perfectæ sint, acquirendas; vel certè ad id satis est ipsa dispositio subiecti, quatenus aliquis in omni materia virtutum proprio statui congruentium versatus, modico exercitio alias excellentiori statui convenientes acquireret, si ad illum statum transferretur, (illud enim habere videmur, quod in promptu est, ut habeamus) vel demum, si tales virtutes statui alicujus repugnent, ut virginitas conjugato, inno-

cen-

## De Connexione Virtutum. A. V. 227

centia lapso, &c. hæc non intelliguntur cum aliis formaliter connexæ.

Instabis. Potest homo unam virtutem studiosè colere, v. g. castitatem: Ergo eam perfectè acquireret sine aliis.

Resp. illam virtutem tamdiu imperfectam fore, quandiu decrunt aliæ, propter rationem jam dictam: quia scilicet poterit corrumpi per tentationes aliorum vitiorum. Ut patet in muliere casta, sed avara, quæ à castitatis bono pecuniæ aviditate retrahi potest.

Urgebis: Ergo virtutes debent simul acquiri,

Resp. simul acquiri, non quantum ad substantiam, sed quantum ad statum. In quantum scilicet appetitus circa cæteras bene affectus, dum circa ultimam rectè disponitur, in aliis ex consequenti perficitur: sicut urbs muris optimis clausa, sed ex una parte aperta, sit perfectè secuta, dudum ille aditus occluditur.

Objic. 2. Sequeretur ex illa sententia, prudentiam simul esse priorem, & posteriorem omnibus aliis virtutibus: Atqui hoc dici non potest: Ergo. Probatur sequela. Nam virtus perfecta supponitur prudentiam perfectam, & prudentia perfecta supponeret alias virtutes perfectas.

Resp. Prudentiam actualem, seu, ut loquitur Cajetanus, *in fieri*, præcedere omnes alios habitus virtutum; habitum verò perfectum prudentiæ, seu *prudentiam in factu esse*, præcedi ab aliis habitibus virtuosus. Nam ex naturali lumine synderesis, & innato amore honestatis, formatur prudentiale iudicium, quò regulantur actus appetitus, à quibus generantur virtutes morales. Deinde verò postquam appetitus habitualiter rectificatus est, sit capax fundandæ prudentiæ perfectæ, cujus proinde habitus ultimus omnium perficitur.

Objic. 3. scientiæ, nec artes, nec vitia sunt connexa: Ergo nec virtutes morales.

Resp. Negæ paritatem. Vicia enim sunt defectus rationis; defectus autem non sunt connexi, sed plerumque inrer se oppositi, ut patet in avaritia, & prodigalitate. Scientiæ verò, & artes sunt circa materias desperatas, & in una simplici menta-

non conjunctas, ideoque separatim haberi possunt.

Sed de virtutibus, ac de morali doctrina, quatenus lumine naturali constare potest, haecenus satis. Nunc pergen-  
dum ad ultimam Philosophiæ nostræ partem.






# QUARTA PARS PHILOSOPHIÆ METAPHYSICA.

## P R Æ F A T I O .



**C**OMMENDATAM à S. Thoma & Aristotele Methodum secuti hanc nobilissimam & omnium principem Philosophia partem postremo ad eundam loco reservavimus, quod ea sit humana sapientia culmen & apex, ad quam proinde homo ritè non ascendit, nisi aliis partibus emensis. Tum verò quia hujus vitæ felicitas quadantenus sita est, cum Deum contempletur; felicitas autem, cum sit omnium finis, ultima obtinetur. Tum demum, quia hac facultas respicit objectum abstractissimum, proindeque postremo loco contemplandum. Hac verò, etsi latissimè pateat, intra limites satis angustos à nobis concludetur, quod ea, quæ hîc tractari possent, partim Logica præoccupaverit, partim in aliis Philosophia partibus explicata sint, partim verò Theologia reserventur.

QUÆ



# QUÆSTIO PROOËMIALIS

*De ipsa Metaphysica, ejusque  
Divisione.*

## ARTICULUS UNICUS.



**M**ETAPHYSICA grece dicitur, quasi latine *Transnaturalis*, quod res supra naturam sensibilem positas contempletur, nempe rationes & affectus omni Enti, si-  
ve creato, siue increato; siue materiali, siue spiritali communes. Hinc *Prima Philosophia* nomen etiam obtinuit, quod non niodò cæterarum ejus partes dignitate anteedat, sed etiam primæ earum principia, supremasque rerum rationes complectatur, adeoque ad illam cæterarum omnium rationes & principia, veluti rami ad truncum tandem reducantur, quam ob causam cæterarum princeps jure habetur, ac domina, quod si quid in earum principiis ambiguum sit, ad supremum ejus tribunal discutiendum, ac confirmandum pertineat. Dicitur de-  
mum *Theologia naturalis*, quod sola de Divinis rebus quantum naturali lumine sciri possunt, ex professo pertractet. Itaque *Metaphysica* nomine intelligitur Facultas, quæ de rebus supra sensum & materiam positis, seu solâ mentis acie perceptis, naturali lumine discurrit. Hæc ut uberius explicentur.

PRI-

PRIMA CONCLUSIO.

*Existit. Metaphysica.*

**P**robatur, Metaphysicæ nomine censetur ea facultas, quæ communes entis rationes, ac res supra sensum & materiam positæ cognoscuntur: Sed existit talis cognitio: Ergo & Metaphysica. Minor declaratur. Ersi nostra omnis cognitio à sensu, proindeque rebus corporeis, ortum ducat, mens tamen in ipsius sensibilibus rationes omni enti communes percipit, & ab iis, quæ rebus corporeis propriæ sunt, discernit; atque ita seorsim de illis ab his abstractis potest discurrere, ut de ratione entis, ut sic eique propriis affectionibus, unitate, bonitate, veritate, essentia, existentia, actu, potentia, &c. Atque inde assurgit ad cognitionem substantiæ immaterialis plerarumque illius proprietatum: Ergo in nobis existit cognitio communium entis ut sic affectionum, ac rerum à sensu & materia secretarum.

**Obj.** Nihil est in intellectu, quin prius fuerit in sensu: Sed res supra sensum positæ nusquam fuerunt in sensu: Ergo nec sunt in intellectu; proindeque nulla earum in nobis esse potest cognitio, atque adeo nec Metaphysica.

**Resp.** Distinguo maiorem: nihil est in intellectu, quin prius fuerit in sensu, ut cognitum à sensu, nego; ut inclusum in sensûs objecto, vel ex eo deductum, concedo. Solutio constat ex dictis.

**Instabis.** Objecti cognitio ejus speciem Supponit. Sed nulla in nobis est species substantiæ immaterialis: Mens enim nostra intelligit per species à phantasmaribus abstractas, quæ solum sunt rerum corporearum: Ergo non datur in nobis cognitio rerum immaterialium, proindeque nec Metaphysica, saltem circa illas; ut in cæco non est scientia colorum.

**Resp.** Distinguo maiorem: objecti cognitio ejus supponit speciem, ab objecto ipso semper impressam, nego; ex his saltem, quæ ab aliis objectis impressæ sunt, deductam, concedo. Fateor itaque, rerum spiritualium  
spe-

species ab iis impressas mentem non habere, ut contende-  
bant Platonici: ex iis tamen, quæ à rebus corporeis  
abstractæ menti imprimuntur, ipsa deducit eas, quibus  
spiritualia cognoscit: idque tribus ferè modis. Primò per  
deputationem; quatenus indita sibi vi mens in objecto  
sensibili rationes altiores ab inferioribus contrahentibus  
ac imperfectis secernit, puta rationem substantiæ  
à corporeitate, entis à dependentia, &c. & sic format  
speciem entis independentis, ac incorporei. Secundò  
quasi per additionem, quatenus remotis imperfectionibus  
dispersas in objectis perfectiones colligit in una altiori  
ratione modo quodam excellentiori & sic inquit S. Th. 1.  
p. q. 13. art. 1. *Deus cognoscitur à nobis ex creaturis secundum  
habitudinem principii, & per modum excellentiæ & remo-  
tionis.* Tertiò per analogiam, quatenus mens ex sui ip-  
sius cognitione in cognitionem aliarum purè spiritualium  
rerum ducitur; atque ita earum speciem quandam sibi  
efformat.

## SECUNDA CONCLUSIO.

**M**etaphysica est facultas ab aliis distincta.

Probatur Facultates per objecta distinguuntur  
Sed Metaphysica & aliæ distincta objecta respiciunt; hæ  
enim particularia objecta quædam habent, Logica ens  
rationis tantum, Physica ens mobile; Moralis ens mora-  
le; Mathematicæ, quantitatem; nec ad communes o-  
mni enti rationes excurrunt; Metaphysica verò ens ip-  
sum & rationes omni enti communes contemplatur: Er-  
go est ab aliis distincta.

Confirmatur. In moralibus præter particulares virtu-  
tes, datur superior alias dirigens, nempe Prudentia; in  
Sensibus, præter particulares sensus, datur sensus com-  
munis: In Artibus, præter inferiores, datur superior,  
quæ altiores faciendorum rationes respicit, cæterisque  
imperat: Ergo & in speculativis dari debet superior scien-  
tia, quæ rationes & veritates altissimas contempletur,  
ac inferiores confirmet & illustret: Et hæc est Metaphy-  
sica, quæ se habet ad alias facultates speculativas, ut  
prudencia ad virtutes; sensus communis ad particulares;  
atque superior & architectonica ad inferiores.

Obj.

## Quæst. Proœmialis. Art. Unic. 233

**Obj.** Metaphysica est concreta aliis scientiis : Ergo non ab his distincta . Probatur antecedens . Nam cum duo Metaphysicam spectent , ens ut sic , ejusque divisæ in decem suprema genera & cognitio Dei quantum ex sensibilibus cognosci potest , consideratio entis ut sic , ejusque in decem suprema genera , divisio pertinet ad Logicam ; ad Physicam verò Dei cognitio ex sensibilibus par-  
ta : unde etiam de primo Motore , ejusque infinitudine , & æternitate .

**Resp.** Nego antecedens . Ad probationis primam partem , distinguo : consideratio entis ut sic ejusque in decem genera divisio spectat ad Logicam , quoad ordinem & dispositionem , concedo ; quoad quidditatem , nego . Logici quidem est res omnes , quo commodius ab apprehensione percipi queat , in certas classes disponere ; atque hoc modo agit de omni Ente , illudque in decem suprema genera , rursusque hæc genera in suas species . At non item ejus est entis naturam ac proprietates , uti nec Prædicamentorum , discutere ; quippe id vim ejus principiorum excedit : unde si fiat à Logico , non tamen ex ipsis Logicæ munera : nam altiore scientiam spectat , nempe Metaphysicam .

Secundam partem itidem distinguo : Cognitio Dei ex sensibilibus spectat ad Physicam , ut est principium motus , & ex sensibilibus sub ratione mobilium spectatis innotescit , concedo ; ut est primum essendi principium , & ex sensibilibus spectatis sub ratione entis participati ac dependentis innotescit , nego . Physica enim ed quidem non ducit , ut sciamus esse aliquem primum motus corporis principium incorporeum , qui re ipsa Deus est . At ibi sistit , nec ejus naturam , attributaque discutit , cum pleraque sint , quæ nullam dicunt ordinem ad motum sensibilem . Metaphysica verò ex intimis & altissimis entis principis Dei , ejusque attributorum noticiam longè diversam ac pleniorē eruit .



## TERTIA CONCLUSIO.

**O**bjectum materiale Metaphysicæ est ens reale, ut comprehendit creatum & increatum, substantiam & accidens. Formale verò est communis ratio entis abstracti ab omni materia. Conclusio supponit, quæ de objecto dicta sunt in *Quæstione præliminari Logicæ*.

Probatúr prima pars. Materia scientiæ sunt res de quibus agit: Sed de his omnibus pertractat Metaphysica: Ergo sunt ejus materiale objectum.

Dices. Etiam agit de Ente rationis.

Resp. Distinguo: primariò ut de propria materia, nego, secundariò ut de umbra materiæ suæ, concedo. Per se enim agit de vero Ente, at veluti per accidens de Ente illo fictitio & adumbrato, seu de non ente ad modum entis apprehenso. Unde ad propriam ejus materiam non spectat, ut nec falsa numina ad materiam Theologiæ, licet de his possit agere.

Probatúr secunda pars. Formale objectum scientiæ est ea ratio, quam in sua materia scientia per se considerat: Sed in ente creato & increato, substantia, accidente, Metaphysica propriè considerat rationes abstractas ab omni materia, alias verò materiæ concretas permittit inferioribus scientiis: Ergo ratio entis abstracti à materia est ejus formale objectum.

Obj. 1. Scientia debet agere de omni specie contenta sub objecto, aliàs illud non plenè explicaret; ut Physica agit de omni ente mobili, ejusque speciebus: Sed Metaphysica non agit de omni specie entis contenti sub ente ut sic, aliàs nulla præter eam esset scientia: Ergo non est ejus objectum.

Resp. Distinguo majorem: scientia debet agere de omni specie contenta sub ejus objecto, quatenus subest rationi formali, quam in objecto considerat, concedo; quatenus extra eam excurrit, nego. Nulla enim scientia fertur extra rationem suam formalem. Porro ratio formalis, quam sibi peculiariter in rebus assumit Metaphysica, est ratio entis abstracti à materia: unde hanc in omni re considerat, sed non alias, quæ in inferioribus scientiis propriæ sunt; proindeque omnia quidem confide-

## Quæst. Procœmialis, Art. Unic. 235

derat, sed non sub omni ratione: sicut sensus communis omnia sensibilia attingit, at non sub omni ratione, sed solum sub ratione sensibilis ut sic. Unde dantur aliæ scientiæ particulares præter Metaphysicam, sicut & alii sensus præter communem.

Obj. 2. Metaphysica agit de quantitate, quæ est quid materiale: Ergo non abstrahit à materia.

Resp. Distinguo: agit de quantitate, ut est affectio corporis & materiæ, nego; ut modus accidentis ut sic, concedo. Agit enim de ipsa ratione accidentis, quam in suos modos dividit, eosque explicat per generalia essendi principia; non verò per principia propria entis materialis & sensibilis, quod spectat ad Physicam. At quando ramen Metaphysicus excurrens extra propria, fertur ad aliena; & sic usurpat objecta aliarum scientiarum, at non ex munere Metaphysicæ.

Ex his constat 1. Metaphysicam esse speculativam, quia tota in contemplatione rerum abstractissimarum vegetatur, & ne quidem de operatione cogitat. 2. Esse sapientiam, quia respicit causas & rationes altissimas. Solum ambigi posset, utrum sit propriè, ac genericè scientia, id est, cognitio certa & evidens per demonstrationem acquisita.

## QUARTA CONCLUSIO.

**M**etaphysica est propriè scientia, seu cognitio demonstrativa.

Probatur. Etenim procedit immediatè per prima, & universalissima principia, ac ex his evidenter plerasque deducit conclusiones circa proprietates entis, ac res divinas.

Obj. Scientia est cognitio circa & evidens: Sed res divinas clarè non cognoscimus: Mens enim hominis ad eas se habet, ut oculus Notuæ ad Solem, ex Aristotele: Ergo Metaphysica, saltem quatenus Deum spectat, non est scientia.

Resp. Distinguo minorem: Divina clarè non cognoscimus, quoad quid est, concedo; quoad an est, nego. Clare enim demonstratur, & Deum esse, & æternum, immutabilemque esse; at quid sit Deus, quid æternitas, quid immutabilitas, obscurè admodum cognoscimus: & hoc sensu loquitur Aristoteles.

Instabis. Scientia est cognitio rerum per causas: Sed Dei, ac divinarum rerum non sunt causæ: Ergo nec scientia.

Resp. Distinguo: non sunt causæ essendi, concedo; cognitionis, nego. Nam ex quorundam principiorum præcognitorum cognitione ducimur in cognitionem circa Divina. Quamquam etiam & essendi causæ sunt virtuales divinarum, quatenus nunc attributum est causa virtualis alterius, ut immutabilitas æternitatis.

## DIVISIO METAPHYSICÆ.

**C**UM Metaphysica versetur circa Ens à materia abstractum, ac ex universalibus essendi rationibus entium immaterialium cognitionem deriveret aptè dividi potest in duas partes, quarum prior Ens in communi, ac rationes ejus universales explicet, possitque adeo dici *Metaphysica universalis*, seu, *Ontologia*, id est Scientia entis; Altera de rebus à materia re ipsa separata disputet; nempe de Deo, Angelis, & Anima separata; dicique possit *Metaphysica particularis*, ac propriè *Theologia naturalis*. Utramque partem duabus complectemur Disputationibus, quarum prior erit De Ente ut sic; Posterior verò de Rebus à materia separatis, seu De Deo, Angelis, & Anima separata. Addeamus appendixem de Ente Rationali.

# DISPUTATIO PRIMA

## *De Ente in communi.*

**Q**UÆ de Ente in universum dicenda occurrunt, ea commodè reducuntur ad tria capita, quæ totidem complectemur Quæstionibus. Prima erit, de Principiis Entis. De ipso Ente: Tertia, De Proprietatibus Entis. Hic agi posset de Causis Entis; item De ejus Divisione in decem Prædicamenta, deque iis singulatim: at primum confecimus in Physica; alterum vero in Logica.

## QUÆSTIO PRIMA

### *De Principiis Entis.*

**P**RINCIPIMUM definit S. Thomas 1. p. q. 33. a. 1. *A quo aliquid procedit.* Aristoteles verb 5. Metaph. cap. 1. *Primum, unde aliquid est, aut fit, aut cognoscitur.*

Hinc tria distinguuntur solent principiorum genera, nempe *Compositionis*, *Generationis*, & *Cognitionis*. Principia compositionis sunt, ex quibus res constituitur; Generationis verb, quæ ad ejus productionem concurrunt; Cognitionis demum, quæ ad ejus notitiam ducunt. De principiis generationis dictum est in Physica. Supereſt hinc agendum de principiis cognitionis & compositionis Entis. Quod quatuor conficiemus articulis. In 1. agemus De principiis cognitionis. In 2. De Principiis Entis in genere. In 3. & 4. De iis in particulari.

## ARTICULUS PRIMUS.

*De Principiis Cognitionis.*

**P**rinzipium cognitionis est, cujus cognitio in alterius cognitionem ducit. Duplex est, incomplexum & Complexum. Principium incomplexum est aliquid simplici apprehensione cognitum, ex quo ducimur in aliorum cognitionem: sic signa ducunt in cognitionem significanti; termini tunc percepti in cognitionem propositionis, quæ his constat, ac idem *per se nota* dicitur, quod ex suis terminis clarè perceptis innotescat. De his dictum in Minore Logica. Principium complexum est propositio, ex qua altera innotescit; eaque propriè principium dicitur, cum adeo clara & evidens est, ut probatione non egeat; sin minus, principii rationem propriè non habet. Hæ propositiones dicuntur, *Effata, Axiomata, Dignitates, Prima Principia*, ac in practicis *Maxima*.

Verum, cum omnis multitudo ad unitatem reducatnr, quamquam plura sint hæc principia, unum tamen in his esse oportet simpliciter primum, in quod alia resolvantur, eoque nitantur; illud verò nullo altero. Hic quaeritur, quodnam istud sit.

## CONCLUSIO.

**P**rinzipium cognitionis principium complexum istud est: *Impossibile est, idem simul esse & non esse*. Ita Aristoteles 4. Metaph. cap. 4. S. Thomas 1. 2. quæst. 94. artic. 2.

Probatnr. Primum Principium est, quod ita certum & notum est, ut à nullo aut non intelligi, aut negari possit; ita primum, ut nullum prius supponat; ita firmum, ut in eo cetera nitantur, ut rectè ait Aristoteles 4. Metaph. c. 3. Sed huic omnes hæc dotes insunt. Nam 1. ita notum & certum est, ut à quovis statim intelligatur, cum constet terminis omnium communissimis; nec ab ullo negari possit,

## De Principiis Cognitionis. A.I. 239

sit, cum funderetur in distinctione entis à non ente, quam inficari nemo potest. 2. Ita primum est, ut nullum supponat, à quo probari queat, cum eo nitatur ars syllogistica, & cuiusvis alterius propositionis veritas: unde eo perempto, omnis probationis firmitas cecidit. 3. Denique ita firmum est, ut eo cetera nitantur, ut v. g. *Totum est majus parte*, quia alioquin esset & non esset totum; *Homo est rationalis*, quia alioquin esset & non esset homo: unde ultima probatio est per reductionem ad hoc impossibile: Ergo est primum principium.

Obj. Heraclitus hoc principium negavit, ex Aristotele 4. Metaph. cap. 3. Ergo non est adeo notum.

Resp. Vel ore tenus negasse, non niente; vel, ut exlimo verosimilius, non negasse simpliciter, sed in sua hypothese respectu rerum materialium: nempe censebat Heraclitus, eas continuo fluxu ab *esse* ad *non esse* rapi, adeo ut, vel eo momento, quo affirmantur esse, jam non sint; sed ad *non esse* transierunt, antequam ipsa figatur cogitatio, atque ita in eadem duratione, quantumvis brevi, qua putantur esse, sint, & non sint, sed non simpliciter simul.

Instabis. Propositio simplex, & absoluta est prior modali. Sed hæc propositio, *Impossibile est, idem esse & non esse*, est modalis: Ergo supponit aliquam priorem modalem veram, puta istam, *Ens est id, quod est*, & sic non est primum simpliciter principium.

Respond. Distinguo majorem: propositio absoluta est prior modali, in ratione propositionis, concedo; in ratione principii, nego. Nam vel hæc absoluta, *Ens est id, quod est*, ista modali nititur: Si enim possibile esset, *idem esse & non esse*, non certò constaret, ens esse id, quod est, cum posset esse etiam id, quod non est.

Urgebis. Affirmativa non probatur per negantem: Sed hæc propositio, *Impossibile est, idem esse & non esse*, est negans: Ergo eà non omnes aliæ probantur.

Respond. Distinguo: affirmativa non probatur per negantem, directè, concedo; indirectè, seu per reductionem ad impossibile, nego. Nam & syllogismi bonitas, & propositio quævis alia per se nota, si negentur, probantur ultimò per productionem ad hoc impossibile, *esse simul & non esse*.

Ex his refelli possunt, qui ut hoc tollant, alia afferunt prima principia, ut, *Nihil simul est & non est*. Aut, *Quid-*  
*quid*

## 240 IV. Part. Philos. Disp. I. Qu. I.

*quid est, quandiu est, necesse est esse. Aut, Necesse est, quodlibet esse, vel non esse. Aut, Quodlibet est, vel non est. Aut, Impossibile est, simul inclinare & negare, &c.* Nam hæc cum illo coincidunt; aut eatenus constant, quatenus illud involvunt.

At non ferendus hic Cartesius, cum jubet omni alio transper seposito principio, ut dubio Mentem ab eo rerum cognitionem auspicari: *Ego cogito*, ex quo statim inferat: *Ergo ego sum*. Nam, ut cætera non urgeam, si cum aliis omnibus nostrum etiam principium mens, ut dubium seponat, dubium quoque erit, an, quod cogitat, sit, vel non sit. Posset enim cogitare, & tamen non esse, si possibile foret, *idem esse & non esse*. Itaque vel illud ipsum Cartesii principium, seu potius Enthymema nostrum nititur principio.

## ARTICULUS SECUNDUS.

*De Principiis Entium constitutivis.*

**P**Rincipia metaphysica entis constitutiva sunt, ex quibus ens, ut ens constituitur. Unde à principiis physicis eo distinguuntur, quod hæc solum sit constitutiva cujusdam particularis entis, nempe substantiæ corporeæ, seu Entis mobilis, ista verò entis cujuscvis, saltem compositi.

Duo præcipuè sunt, actus, & potentia. Nam ens ut ens fit ex potentia & actu essendi. Et si quæ alia sint, ad hæc, ut communiora reducuntur: ut genus & differentia esse & essentia, natura & subsistentia. Genus enim ad differentiam, essentia ad esse, natura ad subsistentiam comparantur, ut potentia ad actum; ac ipsa rursus ex actu, & potentia constitui possunt. Unde actus & potentia per se primò nata sunt ens constituere, neque aliquid datur, quod non sit aut actus, aut potentia, aut ex utroque constitutum. Hæc itaque duo principia hic præcipuè sunt explicanda.

*Quid & Quotuplex sit Actus.*

**A**ctus est perfectio quædam, ut definit S. Thomas 1. part. quæst. 5. art. 3. Unde *esse actum* est esse perfectionem; *esse in actu* est suam habere perfectionem.

Actus dividitur in *actum purum*, & *actum impurum*. Actus purus est, qui non est admixtus potentia. Duobus autem modis actus potest admisceri potentia. 1. Quia est actus alicujus potentia, ut anima est actus corporis. 2. Quia ipse est in potentia ad ulteriorem actum, ut Angelus est in potentia ad suum *esse*; non enim est suum *esse*. Itaque actus simpliciter purus est, qui nec est alicujus potentia, nec ipse est in potentia ad ulteriorem actum. Actus imparus dicitur, qui est admixtus potentia; seu qui vel est actus alicujus potentia, vel ipse est in potentia ad ulteriorem actum.

Actus impurus dividitur in *actum formalem*, & *actum essendi*; seu in actum essentia, & actum existentia. Actus formalis est, quo essentia determinatur ad certam speciem rei; unde idem est, ac forma, de qua in physica. Actus essendi est ipsum *esse*, seu existentia.

Dividi etiam solet in *actum primum*, & *actum secundum*. Actus primus est, qui alium non supponit, sed expectat: ut forma substantialis est actus primus; priorem enim non supponit, cum ipsa det primum *esse*. Actus secundus dicitur, qui priorem alium supponit, eique accedit: sic operatio est actus secundus; supponit enim formam. Existentia quoque in creaturis comparatur ad formam, ut actus secundus: *esse enim est actualitas omnis forme*, inquit S. Thomas 1. part. quæst. 3. art. 4.

Actus primus dividitur in *actum subsistentem* & *non subsistentem*. Actus subsistens est, qui solus existere potest, ut Angelus & Anima rationalis. Non subsistens verb, qui solus esse nequit, sed solum cum sua potentia, ut forma lapidis, bruti, &c.

Actus subsistens dividi rursus potest in *actum completè subsistentem*, qui ita est in se ipso, ut in potentia recipi nequeat, ut Angelus; & *actum incompletè subsistentem*, qui ita est in se ipso, ut in potentia recipi possit, ut Anima.



*pletè subsistentem*, qui ita solus esse potest, ut tamen ordinetur ad potentiam, in qua esse etiam possit & exigar, ut anima rationalis.

Actus non subsistens potest itidem subdivi in *substantialem* & *accidentalem*. Substantialis est, qui dat esse simpliciter suæ potentie; ut forma quævis substantialis; Accidentaliter verò est, qui supponit esse in sua potentia; ut albedo est actus accidentalis parietis, advenit enim ei jam existenti.

*Quid & Quotuplex sit Potentia.*

**P**otentia ducitur ad actum, est enim principium actus. Porro duobus modis potest aliquid esse principium actus: activè, quia ab eo est actus; & passivè, quia in eo fit actus. Unde duplex est potentia, activa, & passiva. Potentia activa est principium agendi, seu à qua est actus. Potentia passiva est principium patiendi, seu aptitudo ad actum habendum. Potentia activa, cum ipsa sit actus, propriè, ac metaphysicè non est potentia. Unde eà prætermittam.

Potentia passiva est, ut dixi, aptitudo ad actum habendum. Unde *esse potentiam* est esse ipsam aptitudinem ad actum; *esse in potentia* est esse aptum ad actum absentem.

Potentia passiva dividitur in *objectivam* & *subjectivam*. Potentia objectiva est mera possibilitas actus, in quo cujusvis rei; seu non repugnantia, ut res sit. Hæc enim possibilitas, seu non repugnantia, importat aliquam aptitudinem, quæ dicitur potentia; minus tamen propriè, cum nihil ponat, nec tantum ducatur ad actum, sed ad quamvis rem possibilem, etiam ad ipsam realem potentiam: unde melius dicitur *possibilitas*. Vocatur *objectiva*, quod sit objectum activæ potentie; hæc enim pro objecto habet, quod sibi possibile est. Potentia subjectiva definitur ab Aristotele. *Principium transformationis ad alios*; seu subjectum, in quo actus recipitur.

Potentia subjectiva dividitur in *puram* & *non puram*. Pura est, quæ nullum actum habet, ut materia prima. Non pura est, quæ jam aliquem actum  
im-

## *De Principiis Entis. Ar. II. 243*

importat, sed ad ulteriorem ordinatum, qualis est potentia subiecti ad accidentia. Plures aliæ divisiones potentiae afferri possent, ut in remotam & proximam; in physicam, quæ est physice transmutationis subiectum; metaphysicam, quæ actum respicit à sensibili mutatione abstractum; imò Logicam, quæ est ad actum solâ ratione distinctum, ut generis ad differentiam, &c.

Sed celebrior est, ac ferè Theologis propria, divisio potentiae in Naturalem & Obedientialem. Naturalis est potentia ad actum naturæ viribus proportionatum, qualis est aquæ ad calorem. Obedientialis verò est potentia ad actum naturæ iura prorsus superantem, & à Deo supra naturæ leges operante inductum.

Circa actum vix ulla hic moveri solet quæstio: ac pleræque circa potentiam, nempe objectivam & obedientialem, de quibus propriis articulis agemus. At prius hic quædam Axiomata in notione actus, & potentiae fundata notanda sunt.

1. Axioma. *In tantum aliquid est perfectum, in quantum est in actu; imperfectum verò, in quantum est in potentia.* Constat ex terminis, quia actus est perfectio. Et ideo quod est in actu, est perfectum; quod est in potentia, est imperfectum.

2. *Actus omnino purus, est omnino perfectus.* Sequitur ex primo: nam est omnimodè actus, & nullimodè in potentia. Itaque est omnino perfectus, & nullimodè imperfectus.

3. *Actus in aliquo ordine purus, in eo ordine perfectus omnino est.* Sequitur ex tertio: nam in eo ordine est omnino actus, & nullimodè in potentia.

Ex his deducitur illud apud S. Thomam frequens, *Omnem formam completè subsistentem esse in sua specie perfectissimam, ac proinde unicam.* Forma enim est actus speciei; Materia verò potentia. Unde forma irreceptibilis in materia est actus purus in sua specie, ac proinde totam actualitatem speciei in se continet, adeoque perfectissima est, & unica.

4. *In tantum aliquid agit, in quantum est in actu; patitur verò, in quantum est in potentia.* Actio enim est

244 *IV. Par. Philosoph Disp. I. Q. I.*

est actus diffusio; passio vero est actus receptio, quæ est propria potentia.

5. *Potentia nequit se ipsam reducere ad actum, sed reduci debet ab alio existente in actu.* Reducere enim ad actum est agere & perficere, quod potentia repugnat.

6. *Omne ens mutabile constat actu & potentia.* Mutatur enim, vel quia incipit actu esse, quod erat in potentia; vel quia desinit actu esse, quod erat. Itaque mutatio fit, quatenus actus potentia vel additur, vel subtrahitur; sicque vel supponit, vel efficit, compositionem.

ARTICULUS TERTIUS.

*De Potentia Objectiva.*

**P**otentia Objectiva est possibilitas rei, quæ ab aliqua causa produci potest. Unde duo importat, 1. Non repugnantiam ex parte rei; 2. Potentiam activam ex parte causæ hujus rei effectricis. Quæritur, à quo duorum per se primò repetenda sit entis possibilitas, an ex ejus non repugnantia; an ex Dei omnipotentia, quæ est propria, & per se causa entis?

C O N C L U S I O.

**E**N S dicitur absolutè, ac primariò possibile ex non repugnantia ad essendum; secundariò vero, & respectivè ab omnipotentia divina. Ita S. Thomas 1. part. quæst. 25. ar. 3.

Probatur prima pars. Oppositorum opposita est ratio: Atqui impossibile absolutè, ac primariò non dicitur, quod à Deo fieri non possit, sed potius à Deo fieri non posse dicitur, dicitur, quia repugnat ei, ut sit: Ergo possibile primariè, absolutè, & intrinsecè dicitur, quia ei non repugnat, ut sit; seu quia in suo conceptu non importat contradictionem, scilicet esse & non esse. Unde possibile definitur, cui non repugnet esse; seu, ut definit Aristoteles, quo posito nullum sequitur impossibile.

Nec

## De Potentia Objectiva. Ar. III. 245

Nec verò eùm philosophi disputant, sitne aliquid possibile, nec ne, aliud attendunt, quàm an illud esse repugnet.

Confirmatur ratione S. Thomæ. Si aliquid præcisè possibile diceretur, quia à Deo fieri potest, explicari non posset, quomodo Deus sit omnipotens. Sic enim diceretur omnipotens, quia potest omnia, quæ potest. Unde præterquam nugatoria esset circulatio, hoc sensu perinde foret omnipotens, quamvis pauciora posset, quàm nunc possit, quod planè absurdum est: Ergo non ex ipsa omnipotentia Dei res per se primò possibiles dicuntur, sed potius ipse omnipotens dicitur, quia potest omnia absolute possibilia; absolute verò possibilia dicuntur, quæ in suo conceptu nihil enti oppositum involvunt. Porro inquit S. Thomas, nihil opponitur rationi entis, nisi non ens. Unde absolute impossibilia sunt, quæ important esse & non esse simul. Quæ verò non important esse & non esse simul, absolute possibilia sunt. Atque hac ratione omnipotentiam Dei explicuit Angelus Mariæ Virgini, *Quia*, inquit, *impossibile non erit apud Deum omne verbum*, id est, quidquid mente concipi, ac rationem entis habere potest. *Id enim*, inquit S. Thomas 1. part. quæst. 25. art. 1. *quod contradictionem implicat, verbum esse non potest, quia nullus intellectus potest illud concipere.*

Secunda pars constat. Possibile enim duobus modis dicitur ex Aristotele 5. Metaph. Absolute, quod ei non repugnet esse; & respectivè, quod à causa fieri possit: Sed Deus est causa totius entis: Ergo ab eo possibilitas respectiva entis desumitur.

Objic. Possibilitas ab eo dicitur, quo sublata tollitur: Sed sublata omnipotentia Dei res possibiles non forent: Ergo ab ea propriè dicuntur possibiles.

Respond. Distinguo minorem: non forent possibiles absolute, nego; respectivè, concedo, *Dicitur enim aliquid absolute possibile, non secundum aliquam potentiam aut secundum aliquas causas, sed ex sola habitudine terminorum, qui sibi non repugnant*, inquit S. Thomas 1. part. quæst. 25. art. 3. ad 4. & quæst. 40. art. 1. ad 1.

Instabis. Quod fieri nequit, non est possibile; Sed eo casu res fieri non possent: Ergo non essent possibiles.

L 3

Resp.

Resp. Distinguo minorem, res fieri non possent, quantum est ex se, nego; defectu causæ, concedo. In ea enim hypothesi impossibili Deus diceretur non esse omnipotens, quia non posset omnia, id est, omne absolutè possibile. Itaque adhuc esset ex se possibile.

Urgebis. Ens ab alio non est ex se possibile, sed ab alio: Atqui cætera, præter Deum, sunt entia ab alio: Atqui cætera, præter Deum, sunt entia ab alio; Ergo non sunt ex se possibilia.

Respond. Distinguo maiorem: non est ex se possibile, ut sit à se, concedo; ut sit absolutè, nego. Nam de ratione entis est saltem esse posse; Ens enim dicitur ab *esse*. Unde omne ens ex ipsa sua essentia, quovis alio respectu præciso, habet, ut et non repugnet esse; seu, ut quantum est ex se, possit esse.

Insistes. Omnis perfectio est à Deo: Sed possibilitas rerum est aliqua perfectio: Ergo est à Deo.

Resp. Distinguo maiorem: omnis perfectio est à Deo, ut à causa eam efficiente dum existit, concedo; ut à causa eam efficiente dum existit, concedo; ut à forma eam possibilem absolutè denominante, antequam actu existat, nego. Et ad minorem: possibilitas est perfectio, actu existens in re, nego; possibilis, concedo. Et nego consequentiam sub distinctione data. Deus enim est quidem causa efficiens, ut possibilis perfectio fiat actu: at ejus possibilitatis non est causa efficiens, cum hæc possibilitas nihil actu effectum in re dicat. Neque eidem causa formalis eam absolutè possibilem denominans, cum hoc habeat ex suis essentialibus principiis.

Dices. Positiva denominatio peti debet ab aliqua forma positiva: Atqui *esse possibile* non est mera negativa denominatio, sed positiva; esse enim possibile opponitur impossibili; Impossibile verò est aliquid negativum, cui non opponitur nisi positivum: Ergo esse possibile peti debet ab aliqua forma positiva: Sed essentia creaturæ, antequam sit, nihil dicit positivum: Ergo ab ea res non denominatur possibilis. Melius itaque possibilis dicitur ab ipsa Dei potentia, à qua producti potest.

Respond. admitte posse, quod possibile sit denomi-

## *De Potent. Obedientiali.* Ar. IV. 247

mutatio positiva, quamquam etiam privativa quandoque sit, ut cum dicitur, *id, quod existit, posse non esse*; attamen *posse esse* videtur esse terminus positivus. Unde hoc dato, distinguo majorem: positiva denominatio peti debet à forma positiva, actu posita semper, nego; positiva saltem possibilis, concedo. Porro essentia rei & *esse* rei, antequam sit, sunt quid positivum possibile, ut constat. Itaque fundare possunt positivam denominationem *possibili*.

Repones tandem. Vel ideo res sunt possibiles, quia possunt produci à Deo, vel ideo Deus potest producere rei; quia sunt possibiles: Posterius dici nequit, aliàs potentia Dei dependeret à possibilitate rerum: Ergo prius dici debet.

Respond. neutrum propriè dici. Sed exactius dicendum cum S. Thoma 1. part. quæst. 25. ar. 3. Deum esse omnipotentem, quia potest producere omnes res absolute possibiles: posse verò producere omnes res absolute possibiles, quia est ipsum *esse* subsistens, infinitum, præhabens in se totius *esse* perfectionem; res denum esse absolute possibiles, quia ex se non repugnant: Qui explicandi modus nullam Dei à creaturis, sed summam creaturarum à Deo dependentiam importat.

## ARTICULUS QUARTUS.

### *De Potentia Obedientiali.*

**P**otentia Obedientialis in genere definiri potest. Potentia creaturæ ad actum naturæ vires excedentem à Deo habendum. Verum cum duobus modis potentia dicatur ad actum, activè, & passivè, quæri potest 1. An detur in creaturis potentia obedientialis passiva, qua aliquid supra naturæ vires positum à Deo possint recipere. 2. An detur in illis etiam potentia obedientialis activa, qua earum virtus activa possit elevari à Deo ad aliquid supra consuevas vires positum. Utrumque sequentibus conclusionibus explicabimus.

## C O N C L U S I O.

**I** N est creaturis potentia obedientialis passiva ad actum naturæ vires excedentem à Deo habendum. Conclusio constat ex fide, quæ docet, Deum in creaturis quædam agere, quæ naturæ vires superant, ut est suscitatio mortuorum, infusio habituum supernaturalium, &c.

Probatur ratione S. Thomæ quæst. 6. de Potentia, artic. 1. ad 18. *Quanto aliqua virtus activa est altior, tanto subiectum sibi potentiam potest perducere ad altiores effectus: Ut natura potest ex terra facere aurum, aliis elementis commixtis, quod ars facere non potest. Et inde est, quod res aliqua est in potentia ad diversa, secundum habitudinem ad diversos agentes: Atqui virtus divina est altior omni virtute naturalis Ergo creatura ei subiecta respectu ejus est in potentia ad aliquos actus ab ea recipiendos, qui naturæ vires superant. Et ista, inquit S. Thomas, vocatur potentia obedientia, secundum quod qualibet creatura Creatori obedit. Unde inquit 3. part. quæst. 11. ad 1. In qualibet creatura consideratur duplex potentia passiva. Una quidem per comparationem ad agens naturale. Alia vero per comparationem ad agens primum, quod potest quamlibet creaturam reducere in actum aliquem altiore actu, in quem reducitur per agens naturale, & hoc consuevit vocari potentia obedientia in creatura.*

Objic. In rebus naturalibus nihil est supernaturale. Sed potentia illa esset supernaturalis: Ergo non datur.

Resp. Distinguo majorem: In rebus naturalibus nihil est supernaturale, actu naturaliter existens tale, concedo; in potentia, nego. Nam natura est in potentia ad ordinem supernaturalem.

Insiabis. Potentia debet esse ejusdem generis cum actu: Sed nulla res naturalis est ejusdem generis cum actu supernaturali: Ergo non est potentia ad illum.

Aesp. Distinguo majorem; potentia debet esse ejusdem generis cum actu proprio ad quem, ut ad sibi de.

## De Potent. Obedientiali. Ar. IV. 249

debitam perfectionem tendit, concedo; cum aliis, ad quos non tendit, sed quibus solum non repugnat, nego. Porro potentia obedientialis non dicitur essentialem ordinem ad illos actus naturæ vim excedentes, sed solum meram non repugnantiam, ut eos à Deo recipiat.

Colligitur, potentiam obedientialem, non esse realiter distinctam à naturali, sed esse ipsam entitatem potentie naturalis, ut comparatam ad Deum, quatenus non repugnat ipsi aliquid supra naturæ ordinem ab eo recipere.

### SECUNDA CONCLUSIO.

**N**ON inest creaturis potentia obedientialis activa ad effectus naturæ vim excedentes operandos absque additione virtutis intrinsecæ.

Conclusio est contra plerosque Recentiores, qui duas potentias obedientiales in creaturis statuunt. Unam passivam ad recipiendum quidquid illis dare voluerit Deus. Aliam activam ad agendum quidquid per eas agere voluerit; ita ut suppositâ solâ voluntate Dei, aut ejus cooperatione extrinsecâ, absque ulla additione virtutis, à qua v.g. possit activè producere ignem, imò gratiam, imò instrumentaliter creare omnes angelos. Nihil sanè absurdius fingi potuit. Ut enim optimè statuit S. Thomas 1. v. qu. 109. art. 2. *Unaquaque forma indita rebus creatis, à Deo habet efficaciam respectu altiusculi actus determinati, in quem potest secundum suam proprietatem; ultra autem non potest, nisi per aliquam formam superadditam; sicut aqua non potest calefcere, nisi calefacta ab igne.*

Probatur. Duobus modis explicari potest hæc potentia obedientialis activa: 1. Ita ut sit idem entitativè, ac ipsa potentia activa naturalis creaturæ. 2. Ita ut sit aliqua vis addita virtuti naturali, quæ insit omni creaturæ, veluti quædam participatio divinæ omnipotentie. Secundus modus palam temerarius est, primus repugnat; Ergo non datur hæc potentia activa obedientialis. Major complectitur adæquatam divisionem modorum explicandi hanc potentiam obedientialem activam, cum datur per membra



## 250. IV. Par. Philosoph. Disp. I. Q. I.

opposita, nempe esse idem cum potentia naturali, & non esse idem. Minoris prima pars constat. Nulla enim ratione, aut authoritate habetur, Deum creaturis hanc vim naturæ jura excedentem. Insuper. Deinde ista vis foret supernaturalis, cum daretur ad effectus supernaturales; & infinita, quia ad infinitos se extenderet. Quis vero ita desipiat, ut censeat omni creaturæ inesse vim supernaturalem, & infinitam?

Secunda pars minoris suaderetur, nempe hanc potentiam activam obedientialem non posse esse ipsam virtutem naturalem creaturæ, quatenus per eam Deus quovis effectus operari potest. Repugnat, aliquid esse potentiam activam respectu effectus, ad quem est in potentia purè passiva: Sed tota natura est in potentia purè passiva obedientiali respectu supernaturalium: Ergo repugnat, ut aliquid naturale sit potentia activa effectuum supernaturalium. Major constat ex illo Axio-mate: In tantum aliquid agit, in quantum est in actu, patitur vero, secundum quod est in potentia: Ergo quod est in pura potentia passiva respectu effectus, non est in potentia activa respectu ejusdem. Minor vero evidens est ex terminis. Supernaturalis enim dicitur, quod est supra naturam, id est, non continetur actu in naturalibus rei, sed ad summum in potentia passiva, iund obedientiali. Sed hæc opotiosus Theo-logi.

Obj. Potentia activa creaturæ tam subditur Deo, quam ejus potentia passiva: Sed ratione hujus sub-jectionis potentia passiva potest recipere actus supra natu-ram positos: Ergo & activa agere effectus supra naturam positos.

Respondi. Nego. paritatem. Nam ut potentia passiva actum recipiat, non est necesse, ut sit in actu, sed po-rius eo esse privata deber. At vero, ut agat effectum, debet esse in actu respectu ipsius. Poterit natura caree omni actu supernaturali. Unde non repugnat, ut ali-quem actum supernaturalem à Deo recipiat. At ut suis viribus producat actum supernaturalem, id omnino re-pugnat.

Instabis. Virtus principalis debet quidem præcon-tinere effectum, at non itidem virtus instrumenta-lis: Ergo exinde non repugnat, creaturas habere vir-tutem, saltem instrumentalem, qua Deus per eas age

## De Potent. Obedientiali. Ar. IV. 251

agere possit quovis effectus, etiam supernaturales.

Respond. Distinguo: virtus instrumentalis non debet præcontinere effectum, ratione suæ formæ, concedo; ratione motionis à causa principali participatæ, nego. Solutio est S. Thomæ 3. part. quæst. 62. ar. 3. Et pariter distingo consequens: non repugnat, Creaturam habere virtutem instrumentalem ad quovis effectus, sibi innatam, negò; à Deo acceptam, qua elevetur, cum Deus per eam agit, concedo. Itaque fateor, Deum uti posse creaturâ; ut instrumento ad effectus naturam excedentes, non quodd innata sit creaturis aliqua vis ad illos effectus, ut volunt Adversarii; sed quatenus Deus virtutem aliquam ad hos effectus instrumentaliter attingendos illis impertitur. Instrumenta enim non attingunt effectum causæ principalis, nisi per virtutem ab ea derivatam, ut ostendi in Physica, cum de instrumentis.

### TERTIA CONCLUSIO.

**A**gentia creata sunt in potentia passiva obedientiali; ut eleventur à Deo per virtutem illis additam, ad effectus naturæ vires excedentes.

Conclusio constat. 1. Ex fide, quæ docet, potentias creaturæ rationalis esse de facto elevatas per habitus supernaturales, fidem, spem, charitatem, lumen gloriæ, ad effectus supernaturales. 2. Constat ex prima conclusione. Potentia enim passiva obedientialis respicit Deum non solum ut est principium essendi, sed etiam ut est principium agendi: Ergo potest ab eo aliquam perfectionem tum essendi, tum agendi naturali maiorem recipere. 3. Denum ex iis, quæ in natura ipsa videmus, colligitur. Agentia enim inferiora videmus posse participare aliquam virtutem ab agentibus superioribus, qua elevantur ad effectus talium agentium attingendos; ut in homine appetitus sensitivus ex conjunctione ad rationem virtutes morales participat, quibus juxta rationem appetit. 5. cogitativa ex conjunctione cum intellectu in particularibus imperfectum aliquem discursum habet,

bet, ut notat S. Thomas: Ergo nihil verat, agentia naturalia aliquam virtutem ab agente primo sua naturali maiorem recipere, qua ultra proprios effectus eleventur.

Potest id duobus modis fieri potest. Primum, per motum transiētem, ut instrumenta eleventur à causa principali: sic aqua in baptismo elevatur ad producendam gratiam per modum instrumenti. Secundum, per habitum permanentem, quo potentia activa creaturæ intra limites objecti specificativi elevatur ad quædam objecta, quæ naturaliter attingere nequit: ut intellectus creatus per lumen gloriæ elevatur ad videndum Deum, quod naturaliter non potest.

Quæritur, an eo secundo modo quævis potentia vitalis possit elevari ad quosvis actus vitales, ut oculus ad audiendum, auris ad videndum, voluntas ad intelligendum, &c.

Resp. Non posse. Nam cum potentia vitalis specificetur à suo actu, si una potentia fieret principium actus alteri proprii, mutaretur essentia, & sic esset & non esset talis potentia, quod repugnat: ut si auris videre posset, iam non esset auris, sed oculus: unde non auris ipsa esset, quæ videret, sed oculus. Itaque repugnat, ut auris ea vi, qua est auris, quocumque sibi addito elevetur ad videndum. Sed de his fusiùs Theologi.

## QUÆSTIO SECUNDA

### *De Ente secundum se.*

**C**irca Ens in communi considerari potest Primum, quid, & quotuplex sit. Secundum, quomodo inferiora respiciat, an univocè, vel analogicè. Tertium, quomodo componatur ex essentia & existentia: Quartum demum, quid sit substantia, suppositum, & persona. Unde hanc quæstionem dividimus in quatuor articulos. Primus erit de quidditate, & variis divi-

## Quid sit Ens, &c. Art. I. 253

divisionibus entis. Secundus de invocatione, vel analogia entis respectu inferiorum. Tertius, an essentia & existentia distinguantur in ente creato. Quartus de-  
mum de subsistentia, supposito, & persona.

### ARTICULUS PRIMUS.

*Quid & quodplex sit Ens, & quomodo sit primum cognitum.*

**C**UM primum principium cujuslibet scientiæ sit definitio ejus objecti, statim in limine Metaphysicæ quaritur, quid sit ens. Hæc questio non est admodum obscura, quia nihil est notius ente in communi, quamvis subtiliores disputationes, quæ circa ipsum docti movent, sine difficillimæ. Ens dicitur ab *esse*. Quippe eo modo aliquid dicitur ens, quo se habet ad *esse*. Si solum habeas *esse* possibiliter, dicitur ens possibile, si actu, ens actuale. Hinc vox illa, *Ens*, duobus modis usurpari potest 1. Participaliter, seu ut est participium verbi substantivi *sum*; tumque importat ipsum essendi actum, seu id, quod est; ut amans significat, quod actu amat. 2. Sumi potest Nominaliter, seu in vi nominis, tumque significat rem, cujus est *esse*, abstrahendum ab ipso essendi exercitio; ut cætera nomina res ipsas, seu essentias significant ab existentia præcisas, ut homo, lapis, &c. Hæc sensu hic sumitur *ens*, ac describi potest eodem S. Thomæ, *Id, cujus actus est esse*. Ex ea definitione deduci possunt ejus divisiones. Unde

Dividitur 1. in *Ens reale*, & *ens rationis*. Duobus enim modis aliquid esse potest, uno modo in sola mentis apprehensione, ut Syllogismus & propositio, & hæc dicuntur *Entis rationis*; alio modo etiam extra mentem in ipsa rerum natura, ut homo, & lapis, & hæc dicuntur *Entis realis*.

Dividitur 2. *Ens reale* in *Invenitum* & *Creatum*, seu in Creatorem, & Creaturam. Eorum enim, quæ sunt in rerum natura, quædam sunt ab alio, ut homo & planta, & generaliter omne, quod non est à se ipso. Cum vero impossibile sit, omnia esse ab alio, necessario deveniendum est ad aliquid, quod sit per se  
&c.

254 IV. Part. Philosoph. Disp. Q. II.

& à se ipso ; ejusmodi ens vocatur *Deus*, qui cum cæteris omnibus det *esse*, à nullo ipsum recipit ; sed à se ipso habet, immod est ipsum *esse* unde dicitur *ens per essentiam*, cum creaturæ solum dicantur *entia per participationem* : sicut lux est visibilis per se ipsam, cum colores sint solum visibiles in quantum participant de luce.

3. *Ens creatum dividitur in Substantiam & Accident.* Eorum enim, quæ participant *esse*, & à Deo producta sunt, quædam habent *esse* in se ipsis, ut homo. & lapis; quædam verò habent *esse* in alio, ut virtus & pulchritudo. Quæ habent *esse* in se ipsis, vocantur *substantia*; quæ habent *esse* in alio, vocantur *accidentia*. Hæc verò accidentia dividuntur in novem prædicamenta, de quibus egimus in Logica.

4. *Ens reale dividitur in ens necessarium, & ens contingens.* Eorum enim, quæ habent *esse*, quædam ita sunt, ut non possint non *esse* : hæc dicuntur *necessaria*. Quædam verò ita habent *esse*, ut tamen possint ipsi deperdere : hæc dicuntur *contingentia*. Quia verò omnis creatura, saltem per voluntatem Dei, potest annihilari, & amittere suum *esse*, ideo omnis creatura est contingens absolute loquendo, & solus Deus est ens necessarium. Attamen cum Deus sit optimus, sua dona communicat sine pœnitentia, ut ait Apostolus, ideo etiam opera divina, quantum est ex parte Dei, sunt æterna. Unde inter creaturas etiam quædam possunt dici *necessaria*, in quantum à solo Deo dependent, qui eas indefectibiliter conservat ; ejusdem sunt angeli & anima rationalis, & deum quidquid à Deo immediate conservatur.

5. *Ens reale dividitur in spirituale & materiale.* Eorum enim, quæ sunt, quædam habent *esse* in materia, ut terra & planta ; quædam verò habent *esse* sine ullo materia commercio, ut Deus & Angeli. Anima rationalis mediæ inter utraq; ; duos enim tractus habet, alterum in materia, alterum sine materia. Hæc sunt frequentiores *Entis* divisiones, ad quas aliæ revocari possunt.

Quantum ad tituli partem alteram, ens in tantum dicitur primum cognitum, in quantum prima notio, quam intellectus format de qualibet re, est ipsa notio entis ; seu quoddam talis res sit ens. Ut enim arguit S. Thomas 1. p. quæst. 85. art. 3. intellectus noster cognoscendo procedit de potentia ad actum, ideoque debet incipere à communioribus, confusioribus, & im-

imperfectissimis, procedendo ad distinctiores & perfectiores notiones, ut dicitur 1. Phys. text. Sed notio entis est omnium confusissima & imperfectissima; cognoscere enim, quod res sit ens, & adhuc ignorare, quale sit ens, est rudis & confusissima cognitio: Ergo cognitio entis est prima, quæ sit in intellectu.

Confirmari potest ex eo, quod omnis alia cognitio supponat notionem entis; nam impossibile est intelligere, rem esse tale, vel tale ens, nisi intelligamus, eam esse ens: Ergo notio entis est omnium prima. Adde experientiam, qua sentimus, nos de omnibus rebus, quas aliquammodo cognoscimus, statim certos esse, quod sint entia; sed sæpe ignorare, qualia sint entia: ut omnes certi sunt, lucem esse ens, sed quidam dubitant; utrum sit substantia, vel accidens: Ergo cognitio entis præcedit omnes alias.

Hic tamen diligenter observandum est, nos posse habere, duplicem entis notitiam; alteram scientificam, penetrando scilicet ipsa entis principia, divisiones, proprietates, & distinctionem à formalitatibus particularium entium; alteram imperfectam & rudem, qua solum intelligimus ipsam entitatem confusè, & ut distinctam à nihilo. Dum ergo D. Thomas dicit, ens esse primum à nobis cognitum, loquitur de cognitione illa rudi & imperfecta, qua omnes etiam maximè rudes intelligunt, quid sit ens, ipsumque distinguunt à non ente. Ceterum cognitio scientifica entis non pertinet nisi ad sapientes 1. unde in illa occupantur Metaphysica omnium scientiarum sublimissima. Et in hoc sensu dixit Aristoteles 1. Metap. *Universalis esse maxime difficilis ad intelligendum*, id est, notione scientificâ, & principiorum, causarum, proprietatumque penetrativâ.

## ARTICULUS SECUNDUS.

*An Ens sit univocum ad inferiora.*

**D**iximus in Logica, Univoca esse, quorum nomen commune est, & ratio per nomen significat.

fiata est simpliciter in omnibus eadem : Analoga verò, quorum nomen quidem est commune, sed ratio per nomen significata non est simpliciter eadem in omnibus, sed solum secundum quid, id est, per quandam veluti proportionem. Hæc posito quaeritur, utrum ens sit univocum ad sua inferiora, vel potius analogum.

Et in primis, quod non sit univocum ad ens rationis, & ens reale; constat ferè apud omnes, quin ens rationis non habet nisi aliquod esse umbratile & diminutum. Solum difficultas est respectu Dei, & creaturarum; substantiæ, & accidentis. Scotus tenet, ens esse univocum ad hæc omnia.

### PRIMA CONCLUSIO.

**E**NS non dicitur univocè de Deo & creaturis, sed solum analogicè. Ea mens est Aristelis: *Ens*, inquit, non dicitur *equivocè*, sed *quemadmodum sanum*; id est, analogicè, 4. Metaph. & lib. 7. cap. 4. Sic expressè docet S. Thomas 1. part. quæst. 13. art. 5. & infinitis in locis.

Probatur 1. ejus ratione. Effectus non adæquans virtutem suæ causæ non convenit univocè cum illa: Sed ens creatum est effectus entis increati non adæquans ejus virtutem: Ergo non convenit cum eo univocè. Major certa est: Cum enim effectus non adæquat virtutem suæ causæ, non recipit ejus similitudinem, nisi diversimodè, & secundum modum longè inferiorem, quod est contra leges univocorum, quæ debent eodem modo participare rationem communem, in qua sunt univoca. Minor probatur. Virtus Dei est infinita, ens verò creatum est finitum secundum omnes formalitates: Ergo non adæquat virtutem suæ causæ.

Respondebis, solum sequi, creaturam non convenire cum Creatore secundum rationes particulares; attamen posse nihilominus convenire secundum universalissimam entis rationem.

Sed contra. Creatura non adæquat suam causam etiam in ipsa ratione entis: Ergo etiam secundum rationem entis non convenit cum illa univocè. Probatur antecedens: Umbra, & imperfecta partici-  
pa-

partio, levissimumque vestigium essendi non adequat totam entis plenitudinem & veritatem, etiam in essendo: Sed ens creatum comparatum enti divino non est nisi hujus verissimi entis umbra, imperfecta participatio, & quasi vestigium: Ergo ipse non adequatur, etiam secundum rationem entis. Major videtur certa ex terminis. Minorem verò Scriptura docet, Patres frequenter inculcant, ipse Gentiles Philotophi agnovere: Exodi 3. Deus dicitur ipsum ens: *Ego sum, qui sum*. Isaia verò cap. 40. Creaturas dicuntur non entia: *Omnes gentes, inquit, quasi non sint, sic sunt coram eo, & quasi nihilum & inane reputatae sunt ei.* Quippe ut argumentatur S. Augustinus Psal. 103. *Non esset in Deo nomen ipsum esse, nisi quidquid aliud est, et comparatum inveniretur non esse verè.* Quod idem profitentem Platonem refert lib. 8. de Civitat. cap. 11. Ergo esse creatum divino comparatum non est nisi ut umbra, tenuis participatio, leve vestigium essendi, & quasi nihilum.

Probatur 2. alià S. Thomae ratione. Quidquid prædicatur de aliquibus secundum idem nomen, & non secundum eandem rationem non prædicatur de illis univocè: Sed ens, licet prædicetur de Deo & creaturis secundum idem nomen, non tamen secundum eandem rationem; Ergo non prædicatur de illis univocè. Probatur minor. Nam ratio entis desumitur ab esse: Atqui esse non convenit eodem modo Deo & creaturis: Ergo etiam ratio entis non prædicatur de Deo eodem modo, ac de creaturis. Declaratur minor. Nam modus essendi Dei est, ut sit ipsum esse purissimum, irreceptum, infinitum, à seipso, immensum, æternum, independens, & in sua simplicitate omnes perfectiones essentialiter importans; Modus verò essendi creaturæ est, ut sit per existentiam à sua essentia distinctam, sitque ens per participationem, limitationem, dependentiam, & per infinitarum perfectionum exclusionem ac negationem; Ita ut, sicut optime notat Plato, Deus sit tantum esse nihil habens de non esse, ut etiam annotavit D. Thomas cap. 5. de Ense & Essentia. At verò creatura plus habeat de non esse, quàm de esse; fuit enim nihil per totam æternitatem, & dum existit, constat ex infinitis non esse, ut homo habet quidem esse humanum.

sed



sed habet infinita non esse, ut non esse Angelum, non esse Solem, non esse Cælum, &c. Unde creatura (si nomen sumatur à principaliori) deberet potius dici non ens, quàm ens; ideoque meritiò Propheta supra relatus dicit, creaturas esse *quasi non sint, & quasi nihilum & inane*; Deus verò solus, ut supra notatum est, dicitur propriè ens, *Ego sum, qui sum*, seu; ut vertunt Septuaginta, *Ego sum ipse ens. ἐγὼ αὐτὸς ὁ ὢν*: Ergo Deus & creatura non habent esse eodem modo, sed longè diverso.

Dicer. Non est contra leges univocationis, ut gradus communis participetur diversimodè; nam animal longè diverso modo est in homine, ac in verme, aut in alio bruto; est enim in homine cum dote rationalitatis, in bruto verò sine tali dote, & in verme cum infinitis imperfectionibus.

Sed contra. Licet diversitas, quæ non refuditur in ipsam rationem communem, sed solum attenditur: secundum differentias adventitias, non tollat univocationem; attamen diversitas, quæ attenditur secundum rationem communem, penitus tollit univocationem: Cum igitur homo & vermis non differant in ratione communis animalis, quippe cum eodem modo sentiant, totumque discrimen sit penes differentias additicias rationi communi, nihil mirum rationem communem manere in illis univocam. At verò Deus & creatura non solum differunt per differentias adventitias rationi entis, sed etiam in ipsa ratione entis, quæ est in illis diversa, in quantum in Deo reperitur per essentialiam & secundum veritatem, in creaturâ verò non nisi per participationem & umbraticè; illeque dicitur propriè ens, quia est ipsum esse subsistens; illa verò diminutè, quia solum participat esse.

Probatur 3. Illa non conveniunt univocè in aliqua ratione, quorum unum participat talem rationem cum essentiali dependentia ab alio: Sed creaturæ participant rationem entis cum essentiali dependentia à Deo: Ergo non conveniunt univocè cum illo in ratione entis. Minor certa est. Nam entitas creaturæ est essentialiter participatio divinæ entitatis, à qua dependet, ut à sua origine; suoque exemplari. Major verò declaratur: Etenim de ratione univocorum: est ratio communis æqualiter descendat ad omnia particularia: Ergo contra rationem

eorum est, ut essentialiter unum dependeat ab alio: hoc ipso enim, quod in sua essentia includit hanc dependentiam, quam aliud non includit, non se habet eodem essentiali modo ad rationem communem.

Confirmatur ex S. Thoma. Si ens esset univocum ad Deum & creaturam, esset genus ad utrumque, quod est expressè contra Aristotelem; siquidem verè esset natura communis Deo & creaturis, quæ contraheretur per finitatem & infinitatem tanquam per differentias. Adde etiam, quod plus distat Deus à creaturis, quàm creaturæ distant ab invicem: Sed propter distantiam unius creaturæ ab alia, tollitur univocatio, v. g. inter hominem verum, & hominem pictum: Ergo inter Deum & creaturam non datur univocatio.

Ex his inferitur cum D. Thoma 1. part. quæst. 13. art. 5. nihil esse univocum Deo & creaturis, quia eadem rationes, quæ probant, rationem entis non esse univocam Deo & creaturis, idem suadent de aliis perfectionibus. Unde quidquid dicitur de Deo & creaturis, ut Sapientia, Iustitia, Providentia, &c. longè alio superiori modo convenit altissimæ illi entitati, ac conveniat creaturis. Hinc est, quod Dionysius designatur vocare Deum nostris hominibus, dicitque non esse propriè bonum, sed *superbonum*, nec propriè sapientem, sed *super sapientem*, &c.

## SECUNDA CONCLUSIO

**E**NS non est etiam univocum respectu substantiæ & accidentis.

Probatur 1. Conclusio iis rationibus, quas supra pro præcedenti adduximus. Substantia & Accidens non participant ens eodem modo, sed diversimodè; Substantia quidem simpliciter, Accidens verò secundum quid: Substantia per prius, Accidens verò per posterius: Substantia sine dependentia & ordine ad accidens, Accidens verò cum dependentia & ordine ad Substantiam. Deinde contra rationem univocum est, ut unum definiatur per aliud: Sed accidens definitur per substantiam; dicitur enim *entis ens*.

*ens*, id est, substantiæ: Ergo non convenit univocè cum illa.

Probatur 2. ratione utramque conclusionem convincente. Univoca sunt, quæ contrahuntur per differentias extra rationem communem positas; analogæ verò sunt, quæ determinantur per varios modos participandi rationem communem: Atqui *ens* non potest contrahi per differentias extra rationem entis positas, sed solum per diversos modos essendi: Ergo non est univocum. Major est S. Thomæ in 1. Dist. 22. quæst. 2. art. 3. ad 2. & constat ex definitione univocorum quippe definiuntur. Quorum nomen est commune, & ratio æqualiter in omnibus: unde non differunt in ipsa ratione communè, quasi diversimodè illam participant; sed solum per aliquid adventitium rationi communis ut animal non differt in homine & bruto secundum diversum modum essendi in utroque, (homo enim & brutum eodem modo participant rationem animalis, & ejus propterea, ut sentire, dormire, comedere, &c.) sed solum differt per adventitias differentias, scilicet rationalitatem & irrationalitatem. Minor verò probatur. Differentiæ propriè dictæ debent esse extra rationem communem: Sed nulla differentia potest esse extrâ rationem entis: Ergo *ens* non potest habere differentias. Probatur minor. Nam ejusmodi differentia vel esset aliquid, vel nihil: Si nihil, profectò non est differentia entis: si aliquid non est extra rationem entis, ut patet: Ergo *ens* non habet differentias extra se. Unde si contrahatur ad Deum & creaturam, ad accidens & substantiam, hoc non fit per differentias ipsi superadditas, sed per varios modos habendi rationem entis: Deus enim est ipsum esse purissimum & plenitudo essendi, creatura verò est quædam illius participatio & tenue vestigium; & in creaturis substantia est simpliciter *ens*, accidens verò secundum quid, seu modus *entis*.

Responderi potest cum Scoto, *ens* formaliter non includi in ultimis differentiis; aliàs enim differentiæ convenirent & disconvenirent: disconvenirent, quia differentiæ sunt; convenirent, quia essent entia.

Sed contra. Nam ut arguit Cajetanus de ente & essentia, cap. 4. proprietates entis conveniunt per se ultimis differentiis: Ergo etiam conceptus entis includitur in illis: Consequentia patet; nam ex Aristot.

Scotele primo Posteriorum. In quo sunt proprietates, debet esse etiam essentia, seu Injectum, quia sunt illius Individuæ comites. Antecedens etiam videtur certum; nam etiam ultima differentia est una & vera. Neque verò inconveniens est, ut differentia illæ convenient analogicè: quia nihil est tam diversum, ut non conveniat analogicè cum aliis in ratione entis; nihil enim potest subterfugere ens, aliàs esset nihil purum.

### TERTIA CONCLUSIO.

**E**NS est analogum suis inferioribus, tum analogiâ attributionis, tum analogiâ proportionalitatis.

Et in primis, quòd ens sit analogum, patet ex dictis. Cum enim non sit nomen purè æquivocum, sed à consilio impositum ad significandam rationem communem essendi, & aliunde demonstraverimus, non esse univocum, restat, ut sit analogum.

Quòd verò sit analogum analogiâ attributionis, prodatur. Analoga attributionis sunt, quorum unum participat rationem communem cum habitudine ad aliud principalius; ut medicina dicitur *sana* per habitudinem ad hominem, quem curat. Atqui creatura participat rationem entis cum habitudine ad Deum, cujus est participatio; & accidens cum habitudine ad substantiam, cujus est modificatio: Ergo ens est analogum analogiâ attributionis.

Quod verò sit etiam analogum analogiâ proportionalitatis, probatur. Analoga proportionalitatis sunt, quæ se habent ad rationem communem cum quadam proportionem, sicut Leo, & Ludovicus XIV. In ratione Regis analogantur, quia proportionaliter se habent ad excellendum inter res sui generis, in quantum sicut Ludovicus XIV. dignitate præstat supra reliquos Gallos, ita quoque Leo suo modo præeminet inter omnes feras; ideoque dicitur *rex ferarum*, sicut ille dicitur *rex hominum*; Sed Deus & creatura, substantia & accidens, se habent cum quadam proportionalitate ad rationem entis, sicut enim Deus

di.

dictur *ens*, quia est ipsum *esse*, ita creatura dictur *ens*, quia participat *esse*, & sicut substantia se habet ad *esse* simpliciter, ita & accidens ad *esse* secundum quid: Ergo *ens* est analogum analogiæ proportionalitatis.

*Soluntur objectiones.*

**O** Bj. 1. contra utramque priorem conclusionem. Quod dicit unum conceptum præcisum ab inferioribus, est univocum; univocum enim est *quasi unius vocis*, & *unius conceptus*: Sed *ens* dicit unicuique conceptum ab inferioribus præcisum: Ergo est univocum. Probatur minor: Ille conceptus est unus præcisus ab inferioribus, de quo possumus esse certi, dum adhuc sumus de inferioribus incerti: Sed possumus esse certi rem aliquam esse *ens*, & incerti, utrum sit accidens, vel substantia: Ergo *ens* dicit unum conceptum præcisum ab inferioribus. Declaratur minor. Antiqui enim erant certi, animam & lucem esse entia; sed dubitabant, utrum essent substantiæ, vel accidentia.

Resp. 1. Distinguo maiorem: Univocum est, quod dicit conceptum ab inferioribus præcisum, & ad illa æqualiter descendantem, concedo; & inæqualiter ad illa descendantem, nego. Ad hoc enim, ut conceptus sit univocus, necesse est, illum ita præscindi ab inferioribus, ut etiam ad illa æqualiter descendat, ipseque eodem modo conveniat: si enim inæqualiter conveniat, tollitur univocatio. Unde quantumvis sanum dicere videatur unum conceptum, scilicet *id*, quod respicit sanitatem, quia tamen aliter applicatur Medicinæ, & aliter animali, non est univocum. Porro *ens*, licet quadantenus dicere videatur unum conceptum confusissimum distinctiones inferiorum non explicantem, sed conglobantem, scilicet *id*, quod habet *esse*; attamen non descendit æqualiter ad Deum & creaturam, ad substantiam & accidens: Deus enim est *ens* per plenitudinem, & est ipsum *esse*, creatura vero est *ens* per participationem; substantia est *ens* simpliciter, & accidens modus entis.

Resp. 2. cum Cajetano Opusc. de Analogiâ entis cap. 4.

## *An Ens sit univocum, &c. Art. II. 263*

cap. 4. distinguo minorem : Ens dicit univocum conceptum præcisum ab inferioribus , præcisione distinctâ & perfectâ , nego ; confusâ & indeterminatâ concedo . Non enim ens significat aliquam formalitatem perfectè præcisam à constitutivo differentiali Dei & creaturæ , substantiæ & accidentis , ita ut ex illa formalitate , & ratione differentiali divinitatis v. g. formetur conceptus certius , sicut ex animalitate & rationalitate fit conceptus hominis . Si quidem & ipsa differentia divinitatis est ens sicut & quidquid est in Deo : unde à nullo , quod sit in Deo aut creatura ; potest perfectè præscindi ratio entis ; sed solum imperfectè , in quantum significat omnem quidditatem Dei , & creaturarum , ( quæ inter se simpliciter differunt ) ut invicem proportionantur secundum esse , ex qua proportionem sortitur nomen entis : sicut sanum solum exprimit id , quod respicit sanitatem , prout proportionatur in tali respectu sanitatis . Unde sicut sanum est analogum , quia solum significat sua inferiora ut proportionata in respicienda sanitate ; ita ens est analogum , quia solum significat sua inferiora , ut proportionata in respectu ad esse .

Ad probationem respondeo , ut possimus esse certi , quod aliqua res sit ens , & incerti , quale sit ens , solum requiri , quod conceptus entis non significet explicatè & determinatè ipsa inferiora , & modos , quos in illis habet , quanvis significet illa in confuso & indeterminatè . Unde quidam Scotista meritis deridet hoc argumentum suorum Confratrum : quia , inquit , si canis marinus , & canis terrestris essent in sacco , & unus moveretur , certi essentius canem moveri ; incerti tamen , quisnam esset canis ille , marinus ne , an terrestris ? & tamen propterea nemo dicit , conceptum canis esse univocum marino , & terrestri , est enim purè equivocus . Ergo quod possimus esse certi de ratione communi , dum adhuc sumus incerti de inferioribus ejus , non arguit ejus univocationem .

Instabis . Si in conceptu entis includerentur inferiora , etiam implicite & in confuso , de quocumque prædicaretur ens , prædicarentur inferiora , scilicet Deus & creatura , substantia & accidens : Consequens est falsum : Ergo & antecedens . Probatursicque-

## 264 IV. Part. Philosoph. Disp. I. Q. II.

quela . Cum prædicatur aliquid de alio , simul prædicantur omnia inclusa in illo : Ergo si inferiora includerentur in ente , de quocumque dicerentur & inferiora : unde omnis ens esset Deus , creatura , &c.

Resp. Distinguo majorem : Si ens includeret inferiora , determinatè & quasi copulativè , concedo ; In determinatè , & quasi disjunctivè , nego . Ens autem non includit inferiora determinatè & conjunctivè , ita ut ad rationem entis requirantur omnia inferiora ; sed solum indeterminatè & quasi disjunctivè , in quantum significat aliquem modum essendi , quisquis ille sit . Cum verò descendit ad inferiora , modus ille essendi , uni erat indeterminatus , determinatur , alius in Deo , alius in creatura , alius in accidente , alius in substantia .

Objic. 2. Perfectè cognoscimus Deum secundum gradum entis : Ergo perfectè convenit cum creaturis in gradu entis . Antecedens patet , Nam demonstrativè probamus esse divinum cum suis perfectionibus : Ergo perfectè ipsum cognoscimus . Quo enim perfectior cognitio esse potest , quàm quæ habetur per demonstrationem ? Probatur verò consequentia . Gradus entis divini non cognoscitur à nobis nisi per creaturas : Ergo si perfectè cognoscatur , debet perfectè convenire cum creaturis .

Respond. Distinguo antecedens . Perfectè cognoscimus Deum secundum gradum entis , quantum ad certitudinem cognitionis , concedo , quantum ad pénétrationem illius gradus , nego . Quamvis enim scientia , quam habemus de Deo , sit certissima , non tamen perfectè pénétrat ens divinum , & modum , quo esse convenit Deo nisi forè per negationem , in quantum cognoscimus Deum longè sublimiori modo esse ens , quàm sint creaturæ .

Instabis . Si conceptus entis non sit univocus Deo & creaturis nullo modo potest à nobis concipi ens divinum . Consequens est falsum : Ergo & antecedens . Probat per sequela . Omnis conceptus , qui à nobis intelligitur , debet relucere in phantasmate creaturarum : Sed si creatura non conveniat univocè cum Deo in ratione entis , ens divinum non reluceret in phantasmate creaturarum : Ergo non posset

*An Ens sit univocum. Ar. II. 265*

posset à nobis ullo modo intelligi. Probatur minor. Quod nullo modo continetur in creatura, non relucet in phantasmate creaturæ: Sed si ens non esset univocum, ratio entis divini nullo modo contineretur in creatura: Ergo, &c. Probatur minor. Vel enim contineretur formaliter, sicut gradus animalis in homine; & hoc non, quia in ratione entis Deus & creatura non assimilantur formaliter. Vel virtualiter; & hoc non, quia causa non continetur virtualiter in suo effectu.

Respond. Nego sequelam. Ad probationem, nego minorem. Ad ejus probationem, nego etiam minorem. Ad cujus probationem, respondeo, ens divinum relucere & contineri in phantasmate creaturæ participativè, tanquam in effectu proprio quidem, sed tamen non univoco. Unde sicut ratio causæ cognoscitur per effectum & participationem suam; ita quoque ratio entis divini, quamvis eminentior, cognoscitur ex ente creato.

Objc. 3. Objectum scientiæ debet esse univocum: Sed ens est Objectum Metaphysicæ: Ergo est univocum. Probatur major. Nam definitio objecti est medium ad demonstrandas proprietates: Sed medium demonstrationis debet esse univocum: Ergo definitio objecti scientiæ debet univocè convenire, ac proinde objectum ipsum esse univocum. Probatur minor. Quia medium debet esse perfectè unum, & ideo defectu unitatis terminus æquivocus non potest esse medium demonstrationis: Atqui terminus & definitio analogæ non possunt esse medium demonstrationis.

Respond. negando majorem absolutè. Nam de analogis potest dari una scientia, in quantum conveniunt in una ratione analogæ, & possunt ostendi per eadem principia: sic Medicina est non solum de homine sano, sed etiam de herbis sanis, de urinis, de pulsu, &c. Ad probationem distinguo majorem: Medium demonstrationis debet esse perfectè unum, unitate excludente æquivocationem, concedo, unitate includente univocationem, nego. Quodd enim unitas analogæ sufficiat ad medium demonstrationis, luce clariùs patet in hac demonstrationis, luce clariùs patet in hac demonstratione: Principium in creatis est prius principiatio: Sed fons est principium rivi: Ergo est prius rivo: & tamen constat, Principium esse terminum analogum. Mille aliæ sunt demonstrationes optimæ, quæ constant medio analogo.

*Philos. R. P. Gaud. IV. Pars.*

*M*

*Quæ-*



Quæres, quare ens dicatur transcendens, & quid sit transcendens?

Respond. Transcendens esse, quod imbibitur in omni formalitate rei, de qua prædicatur, ita ut nihil sit in tali re, de quo dici non possit. Ens autem, cum sit prædicatum universalissimum, imbibitur in omnibus rei formalitatibus, ita ut nihil sit in ea, quod non sit ens: ut in homine nihil est, quod fugiat rationem entis. Nam animalitas est ens, rationalitas est ens, &c. Non modò autem ens est transcendens, sed etiam ejus proprietates, scilicet unitas, veritas, & bonitas, sunt transcendentes; sicut & quædam vocabula, quæ convertuntur cum ente, scilicet *res*, & *aliquid*: nulla enim differentia invenitur in rebus, quæ non sit ens, vera, bona, una, res, & aliquid.

Observandum tamen est ex Cajetano de Ente & Essentia, cap. 4. ista transcendentia, scilicet ens, unum, verum, bonum, res, & aliquid, non importare alium gradum, seu aliam quidditatem à gradibus, seu naturis eorum, quibus attribuuntur. Cum enim dico, ens homo, unus homo, bonus homo, verus homo, res homo, aliquid homo, nullum aliud gradum ab humanitate significo, sed illam solum diversis modis explico. Siquidem *Ens* significat humanitatem, prout habet esse: *Unum* illam exprimit, prout non est divisa in se actualiter: *Bonum*, prout est perfectiva appetitus, id est, potest illum terminare: *Verum*, prout potest terminare intellectum: *Res*, prout ponit entitatem, in rerum natura non fictam, sed realem: *Aliquid*, prout est aliud quid à cæteris.

## ARTICULUS TERTIUS.

### *De Distinctione Essentia & Existentiæ*

**C**elebris est hæc quæstio, unaque ex fundamentalibus doctrinæ S. Thomæ, quæ ut intelligatur, revocanda mens est ab inferioribus rerum rationibus,

## De Essentia & Existent. Ar. III. 267

ac ad universalissimam entis rationem convertenda. Porro, ut dixi supra, ens est, cujus actus est *esse*; unde quidquid est vel est ipsum *esse*, vel aliquid participans *esse*; seu quod habet *esse*. In ente quod est ipsum *esse*, palam est, non distingui essentiam ab *esse*. Et hoc ens est solus Deus, in quo proinde essentia & *esse* nullatenus distinguuntur. At in his, quæ non sunt ipsum *esse*, sed aliquid participans *esse*, cum actu sunt, duo distincta percipimus, nempe Quid sint, & quod sint; seu actum essendi, & rem, quæ hunc essendi actum habet. Actus essendi dicitur *Existentia*. Res verò, cujus est hic actus, dicitur *Essentia*.

Itaque existentia in genere est actus essendi, seu ipsum *esse* actu, seu ipsa essendi actualitas. In his verò, quæ non sunt ipsum *esse*, sed aliquid, quod potest esse & non esse, existentia definitur, actus essentia, seu rei extra causas & nihilum sistentia: seu id, per quod res est actu; seu ultima essendi actualitas; seu id, quod respondetur ad quæstionem. An sit?

Essentia verò eorum definitur. Id, cujus actus est *esse*; seu id, quo aliquid constituitur in determinatæ rei specie; id, quod primum in re concipitur; id, sine quo res intelligi nequit; id, quo res est hoc aliquid; quod nomine rei exprimitur, ac definitione explicatur; quo respondetur ad quæstionem. Quid est? Unde dicitur etiam *Quidditas*. Item *Natura*, quodd sit principium & radix proprietatum, ac operationum. Item *Ratio rei*, quod sit ratio, ob quam res est id, quod est; vel quodd menti ac rationi objiciatur. Dicitur etiam *Forma*, quodd eâ res constituatur in certa rei specie. Quamquam sint quædam essentia, quæ non sunt formæ putæ, sed rursus compositæ ex materia & forma, ita ut materia sit subjectum commune ad plures rerum species indifferens; forma verò determinatio hujus potentia ad certam rei speciem: unde in his essentialis forma non est tota earum essentia, sed actus essentialis, cujus accessu materia determinatur ad hanc entis speciem.

Ex his constat, ac omnes concedunt, in entibus creatis essentiam & existentiam aliquo modo distingui. Nam essentia earum integrè intelligi potest sine existentia. Ut integrè intelligo quid sit homo, quid circulus, quid rosa, ne cogitando quidem existantno, nec

non. Immo scientiæ omnes circa rerum essentiâs ab existentia præcisas versantur. Solum quæstio est, an re ipsâ distinguantur. Negant plerique. S. Thomas disertè affirmat. Scotus censet, distingui distinctione suâ formali ex natura rei.

## C O N C L U S I O.

**I**N omni ente finito & creato essentia re ipsâ distinguitur ab existentia, ut potentia à suo actu. Unde realiter componuntur ex essentia & esse, ut ex duobus essendi principiis. Ita perpetuè S. Thomas 1. p. q. 54. art. 3. *In omni ente creato, inquit, essentia differt à suo esse; & ad ipsum comparatur, ut potentia ad actum.* Opusc. 15. c. 8. *Esse rei non est nec forma ejus, nec materia, sed aliquid adveniens rei per formam.* Idem millies repetit.

Probat 1. Quodd est Deo proprium, nulli enti creato competit: Sed Scripturæ autoritate ac omnium sacrorum Doctorum consensu constat, esse uni Deo proprium, ut sit suum esse; unde nomen Tetragrammaton יהוה *Jehovah*, quod habetur Deo propriissimum, significat ipsum esse. Derivatur enim à verbo substantivo היה *hajah*, seu הוה *havah*, quod significat esse: Ergo nullum Ens Creatum est suum esse, sed in eo esse, seu existentia dividitur ab essentia.

Confirmatur. Nulla creatura est ens simplex; id enim soli Deo proprium est, sed necessariò constat ex actu & potentia: Atqui nisi ejus essentia esset distincta ab existentia, aliqua saltem foret ens simplex & non compositum ex actu & potentia: Ergo in omni ente creato essentia distinguitur ab existentia. Minor constat in Angelis. Nam cum sint essentiæ simplices, si eorum essentia esset ipsa sua existentia, non essent entia per compositionem ex actu & potentia. Ens enim ut ens componitur ex essentia & esse: Sed in illis non esset compositio ex essentia & esse; idem enim non componit cum se ipso: Ergo non essent entia per compositionem.

Major

## De Essentia, & Existenti. A. III. 269

Major verò paullo uberius declaranda est, cum ea conclusio nostra præcipuè nitatur. Itaque solum Deum Optimum Maximum habemus ut ens simplex & purum in actualitate essendi, quoddam proinde minimè constitutum sit ex actu essendi & potentia essendi, sed sit ipsum esse actu. Ceterùm id nulli entis creare concedendum, quod quidem ante nos disertè docuerunt Sancti Patres, ut S. Cyrillus eo libro, quo Spiritum Sanctum esse Deum demonstrat: *Nulla*, inquit, *creatura secundam naturam simplex est*. Et lib. 1. in Joan. c. 9. *In compositione est id omne, quod est in creatura, nihilque in ipsa simplex est*. Itaque nulla creatura est ens per simplicitatem, sed per compositionem. Porro cum ens sit, cujus actus est esse, ens ut ens componitur ex actu essendi & potentia essendi unde, ut omnes concedunt, actus & potentia sunt prima principia entis compositi. Itaque ut creatura sit composita in ratione entis, hæc duo in ea distingui debent, proindeque ejus essentia non debet esse ipse actus essendi, seu existentia, sed aliquid comparatum ad eam, ut potentia ad suum actum. Unde essentiam creaturæ omnes concipiunt, ut aliquid, quod potest esse & non esse, id est, potentia ad existentiam.

Ad hæc unum est Adversariis effugium. Respondent, Creaturam non esse suum esse, nec simplicem in ratione entis, quia in ea essentia & esse distinguuntur, non quidem re, sed ratione; proindeque in ea est compositio non quidem realis, sed rationis ex actu & potentia.

Sed contra. Distinctio & compositio rationis non obstat perfectæ identitati, ac simplicitati: Ergo si sola ratione actus essendi & potentia essendi distinguantur in creaturis, nihil obstarer, quominus absolute dici possent suum esse, ac entia simplicia. Probat antecedens ex ipsis Adversariis, quorum aliqui admittunt in Deo essentiam & existentiam quædantenus ratione distingui; ac omnes uno ore asserunt, Deum componi compositione rationis ex genere & differentia: Et tamen illum habent ut ens absolute simplex, & quod sit suum esse: Ergo sola distinctio & compositio rationis non obstat perfectæ identitati & simplicitati.

Probatur 2. Conclusio ratione, qua perpetuè utitur

S. Thomas, Actus distinguitur realiter à propria potentia, in qua recipitur: Sed *esse*, seu existentia creaturæ recipitur in ejus essentia: Ergo realiter ab ea distinguitur. Major constat. Nihil enim seipsum recipere potest. Minor probatur, tum ex communi loquendi modo, quo dicimus, creaturas recipere à Deo *esse*, seu existentiam. Tum etiam ratione. Existentia creaturæ nequit esse subsistens, seu irrecepta: Atqui in nullo alio recipi potest, nisi in essentia: Ergo in ea recipitur. Minor constat. Essentia enim est proprium existentiae receptivum: unde, in ea, vel in nullo recipitur. Majorem probat S. Thomas variis rationibus.

Prima, Existentia irrecepta, seu subsistens, est actus purus: Sed existentia creaturæ nequit esse actus purus: Ergo nec irrecepta. Minor constat, solus enim Deus est actus purus. Major probatur. Actus purus est, qui nulli potentiae admiscetur, ut constat ex terminis: Sed existentia irrecepta nulli potentiae admiscetur: Ergo est actus purus. Declaratur minor. Actus miscetur potentiae, vel quia est actus alicujus potentiae, vel quia ipse est in potentia ad ulteriorem actum: Sed existentia irrecepta, seu subsistens non est actus alicujus potentiae, cum in nulla recipiatur; nec tendit ad ulteriorem actum, cum sit actus ultimus in linea entis, ut constat ex ejus definitione: Ergo est actus purus, nempe ipsum *esse* subsistens.

Dices, existentiam substantiæ creatæ non esse actum purum, quia licet in nullo recipiatur, recipit tamen aliquid, nempe subsistentiam.

Sed contra suppositum potius recipit existentiam; est enim id, quod produciitur, id est, ducitur ad *esse*: Ergo subsistentia non recipitur in existentia, sed è contra. Itaque existentia est ultima essendi actualitas, seu ut dicit D. Thomas 1. p. qu. 3. art. 4. & q. 4. art. 1. ad 3. *Est actualitas omnium rerum, etiam formarum: unde non comparatur ad alia, sicut recipiens ad receptum, sed sicut receptum ad recipiens*. Et hoc ejus notione constat. Est enim rei extra nihilum & causas existentia. Porro res non censetur sibi extra nihilum & causas, nisi cum provenit ad ultimam essendi actualitatem & metam.

## *De Essentia, & Existentia. A. III. 271*

Secunda ratio. *Esse abstractum*, seu subsistens, seu irreceptum, hæc (enim synonyma sunt) est unicum & infinitum: Sed existentia creata non est unica & infinita: Ergo nec irrecepta. Minor constat: Probatum major. Actus limitatur & multiplicatur per potentiam, in qua recipitur: Ergo *esse*, seu existentia, quæ est actus irreceptus, est unica & infinita in *esse*, id est, simpliciter.

Hoc principium, nempe *Actus limitatur & multiplicatur per potentiam*, à qua proinde si liber sit, erit unus & infinitus in sua linea, licet plerisque videatur mysterium, adeo clarum S. Thomæ visum est, ut perpetuo eo utatur tum ad alia, tum ad Dei unitatem & infinitudinem demonstrandam. Platoni quoque adeo constans visum est, ut cum naturas abstractas & irreceptas statueret, quamque in sua specie unicam & infinite participabilem ipso abstractionis jure esse diceret. Illud explicat S. Thomas experientia. Nam cum naturam à materia abstrahimus, ipsa vi abstractionis una fit, atque unum quid concipitur, unicæ definitione definitur, ac totius speciei rationem complectitur, estque ab infinitis individuis participabilis. Unde si sic abstracta subsisteret in re, esset unica in re, ac infinite participabilis: Ergo ex eo constat, formam, seu, actum abstractione à suo subiecto adnari, ac totam suæ rationis amplitudinem complecti; receptione verò in sua potentia multiplicari & limitari.

Verum ut id penetrantius intelligamus, observandum, ut diximus, & omnes admittunt actum ex sua ratione esse perfectionem; potentiam verò imperfectionem. Unde in rebus actus omnino purus, scilicet Deus, in se continet totam essendi plenitudinem; potentia verò pura, nempe materia prima, summam essendi imperfectionem & vacuitatem, quam ideo S. Augustinus vocat *prope nihilum*, quod nihil habeat de perfectione entis, nisi potentiam ejus habendæ, sicut tenebrosus nihil habet de luce, nisi habendæ lucis potentiam. Et ideo quo magis actus accedit ad potentiam, eique immergitur, eo magis finitur, minuitur, impeditur, adeoque multiplicatur, quia *quæ sunt unita in superioribus, sunt multiplicata & divisa in inferioribus*. E contra quanto

magis recedit a potentia , tanto magis accedit ad Deum , qui est plenitudo essendi , ideoque magis perficitur & ampliatur , & consequenter adunatur , quia *quæ sunt dispersa in inferioribus , sunt unita in superioribus* . Unde sicut potentia deprimit actum , ita quoque eum multiplicat & limitat . Et ideo si aliquis actus sit liber ab omni potentialitate & materiâ , erit expers limitationis , & multiplicatis . Adeoque verum est , *ultimum irreceptum esse unicum & infinitum* . Quod quidem principium ita certum habet S. Thomas , ut videatur illud accepisse ab Angelis ; ideoque perpetuè tanquam evidentissimum usurpat .

Tertia ratio , qua probat S. Thomas existentiam creatam non posse esse irreceptam , hæc est . Existentia non recepta in essentia nihil habet sibi conjunctum , præter suum esse : Sed omnis existentia creata habet aliquid sibi adjunctum præter suum esse , scilicet plura accidentia , ut albedinem , quantitatem . &c. Ergo omnis existentia creata est recepta in sua essentia . Minor patet . Probatur major . Non potest concipi , aliquid conjungi existentie , nisi vel quia recipitur in illa , vel quia recipitur cum illa in aliquo subiecto : Atqui nihil potest recipi in existentia , cum ipsa sit ultima actualitas rei , nec recipi cum illa in aliquo tertio subiecto , si ejusmodi existentia sit irrecepta : Ergo existentia irrecepta non potest habere aliquid sibi conjunctum præter suum esse . Unde Boetius dixit , quodd id , quod habet existentiam , ( id est essentia ) potest recipere aliquid cum suo esse , scilicet formas accidentales ; sed ipsum esse , seu existentia nihil aliud potest recipere .

Probatur demum conclusio alia ratione . S. Thomas . Ens creatum nequit esse sua ultima actualitas ; hic enim proprius est character actûs puti : Sed si essentia creaturæ esset idem reipsâ , ac existentia , esset sua ultima actualitas esse enim , seu existentia est ultima essendi actualitas & meta : unde Deus est ultima sua actualitas , quia est ipsum esse : Ergo essentia entis creati non est re ipsâ sua essentia , sed ab ea distincta .

Obj. 1. Existentia non potest recipi in essentia : Ergo non distinguitur ab ea . Probatur antecedens : Existentia non potest recipi in nihilo : Sed essentia exclusâ existentie est nihilum : Ergo existentia non potest recipi in illa .

Resp.

Resp. Nego antecedens. Ad probationem, concessâ majore distinguo minorem: Essentia præcisâ existentiâ est nihil, *nihilitate existentia*, concedo; *nihilitate essentia*, nego. Cum enim distinguamus in ente duo principia constitutiva, scilicet essentiam & existentiam; seclusâ existentia, essentia non est aliquid existens, ideoque potest dici nihil nihilitate existentia: sicut materia seclusâ formâ non est aliquid actu. Attamen sicut materia seclusâ formâ habet realitatem essentia potentialis; ita quoque essentia præcisâ existentia habet realitatem propriam, quamvis non existentem ex se ipsa, sed quatenus actu est subjeetum existentia.

Instabis. Quod non est extra causas, est purum nihil: Sed essentia præcisâ existentia non est extra causas: Ergo est purum nihil. Probatur minor. Existentiâ est extra causas existentia: Ergo essentia præcisâ existentia non est extra causas.

Resp. 1. Distinguo minorem: Essentia præcisâ existentia non est extra causas, completè & ultimè, concedo; non est extra causas, inchoativè & incompletè, nego. Eodem modo intelligenda est hæc distinctio, quo in Physica dicebamus, materiam præcisâ formâ esse extra causas inchoativè.

Resp. 2. Essentia ut præcisâ ab existentia non est extra causas, ut præcisâ præcisione realis separationis, concedo; ut præcisâ præcisione solum distinctionis realis, nego. Explicatur. Essentia potest dupliciter præscindere ab existentia. Primò præcisione separationis, ita ut realiter destrituatur omni existentia. Secundò præcisione distinctionis realis, quatenus licet sit sub existentia, attamen sumitur ut res distincta ab illa tanquam à sua actualitate. Primo modo sumpta essentia non est extra causas, non potest esse in rerum natura, sicut nec materia separata ab omni forma. Secundo verò modo sumpta dicit aliquid in re extra causas, subjeetum scilicet participans actualitatem essendi. Vel aliter distingui potest & clariùs: essentia objektivè sumpta non est extra causas, concedo; subjectivè sumpta, ut actu subjeetitur existentia: tanquam propria potentia proprio actui, nego.

Urgebis. Ergo essentia confunditur cum materia prima. Probatur consequentia. Materia prima est potentia essendi: Sed etiam secundum nos essentia est potentia



essendi : Ergo invicem utrumque confundimus.

Resp. Nego consequentiam. Ad probationem respondeo, materiam esse puram potentiam ; non solum in linea existentiae, sed etiam in linea essentiae, quia ex se non est determinata ad certam essentiae speciem, sed determinatur per formam, quae est actus essentialis. Sed rursus compositum ex materia & actu illo essentiali, scilicet formâ, quod dicitur *essentia*, comparatur ad existentiam tanquam ad suam ultimam actualitatem. Et ideo forma dicitur *actus primus* ; ac verò existentia *actus ultimus*, *ultimaeque actualitatis*. Unde, ut ait S. Thomas quod Spiritual. Creat. art. 1. in rebus compositis est considerare duplicem actum & duplicem potentiam. Nam prima materia est ut potentia respectu formae, & forma est actus ejus. Et iterum natura, seu essentia, composita ex materia & forma est ut potentia respectu esse, seu existentiae, in quantum est susceptiva ejus. Unde in corporeis substantiis duplex est compositio, prima materiae & formae ad constituendam essentiam ; altera essentiae & existentiae ad constituendum ens perfectum : At verò in substantiis spiritualibus est tantum unica, nempe essentiae & existentiae.

Objc. 2. Existentia creata, sicut & aliae res, propriam habet essentiam : Sed non distinguitur realiter à propria existentia, alias existentiae daretur existentia in inveniunt : Ergo saltem aliqua essentia creata non distinguitur à sua existentia.

Resp. 1. Existentiam propriè non esse essentiam aliquam, sed esse actum omnis essentiae ; ac si abusive dicatur, esse aliqua essentia. Resp. 2. Dum dicimus, essentiam distingui ab existentia, id debere intelligi de essentia propriè dicta, de cujus conceptu non est existentia, puta, hominis, Angeli, &c. Sicut enim omne agens creatum agit per actionem distinctam ; actio verò ut agat, non eget aliâ actione, sed suo modo agit per seipsam ; ita & omne creatum, quod existit, eget existentia à se distinctâ, qua fiat existens ; attamen ipsa existentia, qua res existunt, non eget aliâ existentia, sed per seipsam suo modo existit.

Objc. 3. Quae non possunt separari, non distinguuntur : Sed existentia nequit separari ab essentia : Ergo.

Resp. 1. Majorem esse falsam. Plura enim distinguuntur, quae separari non possunt, ut materia non potest separari ab omni forma.

Resp.

## De Subsistentia, &c. Art. IV. 275

Resp. 2. Etiam de facto existentiam posse separari ab essentia: nam in Christo essentia, seu humanitas, fuit realiter separata à sua existentia, cujus loco subrogata est existentia Verbi, ut probant nostri Theologi.

### ARTICULUS QUARTUS.

#### De Subsistentia, Supposito, & Persona.

**S**ubstantia completa differt ab accidentibus, & entibus incompletis, quod sit sui ipsius in se subsistens & terminata. At verò accidentia non sunt sui ipsius; sed alterius scilicet subjecti, & partes sunt sui totius. Unde si substantia completa, v.g. homo, aliquid operetur, operatio tribuitur ipsi. At verò si accidens, vel pars hominis agat, v.g. si musica causet cantum, & manus percutiat, nec manus, nec musica dicuntur agere, sed homo per musicam, & per manum; manus enim, & musica non sunt sui, sed hominis. Hæc perfectio, per quam substantia ita completur, ut sit in se ipsa, ut sit sui ipsius, & non alterius, dicitur *Subsistentia*, quasi *in se ipso sistentia*. Circa illam tria sunt explicanda. Primum quid sit, quidve suppositum, & persona. Secundò, quomodo distinguatur à natura, seu essentia. Tertio, quomodo distinguatur ab existentia.

Dico 1. Substantia est actualitas, qua natura ita subsistentatur in se ipsa, ut non egeat communicari alteri ad essendum & operandum.

Dicitur in primis *actualitas*, per quod convenit cum aliis perfectionibus. Cæteræ particulae tenent locum differentia; proprius enim character subsistentiæ est reddere naturam in se subsistentatam, & terminatam, ita ut non indigeat alteri communicari, ut sit & operetur. Dico *non indigeat* quia natura Divina, quamvis sit subsistens in se ipsa, est tamen ulterius communicabilis tribus personis, non quidem ex necessitate, sed ex infinita fecunditate.

Definiri etiam potest subsistentia, Perfectio, qua sit, ut natura sit sui ipsius, & non alterius. Unde quidquid agit natura subsistens, non alteri, sed sibi operatur: Et

ideo, quia in natura humana Christi loco propriæ subsistentiæ fuit subrogata subsistentia Verbi, natura illa non erat sui ipsius, sed erat natura Verbi; nec sibi operabatur, sed Verbo Divino. Unde quidquid aut egit, aut passa est, id totum attribuitur Verbo, cuius erat.

Suppositum autem est veloxi concretum subsistentiæ, sicut vivens est concretum vitæ. Persona verò nihil aliud significat, quàm ipsum suppositum, non cuiusque naturæ, sed intellectualis: non enim dicimus personam equi, aut lapidis, sed personam, vel Divinam, vel Angelicam, vel Humanam. Unde persona nihil addit supra suppositum, etsi aliquam dignitatem, & excellentiam peritam ex natura intellectuali. Quod autem Latini vocant *personam* & *suppositum*, Græci dicunt *ὑπόστασις*, *Hypostasis*.

Dico 2. Subsistentia est quid positivum realiter distinctum à natura, seu essentia.

Probatur conclusio. Et in primis, quod subsistentia sit quid positivum, quamvis videatur negare Scotus, tamen suaderetur. Nam subsistentia significat quandam perfectionem & actualitatem. Quod enim natura sit sui ipsius, & non indigeat altero sustentante, est maxima perfectio: Ergo subsistentia exprimit aliquid positivum. Unde sancti Doctores dicunt, Verbum Divinum non assumpsisse subsistentiam naturæ humanæ; sed eam contempsisse, & loco ejus divinam subsistentiam subrogasse, quod dici non posset de pura negatione. Sanè personarum divinarum subsistentia pura negatio dici non potest, cum ipsas personas formaliter constituat, ac invicem distinguat, sit terminus processionum divinarum verè, ac realiter per eas productus, quæ nomina meræ negationi competere nequeunt: Ergo conceptus subsistentiæ in negatione non consistit.

Secunda verò pars, scilicet subsistentiam realiter distinguere à natura, probatur ex Incarnationis Mystério, in quo subsistentia naturæ humanæ fuit separata à natura humana: Ergo distinguuntur ab invicem.

Quantum ad tertium quæsitum, divisi sunt Authores, etiam Thomistæ. Quidam dicunt, subsistentiam & existentiam solum virtualiter distinguere, & esse duo munera unius entitatis, quæ quatenus sistit naturam, & eam ita terminat, ut non sit alterius, nec alteri communicabilis, vocatur subsistentia; quatenus verò ultimè  
com-

## *De Subsistentia, &c. Art. IV. 277*

complet rem ipsam, & eam ponit extra causas, dicitur *existentia*. Quidam verò dicunt, esse duas modalitates ejusdem rei. Quidam demum tenent, esse duas actualitates realiter distinctas. Hæ omnes opiniones sua possunt habere fundamenta etiam in doctrina D. Thomæ. Cæterum prima id commodi habet, quod faciliè explicat distinctionem existentia ab essentia. Si enim existentia & subsistentia sunt idem, constat, distinguì ab essentia, cum fide certum sit, subsistentiam in Incarnatione fuisse separatam a natura humana, pròindeque ab illa distinguì. Attamen tertia sententia videtur conformior D. Thomæ, qui docet, suppositum, id est, subsistentiam cum natura, recipere existentiam 1. p. q. 5. art. 2. ad 3. Deinde existentia præcisè dicit ultimam actualitatem essendi, ideoque communis est tam accidentibus, quàm substantiis. At verò subsistentia est perfectio conveniens tantum substantiis completis, & illas distinguens ab accidentibus: unde videtur esse actualitas longè diversæ rationis ab existentia, At de his parcius. Quippe subsistentia notitia, ut maxime peti solet ex fontibus fidei, nempe Trinitatis, & Incarnationis, ita jure remittitur ad Theologos. Eam delibasse nobis sufficiat.

## QUÆSTIO TERTIA

*De Proprietatibus Entis, scilicet  
Unitate, Veritate, &  
Bonitate.*

**C**UM ens sit, cujus actus est *esse*; manifestum est, ipsum esse unum, verum, bonum. Omne enim, quod est, habet unum *esse*, verum est *esse*; & bonum est *esse*. Habet quidem unum *esse*, aliàs non eiset ens, sed multitudo entium. Verum est *esse*, quia hoc ipso, quod est, potest terminare veram cognitionem & actionem intellectûs, cujus objectum est ens. Et demum bonum est *esse*, quia bonum est, quod appetitur: omne, autem ens naturaliter appetit *esse*. Et præterea omne quod est, voluntati primæ causæ (scilicet Dei) conformatur; aliàs non esset, si prima causa ipsum ut bonum non approbaret juxta illud Sapient. 11. *Quomodo aliquid permanere posset, nisi tu voluisses?* De illis tribus entis proprietatibus agemus singulis articulis, adjiciemusque specialem de distinctione; si tamen primò admonuerimus, non esse proprietates physicas, id est, realiter ab ente distinctas, sed solum quasdam notiones, quæ omni enti tribui solent, ideoque dicuntur *proprietates attributales, virtuales, & notionales*.

## ARTICULUS PRIMUS.

*De Unitate.*

**U**Num dicitur, Ens indivisum in se, & divisum à quolibet alio. Cum autem quodlibet ens tandiu sit, quaudiu est unum, & amittat rationem entis, quando amittit unitatem, ut patet in homine, qui desinit *esse*, quando patres ejus non ununtur, unum nihil addit supra ens, sed solum exprimit entitatem cum negatione divisionis. Circa unitatem sic explicatam tria quærimus. Primò, in quo consistat principaliter, an in negatione di-

visionis, an in entitate, ut connotante indivisionem. Secundò, quotuplex sit. Tertio, unde sumatur unitas, & multiplicatio rerum.

Dico 1. Unum essentialiter significat entitatem, ut connotat negationem divisionis. Unde significat aliquid positivum in recto; negationem verò in obliquo.

Probatur facillè ex definitione Unius, qua dicitur, Ens indivisum in se, & divisum ab alio. Et unitas dicitur, entitas indivisa; Ergo primariò, principaliter, & in recto significat entitatem positivam; indirectè verò, & de connotato negationem divisionis.

Confirmatur. Proprietas entis, cum sit aliquid positivum & convertibile cum ente, non potest significare primariò, & principaliter solam negationem: Ergo debet principaliter significare ipsam entitatem, ut connotat negationem divisionis.

Dico 2. Unitas præcipuè videtur esse triplex, scilicet generica, specifica, & purè numerica.

Declaratur. Cum enim unum significet ens indivisum, tot erunt unitates, quot sunt divisiones. Res autem præcipuè dividuntur ab invicem vel genere, ut lapis ab homine; vel specie, ut leo ab equo; vel numero, ut Petrus à Paulo. Ergo tres sunt unitates, quarum, quæ negat divisionem generis, dicitur *generica*; quæ negat divisionem speciei, dicitur *specifica*; quæ negat divisionem numericam, dicitur *numerica*, seu *individualis*.

Circa unitatem genericam, & specificam nihil speciale occurrit. Solum advertendum est, nisi accedat unitas individualis, non esse à parte rei perfectas unitates, sed solum negationes diversificatis, ut dictum est in Logica.

Circa unitatem numericam, gravis difficultas est, unde oritur unitas, & multiplicatio purè numerica; seu, quæ sit causa, cur in rebus quædam intra eandem speciem solo numero differant, & multiplicentur. Rem duabus conclusionibus explicabimus.

## PRIMA CONCLUSIO.

**U**Nitas, & multiplicatio purè numerica substantiarum oritur ex materia quantitatem connotante. Ita Thomistæ omnes contra Scotum.

Probatur conclusio primò. authoritate Aristotelis, qui expressè docet lib. 12. Metaph. cap. 8. *Ea, quæ sunt multa numero, habere materiam*. Ex quo infert, primum motorem numero non multiplicari, quia caret materiâ. Et Plato, qui posuit ideas separatas à materia, dixit, ob eam causam eas non multiplicari numero, sed distinguere specie S. Thomæ autoritates non refero, quia de ejus mente nemo dubitare potest.

Probatur 2. ratione S. Thomæ, Unitas, & multiplicatio materialis debet oriri à materia; ideo enim dicitur *materialis*: Sed unitas & multiplicatio numerica est *materialis*. Ergo oritur ex materia. Probatur minor. Tum quia unitas, quæ petitur à forma, sicut & multiplicatio, constituit formalem, & specificam diversitatem: Ergo unitas purè numerica non potest esse nisi materialis. Tum præcipuè, quia multiplicatio in partes ejusdem rationis est multiplicatio materialis: Sed multiplicatio numerica fit in partes ejusdem rationis: Ergo est materialis. Minor patet. Ea enim censentur purè numero distinguere & multiplicari, quæ cum sint ejusdem rationis, id est, similis essentiæ, sola divisione distinguuntur, ut duæ guttæ aquæ, duo ignea, &c. Major verò probatur. Nam essentialiter materiæ convenit habere partes ejusdem rationis; est enim radix quantitatis, cujus essentielle munus est distribuere substantiam in partes ejusdem rationis: Ergo materiæ proprium est dividi in partes ejusdem rationis; ideoque si competat formæ, hoc oritur ex communione, quam habet cum materia.

Confirmari præterea potest conclusio. Primò alia ratione D. Thomæ. Ab eo radicaliter oritur multiplicatio numerica, quod est ratio, cur forma aliqua sit multiplicabilis numericè: Sed ratio, cur planta v. g. sit multiplicabilis numericè est materia: Ergo, &c. Probatur minor. Nam actus est multiplicabilis pro-

propter potentiam, in qua recipitur, ut abundè ostensum est supra quæst. 1. artic. 3. Atqui potentia, in qua recipitur forma, est materia prima: Ergo forma habet à materia prima, quòd sit multiplicabilis.

Secundò. Infima distinctionum, & unitatum sumi debet ab eo, quod est infimum in rebus: Sed unitas, & distinctio numerica est infima omnium: Ergo debet sumi à materia, quæ est in rebus infima.

Tertiò demum accedit experientia, qua videmus, nos, ubi primùm abstrahimus id, quod est formale in rebus ab eo, quod est materiale in eis, ut quando definimus quidditatem hominis, circuli, trianguli, &c. hoc ipso abstrahere rem ab omni multiplicitate numerica & individuali: unde omnium individuorum non datur, nisi una communis definitio: Ergo signum est, multiplicitatem numericam oriri à materia.

Ex his inferitur, res purè spirituales, seu formas in materia nullatenus receptas, quales sunt angeli, nullo modo posse multiplicari numericè, proindeque unicùm individuum possibile esse in talibus speciebus, in quo individuo natura specifica tota subsistit. Remotà enim causà, necesse est, ut effectus removeatur. Cùm igitur in his naturis non sit materia, quæ est causa multitudinis numericæ, necesse est, ut & omnis multitudo purè numerica procul ab illis exulet.

Obj. 1. Quilibet Angelus est unus numero: Ergo unitas numerica non petitur à materia, quæ non est in Angelis.

Respond. In Angelis, licet sit unitas numerica, non esse tamen unitatem purè numericam, qua scilicet unus Angelus distinguatur ab alio solo numero intra eandem speciem. Unde argumentum nihil efficit contra conclusionem, quæ est de unitate purè numerica.

Instabis. Animæ rationales differunt & multiplicantur, etiam solo numero; & tamen non habent materiam: Ergo materia saltem in illis non est causa multiplicationis numericæ.

Respond. Animas rationales, quamvis possint esse sine materia, essentialiter tamen destinari ad materiam, cui proinde proportionari debent, quia *quidquid recipitur, ad modum recipientis recipitur*. Unde solo numero sunt multiplicabiles, sicut aliæ formæ in materia receptibiles; non quidem ex materia, quam in se habeant, sed ex ipsa habitudine ad materiam.

Ur.



282 *IV. Part. Philosoph. Disp. I. Q. III.*

**Urgebis.** Unitas & distinctio numerica debent desumi ab aliquo principio intrinseco: Sed anima separata intrinsece non habet materiam: Ergo non desumit unitatem, & distinctionem numericam à materia.

**Respond.** Distinguo majorem: Unitas numerica debet desumi à principio intrinseco, proxime, concedo; radicaliter, nego. Licet enim id, per quod res immediate sortitur unitatem numericam, debeat esse ipsi intrinsecum; attamen illud potest rursus dependere ab aliquo extrinseco, ad quod essentialiter destinatur. Unde anima separata proxime quidem individuatur à propria entitate: Sed tamen quod illa entitas sit distincta solo numero, habet ex hoc, quod sit receptibilis in materia, quæ est prima parens distinctionis numericæ; seu ex coactione ad materiam, tanquam ad proprium receptivum.

**Objic. 2.** Hæcceitas individuat substantias: Ergo non est querenda ulterior ratio unitatis individualis.

**Respond.** Hæcceitatem esse ipsam differentiam individualement. Sed rursus de illa queritur, unde habeat, quod sit multiplicabilis numericè, id est, cur plures hæcceitates possint reperiri intra eandem speciem. Unde Scotus nihil dicit ad questionem, dum ait, hæcceitatem individuate substantias.

**Instabis.** Omnis differentia desumitur à forma: Sed unitas individualis est aliqua differentia: Ergo desumitur à forma.

**Respond.** Distinguo majorem: Omnis differentia formalis, & quæ est per modum diversitatis, concedo; omnis differentia materialis, & quæ est solum per modum quasi quantitativæ divisionis, nego. Nam sicut forma est radix diversitatis, ita materia est radix divisionis. Unde sicut diversitas specifica sumitur à forma, ita distinctio numerica sumitur à materia.

**Objic. 3.** Eadem materia pertinere potest ad plura individua: Ergo non est principium unitatis numericæ.

**Respond.** Distinguo antecedens: Eadem materia materialiter sumpta, concedo; eadem materia formaliter sumpta, nego. Materia sumitur materialiter, dum sumitur præcisè secundum suam entitatem, quam constat posse successive pertinere ad plura individua. Materia verò  
sumi.

sumitur formaliter, quando ejus entitas consideratur, ut subsistans tali actioni, & connotans talem numero quantitatē. Sic autem sumpta materia non potest pertinere ad plura individua.

SECUNDA CONCLUSIO.

**A**ccidentia desumunt suam unitatem, & multiplicationem numericam à subjecto formaliter sumpto, id est, prout subest tali actioni agentis, à quo recipit ipsum accidens, talique durationi, &c.

Probat. Tum quia subjectum tenet locum materiam respectu formæ accidentalis: Ergo debet eam individuarē. Tum quia forma multiplicatur per suum receptivum: Sed forma accidentalis recipitur in suo subjecto: Ergo ab illo desumit multiplicationem, & limitationem numericam.

Objic. Accidens separatum à subjecto, adhuc est unum numero, ut patet in mysterio Eucharistiæ; Ergo non individuatur à subjecto.

Respond. Accidens separatum semper retinere habitudinem ad subjectum, ac proinde potest individuari ab illo; sicut dicebamus, animam rationalem individuari à corpore, ad quod dicit habitudinem.

## ARTICULUS SECUNDUS.

*De Distinctione, ubi celebris difficultas agi-  
tatur circa modum, quo gradus  
metaphysici ab invicem di-  
stinguuntur.*

**Q**UAE in titulo discutienda suscepimus, etsi à pluri-  
bus præmaturè tractentur in Logica, opportunitas  
tamen visum est huc usque differre. Cum enim ea-  
dem scientia sit de contrariis, explicatâ unitate congruè  
agatur de distinctione. Et quia præcipua difficultas, quam  
circa distinctionem agitatur, ea est, quam celebrem Sco-  
tus fecit, de distinctione graduum metaphysicorum, ( id  
est, illarum formalitatum, quas gradatim in qualibet re  
distinguiunt, ut in Petro formalitatem rationalis, anima-  
lis, viventis, substantiæ, &c.) ideo de illa dicendum est  
operosius.

S. L.

*De variis Distinctionum generibus.*

**U**NITAS & distinctio sequitur ens, ut sæpe repetit S.  
Thomas: in tantum enim res aliqua distinguitur ab  
alia, in quantum non est idem cum illa. Unde sequitur,  
distinctionem esse duplicem, realem scilicet, & rationis.  
Res enim una potest non esse alia, vel de facto à parte  
rei; & hæc distinctio realis dicitur, in quantum scilicet  
sunt duæ res, aut quasi res, ut Petrus & Paullus: vel per  
considerationem intellectus, in quantum rem in se uni-  
cam in varios conceptus distinguiamus; & hæc dicitur di-  
stinctio rationis.

Distinctio realis est triplex, major, minor, & virtualis.  
Distinctio realis major, est distinctio rei à re; sic Petrus  
distinguitur à Joanne, anima à corpore. Distinctio realis  
minor,

## De Distinctione, &c. Art. II. 285

minor, est distinctio rei à modo, quo afficitur, id est, à tenuissimis quibusdam entitatibus, quæ propriè non obtinent nomen rei propter suam exiguitatem, arque adeo dicuntur *modi*: sic Petrus distinguitur à suâ sessione, linea à sua obliquitate. Hæc distinctio solet etiam dici *modalis*. Distinctio virtualis non est tam distinctio, quàm fundamentum distinctionis; & est in illa re, quæ unica in se æquivaleret pluribus, ideoque præberet fundamentum, ut eam distinctis actibus cognoscamus, diversasque in ea formalitates distinguamus: sic nummus aureus habet quiddam unicum valorem, scilicet libratum sex circiter; attamen ille unicus valor æquivaleret duplici valori duorum nummorum argenteorum; ideoque possumus illum distinguere in duos valores parciales. Similiter anima hominis est, quidem in se unica, attamen præstat quidquid præstant animæ plantarum & pecudum, diciturque ob id virtualiter multiplex; ideoque potest distingui per intellectum in tres gradus, vegetativum, sensitivum, & rationale.

Hanc distinctionem virtuales Scotus non putat sufficere; & ideo aliam ejus loco subrogat, quam vocat *distinctionem formalem actualem ex natura rei*; quæ sit, non quidem inter rem & rem, aut rem & modum, sed inter duas formalitates ejusdem rei, ut inter animalitatem & rationalitatem, quarum una ante omnem mentis operationem non sit formaliter altera, neque de intrinseco constitutivo aliterius, quamvis utraque non sit nisi unica res; sicut in lapide triangulari tres anguli sunt unus & idem lapis; & in fabuloso Jano bifronte duæ erant facies, sed unum caput.

Dicit igitur Scotus, hanc distinctionem, quamvis sit actualiter in rebus, non tamen esse realem: quia non est distinctio rerum, sed solum formalitatum, quæ adeo propriè dicenda sit *formalis*. Hanc verò liberaliter concedit in omnibus rebus, etiam in attributis divinis, adeo ut in una simplici re & entitate integrum formalitatum exercitum aliquando exciter, ex quibus aggregetur: unde definit essentiam divinam *Cumulum perfectionum, & formalitatum*.

Quantum ad distinctionem rationis, triplex quoque assignari potest, major, minor, & minima. Distinctio rationis major est, dum ratio nostra entitatem virtualiter multiplicem distinguit in varios conceptus perfectè distincti-

scindos, quorum unus nullo modo includitur in alio, ut dum distinguimus humanitatem in animalitatem, & rationalitatem: nam conceptus animalitatis nullo modo continet actum conceptum rationalitatis; ideoque attribui potest rebus etiam irrationalibus. Distinctio rationis minor est, cum intellectus rem eandem distinguit in varios conceptus, quorum unus explicitè quidem non continet alium, id est, ipsum formaliter non exprimit, implicitè tamen ipsum involvit & includit, ut dum distinguimus in ente unum, verum, bonum, boni siquidem conceptus includitur in conceptu veri, & uterque in conceptu entis. Distinctio rationis minima est, dum absque ullo fundamento ex solo beneplacito, vel ex infirmitate sua, intellectus dividit rem unicam in varios conceptus; ut si quis distinguat vestimentum ab indumento, & voluntatem divinam à sua volitione. His præsuppositis, ut ad distinctionem graduum metaphysicorum redeamus,

Duplex est sententia. Prima Scoti, qui vult, hos gradus, v.g. animalitatem, & rationalitatem in homine, distinguì actualiter ante opus intellectus, distinctione illa, quam vocat *formalem ex natura rei*, ita ut, licet concedat in homine animalitatem, & rationalitatem esse eandem rem, velit tamen esse duas formalitates actu, & de facto independentes ab intellectu. Scotum sequuntur ejus discipuli: sed deserunt alii, ut hac in parte de illo dixeris, quod de Ismaele dictum est: *Manus ejus contra omnes, & manus omnium contra eum.*

Secunda sententia est S. Thomæ, & communiter aliorum, qui tenent, gradus illos distinguì quidem actualiter per intellectum: ante operationem verò intellectus solum fundamentaliter, & virtualiter; quatenus scilicet eadem simplex formalitas, licet in se una, quia tamen æquivaleret pluribus, præbet occasionem intellectui distinguendi in ea varios conceptus; quibus non correspondet in re, nisi unica simplex entitas diversimodè concepta; sicut in circulo, diversis lineis à circumferentia ductis correspondet idem centrale punctum virtualiter solum multiplex.

## S. II.

*Statuitur vera sententia.*

## PRIMA CONCLUSIO.

**N**ON datur distinctio actualis formalis Scoti inter formalitates ejusdem rei, sed distinctio animi enitatis in varias formalitates, & varios conceptus objectivos sit ab intellectu.

Probatur unica, sed efficaci ratione. Distinctio illa non est necessaria: Ergo nec admitrenda. Probatur antecedens. Distinctio virtualis potest facere quidquid facit distinctio illa Scotica: Ergo non est necessaria. Probatur antecedens tum ratione, tum Inductione. Ratione quidem. Nam, quod æquivaleret alteri, potest facere quidquid alterum faceret, si adesset: Sed distinctio virtualis æquivaleret actuali: Ergo potest facere quidquid distinctio actualis faceret, si adesset. Major aperta est. Sic enim nummus aureus facit quidquid facerent duo argentei, si adessent: sic punctum in centro positum, quia est virtualiter multiplex, potest terminare varias lineas æquæ, ac si essent varia puncta. Minor verò manifesta est. Ideo enim dicitur *distinctio virtualis*, quia per illam res æquivaleret pluribus realiter distinctis.

Probatur etiam Inductione. Tria sunt, quæ Scotus tribuit distinctioni formali actuali, & propter quæ illam necessariam putat. Primum, ut de unica re possint verificari contradictoriæ propositiones. Secundò, ut possit terminare diversos conceptus. Tertio, ut possit definiti diversis definitionibus: Sed hæc omnia præstare potest sola distinctio virtualis: Ergo, &c. Probatur minor. Nam hoc ipso, quod res est virtualiter multiplex, secundum unam partem ejus, ut ita dicam, virtualitatis potest aliquid verificari de illa, quod non verificatur secundum aliam; ac proinde sufficit ad verificanda contradictoria; sic in nummo aureo, licet sit unus valor sex librarum, potest dici, quod nummus ille aureus, quatenus continet valorem  
unius

unius argentei, non sufficit ad solvendum debitum quatuor librarum, bene tamen quatenus excedit argenteum. Unde D. Thomas Quæst. 7. de Potentia, art. 1. ad 5. *De illo*, inquit, *quod est idem secundum rem, sed ratione differens, nihil prohibet predicari contradictoria, ut dicit Aristoteles 3. Physicorum; sicut patet, quod idem punctum re, solum differens ratione, est principium & finis; & secundum quod est principium non est finis, & è contrario.* Deinde quod etiam distinctio virtualis sufficiat ad terminandos diversos conceptus & varias definitiones, adhuc appetitus patet. Hoc ipso enim, quod una res æquivaleret pluribus, potest concipi & definiri præcisè secundum quod æquivaleret uni, & deinde præcisè secundum quod æquivaleret alteri. Et rogo Scotistas, si re ipsa nolint esse, saltem fingant in rerum natura existere formalitatem in se quidem unicam & simplicem, quæ tamen idem præstet, quod plures, id est, sit æquivalenter multiplex. An non continuò palàm erit de ea diversimodè considerata posse prædicari contradictoria, posse formari plures conceptus inadæquatos, posse demum constitui plures definitiones eam sub illa diversa consideratione diversè explicantes: Ergo virtualis distinctio ad hæc tria sufficit.

## SECUNDA CONCLUSIO.

**G**Radus metaphysici non distinguuntur actu in re ante opus intellectûs; sed tantum virtualiter. Unde tota illorum distinctio actualis sit ab intellectu distribuyente eandem entitatem virtualiter multiplicem in diversas formalitates, v.g. hominem in animalitatem & rationalitatem.

Conclusio posset probari ratione jam facta. Si enim non datur distinctio Scoti, gradus quoque illi non possunt distinguui tali distinctione. Sed præterea

Probatur ratione fundamentali. Gradus metaphysici sunt una, & eadem formalitas virtualiter tantum multiplex: Ergo non distinguuntur actu, sed solum virtualiter. Probatur antecedens. Cum enim formalitas sit effectus formæ, oportet, illam proportionari, & adequari formæ, à qua procedit. Unde sic argumentor. Eodem modo loquendum est de formali-

eatibus & de formis, à quibus procedunt: Atque forma, à qua procedunt gradus metaphysici, ut anima rationalis in homine, non est ex pluribus animabus tertia anima, sed unica simplex, virtualiter solum multiplex: Ergo etiam humanitas in homine non est tertia formalitas composita ex pluribus partialibus, animalitate scilicet, & rationalitate, sed unica simplex virtualiter tantum multiplex.

Declaratur amplius dissipando inanem Scoti subtilitatem. Equid enim tandem sibi vult per *formalitatem*, quo nomine imperitos hoc toto in negotio deludit? Planè apud æquos nominum æstimatores *formalitas* id ipsum est in abstracto, quod *forma* in concreto. Cum igitur, ut explicuimus 1. phys. quæst. 3. art. 1. forma sit, qua res determinatur ad certam essendi rationem, *formalitas* nihil aliqd est, quàm determinatio rei ad propriam essendi rationem; ac proinde ubi est unica res determinata ad unum essendi modum, est unica quoque non modò forma, sed etiam *formalitas* illi formæ proportionata, nisi velimus relicta soliditate rerum evanescere in inanitates & abstractiones. Deinde sicut forma est res, ita & *formalitas* est realitas vana: Ergo subtilitas est inducere in formis distinctionem formalem non realem, seu *formalitarum* & non *realitarum*. Sicut igitur unius entis est una forma æquivalens pluribus, ita & una *formalitas* æquivalens pluribus.

Illustravit id totum Sanctus Thomas 1. par. quæst. 76. artic. 3. Rerum enim species differunt secundum perfectum, & minus perfectum; sicut in rerum ordine, animata sunt perfectiora inanimatis, animalia plantis, & homo animalibus: unde Aristoteles comparat rerum species numeris & figuris, in quibus perfectior continet imperfectiorem, & excedit. Sicut ergo pentagonum continet trigonum, & numerus senarius continet ternarium, ita humanitas continet animalitatem & vegetabilitatem; non quidem per aggregationem, ut cumulus lapides, sed per æquivalentiam, ut nummus aureus argenteos; quæ enim sunt distincta in inferioribus, adnuntur in superioribus. Unde in homine eadem simplex *formalitas* est radix discurrendi, sentiendi, & vivendi. At tamen intellectus noster, qui distinguit illa, quæ sunt unum, apprehendit istam simplicem *formalitatem* orō-



eisè quatenus est principium sentiendi; & sic eam vocat *animalitatem*, formatque gradum animalis: deinde illam concipit, ut est principium ratiocinandi, sicque eam vocat *rationabilitatem*; quamvis hæc omnia sint una eadem entitas, solum virtualiter multiplex. Idem dicunt Theologi de attributis divinis, quod scilicet Deus est una simplicissima entitas; imò una in re formalitas, quæ tamen æquivaleret infinitis. Unde ratio nostra concipiens illam quatenus punit, vocat *justitiam*; quatenus parcat, vocat *miserericordiam*, &c. Quamvis in re, ut ait Sanctus Thomas 1. part. quæst. 13. artic. 4. ad 2. *Omniſibus illis rationibus respondeat unum quid ſimplex, per omnia huiusmodi multipliciter & imperfectè repræſentatum.*

## §. III.

*Solvuntur objectiones.*

**O**bj. 1. Animalitas, etiam hominis, distinguitur actu ante mentis operationem ab ejus rationalitate: Ergo datur distinctio actualis formalis inter gradus metaphysicos. Consequentia patet. Probatur antecedens, Illa sunt distincta actu in re, de quibus verificantur contradictoria: Sed de animalitate & rationalitate verificantur contradictoria: Ergo distincta sunt actu in re. Minor patet. Nam de animalitate dicitur, quod est principium sentiendi, de rationalitate, quod non est principium sentiendi, quæ sunt contradictoria. Major verò probatur, Contradictoria non possunt verificari de uno & eodem: Ergo illa, de quibus verificantur contradictoria, non possunt esse actu idem: Ergo debent esse actu distincta.

Respond. Nego antecedens. Ad probationem nego majorem. Ad cujus probationem distinguo antecedens: Non possunt verificari contradictoria de uno & eodem tam secundum rem, quam secundum rationem, concedo; de uno & eodem secundum rem, multiplici ratione secundum rationem, nego. Solutio est S. Thomæ loco citato, in probatione primæ conclusionis. Vel alio modo:

modo: Contradictoria non possunt verificari de uno & eodem, virtualiter multiplici, nego; non virtualiter multiplici, concedo. Ut enim diximus, de uno & eodem nummo aureo dicitur, quod si sumatur prout continet tantum valorem trium librarum, non sufficit ad solvendum debitum; at vero, ut continet valorem sex librarum, sufficit: *sufficit autem, & non sufficere* sunt contradictoria. Similiter de eodem puncto dicitur, quod quatenus incipit lineam, non est finis, quatenus vero finit aliam, est finis: Ergo de uno & eodem virtualiter multiplici possunt verificari duo contradictoria.

Instabis. Animalitas hominis formaliter sumpta est ejusdem rationis, ac animalitas leonis: Sed hæc ex natura sua distinguitur à rationalitate: Ergo & illa.

Respond. 1. Argumentum nimis probaret, nempe non solum formalem, sed etiam realem distinctionem; quia animalitas leonis est realiter diversa à rationalitate.

Respond. 2. Distinguo majorem: Animalitas hominis est ejusdem rationis, ac animalitas leonis, quantum ad munera, quæ illi competunt, secundum quod dicitur animalitas, concedo; quantum ad alia, quæ ipsi conveniunt ratione eminentiæ hominis supra leonem, nego. Id est, formalitas illa, quam in homine vocamus *animalitatem*, continet quidquid est in animalitate leonis; est enim radix sentiendi, dormiendi, vigilandi, manducandi, &c. Attamen in homine habet plura munera, quæ non habet in leone, scilicet quod sit etiam principium ratiocinandi, secundum quod munus dicitur *rationalitas*; & ideo quantum ad hoc, quod est excedere rationalitatem, non est ejusdem rationis in homine & leone.

Urgebis: Ergo falsò dicitur, quod animalitas in homine non est principium ratiocinandi, si unica formalitas est, quæ sentit, & ratiocinatur.

Respond. Nego consequens. Licet enim in homine sit unica formalitas, quæ sentit & ratiocinatur; attamen intellectus potest illam concipere præcisè, ut est principium sentiendi; & sic eam vocat *animalitatem*; & præcisè ut est principium ratiocinandi; & sic eam vocat *rationalitatem*. Patet autem, quod præcisè ut est principium ratiocinandi, non est principium sentiendi; & ideo meri-

id dici potest, quodd animalitas non est formaliter rationalitas, quia exprimit tantum humanitatem, ut est principium sentiendi, & non prout est principium ratiocinandi.

Dices. Quæ habent diversas definitiones essentielles, sunt diversa: Sed animalitas & ratiocinalitas, etiam in homine, habent diversas definitiones essentielles: Ergo sunt diversa. Minor certa est. Nam animalitas definitur, principium sentiendi; rationalitas verò, principium ratiocinandi. Major verò probatur. Definitio explicat naturam rei: Ergo ubi sunt distinctæ definitiones, sunt etiam distinctæ naturæ.

Respond. Distinguo majorem: Quæ habent diversas definitiones essentielles, sunt diversa, vel actu, vel æquivalenter, concedo; actu semper, nego. Quod enim æquivalens pluribus, potest facere, quidquid facerent plura, si adessent, ac proinde diversis nominibus exprimi, diversis definitionibus explicari, & diversis conceptibus attingi.

Replieabis. Ubi sunt diversæ operationes, ibi debent esse diversa principia talium operationum: Sed animalitas & rationalitas sunt principia diversarum operationum: Ergo sunt inter se diversa. Major videtur certa. Quia principia cognoscuntur per suos effectus, suasque operationes, sicut arbor per suos fructus. Minor verò constat. Nam animalitas est principium sentiendi; rationalitas verò ratiocinandi. Sentire autem & ratiocinari sunt diversæ operationes,

Resp. Solutione sæpius data: ubi sunt diversæ operationes, sunt diversa principia, diversitate actuali, nego; diversitate virtuali, concedo. Nam sicut idem truncus sufficit ad varios ramos, ita idein principium virtualiter tantum multiplex ad varias operationes.

Objic. 2. & simul instabis contra datam solutionem. Ea, per quorum unum res convenit cum aliis, & par aliud differt ab illis, non sunt unum & idem: Sed per animalitatem homo convenit cum brutis, per rationalitatem verò differt ab illis: Ergo non sunt unum & idem.

Respond. Argumentum nimis probare. Probaret enim, nullam dari simplicem formalitatem: quia nihil adeo simplex est, quod aliquo modo non conveniat cum aliis rebus, & aliquo modo non differat ab illis. Unde si per idem

idem res non potest convenire & disconvenire, sequitur etiam simplicissimam formalitatem esse distinguendam in alias duas, & utramque iterum in alias duas, & sic in infinitum.

Respond. 2. Præter solutiones jam datas, quæ huic argumento aptari possent, distinguo majorem: Ea, per quorum unum res convenit cum aliis, & per aliud differt ab illis, non sunt unum & idem, eodem modo sumptum, concedo; diversimodè sumptum, nego. Nam eadem simplex entitas, quatenus sumitur uno modo, potest convenire cum aliis; & quatenus sumitur alio modo, potest ab illis differre. Sic igitur humanitas sumpta, ut est principium sentiendi, convenit cum brutis; sumpta verò ut est principium ratiocinandi, differt ab illis.

Obj. 3. De ratione partis est, ut à comparte distinguatur: Sed animalitas & rationalitas sunt partes naturæ humanæ: Ergo ab invicem distinguuntur.

Resp. Distinguo minorem: Animalitas & rationalitas sunt partes naturæ humanæ, partes realiter, nego; partes secundum rationem, concedo. Ut enim dicit S. Thomas, ex animali & rationali componitur homo, non sicut ex duobus rebus, aut compositis; sed sicut ex duobus conceptibus tertius conceptus. Unde non distinguuntur secundum rem, sed solum secundum rationem & conceptum.

Instabis. Partes metaphysicæ sunt reales: Sed animalitas & rationalitas sunt partes metaphysicæ hominis: Ergo sunt reales.

Resp. Distinguo majorem & sunt reales, quantum ad entitatem, concedo; quantum ad distinctionem, nego. Id est, partes metaphysicæ dicunt quidem aliquam naturam realem, sed tamen non semper exigunt, ut illa natura realis sit secundum rem divisa in utramque partem, sed sufficit dividi per intellectum.

Urgebis. Si animalitas & rationalitas sunt unica formalitas à parte rei, quid igitur nos eam concipimus per modum compositi metaphysici ex animalitate & rationalitate, & non potius per modum cujusdam simplicis entitatis utique æquivalentis?

Respond. Id fieri propter conditionem intellectus nostri, qui non percipit intuitivè rerum essentias, sed solum ex effectibus sensibilibus eas colligit. Unde si ex una essentia plures procedant effectus, plures quoque de

Illa format notiones, quas postea componit adinvicem, illaque compositio dicitur *metaphysica*, seu potius *logica*. Sed Angelus, qui videt intuitivè v.g. humanitatem, videt etiam illam esse unicam simplicem formalitatem virtualiter tantum multiplicem, quatenus cum sit una, duo tamen munera præstat, scilicet sentire, & ratiocinari.

Objic. ultimò. Illa distinguuntur actus, quorum unum non est actu aliud: Sed animalitas in homine non est actus rationalitas: Ergo distinguuntur. Major est certa, in tantum enim unum distinguitur ab alio, in quantum non est illud. Minor probatur. Animalitas non est actu id, quod ipsa negat: Atqui animalitas negat rationalitatem: Ergo non est formaliter rationalitas. Probatur minor. Id, quod convenit, negat id, quod non convenit: Sed animalitas in homine est id, quod convenit cum bruto: Ergo negat rationalitatem, quæ est id, quod non convenit cum bruto.

Resp. 1. Argumentum evidenter nimis probare. Probaret enim, nihil in mundo esse simplex, quia nihil est, quod cum alijs aliquo modo non conveniat, & aliquo mo-

Itespond. 2. Nego minorem. <sup>non universaliter</sup> Probationem, nego minorem. Ad cujus probationem distinguo majorem: Id, quod convenit, negat id, quod non convenit, absolute & in ipso subjecto, quod comparatur; nego; respectivè scilicet & in termino, ad quem fit comparatio, concedo. Et ad minorem: Animalitas est id, quod convenit cum brutis, & rationalitas id, quod differt, concedo. Et ad consequens: Ergo animalitas negat rationalitatem, absolute & in ipsa humanitate, nego; respectivè & in bruto, cui humanitas comparatur, concedo.

Explicatur solutio. Ut aliquid dicatur conveniens & non conveniens alteri, non est necesse, ut id, in quo convenit, excludat id, in quo non convenit in utroque extremo comparisonis; sed satis est, ut neget in termino comparisonis, v.g. ut homo conveniat cum brutis per animalitatem, & ab illis disconveniat per rationalitatem: non est necesse, ut animalitas in ipso homine distinguatur à rationalitate, ipsamque neget & excludat; sed satis est, ut talis negatio & exclusio se teneat ex parte ipsius bruti; seu in bruto sit animalitas

line rationalitate, proindeque negans & excludens rationalitatem. Hoc enim ipso, quod in bruto est animalitas sine rationalitate, quantumvis in homine eadem res, imò eadem formalitas sit & rationalitas, & animalitas, attamen illa simplex & unica hominis formalitas negabit convenientiam cum bruto, quatenus deest bruto rationalitas; & tamen dicet cum eo convenientiam, quatenus in eo reperitur animalitas.

Ratio autem radicalis hujus solutionis est, quia prædicata respectiva, cum sint ad alteram, distinctionem & oppositionem desumunt per ordinem ad alterum. Cum igitur *esse conveniens*, & *non esse conveniens* sint prædicata respectiva, eorum oppositio non emendatur semper ex distinctione & oppositione, quæ sit in utroque extremo comparationis, sed solum in termino; & ideo ut idem dicatur conveniens & non conveniens, non requiritur aliqua distinctio in illo, sed satis est, ut ea, quæ in illo sunt identificata, in alio, cui comparetur, sint divisa; seu, ut unum sit sine alio in termino comparationis.

Respond. 3. ~~Solutio totius tris. 22. 1. 2. 3. 4. 5. 6. 7. 8. 9. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100.~~ Solutio totius tris. 22. 1. 2. 3. 4. 5. 6. 7. 8. 9. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100. negat 14, quod non convenit, negat actu semper, negat virtualiter, concedo. Hoc enim ipso, quod in homine animalitas & rationalitas sunt eadem formalitas virtualiter multiplex, secundum unam virtualitatem negat convenientiam, quam dicit secundum aliam. Ut enim sæpius diximus, distinctio virtualis, cum æquivaleat actuali, idem facit, quod illa faceret, si adesset.

## ARTICULUS TERTIUS.

*De Veritate.*

**V**eritas in genere definitur, Adequatio rei & intellectus. Unde inter duos terminos est, quorum utrumque denominat, rem scilicet & intellectum. Res enim *vera* dicitur, quatenus adequatur, aut adequabilis est intellectui; ac rursus intellectus *verus*, quatenus adequatur rebus. Hinc duplex veritas, nempe veritas rei, & veritas cognitionis. Veritas rei est Conformitas, seu Adequatio rei cum intellectu. Hinc *objectiva* dicitur, quod sit in objecto intellectus; item *transcendens*, quod in ente, atque omni ejus differentia includatur. Veritas formalis definitur, Conformitas, seu Adequatio intellectus cognoscentis cum re cognita.

Addi potest & *significativa*, namque Veritas signi, quae est conformitas signi cum re significata. Ad hanc pertinet Veritas locutionis, seu orationis, quae duplex distingui potest. Nam cum oratione, quid de rebus sentiamus, significemus, ea tum ad res, tum ad mentem referri potest. Cum rebus ipsis congruit, *Vera* dicitur. Ad mentem vero relata, cum ipsi concordat, ita ut loquamur, ut sentimus, *Verax* dicitur; sin minus, fallax, ac mendax. De hac nihil hic disputandum occurrit.

Circa Veritatem rei & cognitionis tria quæri possunt.

1. In quo sita sit Veritas rei, seu transcendentalis.
2. In qua mentis operatione sit veritas cognitionis.
3. Quænam prior sit, Veritas rerum, an Veritas Cognitionis.

## PRIMA CONCLUSIO.

**V**eritas rei, seu transcendentalis, est ipsa rei entitas, non præcisè sumpta, sed prout dicit ordinem ad intellectum, præcipuè divinum.

Declaratur conclusio. Et in primis, non esse quiddam distinctum ab ente, constat. Hoc ipso enim, quod res est, verum est, ipsam esse. Unde non alio, quàm se ipsa vera est. Hinc Aristoteles 2. Metaph. cap. 1. *Ut, inquit, unumquodque est, ita & verum est.*

Quod autem veritas non sit præcisè rei entitas, constat. Ens enim, ut ens præcisè nihil aliud exprimit, quàm actum essendi. Veritas verò aliquid præterea dicit, non quidem aliam entitatem, quia enti nihil addi potest, cum omnia complectatur; sed eandem, ac ens ipsum cum ordine ad aliquid.

Quod verò ratio veri accipiatur per ordinem ad intellectum, ex eo probat S. Thomas, quod veritas propriè, & per se primò competat intellectui, ut sanitas propriè, ac primò competit animali. Unde, ut cætera denominantur *sana*, quatenus habent ordinem ad animal; ita & *vera*, quatenus dicunt ordinem ad intellectum. Cum autem intellectus objectum sit ens, hinc sequitur, verum dici de omni ente, quatenus nullum est, quod intellectui comparari non possit.

Demum veritatem rei præcipuè sumi per ordinem ad intellectum divinum, egregiè sic probat S. Thomas 1. par. q. 16. a. 1. *Res ad intellectum aliquem potest habere ordinem vel per se, vel per accidens. Per se quidem habet ordinem ad intellectum, à quo dependet secundum suum esse. Per accidens autem ad intellectum, à quo cognoscibilis est. Sicut si dicamus, quidam domus comparatur ad intellectum artificis per se; per accidens autem comparatur ad intellectum, à quo non dependet. Judicium autem de re non sumitur secundum id, quod inest ei per accidens, sed secundum id quod inest ei per se. Unde de unaquaque res dicitur vera absolute secundum ordinem ad intellectum, à quo dependet. Et inde est, quod res artificiales dicuntur vera per ordinem ad intellectum nostrum. Dicitur enim domus vera, quæ assequitur similitudinem formæ, quæ est in mente artificis. Et dicitur oratio vera, in quantum est*



## 298 IV. Par. Philosoph. Disp. I. Q. III.

*signum intellectus veri. Et similiter res naturales dicuntur esse vera, secundum quod assequuntur similitudinem specierum, quae sunt in mente divina. Dicitur enim verus lapis, quia assequitur propriam lapidis naturam secundum pra conceptionem intellectus divini.*

Obj. contra primam partem. Verum dicitur etiam de non ente nam ut verum est, quod est esse; ita verum est, quod non est non esse: Ergo non consistit in entitate rei.

Resp. Distinguo consequens: verum non consistit in entitate rei, verum entis realis, nego; verum non entis, subdistinguo: non consistit in entitate reali, concedo; in entitate rationis, seu apprehensi à ratione, nego. Nam non ens, seu negationes & privationes, apprehendimus per modum entis. Et sic verum dicitur *non esse, quod non est*; quatenus apprehendimus *non esse* per modum alicujus, ut vel ex ipso modo loquendi constat, cui veritatem attribuiamus, quatenus concordat iudicio neganti. Ita Sanctus Thomas 1. par. quæst. 16. ar. 2. & quæst. de Verit. art. 2. ad 7.

Obj. contra alias partes. S. Augustinus lib. 2. Soliloquiorum, cap. 5. rejicit hanc veritatis definitionem, *verum est, quod ita se habet, ut videtur cognitori, si velit & possit cognoscere*, quia sequeretur, nihil esse verum, si nullus posset cognoscere; ac illam ut legitimam statuit, *Verum est id, quod est*: Ergo veritas rei non consistit per ordinem ad intellectum, sed ipsi competit per se, quatenus scilicet assequitur propriam naturam. Unde veritas rei ab aliquibus definitur, *Conformitas rei cum suis intrinsecis principiis*; & ab Avicenna, *Uniuscujusque rei proprietas sua esse, quod stabilitum est ei.*

Resp. Cum S. Thomas 2. par. quæst. 16. art. 1. S. Augustinum loquitur de veritate rei, à cujus ratione excludit comparationem ad intellectum nostrum, ad quem comparatur per accidens, non tamen ad divinum, à quo per se pendet. Nam, ut ipse definit lib. de Vera Religione, cap. 36. *Veritas est summa similitudo principii, quae sine dissimilitudine est.* Porro intellectus Dei est principium rerum. Cum vero dicit, *Verum est id, quod est*, definit veritatem secundum id, quod est in ea, ut fundamentale, & non secundum id, quo ratio veri completur, ut exponit S. Thomas q. 1. de Veritate art. 1. ad 1.

Atque inde conciliari possunt variae Veritatis definitiones. Nam quæ nullum respectum ad intellectu

Quam

Quam includunt, eam solam explicant fundamentum veritatis, ut quæ in objectione relatæ sunt. At quæ ordinem ad intellectum includunt, explicant id, quo ratio veri completur. Ut enim in medicina virtus ejus est fundamentum denominationis *sani*; habitudo verò ejus ad sanitatem animalis est formalis ratio, cur sana dicatur. Ita veritas rei duo importat, unum ut fundamentum, scilicet entitatem rei; alterum ut complementum & propriam rationem, nempe ordinem ad veritatem, quæ est in intellectu. Unde Ens, ut sic, verum est, nempe fundamentaliter, quatenus est id, quod est. Quodlibet verò ens particulare verum est, eisdem fundamentaliter, quatenus *esse* proprium, ad quod tendit, assequitur; falsum verò, quatenus ab eo deficit: ut Aurichalcum est falsum, aurum, quia à natura auri, ad quam videtur accedere, deficit: est tamen verum Aurichalcum, quia hanc metalli speciem assequitur. Eodem sensu veritas rei principiata, nempe fundamentalis, potest dici conformitas rei cum suis principiis intrinsecis. Hæc tamen definitio particularis est: quia non omnis res vera principiata est, ut Deus, qui est summè verus. Ac rursus principia ipsa vera sunt, nec tamen per conformitatem ad alia principia, aliàs abiretur in infinitum. Et si dicas, vera esse, quatenus rem veram nata sunt constituere, jam erit circulus; quippe res vera erit, quia veris constat principiis; vera principia, quia veram rem constituunt.

**Instabis.** Veritas fundamentalis est ipsa veritas transcendentalis: Ergo hæc non consistit in habitudine ad intellectum, sed in ipso *esse* rei præcisè, seu in assecutione principiorum rei.

**Respond.** Distinguo veritas fundamentalis est ipsa veritas transcendentalis, si præcisè sumatur pro ipsa entitate fundante, nego; sic enim est solum propriè ens, ac nondum veri rationem exprimit: si sumatur, ut aliquo modo relata ad intellectum, concedo; tunc enim incipit exprimere ens aliquâ ratione, qua verum dicitur, & non solum ens.

**Urgebis.** Intellectus dicitur *verus* ex ordine ad rem. Ergo si res item dicatur *vera* ex ordine ad intellectum, erit circulus vitiosus in explicanda veritatis ratione.

**Resp.** Distinguo antecedens: intellectus dicitur *verus* ex ordine ad rem, ut veram, nego; ut res est, con-

concedo. Intellectus enim dicitur *verus*, non quatenus ejus veritas est conformis veritati rei, sed quatenus ita judicat, rem esse, ut est. Unde oratio dicitur *vera*, aut *falsa*, non ex eo, quod res vera est, sed præcisè ex eo, quod res est, aut non est, ut ponderat S. Thomas 1. part. qu. 1. 6. art. 1. ad 3. Et ideo veritas per se primò comperit intellectui, cum quadam tamen connotatione ad res intellectas. Res autem dicuntur *vera* ab ordine ad veritatem, quæ est in intellectu, cui natæ sunt conformari & obijci: sicut sanitas per se primò competit animali, idque sæpe dependente à virtute medicinæ, à qua causatur; medicina verò *sana* dicitur, quod hanc sanitatem causare nata sit. Et in hoc nullus est vitiosus circulus.

Institres. Cum aurifex aurum examinat, non inquit, an sit conforme intellectui, sed ex sono, pondere, colore, ductilitate rimatur, an in eo sint veri auri principia: Ergo in illis veritas rei consistit.

Respond. Distinguo consequens: veritas fundamentalis, quam solam inquit aurifex, concedo; veritas propriè dicta, nego. Hæc enim propriè, ac primò est in intellectu, & ex eo derivatur ad alia. Videtur tamen aliquando *veritatis* nomen extendi paullo latius, ac quandoque veluti metaphoricè dici. Nam cum propriè sit adæquatio rei & intellectus, aliquando quævis adæquationis mensuræ & mensurari *veritas* dicitur, ac ipsa mensura etiam *veritas* nuncupatur. Sic rectitudo moralis & æqualitas iustitiæ, *veritas* dicitur; immò ipsa lex. Psal. 148. *Omnia mandata tua veritas, & Lex tua veritas.* Joan. 21. *Quia facit veritatem, venit ad lucem.* Eo sensu videtur usurpari *veritas*, cum vera effigies dicitur, quæ adæquatur suo prototype. Immo cum dicitur *vera gemma, verum aurum, vera moneta*; quamquam & in his ratio veri possit derivari ex quadam habitudine ad intellectum, quam fundare nata sunt. At si quis contendat, hæc & alia *vera* dici absque ulla habitudine ad veritatem intellectus, dicendum eo sensu censerì solùm vera quasi metaphoricè, ut mens dicitur metaphoricè *sana*. Ceterùm veritas propriè dicta est in intellectu, & in rebus per ordinem ad ipsum.

SECUNDA CONCLUSIO

**V**eritas formalis, seu cognitionis propriè non est in prima mentis operatione, scilicet apprehensione, sed solum in secunda, nempe iudicio affirmante, aut negante.

Ita S. Thomas 1. p. qu. 16. a. 2. ubi notat, veritatem duobus modis posse esse in intellectu. 1. Materialiter, ut in quadam re vera. 2. Formaliter, ut in cognoscente & exprimente veritatem. Priori modo veritas est etiam in prima mentis operatione, immò in sensibus, in quantum id, quod percipiunt, est conforme objecto. Sed secundo modo est solum in iudicio, quo intellectus hanc conformitatem iudicando determinat & enuntiat.

Probatur ratione S. Thomæ. Cum veritas propriè sit adæquatio rei & intellectus, in ea solum operatione propriè est, quæ hanc adæquationem exprimit & enuntiat, ut constat ex terminis: Sed sola secunda operatio hanc adæquationem exprimit & enuntiat; prima enim apprehendit quidem aliquid de rebus, at illud ipsis non attribuit, nec esse illis conforme pronuntiat, sed hoc spectans ad iudicium, quo mens determinat, hoc illi inesse: Ergo propriè veritas est solum in secunda mentis operatione, seu iudicio. Unde quandiu mens abstinet se à iudicio, nec vera, nec falsa dicitur, nec ipsæ idem & termini falsi, aut veri dicuntur; sed solum iudicium & propositio illud exprimens. Ex quo confirmari potest conclusio. Cum enim veritas & falsitas opponantur, unum est utriusque subjectum: Sed falsitas solum locum habet in iudicio mentis, cum rei disforme est: Ergo & veritas propriè dicta.

Confirmatur amplius. Ut enim acutè arguit S. Thomas Quæst. 1. de Veritate, art. 2. cum veritas sit maxime propria intellectui: in eo solum propriè reperitur, quod est maxime proprium intellectui; Sed simplex rei perceptio non dicit aliquid proprium intellectui, nam & sensus res percipiunt; & cum intellectus solum rem percipit, nihil habet nisi formam rei, quæ etiam in re ipsa reperitur: at cum iudicat, tunc incipit habere aliquid sibi maxime proprium, & quod rebus, ut sunt in seipsis, commen-

surari exigit, nempe actum iudicii, quo determinat, hoc esse in re. Nam hic actus exercet actualem respectum ad rem, ut ex terminis, qui respectus si sit adæquationis propriè veritatem habet; sin minus, falsitatem: Ergo veritas propriè dicta est in iudicio solo.

Obji. Veritas formalis est conformitas intellectus cum re intellecta: Sed apprehensio aliquando est conformis rebus, ut cum definitionem rei apprehendo, aliquid conforme rei apprehendo: Ergo in apprehensione est formalis veritas.

Respond. Distinguo maiorem: veritas formalis est conformitas intellectus cum re intellecta, conformitas expressa, & per se importata in ipso actu intellectus, concedo; per accidens ei adjuncta, sed nec expressa, nec importata in vi actus, nego. Et distinctione applicatâ minori, nego consequentiam. Explicatur solutio, quæ est Cajetani super art. 2. q. 16. 1. part. Conformatio ad rem duobus modis in actu intellectus invariari potest. Primò, materialiter, & per accidens, ut aliquid per se nec importatum, nec expressum à tali actu. Secundò, ut per se expressa & importata in ipso actu. Primo solùm modo reperitur conformitas ad rem in apprehensione. Nam apprehensio & terminus apprehensionis nec exprimunt, nec per se important aliquem respectum. Cum enim apprehendo album, aut animal rationale, eo actu nullum ad ullam rem respectum exprimo, nec an idea hæc sit alicui conformis, aut difformis cogito: unde per accidens est, ut sit alicui conformis, aut difformis: Et ideo hic actus, seu intellectus exercens hunc actum, cum nullum ad res exprimat, aut importet respectum, formaliter nec conformis, nec difformis; adeoque nec verus, nec falsus dicitur. At secundo modo conformitas, aut difformitas reperitur in actu iudicii: Cum enim mente judico, parietem esse album, hominem esse animal rationale; ille actus per se & ex propria ratione exercet & importat respectum æqualitatis, aut inæqualitatis ad rem, quæ est extra intellectum; & ideo per se & ex propria ratione veritatem, aut falsitatem importat. Si enim rei, quam respicit, concorder, verus est; sin minus, falsus. Et ideo propriè solùm ac formaliter intellectus verus est, aut falsus, cum in hunc actum prorumpit. Sicut iudex antequam iudicet, quantumvis percipiat litem & momenta utriusque partis, iniquus, aut æquus dici non potest, quia

quia nihil exerceat, quod per se respiciat jus, etque commensurari postulet. At ubi sententiam profert, quod ea per se respiciat rem & jus, tum aut iustum, aut iniquum esse oportet. Hæc paullo fufius, quæ probè intellecta, tum allatum, tum quæ afferri possent, argumenta radicibus solvunt.

### TERTIA CONCLUSIO.

**V**eritas intellectus est simpliciter prior, quàm veritas rerum. At veritas intellectus creati est posterior veritate rerum naturalium.

Declaratur conclusio ex S. Thoma Quæst. 1. de Veritat. art. 2. Et quidem prima pars. Nam, ut ipse inquit, *res non dicitur vera, nisi secundum quod vero intellectui est adequata*: Ergo veritas per posteriorius invenitur in rebus, per prius autem in intellectu. Nempe in illo, ad quem per se res comparantur, scilicet Divinum.

Secundum verò partem egregiè sic explicat. *Res aliter comparatur ad intellectum prætium, aliter ad speculativum. Intellectus enim prætius causat res: unde est mensura rerum, quæ per ipsum fiunt. Sed intellectus speculativus, qui accipit à rebus, est quodammodo motus ab ipsis rebus, & ita res mesurant ipsum. Ex quo patet, quod res naturales, ex quibus intellectus noster scientiam accipit, mesurant intellectum nostrum: Sed sunt mesurata ab intellectu divino, in quo sunt omnia creata; sicut omnia artificata in intellectu artificis. Sic Ergo intellectus divinus est mensurans, non mesuratus; res autem naturalis mesurans & mesuratae. Sed intellectus noster est mesuratus, non mesurans quidem res naturales, sed artificiales tantum. Res ergo naturalis inter duos intellectus constituta secundum adæquationem ad utrumque vera dicitur, secundum enim adæquationem ad intellectum divinum dicitur vera, in quantum implet hoc, ad quod est ordinata per intellectum divinum, secundum autem adæquationem ad intellectum humanum dicitur res vera, in quantum nata est de se formare veram astinationem: sicut & contrario res falsa dicuntur, quæ nata sunt videlicet, quæ non sunt, aut qualia non sunt, ut dicitur 5. Metaph. Primo autem ratio veritatis per prius inest rei, quàm secunda; quia prior est comparatio ad intellectum divinum, quàm huma-*  

De

## De Falsitate.

CUM falsitas veritati opponatur, colligitur, eam consistere in disformitate rei & intellectus; ita ut si res deficiat in conformitate intellectus, à quo originatur & regulatur, *falsa* dicatur: ut v.g. si moneta fabricetur deficiens à regulis monetæ, quas intellectus principis præscripsit, *falsa* dicitur. Et si quædam res naturales possent deficere ab idea, quam de ipsis habet divinus intellectus, dicerentur simpliciter *falsa res*. Unde actus liberi, ut peccata, qui deficiunt ab ordine legis æternæ, seu intellectus divini, passim in Scriptura dicuntur *falsitates* & *mendacia*. Intellectus verò, qui dependet à rebus, dum ab ipsi deficit in iudicando, *falsus* dicitur: ut si iudicet, Petrum ægrotare, cum non ægrotat; aut, nullos Antipodas esse, qui tamen re ipsa existunt, Secundum quid tamen aliqua ab intellectu nostro non dependentia dicuntur *falsa*, quatenus licet in se sint entia, ac proinde simpliciter vera, *apta tamen sunt apparere, aut qualia non sunt, aut qua non sunt, ut umbra, pictura & insomnia*. Hæc enim sunt quidem aliquid, sed non sunt ea, quorum faciunt existimationem, ut inquit Aristoteles 3. Metaph.

Falsitas formalis in solo iudicio reperitur, quia, ut supra explicui, solum iudicium per se includit respectu ad res. Attamen aliqua minus propriè dicta falsitas, & in sensu & in apprehensione intellectus reperitur, quatenus sensus defectu quodam aut organi, aut medii, aut objecti, non rectam objecti speciem recipiens, ac ad intellectum referens; dat ei occasionem falsi iudicii. In apprehensione verò intellectus, quatenus et admiscetur aliqua compositio, idque duobus modis. Primo quatenus intellectus definitionem unius attribuit alteri. Secundo, quatenus in definitione rei admiscet aliquod attributum repugnans, ut si dicat, Animal rationale quadrupes.

## ARTICULUS QUARTUS.

## De Bonitate.

**B**onitas definitur ab Aristotele, *Quam omnia appetunt*. Quæ definitio non sic accipienda est, ut nihil sit bonum, nisi ab omnibus appetatur; sed quia quidquid appetitur, quatenus appetitur, bonum est. Unde quia omnia appetunt esse, ideo ens dicitur bonum. Circa bonum tria querimus. Primum quid sit. Secundò quotuplex sit. Tertiò quibus conveniat.

Dico 1. Bonum est ipsum ens, prout dicit ordinem conformitatis ad voluntatem, præcipuè divinam.

Et in primis, quod bonum sit ipsum ens, patet: nam quodlibet ens, in quantum est ens, est bonum; ideoque appetit suam conservationem. Deficit autem à bonitate, in quantum deficit à sua entitate. Quòd verò ens sit bonum, ut dicit conformitatem ad appetitum, constat. Quia bonum idem est, ac appetibile, quod sine dubio importat respectum ad voluntatem. Sed quia divina voluntas est regula cæterarum, quæ in tantum dicuntur bonæ, in quantum concordant cum divina, ideo ens dicitur bonum per ordinem ad voluntatem præcipuè divinam.

Dico 2. Bonum dividitur in transcendens & morale.

Declaratur. Ea enim, quæ appetuntur, quatenus appetuntur præcisè, sunt bona transcendentaliter; quatenus verò appetuntur conformiter ad aliquam regulam, cui subijcitur voluntas appetentis, dicuntur bona moraliter. Unde bonum transcendens est ipsa rei entitas præcisè ut movere potest appetitum. At verò bonitas moralis est ipsa conformitas rei cum regulis morum, scilicet lege æternâ, & rectâ ratione dictante quomodo, & quantum qualibet res sit appetenda, de qua in Morali dictum est.

Dividitur præterea bonum in Utile, Honestum, & Delectabile. Ea enim, quæ appetuntur à natura rationali, vel queruntur, ut serviant alteri, sicut medicina sanitati, & hæc dicuntur *utilia* vel propter se ipsa, & hæc



*hæc dicuntur honesta* ; honestum enim est , quod propter se est appetibile à natura rationali , & rationaliter appetente . Unde definitur ab Aristotele lib. 2. Rhet. cap. 9. *Quod cum per se eligibile sit , laudabile est à Cicerone* verò lib. 2. de finib. *Quod tale est , ut detractâ omni utilitate , sine ullis premiis , fructibusque per se ipsam possit jure laudari ; nempe præcisè , quia decet , & congruit rationi ac legibus ab ea constitutis .* Demum quatenus quiescant appetitum per sui fruitionem , dicuntur *delectabilia* ; nam delectatio est quies in bono possessio . Quia tamen appetitus irrationaliter agens in quibusdam jucundè quiescit , quæ minimè honesta sunt , ideo delectabile latius patet , quàm honestum .

Dico 3. Bonum convenit rebus in ordine ad existentiam . Unde res non dicuntur bonæ , nisi ut dicunt ordinem ad existendum ; ideoque possibilia ; præcisè ut passibilia , non sunt bona .


Probatior conclusio , quæ est communior inter auctores . Bonum enim est , quod perficit appetitum : Sed appetitus non perficitur à rebus , nisi quatenus possidentur & existunt : Ergo res non sunt bonæ , nisi per ordinem ad existentiam . Major patet . Minor probatur , tum ratione , tum inductione . Ratione quidem , quia in hoc differt intellectus à voluntate , quod intellectus trahat res ad se , ideoque abstrahit eas ab existentia , quam habent in se : at verò voluntas trahitur ad res ipsas , ideoque tendit in eas , ut se existentes . Inductione etiam idem suaderetur . Voluntas enim avari , v. g. non perficitur à divitiis , nisi possessor & existentibus . Nec infirmus juvatur à sanitate , nisi quatenus eam realiter possidet : unde voluntas non amat sanitatem & divitias ut possibiles præcisè , sed ut acquirendas , ac proinde in ordine ad existentiam .

Confirmatur . Bonum habet rationem finis : Sed finis dicit ordinem ad existentiam , movet enim ad sui affectionem , quæ affectio non est sine existentia : Ergo , &c. Deinde voluntas movet ad executionem , intellectus verò movet solum specificativè : unde id , quod terminat intellectum , debet solum esse specificatum ; sed id , quod movet & terminat voluntatem , debet cadere sub executionem , ac proinde dicere ordinem ad existentiam .

Circa malum , cum sit oppositum bono , sequitur ,  
ipsum

ipsum esse duplex, scilicet morale, & metaphysicum. Malum metaphysicum est privatio entitatis debitæ; ut si oculus desit homini, si pes, si sanitas, si virtus, &c. huiusmodi privatio dicitur *malum metaphysicum*. Malum verb morale consistit in deformitate ad regulas morum, ut si homo occidat innocentem, si rapiat aliena, huiusmodi actio est malum morale; quia discordat à regulis morum, scilicet recta ratione, cum divinâ, cum humanâ. Utrum autem illa deformitas sit respectus positivus, vel pura privatio, non est præsentis loci disputare, sed id ex professo discutitur à Theologis. Dividi præterea potest malum in nocivum, quod opponitur utili; turpe, quod opponitur honesto; & dolorificum, quod opponitur delectabili; de quibus omnibus spectatim dicere non est necesse.





## DISPUTATIO SECUNDA

*De Ente Spirituali, seu de Rebus  
à materia re ipsâ abstractis.*

**R**ES Spirituales, seu à materia re ipsâ abstractas dicuntur, quæ non sola mente concipiuntur, sed re ipsâ existunt ab omni materia separatas. De his parcius agemus, quod illæ ad Theologiam, quam hîc tradere non institumus, maximè pertineant. Itaque disputationem quatuor his complectemur Quæstionibus. 1. De Deo. 2. De Angelis & Anima rationali separata. 3. De influxu Dei in causas secundas. 4. De Accidentibus spiritualibus.

---

 QUÆSTIO PRIMA

*De Deo.*

**Q**UÆ de Deo naturali lumine investigari queunt, ea sunt, in primis ejus existentia; deinde quedam ejus attributa. De his agemus duobus articulis.

AR.

ARTICULUS PRIMUS.

De exsistentia Dei.

**D**Eus concipitur ens à seipso, à quo cætera dependent & procedunt, & in quo consequenter reperitur tota essendi plenitudo, ut in primo fonte. Dari omnes nationes farentur, dum ipsum adorant, invocant, & cæris ritibus colunt, qui cultus dicitur *Religio*. Immo ipsa natura fundamentalem hanc veritatem inscruit menti, quam ideo vocat Cicero, *Anticipationem naturæ*, quia sine doctore, sine more, sine lege omnibus nota est. Hanc tamen cognitionem quædam gentes immani stupiditate & feritate ad bruta declinantes in seipsis opprimunt; & in pollicioribus populis quidam impietate propria excæcati ita obruunt, ut sibi persuadeant, non dari Deum impietatis ultorem, ne illum timere cogantur. Sed magnum divinitatis testimonium est, ut ejus notitia nonnisi cum humanitate & virtute ab hominibus exuatur. Dubitari solum potest, utrum exsistentia Dei, ut in mentibus nostris naturaliter indita est, sic rationibus quoque demonstrari possit, hisque ita efficacibus, ut convincant intellectum rectè dispositum.

C O N C L U S I O.

**E**Xsistentia Dei naturaliter demonstrari potest. Ita tenere famosiores antiquitatis Philosophi, & tenere debent omnes Catholici, cum dicat Apostolus, *Invisibilia Dei per ea, quæ facta sunt intelligi*. Et reprehendantur Sapient. 33. *Qui de his, quæ videntur bona, non potuerunt intelligere eum, qui est; nec operibus attendentes cognoverunt, quis esset artifex.*

Conclusio non aliâ viâ stabiliri potest, quàm adducendo demonstrationes, quæ naturali lumine haberi possunt de Dei exsistentia. Porro eas reduci solent ad quinque capita, juxta quinque præcipua attributa, sub quibus Divinitas nobis innotescit. Hæ sunt, ratio primi Motoris immobilis, ratio Primæ causæ, Entis necessarii, item Entis perfectissimi, & demum ratio supremi Mundi Gubernatoris. Si demonstremus, esse in mundo naturam aliquam has quinque dotes obtinentem, res confecta est.

Inimò si vel una ex his probè stabilitur, statim cæteræ consequentur: Neque enim esse potest primus motor immobilis, quin statim sit prima causa; nec prima causa, quin sit à se necessariò, &c. Age igitur hæc præclarissima rationis humanæ de Divinitate testimonia tantisper attingamus, quibus addemus aliquas confirmationes, ac postremò confutationum objectionum, quibus Athei conantur tam fulgida lumina obscurare.

*Demonstratur existentia Dei sub ratione primi Motoris immobilis.*

**N** Emini dubium est, & nos & ea, quæ circa nos sunt, mutationi obnoxia esse, id est, non uniformiter perseverare in suo esse, sed ab uno efficiendi modo ad alium transire. Ex hoc notissimo phænomeno, cui tota Physica incumbit, quod unicum est omnium, quæ in natura conspiciuntur, exploratissimum, hoc pacto erui potest existentia primi Motoris immobilis.

Datur in natura fons, & principium omnium mutationum, quæ in rebus cernuntur: Sed fons ille debet esse Primus Motor immobilis: Ergo datur Primus Motor immobilis. Major est certa. Cum enim videamus ad oculum, mutationes illas procedere ab una re in aliam, ut ab anima procedit motus in manum, à manu in baculum, à baculo in lapidem, &c. necesse est, istius, ut ita dicam torrentis, quo cuncta abripiuntur, extare fontem & causam: cum etiam per se notum sit, nihil fieri sine causa. Minor verò; in qua notum negotium positum est, duo dicit, fontem illum debere esse primum aliquod movens; & præterea primum illud movens deberet esse immobile, quibus semel demonstratis, res omnino confecta censetur.

Probatum ergo prima pars. In moventibus & motis, seu quod idem est, in mutantibus, & mutatis non potest procedi infinitum: Ergo fons motus & mutationis necessariò collocandus est in aliquo primo movente. Consequentia patet ex terminis: quippe illud, in quo sistitur processus, est primum movens. Antecedens probatur tripliciter. Primb, in moventibus motis subtracto primo medium non movet; etenim non movet, nisi quia movetur, id est, quia supponit aliquid prius, à quo motum sit: Atqui si procederetur in infinitum, omnia essent moventia mota,

&

& nullum haberet simpliciter rationem primi moventis; Ergo nunquam movere possent: Ergo extra totam collectionem moventium motorum oportet esse aliquid movens non motum ab alio, id est, primum movens. Et certè si tota collectio sit mota ab alio vitare nequit, quin si nihil aliud sit præter collectionem, dicatur mota ab eo, quod non est, quod palam repugnat.

Secundò. Causa instrumentalis non movet nisi mota à principali, utpote cum de ejus ratione sit, ut agat in virtute principalis: Sed si procedatur in infinitum in moventibus motis, omnia erunt instrumenta motus, & nulla ejus principalis causa: Ergo impossibile est, ut procedatur in infinitum in moventibus motis, ita ut non assignetur extra illa aliquid per se movens principaliter. Declaratur minor. Etenim id, quod movet motum, se habet in motu, ut instrumentum ejus, à quo movetur, ut moveat: Ergo si omnia sint moventia mota, & nullum movens ab alio non motum, omnia erunt instrumenta, & nulla causa principalis.

Tertiò demum. Movens motum non se habet, nisi ut medium, & ut canalis deferens motum, & magis ut mobile, quàm ut movens: Ergo vel assignandus erit fons motus, à quo primò deriveret in illos, quasi canales, & respectu cujus tota illa multitudo se habebit, ut unum mobile; vel fatendum est, aliquid esse mobile, quod moveatur sine motore, & canalem, qui fluat sine fonte in illum influente: quæ tam repugnant, quàm, ut vulgè ajunt, esse baculum sine extremis, & montem sine valle.

Dici tantùm posset, Aristotelem admittendo generationes ab æterno, debuisse admittere processum in infinitum in generantibus genitis.

Sed faciliè responderetur, Aristotellis positionem nihil ob stare ratiociniis jam factis: quippe quorum vis posita est non in eo, ut esse nequeant infinita generantia genita, & moventia mota; sed in eo, ut præter illam multitudinem, seu finitam, seu infinitam, moventium motorem oporteat esse aliquem fontem motus, qui ab alio illum non accipiat, & huic multitudini communicet. Et certè si repugnat, esse unum, aut duo mota, quin statim sit aliquid præter illa, à quo moveantur; à fortiori repugnat, esse infinita moventia mota, nisi præter illa sit aliquid aliud, à quo infinita illa multitudo constituatur in motu,

exciteturque illud, ut ita dicam, commercium, quod est in accipiendo, & dando motum. Unde confugiendo ad infinita moventia mora Athel non vitant necessitatem primi motoris, sed magis commendant motus ab eo derivati efficaciam, quod potuerit in infinita propagari.

Probatur verò secunda pars minoris principalis, nempe primum illum Motorem debere esse immutabilem. Omne, quod mutatur, ab alio mutatur: Sed primus ille motor ab alio mutari nequit: Ergo est prorsus immutabilis. Minor patet ex terminis. Neque enim esset primus motor, si priorem supponeret, à quo mutaretur. Major verò nobis demonstrata fuit in fine Physicæ. Et præterea manifesta est, tum experientia, qua videmus mobilia quiescere, donec aliquid in eis motum excitet. Tum communis animi notione, qua notum habemus, inter movens, & mobile esse relationem & subjectionem, quatenus id, quod mutatur, dependere censetur à suo motore; patet autem non esse relationem, dependentiam, ac subjectionem ejusdem ad se ipsum. Tum demum ex ipsis fontibus mutationis. Etenim per se subjectum mutationis est potentia privata actus; at verò per se causa efficiens mutationis est actus. Patet autem, quod privatio actus non potest esse per se actus, & causa efficiens actus, aliàs non esse eficeret esse: ergo necessarib distingi debet movens à mobili, seu causa efficiens mutationis ab ejus subiecto.

Atque exinde confutata manet responsio, quæ peti posset ex fontibus Scoti; nempe in eo, quod mutatur, posse esse virtutem mutationis causativam, ut in pipere est virtus causativa caloris. Utut enim se habeat hanc in partem opinio Scoti, non enervat vim nostri argumenti; quippe semper oportet, illam virtutem esse re ipsa distinctam à subiecto, quod transmutat. Unde vel illa virtus, quæ supponitur primus fons mutationum, est etiam per se mutabilis, vel non. Si non est mutabilis, jam tenemus id, quod quaerimus, nempe motorem immutabilem, solumque discutiendum supererit, an illa virtus Primo-motrix Immobilis sit accidens, vel substantia; subsistens, vel recepta, &c. Si autem illa virtus motrix sit rursus mutabilis, jam oportebit, eam comparari ad aliam prio-

priorem, ut subjectum transmutabile ad suum transmutativum.

Unicum effugium superesse potest Atheis adversus efficacissimum hocce ratiocinium, nempe illud quidem satis demonstrare inesse rebus fontem quendam motus, ac mutationum: at illum non esse Deum, sed aut naturam, ut vult Plinius; aut elementa, ut vult Empedocles; aut quod proprium semper fuit Philosophorum Atheizantium perfugium Atomos, seu particulas infinitas in infinito spatio ab æterno, & in æternum innatâ sibi vi agitatae.

Sed facillè excluduntur ab hoc effugio. In primis enim *natura* vacuum & inane nomen est, nisi determinetur ad aliquam primam naturam moventem. Elementa verò, cum ipsa mutationi, ac generationi obnoxia sint, aliundeque constet ex jam dictis, oportere primum fontem mutationum esse immutabilem, manifestè non possunt esse prima moventia. Porro Atomis, præter quàm quidd sunt magna fabula, etsi darentur, ad summum haberent rationem materiæ, ut lapides respectu donus. Unde præterea oporteret addere causam effectricem rerum, ac moventem illam materiam. Ut meritis Tullius reprehenderit ineptum philosophandi modum Epicuri, qui cum positis infinitis atomis immensam materiam quasi collegerit ad fabricam mundi, causam effectricentem præcipuam prætermisit.

Replicari posset, In Atomis duo esse, molem & gravitatem; quæ duo ita se habent invicem, ut moles quidem sit quasi materia pariens, gravitas verò quasi primum, æternumque hujus materiæ principium movens.

Sed facillè confutatur. Etenim gratis admissâ æternâ gravitate atomorum, hæc esse non posset prinus fons omnium mutationum. Primb, quia cum gravitas sit virtus inherens substantiæ atomorum, non potest esse illis immutabilior, proindeque nec prima virtus movens immobilis. Secundo, quia cum subjectum ex se nequeat se reducere in actum, oporteret assignare causam, quæ ab æterno fecit, ut substantia atomi, quæ ex se est subjectum capax gravitatis, esset actu gravis. Tertio demum, quia oportet



tet, primam virtutem motricem esse fontem omnium moruum, quos in mundo cernimus. Quis autem adeo desipiat, ut sibi persuadeat, vitam, sensum, appetitum, rationem, libertatem, aliosque tam præclaros motus, quos in nobis experimus, oriri ex illa caeca, stupida, mortuaque gravitare? Furor est profecto, furor, negato Deo vivo & vero, quem natura inspirat, ratio demonstrat, totus mundus prædicat, hæc portentosa chimararum loco ejus substituere, illisque absurdissimis principis mentem, sapientiam, omnia bona accepta referre. At impiissimis hominibus hæc pœna debebatur, ut qui optimum patrem, ac principem agnoscere recusant, tam vilibus primis principis se se turpiter subjiciant.

*Demonstratur existentia Dei sub ratione Primæ  
Causæ, Entis necessarij, Entis per-  
fectissimij, Supremi Moderato-  
ris Universi.*

**S**ecunda demonstratio existentia Dei petita ex ratione primæ causæ hoc pacto conscribi potest. Manifestum est, in rerum natura quædam effici, cum antea non essent, id est, accipere esse ab alio, nempe à sua causa effedrice. Etenim nobismet consensimus, nos non semper fuisse, sed ab aliquo præ-existente accepisse esse, quod & idem merito sentire possumus de aliis villioribus animâ nostrâ, nempe tellure, aquâ, igne, immò astris ipsi, ac cœlis quippe cum hæc sint imperfectiora mente, & ratione in nobis ab aliquibus annis extorta & vigente. Atque impossibile est, omnia accepisse esse ab alio, ita ut nihil in mundo sit à se: Ergo deveniendum est ad primam causam incausatam, quæque sit à se, primæque origo essendi. Major patet. Minor ita demonstratur. Quæ habent esse ab alio, non sunt, nisi sit illud aliud, à quo habent esse: Sed si omnia sint ab alio, non est illud aliud, à quo omnia dicuntur esse: Ergo si omnia essent ab alio, re ipsâ nihil esset. Major nota est. Minor declaratur. Etenim non est aliud ab omnibus; non enim diceret *omnibus*, si aliud supponeres præter illa: Ergo si omnia sunt ab alio,

## De Existentia Dei. Art. I. 315

alio, sunt ab eo, quod non est; seu, non est id, à quo supponuntur esse.

Responderi solet nomine Atheorum, omnia quidem divisivè sumpta esse ab alio, non tamen collectivè; ut omnes homines singularim sumptos esse quidem ab alio, ut Rubeam à Salomone, Salomonem à Davide, Davidem à Jesse, Jesse ab Obed, & sic in infinitum procedendo versùs æternitatem; cæterùm ipsum genus humanum à nulla alia causa extra se positâ esse causatum, quia nunquam cœpit.

Sed hæc responsio puerile est effugium, ad quod antiqui illi Philosophi, etiam si qui Deum negavere, non recurrerant; quippe qui omnino persuasum habuere, necessariò admittendum esse in rebus aliquem primum essendi fontem. Primò, quia tota collectio entium ab alio, seu effectuum, est ejusdem rationis, ac singulæ; nihilque illis addit, quàm numerum. Patet autem, quòd numerus effectuum non excludit causam, sed quanto magis multiplicantur effectus, tanto magis urgetur necessitas causæ: Ergo si intelligi nequit unus effectus sine causa, ita nec à fortiori infinita collectio effectuum. Secundò, quòd ex sui ratione dicitur *non esse à se*, nunquam incipit esse, nisi sit aliquid extra illud, à quo *esse* accipiat. Sed ex sui ratione collectio entium ab alio dicitur *ex se non esse*; non enim dicuntur *entia ab alio*, nisi quia ex se non habent, quo sint: Ergo supponit causam, à qua acceperit *esse*. Tertiò, difficilius est esse per totam æternitatem, quàm per annum: Sed ea, quæ sunt ab alio hoc anno, nunquam fuissent, nisi fuisset aliquid extra illa, à quo accipere *esse*: Ergo à fortiori collectio entium ab alio esse non potuit per totam æternitatem, quin fuerit extra illam causa aliqua æterna dans illi non modò *esse*, sed etiam perennem illam essendi successionem. Sicque luce claris demonstratum manet, admittendam esse causam essendi æternam, à qua sint, quæ sunt ab alio, Quod ratiocinium duobus verbis complexus est Propheta regius *Scitote*, inquit, *quoniam Dominus ipse est Deus; ipse fecit nos, & non ipsi nos*. Quasi diceret, ut nos nobis *esse* non dedimus, ita nec ullus unquam hominum. Unde querendus est aliquis generis nostri Author, cui acceptum *esse*, & nos & quicumque fuere homines, debeamus; quippe ob id sit Deus noster.

Tertia Demonstratio petita ex dote entis necessarii sic

breviter conficitur. Impossibile est, ut omnia sint contingentia; cum enim contingens sit, quod possibile est non esse, possibile esset nihil fuisse, immodò nihil esse potuisset, quia quod possibile est esse, non potest sibi dare esse: Ergo oportet, dari in natura immobilem essendi basim, cui necessaridò competat esse; immodò quæ sit ipsum esse subsistens. Non enim ei necessaridò, & à se competeret esse, si esset solum subjectum essendi, & non ipsum esse, quia omnis essendi potentia ab alio existente in actu debet habere esse: ex se enim est privatio esse, quam repugnat esse causam ejus effectricem, aut formalem.

Antiqui Athei videntur ad id respondisse, necessariam illam, æternamque essendi basim non aliam esse, quàm materiam. Verùm cum materia non sit nisi essendi potentia, saltem formaliter in quantum est materia; nisi corresponderet æternæ materiæ, æterna quoque causa efficiens, ac dans illi esse, non esset ab æterno, nisi æterna quadam essendi privatio. Unde hac in parte peccarunt apertissimè contra prima Philosophiæ fundamenta, materia sine causa effectrice sibi proportionata inducentes.

Quarta Demonstratio petra ex ente infinitè perfecto, ita proponi potest. Cum in rebus aliæ aliis perfectiores sint in essendo, ut animalia plantis, homines animalibus, oportet, rem omnium perfectissimam dari, aliàs fieret processus in infinitum in perfectione essendi; immodò sic daretur, infinira res perfecta, quanvis ad eam numerando perveniri non posset. Sed res illa perfectissima est Deus quippe id sibi volunt omnes, qui *Deum* nominant: Ergo datur Deus. Et confirmatur. Etenim cum ea, quæ possunt esse, non sint possibilia, nisi quatenus continentur in existentibus, res perfectissima omnium, cum in alia contineri repugnet, non est aliquid merè possibile, sed necessaridò debet esse existens.

Neque dicas, rem perfectissimam non esse aliquam unam, sed totam rerum summam. Etenim, quia in ipsa summa una res est perfectior alià, oportet, ut gradatio perveniat ad unam in summa perfectissimam.

Quinta demum, eaque illustrissima demonstratio, petitur ex ratione supremi gubernatoris. Hæc dos præcipua est Divinitas, adeo ut cæteris concessis, illa solà negatà, negetur Deus. Quapropter Athei censeri debent illi omnes, qui etsi admittant primum fontem motûs, pri-  
mam

nam causam, ens necessarium, ac perfectissimum, negant tamen, illud esse intellectum prædictum, ac regere naturam, ut Epicurei, & ex Antiquis naturalistis aliqui. Cæterum ut hæc demonstratio magni momenti est, ita non tam humano ratiocinio, quam publico totius naturæ testimonio constat. Quippe per se notum est, iis effectibus præfse summam, perfectamque rationem moderatricem, in quibus relucent omnes agentis perfectissime intelligentis, ac sapientissime universa disponentis characteres. Alias enim, quodd absurdum est, tribueretur effectibus causa, à qua se totis abhorrent; & denegaretur illa cognata ac germana, quam se totis exigunt: Atqui in dispositione mundi, ac effectibus naturæ relucent omnes agentis propter finem characteres: Ergo mundo, & naturæ præsidet causa agens propter finem, id est, sapientissima & intelligentissima. Minor, in qua sola est difficultas, fuit à nobis satis luculenter demonstrata in Physica agendo de Causa Finali, ut nihil necesse sit jam satis inculcata reperere. Vide ibi.

*Adduntur quadam confirmationes, solvunturque objectiones Atheorum.*

**P**Ræter has quinque illustres demonstrationes, exsistentia Dei potest aliis rationibus confirmari; sed aliquas brevitatis causâ indicasse sufficiat.

Prima petitur ex consensu omnium ætatum, ac nationum mundi, ac veluti communi conspiratione in agnoscenda, colendaque Divinitate. Hæcque enim tanta vis tot homines, tam in aliis dissentientes, in hac sententia colligavit, coegitque etiam sapientissimos, & independentiæ avidissimos, ut Divinitatis dominum sponte: constanter, lætique agnosceret, si eorum chimæricum esset? Planè ea alia non fuit, quàm ipsius Authoris naturæ Dei, qui sui notionem omnibus inferuit, ut totius vitæ rationalis præcipuum fundamentum.

Secunda peti potest ex ipsa anima nostra, quam sentimus ratione, sensu, libertateque præditam esse, divinumque aliquid respirare, ac corporibus naturaliter præminere, immodò dum illis jungitur, præsidere ac dominari; nec tamen prorsus independentem esse, sed alicui

subiecti, qui eam effecerit, & corpori alligavit, & legibus quibusdam astrinxerit, &c. Quis igitur est author hujus animæ? Quis eam corpori huic mortali præfecit? Quis alligavit? Quis etiam repugnantem coercet? Quis ei corpus aptavit? Quis subiecit? Quis utrique utriusque tantum amorem inspiravit? An agens irrationale, ac corporeum? At ipsa naturaliter præminet corporibus, repugnatque irrationale rationali essendi, vivendique, atque omnium perfectionum principium esse. Agnoscamus igitur Patrem illum spirituum, & rationis fontem, eumque non mortuum, ac irrationalem, sed perfectissime vivum, ac intelligentem.

Tertio repeti potest ex analogia mundi cum homine. Quippe sapientissime celebrantur Antiqui, *hominem esse mundi quiddam compendium*. Ut igitur anima præest corpori, & ratione sua illud regit, ita par est æstimare, totam hanc molem corporum in unum universum, ut plura membra in unum corpus, adunatam subesse alicui universali rationi. Neque enim ratio nostra regens corpus, tot, tamque insignibus indicibus se proinde prodest extrinsecis, ac ratio illa suprema regens mundum. Quippe nimium felices sumus, si in componendis nostris negotiis, mundi, naturæque ordinem vel longè possumus imitari.

Quarta demum, ne plura accumularem, repeti potest ex illis ipsis, qui Deum ignorant, aut negant. Quippe primi sunt homines stupidi, ac tantum non belluini nam inter omnes politiores populos Divinitatis notitia, & cultus semper florere. Secundi verò sunt homines aut arrabilliosi, & quodam furoris æstro correpti, qui immanem hanc impietatem, ut non vulgaris ingenii audaciam affectant. Aut facinorosi, ac perditissimæ conscientiæ, qui ut omne humanum, divinumque jus liberius violent, extirpatis cæteris æqui, ac boni columinibus, hoc postremum totius bonæ vitæ fundamentum in corde suo subvertere nituntur. Aut scioli quidam re ipsâ inepti, sed usque ad insaniam superbi, ac præidentes, quibus heroicum quoddam facinus videtur certissima quæque audacissime pernegare. Aut voluptuosi, ac vitæ molliæ perditæ, quorum mens sepulta in carne & sanguine nihil divinum potest sapere. Aut demum scurræ, ac ridiculi nebulones, nullius frugi, nullius nisi ad malignas nugas ingenii, toti ad seria & optima quæque fa-

ce-

cetils corrumpenda genti. Ex hac hominum colluvie, ex his humani generis opprobriis emergunt Athei, qui omnes sublato, negatoque Deo, malignè exsultant, ut de quodam egregio facinore, instar seditiosorum civium optimo principe, ac reipublicæ parente obtrectato.

His omnibus addi possent illustres confirmationes ex ordine gratiæ petitiæ. Sed hoc genus argumenti totum Theologicum est, à quo proinde abstinemus; quippe cum ad veritatem tam apertam demonstrandam ea pauca, quæ de fontibus naturæ deprompsimus, sint sufficientissima.

Nunc ad objectiones pergamus. Quamquam infirmæ admodum sunt, quæque nullam aliam vim habent, quàm vel in audacia proponentium, qui ut suas fabulas confidentissimè divendunt, ita quidquid suæ perfidiæ adversatur, pertinacissimè inficiantur; vel certè in imbecillitate audientium, qui innatâ quadam cordis humani improbitate, cum in veris, ac optimis dogmatibus, non nisi multis argumentorum arietationibus desigi valeant; minimo probabilitatis statu in prærupta falsitatem, ac malignarum opinionum facile abripiuntur. Sed ut se habent hæ objectiones, referendæ nobis sunt, ac refutandæ.

Igitur objici potest primò. Res tanti momenti, ut est Deus, non debet induci in rerum natura sine gravissimo fundamento. Malè enim consuleretur libertati hominum, si tantus, tamque terribendus Dominus eorum cervicibus gratis imponeretur. Atqui rationes, quæ Deum probant, esto sint efficaces, non tamen omnino convincentes sunt, quippe videntur solvi posse: Ergo non videtur admittendus.

Secundò. Si existeret Deus summè bonus, nihil malè fieret; non enim summè bonus est, qui mala impedire non vult, aut non potest: Atqui plurima mala sunt: Ergo non datur Deus summè bonus.

Tertiò. Nemo prudens patitur sibi à subditis irrogari injuriam, si prohibere possit: Sed ab impiis, & blasphemis videmus impunè irrogari injuriam Deo: Ergo videtur non exsistere Deus, qui illos coercere possit.

Quartò. Videmus, res humanas pessimè administrari, malos prosperè agere, bonos opprimi, seductores, & hypocritas suum virus latè diffundere, simplices & veraces contemni, &c. Ergo videtur, non esse Deus, qui hæc curet.

Quintò. Si esset Deus, curaret utique homines, neque proinde fineret, eos tot ærumnis miserè confici: Ergo nullus esse videtur.

Sextò. Verus Deus vero suo cultui provideret, ac proinde tot religiones erroneas non permetteret: Atqui innumeræ sunt inter se pugnantes, ac genus humanum miserum in modum discerpentes: Ergo aut Deus non est, aut certè homines non curat.

Hæ, similisque fursutis argumentationes sunt, quas Athei jactare solent, ut invictas demonstrationes. At quis sanæ mentis non vider, puerilia ratiocinia esse, quæque comparatione gravissimarum rationum, quibus stabilitur existentia Divinitatis, nullius prorsus momenti habeantur. Atque ut in singulis, quàm facile confutari possint, ostendamus.

Resp. Ad primum, In primis nullam veritatem, etiam earum, quibus homines maximè confidunt, tot tamque validis argumentis stabiliri, ac divinitatis existentiam. Sed nihil mirum, Atheos eorum vim minimè sentire; quippe qui nihil magis cordi habent, quàm ut ab oculis amoliantur motiva, quibus ad Deum reducti possent; cùm è contra toti sint in exaggerandis iis, quæ sunt perfidiæ tantisper favent. Addo tamen præterea, hominem bonum, ac minimè protervum, etsi essent minus, quàm sunt valida, hæc argumenta, debere iis libenter acquiescere: quia Deus non est aliquid grave & onerosum, ut illi ineptè calumniantur, sed optima, ac convenientissima res, quæ cogitari, ac optari possit, proindeque digna, quam omnes boni cupiunt existere. Sed radix totius mali est, quòd Athei, cum sint pessimi, optimi principis potestatem, ac censuram reformidant, ut rei judicem quantumvis bonum. Atque idcirco nullum non moliuntur lapidem, ut illum recusent. Quàm melius foret, ut omnes boni esse satageremus, atque tales, in quibus nemo bonus quidquam valeret reprehendere. Placere tunc sentiremus Deum, non esse formidalem Dominum, quem nobis expediat non esse; sed magis optimum patrem, quem totis votis nobis præesse cupiamus. Qui sunt hujusmodi facile agnoscunt, quàm validis argumentis stabilita sit Dei existentia.

Resp. Ad secundum decere summum bonum, ut ea mala non impediatur, ex quibus majora bona redundant. Unde nihil mirum, si Deus, licet optimus, non omnia tol-

## *De Exsistentia Dei. Art. I. 321*

tollat, ne majora bona impediat; præcipue, quia ita fere conditio rerum ob originale nihilum.

*Resp. Ad tertium*, Dei sapientiam decere, ut unumquodque regat juxta suam conditionem. Cum igitur homo ex naturæ suæ conditione sit liber libertate defectivâ, oportuit, ut tantisper sibi permitteretur, suâque frueretur libertate, etiam si illâ æffet aliquando abusus in contemptum Dei. Non enim contemptus ille nocet Deo; sed magis suo tempore punitus ejus justitiam commendabit.

*Ad quartum resp.* Res humanas, plerumque malè administrari, quia administrantur ratione humana, quæ plerumque deficit; sed corrigetur suo tempore à ratione divina. Neque interim præjudicium sit bonis, quia injuriæ ipsæ transeunt illis in illustrem materiam virtutis. Unde non sunt jacturæ, sed semina copiosâ messe suo tempore compensanda.

*Ad quintum resp.* Admodum ingratum esse, quæ videre nolit, quanta bona hominibus largita sit divina benignitas. Quod si quibusdam malis permixta sint, ea ferè omnia proficiuntur ex malignitate hominum divinis beneficiis, ac suâ libertate abutentium ad se se mutud devorandum, ac divexandum. Sed ecce Epicureos in hac parte sibi egregiè contradicentes. Quippe ex una parte celebrant miseras humanas ad eliminandam Divinitatis providentiam; cum aliunde jactitent, nemini malè esse, nisi propter suam insipientiam, naturamque nobis bonorum plusquam satis semper tribuere ad bene, beatèque vivendum.

*Ad sextum resp.* Deum satis providisse cultui suo, tum per lumen naturale, quod nos Dei agnoscendi, amandique continuè admonet; tum per specialem instructionem, quam primis parentibus commisit posteritati tradendam, atque identidem collapsam restauravit. Sed hominum socordia, & malitia in causa est tot errorum utrumque lumen extinguentium, quatenus alii quidem seducere gestiunt, alii verò seduci. Quam pruriginem, ut docet Theologia, & confirmat experientia, malus quidam genius inflamat. Unde ex eo argumento nihil quidem adversus Dei providentiam colligi debet, sed tantum conjectandi locus datur, genus humanum scelere quodam in omnes vulgate iram Dei potuisse provocare, arque idcirco propriæ nequitiae, ac malorum geniorum potestati esse permissum.



## ARTICULUS SECUNDUS.

*De Attributis Dei, ac potissimum de  
Deo creatore.*

**D**Emonstratâ Dei existentia, ac positâ communâ illâ divinitatis notione, qua omnes intelligunt nomine *Dei Ens à se*, quod illis omnibus, quæ sunt est, ut fons, & principium essendi, facillè deduci possunt ejus attributa. Arque ut rem, quam pro merito expendunt Theologi, tantisper solum, & ut ajunt, crassâ Minervâ delibemus.

In primis, cum tantopere celebraverimus actum & potentiam, ut constitutiva entis, sequitur manifestè, Deum esse actum purissimum, plenissimamque essendi actualitatem nulla potențialitate dilutam. Quippè cum in compositis ex actu & potentia essendi, oporteat, potentiam reductam fuisse ad actum essendi ab aliquo existente in actu; non enim ex se ipsa reducta esse potest, cum magis ex se ipsa dicat privationem actus, cum nuda capacitate illum alio recipiendi: Ergo primum essendi principium, scilicet Deus, non potest esse per constitutionem potentia & actus, sed per omnimodam actualitatem.

Secundò sequitur: Deum esse unicum & infinitum. Quia actus non finitur & multiplicatur, nisi per potentiam, in qua recipitur, ut supra ostensum est; Ergo si esse divinum est actus irreceptus, erit unicus & infinitus.

Tertiò sequitur, Deum esse immutabilem. Omnis enim mutatio supponit potentiam ad terminum mutationis, & etiam supponit causam mutantem & moventem. Deus autem nec est in potentia ad aliquid, nec subjacet causæ, à qua moveri possit.

Quartò sequitur, Deum esse æternum. Quia æternitas est mensura entis omni ex parte immobili.

Quin.

## *De Attributis Dei, &c. Art. II. 323*

Quintò Sequitur Deum esse immaterialem & spiritualē . Est enim actus purus , ac proinde omnis materialitatis expers .

Sextò sequitur , Deum esse intellectu & voluntate præditum . Quia istæ perfectiones conveniunt substantiis spiritualibus : Ergo sicut Deus est maximè spiritualis, ita & maximè intellectualis .

Sequitur septimò , Deum esse libertate præditum , proindeque omnia libere producere . Quia libertas est proprietas , & perfectio voluntatis .

Sequitur octavò , Deum esse summè bonum . Quia continet in se plenitudinem omnium perfectionum , quas communicat creaturis .

Sequitur nonò , Deum esse omnipotentem . Quia cum contineat totam essendi plenitudinem , omnia potest intra lineam entis . Non potest tamen contradictoria , quia contradictio destruit ens .

Sequitur decimò , Deum esse immensum , & ubique præsentem , ac omnia cognoscentem . Cum enim sit horum causa , necesse est , ut ubique sit præsens , & omnia cognoscat , sicut peritus artifex cognoscit sua artefacta . Verùm illi leviter delibatis , solum tantisper dicendum de emanatione rerum à Deo : quippe de qua identidem mentio nobis incidit in decursu Philosophiæ .

Igitur , cum omnes , qui Deum agnovere , illum semper habuerint , ut omnium aliorum causam & Dominum , non omnes tamen eodem modo intellexerint hanc rerum à Deo emanationem . Quippe aliqui , cum non satis caperent immensam Dei potestatem , putaverint , hanc emanationi præsupponendam esse materiam , quam proinde æternam habuere , & ex qua Deus cuncta conficeret . Alii verò è contra , non modò Deo , sed etiam aliis rebus potestatem attribuere producendi aliquid ex nihilo . Ut utrumque confuteretur .

## PRIMA CONCLUSIO.

**D**EUS creavit omnia, etiam materiam primam.  
 Probatur ratione D. Thomæ. Causa universalis  
 entis debet producere omnia, quæ sunt sub linea entis  
 participati: Sed Deus est causa universalissima entis: Er-  
 go debet causare omnia, quæ sunt sub linea entis: Atqui  
 materia prima comprehenditur sub linea entis; est enim  
 potentia ad essendum: Ergo non solum omnia alia, sed  
 etiam materia prima est causata à Deo.

Confirmatur. Tum quia Deus est universalior causa,  
 quàm cætera entia ab ipso producta: Ergo debet minùs  
 præsupponere, quàm ipsa. Atqui cætera pleraque entia  
 solum præsupponunt materiam, ex qua suos effectus pro-  
 ducunt: Ergo Deus non debet illam supponere. Tum  
 quia Deus producit entia immaterialia, ut Angelos, quæ  
 non producuntur ex aliqua materia, sed ex nihilo: Ergo  
 potest educere suos effectus de nihilo, ac proinde causare  
 totum id, quod est in rebus, etiam materiam primam.

## SECUNDA CONCLUSIO.

**N**ulla creatura potest creare per modum causæ prin-  
 cipalis. Ita S. Thomas 1. p. q. 45. art. 5.

Probatur ejus ratione. Nulla creatura potest respicere  
 ens sub universalissima ratione entis: Atqui causa creans  
 debet respicere ens sub universalissima ratione entis: Er-  
 go nulla creatura potest creare. Minor constat. Nam  
 causa creans nihil supponit de ente: Ergo debet respice-  
 re universalissimam rationem entis comprehendentem  
 omnes essendi modos. Major verò declaratur. Etenim  
 ens sub universalissima ratione entis est effectus proprius  
 Dei; oportet enim, universalissimæ causæ assignare uni-  
 versalissimum effectum.

T E R T I A C O N C L U S I O.

**C**reatura non potest esse instrumentum physicum ad creationem : Ita S. Thomas 1. p. q. 45 a 5.

Probatnr ejus ratione. In tantum aliqua causa cooperatur instrumentaliter alteri, in quantum per aliquam actionem sibi propriam attingit subjectum, circa quod operatur causa principalis : Atqui nulla creatura potest habere actionem attingentem subjectum ipsius creationis : Ergo non potest instrumentaliter creare : Minor constat. Quia creatio non supponit subjectum. Major verò declaratur. Si enim instrumentum non ageret per actionem sibi propriam circa tale subjectum, non posset dici instrumentum, quia nihil ageret ad effectum causæ principalis.

Confirmatur utraque conclusio. Nulla virtus eductiva est ullo modo creativa. Pater ex terminis. Creativum enim est, quod agit ex præsupposito subjecto : Atqui omnis virtus recepta in creatura est eductiva : Ergo nullo modo est creativa. Declaratur minor ex S. Thoma 1. par. q. 45. art. 5. ad 1. Cum enim omnis virtus, quæ est in creatura, sit participata ab aliquo subjecto, nihil amplius facere potest, nisi ut subjectum aliquid participet : Atque facere, ut subjectum aliquid participet, est educere : Ergo, &c.

Obj. 1. Ex S. Augustino tractatu 72. in Joannem. *Majus opus est, ut ex impio justus fiat, quàm creare calum & terram* : Sed creatura potest esse instrumentum physicum justificationis impii : Ergo & creationis. Secundò ad creationem non requiritur virtus infinita : Ergo sufficere potest virtus creata. Probatnr antecedens. Effectus creationis est finitus : Ergo non exigit virtutem infinitam.

Resp. Ad primum cum D. Thoma 1. 2. q. 113. art. 9. distinguo majorem : Justificatio est majus opus, quàm creatio, quantum ad substantiam operis, concedo ; quantum ad modum productionis, nego. Quamvis enim gratia, per quam justificamur, sit dignissima creaturarum, quia tamen sit ex præsupposito subjecto, quantum ad modum fiendi non est tantum opus, nec requirit tantam virtutem, quantum exigit productio minimæ creaturæ ex nihilo.

Ad secundum, nego antecedens. Ad probationem, di-

# 326 IV. Part. Philosoph. Disp. II. Q. I.

distinguo antecedens : Effectus creationis est finitus ,  
 materialiter & entitativè , concedo ; formaliter & in ratio-  
 ne effectûs , nego . Quamvis enim res creata sit finita , v. g.  
 musca , attamen cum fiat per creationem , debet termi-  
 nare virtutem respicientem ens sub universalissima ratio-  
 ne entis , ideoque infinitam . Unde etiam musca sub ra-  
 tione entis creati est effectus exigens virtutem infinitam .  
 Adde præterea ex D. Thoma 1. p. q. 45. art. 5. ad 3. *Quod si*  
*santo major virtus requiritur in agente , quanto potentia est*  
*magis remota ab actu , oportet , quod virtus agentis ea nulla*  
*presupposita potentia , quale agens est creans , sit infinita ,*  
*quia nulla est proportio nullius potentia ad aliquam poten-*  
*tiam , quam presupponit virtus agentis naturalis , sicut non*  
*entis ad ens . Unde effectus creationis ex modo fiendi est*  
*infinitus .*

## QUÆSTIO SECUNDA

### *De Angelis, & Anima separata.*

#### ARTICULUS PRIMUS.

##### *De Angelis.*

**A**ngelos vocat Dionysius *Mundissima divinitatis specula*, eo quod in illis divinæ cognitionis claritas, ut solis fulgor in speculo, resplendeat. Nulla ferè natio est, quæ non noverit Angelos, quamvis cæca gentilitas eos cum Deo confunderet, Deoque vocaret; ex quo Idololatria pullulavit, quæ adorabat simulacra malis Angelis dicata. Circa Angelos disputant Theologi. Metaphysicus verbò solum quædam faciliora prælibat, scilicet an dentur, quomodo intelligant, & invicem loquantur, & ad corpora se habeant.

#### PRIMA CONCLUSIO.

**D**antur in universo substantiæ incorporeæ, quæ dicuntur Angeli. Conclusio est contra quosdam Antiquos, qui vel negabant dari spiritus, ut Sadducæi & Epicuræi; vel dicebant, omnem spiritum esse receptum in corpore, excepto Deo. Unde dabant corpora etiam Angelis, quamvis subtiliora. Pro qua sententia referuntur quidam ex sacris Ecclesiæ Doctoribus.

Probatur tamen conclusio, quæ modò est doctrina Ecclesiæ. Omne agens intendit perfectè assimilare sibi effectum suum, quantum ejus conditio patitur: Sed mundus

non

non assimilaretur perfectè Deo, nisi darentur Angeli: Ergo dantur. Major patet, præcipuè de Deo, qui condidit mundum, ut in illo repræsentaretur. Minor verò probatur. Tunc opus censetur perfectè simile agenti, quando imitatur ipsum secundum id, per quod agit: Sed Deus causat mundum per modum agentis intellectualis & incorporei: Ergo debent dari in mundo creaturæ incorporeæ & intellectuales, quæ repræsentent Deum quantum ad spiritualitatem & incorporeitatem omnimodam.

Si verò dicas, dari animam rationalem, quæ hanc Dei spiritualitatem satis repræsentat, contra instatur. Nam anima rationalis est solum imperfectè incorporea & spiritualis, siquidem emendicat cognitionem intellectivam à sensibus, & est capax informandi corpus: Ergo præter ipsam dari debent in mundo substantiæ perfectè spirituales & intellectuales. Probatur sequentia. Ut enim acutè ait Cajetanus, natura est magis sollicita de rebus perfectis, quàm de imperfectis. Unde si producit substantiam spirituales imperfectam, à fortiori debuit producere aliquam perfectè spirituales.

Confirmatur. Tum quia cùm videamus, esse res purè corporeas, ut arbores, & alias partim corporeas, partim spirituales, ut homines, debent etiam dari res purè spirituales, scilicet Angeli. Tum quia plures Angelorum effectus legimus in historiis: constat enim, homines correptos fuisse ab hujusmodi spiritibus, ita ut per aera rotarentur; linguis, quas nunquam didicerant, loquerentur; res absentes manifestarent, &c. quæ omnia fieri non possunt, nisi à spiritibus illis separatis, qui dominantur corporibus. Ergo dantur hujusmodi spiritus incorporei.

## SECUNDA CONCLUSIO.

**A**ngeli intelligunt per species à Deo infusas, in quibus res omnes naturales clarissimè cognoscunt. Unde non discurrunt, sed in illis speciebus omnem veritatem, cujus sunt capaces, intuentur. Loquuntur verò invicem per directionem conceptuum, in quantum scilicet unus Angelus vult cogitationem suam innoscere alteri; hoc ipso enim dat ei jus in suum secretum, sicque fit, ut talis cogitatio incipiat relucere in ejus speciebus.

Pri-

Prima pars patet. Cum enim non habeant sensus corporeos, quibus colligant species rerum, sicut anima rationalis, necesse est, ut illas recipiant ab eo, sub quo immediate collocantur, & à quo immediate receperunt intellectum suum; proindeque species intelligibiles, quibus perficitur.

Secunda sequitur ex prima. Si enim recipiant species à Deo, in quibus vident veritatem, non indigent inquirere illam per discursum, sicut homo, qui ex rebus notis infert ignotas.

Tertia tandem pars ex eo colligitur, quod inter Angelos debeat dari communicatio cogitationis, sicut & inter homines; aliàs non possent invicem conversari, nec proinde societatem instituere. Non apparet autem alius modus expeditior communicandi conceptus inter substantias purè spirituales; nisi per directionem voluntatis, quatenus unus Angelus vult suam cogitationem innotescere alteri, sicque dat illi veluti jus in sua secreta.

### TERTIA CONCLUSIO.

**A**ngeli præ sunt corporibus omnibus, sibi que formare possunt corpora aerea, in quibus licet non exerceant opera vitæ, attamen omnia, quæ rebus vitalibus competunt, exercere possunt secundum apparentiam.

Prima pars probatur. Cum enim mundus sit ordinatissimus, oportet, ut inferiora obediant superioribus: unde sicut corpus animatum subjacet animæ, à qua movetur, ita omne corpus subjacet Angelis, tanquam sublimioribus spiritibus, ut ab illis possit moveri, prout ipsis placuerit. Nec subjacent modò Angelis corpora, sed etiam ob eandem, quam diximus rationem, gubernantur ab illis. Unde S. Augustinus lib. 83. qq. dicit, *quod unaqueque res visibilis in hoc mundo habet Angelicam potestatem sibi præpositam*. Et Gregorius 4. dialog. quod in hoc mundo visibili nihil nisi per creaturam invisibilem disponi potest.

Secunda verò pars constat ex Scripturis & Historiis; sequiturque ex præcedenti, si enim Angelus præest corporibus, quid obstat, quominus aerem v. g. possit movere, addensare, figurare, & ad nutum formare.

Tert-



Tertia verò pars ex eo constat, quòd opera vitæ necessariò exigunt formam vitalem. Angeli autem non possunt esse formæ vitales corporum: unde nequeunt exercere opera vitæ, nisi secundum apparentiam juxta illud Raphaelis ad Tobiam: *Videbar vobis manducare, & bibere; sed ego cibo invisibili, & potu, qui ab hominibus videri non potest,utor.*

## ARTICULUS SECUNDUS.

### *De Anima separata.*

**C**UM Anima rationalis immortalis sit, ut demonstravimus in fine Physicæ, proindeque corpori superfluo, consequens est, duos habere status, Conjunctionis scilicet, & Separationis. De primo statu agit Physicus. At secundus ad Metaphysicum spectat. De eo multa ex revelatione didicimus, pauca ratio investigare potest. Hæc quibusdam conclusionibus explicabimus.

## PRIMA CONCLUSIO.

**I**n intellectus, & voluntas formaliter insunt animæ separatæ; potentia verò sensitivæ solum radicaliter.

Prima pars constat. Nam intellectus & voluntas sunt Facultates immateriales, quæ subjecto corporeo non insunt, sed in ipsa animæ substantia resident, ut individuum ejus, ac cujusvis spiritualis substantiæ proprietates.

Secunda pars probatur ratione S. Thomæ Quæst. de Anima, art. 19. Corrupto subjecto corrumpitur facultas in eo residens: Sed facultates sensitivæ non sunt in ipsa anima, ut in subjecto, sed in animali, unde brutis conveniunt: Ergo perempto animali destruntur: Ergo non manent formaliter in anima separata, sed solum radicaliter, quatenus ipsa est earum radix, ac principium, quo illas habebat compositum.

Obj. Anima separata sensibilibus objectis afficitur: Ergo sentit. Consequentia constat. Antecedens colligitur ex variis Scripturæ locis, ut Lucæ 16. ex illis verbis Animæ Divitis Epulonis: *Pater Abraham, miserere mei, & mitte Lazarum, ut intingat extremum digiti sui in aquam & refrigeret linguam meam; quia crucior in hac flamma.*

Resp. Distinguo antecedens: Anima separata sensibilibus objectis afficitur, ut motivis sensuum, nego; ut instrumentis divinæ iustitiæ, veris quidem, sed miris modis, ac longè aliter, quàm cùm erat in corpore, eam tormentibus, concedo. Hæc tamen tormenta, ut cætera spiritualia, Scriptura nobis explicat per sensibiles affectus, imò per organa corporea, quæ tamen constat nulla inesse animæ separatæ. Unde, ut ex eo scripturæ loco non sequitur, animam, linguam, & digitos habere, ita nec propriè dictos sensus, sed solum aliquid, quo dolere possit, nempe voluntatem, quæ ut in corpore, sic extra corpus doloris & gaudii capax est.

## SECUNDA CONCLUSIO.

**A**nima separata retinet habitus & species cognitionum, quas habuit in hac vita.

Constat ex Scriptura. Nam Lucæ 16. dicitur ad Divitem in inferno positum, *Recordare, quia recepisti bona in vita tua.* Recordatio enim est usus scientiæ & specierum olim impressarum. Probatur verò ratione S. Thomæ 2. p. q. 89. art. 5. Ut species & habitus sensitivi recipiuntur in corporeis organis, ita & spirituales in mente, ut in proprio subjecto: Sed mens manet: Ergo & habitus, ac species spirituales.

Dices. Morbo plerumque aboletur omnis prius parva cognitio, ut certis constat experimentis: Sed mors quovis morbo maiorem mutationem inducit: Ergo omnem in vita partem cognitionem abolet.

Resp. Distinguo maiorem: morbo aboletur omnis prius parva cognitio, quantum ad id, quod habet in organis corporeis, concedo; quoad id, quod est in mente, nego. Unde sanata ægitudine aliquando ex integro redit scientia. Vidi senem, cui apoplexia rerum præteritarum memoria

rlam eripuerat; quique sanatus est diu caruit; ac iterum in similem morbum incidens, cum sanitate memoriam ex integro recuperavit. Adde luculentius experimentum ex mortuis miraculo suscitatis, quorum anima cum scientiis & speciebus suis ad corpus rediit. Non ergo mors eas aboler.

*Instabls.* Harum specierum nullus usus esse potest in anima separata: Ergo non remanent. Probatur antecedens. Nani ita pendent à phantasmatibus, ut iis anima uti nequeat, nisi per conversionem ad phantasmata: unde turbata imaginatione nullus est earum usus.

*Resp.* Nego antecedens. Ad probationem distinguo: Pendent à Phantasmatibus, pro statu conjunctionis, concedo; pro statu separationis, nego. Modus enim utendi specie sequitur modum essendi animæ. Unde sicut speciebus supernaturaliter infusis anima in corpore posita utitur cum quadam habitudine ad phantasmata propter conditionem statûs, ut notat S. Thomas *Quæst. de Anima*, art. 15. licet ex illis non pendeant; ita speciebus naturaliter acquisitis in corpore anima separata utetur sine habitudine ad phantasmata, licet ex illis pendeant pro statu conjunctionis. Itaque, inquit S. Thomas 1. p. q. 89. art. 6. *Secundum species intelligibiles hæc acquisitas anima separata intelligere poterit, quæ prius intellexit; non tamen eodem modo, scilicet per conversionem ad phantasmata, sed per modum convenientem anima separata.*

### TERTIA CONCLUSIO.

**A**nima separata, præter species, quas ex hac vita detulit, alias infusas à Deo recipit, quibus ejus vis intellectiva completur.

Probatur. Mens nostra ut à sensu, ita & à Deo species accipere potest, ut constat in prophetia, ecstasi, & raptu. Porro quandiu posita est in corpore, conversa est ad sensibilia; subit enim conditionem aliarum animarum corpori unitarum, unde ut illarum cognitionem suam à sensibilibus objectis excipit. At verò dum separatur à corpore, avertitur à sensibilibus, & convertitur ad intelligibilia; subit enim statum intelligentiarum separatarum: Ergo, ut illarum, à fonte intelligibilium specierum pro sua capacitate species hauriet.

Di-

Dices. Si anima naturaliter posset à Deo species suas accipere, ut angeli, frustra uniretur corpori ad eas sensibus colligendas.

Respond. cum S. Thoma, animam licet utroque modo queat species habere, ac per eas intelligere; at tamen conaturalius, ac quodammodo perfectius intelligere per species à sensu derivatas, quod hæ distinctius ei res repræsentent, quam illæ, quas à Deo accipit per infusionem, saltem naturali jure. Hæ enim, cum res repræsentent magis in universali, confusionem in ea notitiam ingenerant, ob exiguum ejus lumen. Sicut videmus, eos, qui modico mentis lumine præditi sunt, res in universali propositas confusius percipere; distinctius verò, cum illis in particulari explicantur. Itaque Anima exigit prius uniri corpori, ut per sensus rerum species sibi proportionatas accipiat, quas in statu separationis infusæ species magis perficiunt, & elevant, ut mox dicemus.

## QUINTA CONCLUSIO.

**S**pecies infusæ complent & elevant eas, quas anima secum detulit, ita ut quanto plura noverit in hac vita, tanto plura cognoscat in altera. Unde in illis, junctis illis, quas secum detulit, cognoscit singularia, quæ gessit, aut novit, dum viveret; ut Dives Epulo Lucæ 16. meminit fratrum suorum. Cognoscet præterea Angelos, & ordinem mundi in communi. Non tamen particularia, quæ aguntur in hoc mundo, saltem naturaliter, sed solum quantum & quatenus ei Deus voluerit revelare.

Conclusio est S. Thomæ 1 p. q. 89. & probatur ejus principio. Quidquid recipitur, ad modum recipientis recipitur. Unde unaquæque substantia spiritualis ad Deum fontem specierum conversa haurit species de illius plenitudine juxta proprium modum, conditionem & exigentiam. Porro anima per separationem à corpore unitur superioribus intelligibilibus. Ergo oportet, ut notitiæ, quas hinc detulit, uniantur cum superioribus notitiis rerum spiritualium, quas de novo accipit, & sic eleventur, ac quantum ad id, quod sibi deest, compleantur. Unde per species illas infusas acquisitis junctas repræsentabitur animæ quidquid scire debet pro suo statu. Porro nosse debet

debet ea omnia, ad quæ per præcedentem cognitionem & affectionem determinata fuisse; aut quæ ad eam pertinent, ut ordinem universi, cuius pars est; aut quæ specialiter ad illum novum statum spectant, ut angelos, cum quibus conversari debet. Illa verò, quæ in hoc seculo geruntur, amplius ad eam non pertinent, quia jam est extra hoc seculum. Attamen Angelis ea, quæ sunt in hoc mundo, representantur in eorum speciebus, quia naturaliter sunt ministri divinæ providentiæ: itaque hæc pertinent ad eorum ministerium.

*Quæres, an Anima separata possit movere corpora.*

*Resp.* Animam separatam habere quidem vim aliquam movendi corpus. Hæc enim omni spiritali naturæ cognata est. Hæc tamen virtus naturaliter determinatur ad proprium corpus, quod est proprium ejus mobile, ut inquit S. Thomas. Unde non habet naturalem habitudinem ad alia corpora; & sic anima separata non videtur naturaliter ea posse movere, ut possunt angeli, quorum vis motiva non est sic determinata ad aliquod corpus, sed omnibus eminet. Attamen nihil verat, ut ordinatione divinâ ulterius extendatur hæc vis motiva animæ. Ut videmus, alias animæ potentias extendi divinitus ultra connaturalem spheram, ut intellectus ad videndum Deum. Unde concessione Divinâ fieri potest, ut anima separata quodcumque corpus moveat. Ac eo pacto legimus in historiis, Animas Sanctorum apparuisse in assumptis corporibus, opem tulisse hominibus, & alia ejusmodi perfecisse cum motu locali corporum. Quamquam dici potest, hæc facta ab Angelis earum nomine; attamen non repugnat & ab ipsius animabus esse facta.

## QUÆSTIO TERTIA

### *De Influxu Dei in causas secundas.*

**C**UM de Deo Creatore, ac nobilioribus creaturis dictum sit, nunc agendum de Divino Influxu in res jam creatas. Duplex distingui potest. Nam alius respicit *esse*, diciturque *Conservatio*; alius *operari*, qui variis nominibus

nibus exprimi solet, prout variè sumitur, ac in genere dici potest influxus causæ primæ in secundam. Priori influxu creatura dependet à Deo, ut ens secundum à primo ente; posteriori, ut causa secunda à causa prima. Per primum habet creatura, ut actus sit; per secundum, ut actus operetur. De conservatione vix ulla est quæstio. Constat enim & concedunt omnes, creaturas, ut sint & in esse persistant, egere continuo influxu Dei, quo subtracto in pristinum nihilum statim collaberentur. At circa modum, quo Deus influit ad actiones & effectus causarum secundarum gravissimæ ac celeberrimæ, his præcipuè temporibus, excitatæ sunt controversiæ. Porro cum causa secunda, libera, de qua præcipuè hic agi solet, duobus modis spectari possit, in ordine scilicet purè naturali, tum verò in ordine gratiæ; atque in utroque statu egeat influxu Dei, ut agat, eo posteriori modo quæstio ad Theologos spectat; at priori modo ad Philosophos. Ut rem tanti momenti accuratius expendamus, eam octo articulis ita complectemur, ut nos quantum fieri poterit, intra proprias, id est naturalis ordinis, metas contineamus, his, quæ ordinem gratiæ spectant, ad Theologos remissis. In 1. quæstionis statum, ac varias opiniones referemus. In 2. Terminos, qui in hac quæstione in usu sunt, explicabimus. In 3. Inquiremus, an possibile sit, Deum ita influere in causas secundas, ut eas ad agendum præviâ motione applicet. In 4. An re ipsâ sic præmoveat, In 5. An & quomodo Deus voluntatem moveat ad actum peccati. In 6. Naturam & vim divinæ motionis explicabimus. In 7. Solvemus objectiones, quæ adversus eam fieri possunt. In 8. Concordiam efficaciam divinæ illius motionis cum libertate explicabimus, ac ea in re Thomistarum sententiam ab Hæreticis omnium remotissimam esse ostendemus.

## ARTICULUS PRIMUS.

*Aperitur questionis status, ac varia de influxu divino sententia referuntur.*

**C**ausas secundas ad agendum egere divino influxu vel ipsi primæ notæ Gentiles Philosophi agnovere, apud quos tritum fuit, *Secunda moventia non movere nisi mota à primo*; *Causas secundas non agere nisi in virtute primæ*, &c. Scriptura sacra id aperit docet, cum passim Deo ut causæ primæ tribuit effectus naturæ, ac voluntatis. Job. 10. *Manus tuæ, Domine, fecerunt me & plasmaverunt me.* Isaïæ 26. *Omnia opera nostra operatus es nobis, Domine.* Et ipse Deus Ezech. 36. *Faciam, ut in preceptis meis ambuletis.* 1. ad Corinth. 12. *Omnia Deus operatur in omnibus.* Ad Philipp. 2. *Operatur in nobis velle & perficere.* Joan. 1. *Omnia per ipsum facta sunt, & sine ipso factum est nihil,* &c.

Durandus in 2. Dist. 1. quæst. 5. censet, hunc Dei in causas secundas influxum non alium esse præter eum, quo Deus res omnes creavit, eisque vim agendi contulit, ac continuò conservat.

Verùm ab omnibus rejicitur & merito. Nam hæc opinio Scripturæ testimoniis adversatur, ut etiam expendit S. Augustinus lib. 5. de Genesi ad litteram, cap. 20. *Sunt, qui arbitrantur, inquit, tantummodo mundum ipsum factum à Deo, cetera jam fieri ab ipso mundo, sicut ille ordinavit & jussit, Deum autem ipsum nihil operari*, ac deinde allatis adversus eam opinione variis Scripturæ testimoniis concludit: *Movet itaque Deus occultâ potentia universam creaturam suam, eoque motu illa versata, dum Angeli jussa perficiunt, dum circumstant sidera, dum alternantur venti, dum vireta pullulant, &c. explicat secula, qua in suos cursus non explicarentur, si ea ille, qui condidit, provido motu administrare cessaret.*

Repugnat etiam rationi. Nam Deus, ut est primum ens, ita & prima causa: unde ut ens creatum pendet ab eo in essendo, ita & causa creata in operando. Operari enim sequitur esse, ac illi commensuratur. Unde Apostolus ut rem notam in Arcopago Athe-

Atheniensis statuit, Deum non solum esse, sed & alia omnia omnibus dare, quod verum non foret, si solum daret esse, non verò actu operari. Ipse, inquit, dat omnibus vitam, & inspirationem, & omnia. Ac rursus, In ipso enim vivimus, movemur, & sumus; non utique ut in loco ambiente, sed ut in causa suo influxu in nobis operante non solum esse, sed & vivere, ac moveri, quod ad operationem pertinet. Id etiam luculentius constabit argumentis in hujus questionis decursu expendendis.

Nec urget, quod pro sua opinione affert Durandus, Effectus proprios causæ secundæ vim ejus non excedere, proindeque ad illos sufficere; nec dici posse, an Deus eadem, vel diversa actione eos cum creatura producat.

Ad 1. enim respond. cum Sancto Thoma Quæst. 3. de Potentia, artic. 7. Causam secundam sufficere in ordine suo, qui non excludit dependentiam ab alia superiori. Ad 2. verò respond. ex eodem Sancto Thoma ibidem, causam primam etiam eadem operatione effectum attingere, qua attingitur à causa secunda, quatenus operatio causæ secundæ est ab ea per virtutem Dei, ut operatio instrumenti est etiam à causa principali. Nihil enim prohibet, quin una & eadem actio procedat à primo & secundo agente, ut dicit 1. par. quæst. 105. art. 5. ad 2.

Constat itaque, causas secundas egere influxu Dei, non solum quo earum virtutes activas contulit & conservat, sed etiam quo & ipse aliquid confert, dum actu agunt. Verum cum duobus modis intelligi possit hic influxus: primò ex parte effectus tantum, per modum simultaneæ & externæ cooperationis, ita ut Deus simul cum causa secunda eundem effectum producat, nihil influendo in ipsam causam; ut cum quis cum alio navem trahit, non aliquid socio confert, sed cum socio in navem agit: secundò etiam ex parte causæ, per modum prævii influxus in causam secundam, quo Deus eam ad agendum moveat, compleat, & applicet; ut cor cæteris membris vigorem prævium influit, quo ad suas functiones excitantur & complentur: ingens est controversia, quonam ex his modis se habeat divinus influxus.

Et quidem Veteribus omnibus solenne fuerat, ut hunc  
Philos. R. P. Gaudin. IV. Pars. P in-



Influxum explicarent etiam per modum interioris virtutis, qua Deus occultâ potentia movet universam creaturam suam ad agendum, ut mox relatus Sanctus Augustinus loquitur; qua moventia secunda à primo movente mota cætera movent, ut loquitur Aristoteles; quæ recepta in causis secundis, juxta cujusque modum, eas complet, elevat, & applicat ad agendum, ut millies repetit S. Thomas.

At nupero seculo aliter visum Molinæ. Is in Libro, cui titulus est *Concordia*, & in Commentariis in questionem 14. primæ partis, artic. 3. disputat. 6. ingenuè fatetur, Sanctum Thomam sensisse, Deum movere & applicare causas secundas ad agendum, ut mox dixi; ac id sibi non probari: quippe hunc motum & influxum Dei in causas secundas esse commentitium, nullâque ratione probari; atque adeo Deum non in causam, sed cum causa in ejus effectum influere per modum causæ partialis cooperando; ut equus equo currum trahenti, & nauta nautæ cimbam impellenti cooperatur. *Concursus Dei generalis*, inquit 1. part. quæst. 14. art. 3. Disput. 6. non est influxus Dei in causam secundam, quasi illa prius eo mota agat & producat effectum suum; sed immediatè cum causa in illius actionem & effectum. Et in fine Disputationis, Cum dicimus, neque Deum per concursum universalem, neque causas secundas esse integras, sed partiales causas effectuum, intelligendum id est de partialitate causa, ut vocant, non verò de partialitate effectus. Totus quippe & à Deo est, & à causis secundis; sed neque à Deo, neque à causis secundis, ut à tota causa, sed ut à parte causa, qua simul exigit concursum & influxum alterius; non secus ac cum duo trahunt navim, totus motus proficiscitur ab unoquoque eorum.

Ex quo patet, juxta Molinæ, ac Sædatorum ejus sententiam, Deum non efficere, ut causæ secundæ agant, sed solum agere, cum illæ agunt. Atque ita, si res suis nominibus exprimantur, in ea opinione Deus agentium motor non est, sed cooperatur; nec dux actionis, sed socius; nec prima agendi causa, sed agentium concausa; nec dat illis agere, sed solum cum illis dat effectum esse; nec illis utitur, sed potius illa ipso: Non enim ea applicat, quod utentis est, sed ab illis applicatur. Unde cum creatura rationalis eo indifferenti concursu Dei rectè potius, quàm malè utitur, & illum ad bonum opus

opus applicat, non creatori tribuendum, sed creaturæ, ut etiam ipse Molina fatetur in suis *Commenraris* ad primam partem, quæst. 19. art. 6. disput. 3. ubi concedit, ex sua doctrina proficisci, ut virtutis actus, qui solo Dei generali concursu, & particulari arbitrii sit, non in Deum, sed in nos ipsos, tanquam in causam particularem, atque liberam ad illum determinantem referendus sit. Itaque, quod sumus, ac bene agere possumus, Deo quidem tribuendum; at quod boni viri sumus, ac bene agimus, nobis adscribendum, ut Seneca & post eum Pelagius docuere. Atque vel hinc constat, in quæ præcipitia hic dicendi modus, qui primâ fronte plerisque adeo commodus videtur, tandem perducatur.

Verum hujus sententiæ Sæctatores, cum Deo munus applicandi, ac determinandi creaturam in ordine Physico denegent, addunt tamen, id præstare, maxime in ordine gratiæ, per motiones morales, etiam prævias, tum exteriores, ut prædicationes, exempla bonorum, &c. tum interiores, ut sunt sanctæ cogitationes, inspirationes, illustrationes, &c. quibus allicit, ac excitat creaturam rationalem, quæ sola propriè hocce motionis genere capax est. At illud notandum, inde nihil speciale Deo tribui, cum non modò boni Angeli, sed etiam ipsi demones hocce genere motionis moralis voluntatem movere possint.

Alii, ac dignius de influxu divino Thomistæ sentiunt. Docent cum tota Antiquitate, ac primatibus Theologicis & Philosophis, Deum non modò cum causis agere, sed etiam, ut illæ agant influxu suo, efficere, eas ad agendum applicando; atque ita non modò cum illis, sed etiam per illas omnia efficere, ut integrè verum sit illud 1. Joan. nempe non modò sine ipsis factum esse nihil, sed etiam per ipsum omnia facta esse. Quod sine dubio longè amplioris est virtutis. Sic enim Deus non causarum socius est, sed princeps & dominus, his utens ad suæ providentiæ finem; ac verè primus motor, primaque causa, à qua non modò effectus, sed & causæ omnes dependent. Unde ut cor jure primi viventis membris omnibus, eorumque facularibus vitæ vigorem & agendi efficaciam confert eo influxu, quo subtracto statim labascunt, & ad suas functiones torpent; sic Deus, ut primum agens toti naturæ, ac agentibus omnibus, eorumque virtutibus activis ultimam agendi actualitatem

Influit, intimâ quadam, & ad omnem actionem, effectumque præviâ vi, qua subtractâ virtutes omnes activæ languescerent, ut jure in sacris Ecclesiæ hymnis vocetur *Rerum tenax vigor*. Eo universali influxu vivificata omnia pro cuiusque dispositione, ac conditione suas vires exserunt, ut supra relatus S. Augustinus expendit, Angeli jussa perficiunt, sidera circumveniunt, vireta pullulant, animalia generant, &c. quatenus, ut ille ait, hæc causæ *provido motu administrata*, Deo non solum cum illis, sed etiam per eas agentibus, ad finem divinæ providentiæ famulantur. Hinc quidquid boni est à causis secundis, Deo ut proprio authori jure tribuitur; si quid mali & defectus, in ipsas refunditur, quod ab ejus influxu ipsæ deficiant. Ut animæ organa sua vivificant, quidquid rectè per ea fit, adscribitur; at si oculus caliget, si tibia curva claudicat, non animæ, sed organi vitium est.

Hinc influxum, quatenus causas secundas ad agendum movet, complet, & applicat, Thomistæ *Promotionem Physicam* vocant, voce quoad usum aliquatenus novâ, quo ad sensum vetustissimâ. *Motionem* quidem, quia eo veluti impulsu cuncta ad agendum promoventur. *Præviâ* verò, quia omnem creati agentis actionem naturâ & causalitate præcedit. *Physicam* demum, ut eam quatenus agentia libera afficit, à motione morali distinguant. Non enim in objecti propositione sita est, sed in activa causarum applicatione. Solet etiam dici *Prædeterminatio Physica*, quod ad agendum determinet & applicet.

Sunt tamen, qui promotionem illam Physicam admittunt quidem, autoritatum & rationum pondere convincti; at eam nolint esse prædeterminationem, quod, inquit, ad agendum hunc potius, quàm alium actum hæc generalis motio non determinet. Verùm hi frustra de voce litigant. Nam si hæc motio generalis sit, nulla vis creata eam subterfugiet, sed ad omnia omnino pari jure se extendet. Cùm itaque causa secunda suâ virtute se determinat, id sanè non præstabit, nisi eâ universali & omnia pervadenti motione applicata; sicque ea motio determinativa rectè dicetur, quod per eam fiat, ut ipsa causa se determinet.

¶ Nec refert, quod ajunt, potius hanc motionem determinari per causas secundas, ut non semel docet Sanctus Thomas. Dicendum enim, ut etiam ipse se explicat, determinari passivè, ut à subjecto recipiente, quatenus

tenus in unoquoque agente recipitur, & operatur juxta modum ejus. Deus enim unumquodque movet & perficit juxta propriam dispositionem. Non verò activè, ita ut actione sua causa secunda divinam motionem applicet ad hunc potius, quàm ad illum effectum. Nam cum per eam causa quævis suam omnem habeat efficaciam, palam est, in eam nullam exercere efficientiam; atque ita activè omnes causas determinat divina motio, eas à potentia ad ultimam agendi actualitatem transferendo; ipsa verò sic à nulla determinatur. Quippe ipsa est ultima actualitas in linea operandi; quæ à nulla formaliter & activè determinatur, sed solum passivè, ut à subjecto recipiente, quatenus quidquid recipitur ad modum recipientis recipitur. Hæc aperta mens S. Thomæ. Hæc omnium verè Thomistarum doctrina, ex ipsa notione hujus motionis clarè sequens. Unde vel omnino negandum cum Molina, causas secundas moveri à Deo; vel admittendum, etiam prædeterminari, eo, quo diximus, sensu. Porro sub ea, & per eam causa libera seipsam determinat, at non ipsam. Verùm hæc posterius. Itaque hæc motio etiam determinatio, imò prædeterminatio jure dici potest.

## ARTICULUS SECUNDUS.

*Quid sit concursus simultaneus. Quid præmotio physica. Quid motio moralis.*

**F**Requens est horum vocabulorum usus in hac questione. Unde ne eorum ignorantia tenebras questionis offundat, & Andabatarum more quasi clausis oculis de ignotis pugnemus, statim in ipso limine constituendum est, quid hæc vocabula significant.

Concursus simultaneus, ut ab illis, qui eum solum admittunt explicatur, est influxus, per quem Deus causis secundis cooperatur, in quantum cum illis eundem effectum producit, illudque idem, quod creatura producit tanquam causa inferior ac limitatio, ipse quoque attingit & producit, tanquam causa superior & universalior.

salior. Unde concursus ille non movet, nec applicat. intrinsicè causam creatam, imò non recipitur in illa, tantùm in effectu, ideoque per illum Deus nihil intrinsicè ponit in agentibus creatis, nec propriè facit, ut faciant, sed facit, cum faciunt. Est præterea talis concursus de se insufficiens, & indifferens ad producendum, vel non producendum effectum, & ad istud potius, quàm aliud ponendum; ideoque ut efficax sit, & hunc potius, quàm alium effectum producat, expectat creaturæ cooperationem; cui etiam sic se attemperat & accommodat, ut cum igne ignem, cum planta plantam, cum volente volitionem, cum volente nolitionem, cum alio aliud efficiat. Unde ex eo ratio reddi non potest, nec cur creatura agat potius, quàm non agat, nec cur istud potius, quàm aliud efficiat.

Premotio physica est influxus causæ primæ receptus, non quidem immediatè in effectibus, sed in causis secundis, quo Deus ipsis actualem efficacitatem inspirat, quo eas movet & applicat, non solum objectivè, ac moraliter, alliciendo & suadendo, sed etiam physicè & activè, interiorius inclinando, applicando, determinando, ac ultimam illam activitatem, ad quam statim sequitur actio, influendo; & ideo dicitur *Motio Physica*. Sed quia motio, & applicatio virtutis activæ ad agendum est prius natura, quàm ipsa actio, sicut omnis vltima est prior suo termino, & omnis causa suo effectu, ideo motio illa dicitur *prævia motio*, seu *præmotio*, quam ritè comparaveris illi impulsui, quo voluntas movet potentias sibi subditas, quo anima vivificat organa vitalia, quo cælum & sidera movent arbores ad fructificandum, quo manus movet baculum, & artifex securim, licet ista omnia exempla non ex omni parte quadrent. Unde per illum influxum Deus activè & propriè facit, ut creatura faciat, redditque illam à se dependentem, non ut concausam concausæ, sed ut secundum agens primo agenti, & ut causam subditam, ac inferiorem superiori, à qua compleretur & applicatur, cui proinde non solum effectum suum debet, sed etiam propriam in productione effectus cooperationem.

Motio tandem moralis est invitatio quædam objectiva nihil imprimens voluntati, sed solum eam metaphoricè movens & trahens per modum allicientis suadendo, illustrando, deprecando, comminando, præcipiendo,

do, consulendo, &c. quomodo ait Poeta,

*trahit sua quemque voluptas.*

& alius, *Corrumpunt bonos mores colloquia prava.* Unde solæ creaturæ cognitione præditæ sunt capaces illius motionis; nec enim ignis, v. g. vel arbor minis, aut precibus, aut blanditiis moveri possunt, ut paret; cum tamen ista moveant hominem. Immo aliquando bruta animalia istis movetur, in quantum cognitione aliqua prædita sunt.

Ex his habes definitiones & discrimina triplicis illius motionis. Definitiones quidem. Nam motio moralis est, Propositio objecti ad agendum invitantis, sive talis propositio interius fiat illustrando, sive exterius sensibilibus objectis, quibus voluntas sollicitari nata est, offerendo. Concursus simultaneus est influxus, quo Deus agit, non in causam secundam, ut agit, sed in effectum simul cum causa secunda, eum scilicet attingendo sub altioribus & universalioribus formalitatibus, dum creatura illum sub limitatioribus attingit. Præmotio autem physica est influxus, quo Deus præviè, activè & intrinsecè applicat causam secundam ad agendum.

Discrimina verò. Nam motio moralis solum invitat ad agendum; physica verò intrinsecè & activè applicat ad agendum. Concursus autem simultaneus creaturæ agenti cooperatur. Prima movet solum objectivè, per modum finis alliciendo. Secunda movet effectivè, per modum agentis applicando. Concursus verò simultaneus nullatenus movet causam, sed se habet solum, per modum concausæ cooperando & adjuvando. Movere moraliter possunt omnes creaturæ, præcipue verò Angeli boni bona inspirando, Angeli mali tentando, Homines persuadendo. Movere physicè, præcipue voluntatem, soli Deo proprium est, qui solus omnes virtutes activas in manu sua habet, voluntatique illabitur, ac præest tanquam ejus author, conservator, ac moderator. Concurrere verò simultaneè, etsi speciali modo conveniat Deo, attamen & suo modo creaturis potest competere.

Res omnis sensibili exemplo declarari potest. Pictor dum præcipit discipulo, ut pingat, est motio moralis. Si apprehensam ejus manum simul cum penicillo moveat & applicet ad pingendum, est motio prævia physica. Si deum ipsius cooperando difficiliora tabellæ linea-

debet ea omnia, ad quæ per præcedentem cognitionem & affectionem determinata fuit; aut quæ ad eam pertinent, ut ordinem universi, cujus pars est; aut quæ specialiter ad illum novum statum spectant, ut angelos, cum quibus conversari debet. Illa verò, quæ in hoc seculo geruntur, amplius ad eam non pertinent, quia jam est extra hoc seculum. Attamen Angelis ea, quæ sunt in hoc mundo, repræsentantur in eorum speciebus, quia naturaliter sunt ministri divinæ providentiæ: itaque hæc pertinent ad eorum ministerium.

*Quæres, an Anima separata possit movere corpora.*

*Resp.* Animam separatam habere quidem vim aliquam movendi corpus. Hæc enim omni spiritali naturæ cognata est. Hæc tamen virtus naturaliter determinatur ad proprium corpus, quod est proprium ejus mobile, ut inquit S. Thomas. Unde non habet naturalem habitudinem ad alia corpora; & sic anima separata non videtur naturaliter ea posse movere, ut possunt angeli, quorum vis motiva non est sic determinata ad aliquod corpus, sed omnibus eminet. Attamen nihil verat, ut ordinatione divinâ ulterius extendatur hæc vis motiva animæ. Ut videmus, alias animæ potentias extendi divinitus ultra connaturalem sphaeram, ut intellectus ad videndum Deum. Unde concessione Divinâ fieri potest, ut anima separata quodcumque corpus moveat. Ac eo pacto legimus in historiis, Animas Sanctorum apparuisse in assumptis corporibus, opem tulisse hominibus, & alia ejusmodi perfecisse cum motu locali corporum. Quamquam dici potest, hæc facta ab Angelis earum nomine; attamen non repugnat & ab ipsis animabus esse facta.

## QUÆSTIO TERTIA

### *De Influxu Dei in causas secundas.*

**C**UM de Deo Creatore, ac nobilioribus creaturis dictum sit, nunc agendum de Divino Influxu in res jam creatas. Duplex distingui potest. Nam alius respicit *esse*, diciturque *Conservatio*; alius *operari*, qui variis nominibus

nibus exprimi solet, prout variè sumitur, ac in genero dici potest influxus causæ primæ in secundam. Priori influxu creatura dependet à Deo, ut ens secundum à primo ente; posteriori, ut causa secunda à causa prima. Per primum habet creatura, ut actu sit; per secundum, ut actu operetur. De conservatione vix ulla est quæstio. Constat enim & concedunt omnes, creaturas, ut sint & in esse persistant, egere continuo influxu Dei, quo substracto in pristinum nihilum statim collaberentur. At circa modum, quo Deus influit ad actiones & effectus causarum secundarum gravissimæ ac celeberrimæ, his præcipuè temporibus, excitatæ sunt controversiæ. Porro cum causa secunda, libera, de qua præcipuè hic agi solet, duobus modis spectari possit, in ordine scilicet purè naturali, tum verò in ordine gratiæ; arque in utroque statu egeat influxu Dei, ut agat, eo posteriori modo quæstio ad Theologos spectat; at priori modo ad Philosophos. Ut rem tanti momenti accuratiùs expendamus, eam octo articulis ita complectemur, ut nos quantum fieri poterit, intra proprias, id est naturalis ordinis, meras contineamus, his, quæ ordinem gratiæ spectant, ad Theologos remissis. In 1. quæstionis statum, ac varias opiniones referemus. In 2. Terminos, qui in hac quæstione in usu sunt, explicabimus. In 3. Inquiremus, an possibile sit, Deum ita influere in causas secundas, ut eas ad agendum præviâ motione applicet. In 4. An re ipsâ sic præmoveat, In 5. An & quomodo Deus voluntatem moveat ad actum peccati. In 6. Naturam & vim divinæ motionis explicabimus. In 7. Solvemus objectiones, quæ adversus eam fieri possunt. In 8. Concordiam efficaciam divinæ illius motionis cum libertate explicabimus, ac ea in re Thomistarum sententiam ab Hæreticis omnium remotissimam esse ostendemus.



## ARTICULUS PRIMUS.

*Aperitur quæstionis status, ac varia de Influxu divino sententia referuntur.*

**C**ausas secundas ad agendum egere divino influxu vel ipsi primæ notæ Gentiles Philosophi agnovere, apud quos tritum fuit, *Secunda moventia non movere nisi mota à primo; Causas secundas non agere nisi in virtute primæ, &c.* Scriptura sacra id apertè docet, cum passim Deo ut causæ primæ tribuit effectus naturæ, ac voluntatis. Job. 10. *Manus tua, Domine, fecerunt me & plasmaverunt me.* Isaïæ 26. *Omnia opera nostra operatus es nobis, Domine.* Et ipse Deus Ezech. 36. *Faciam, ut in præceptis meis ambuletis.* 1. ad Corinth. 12. *Omnia Deus operatur in omnibus.* Ad Philipp. 2. *Operatur in nobis velle & perficere.* Joan. 1. *Omnia per ipsum facta sunt, & sine ipso factum est nihil, &c.*

Durandus in 2. Dist. 1. quæst. 5. censet, hunc Dei in causas secundas influxum non alium esse præter eum, quo Deus res omnes creavit, eisque vim agendi contulit, ac continuè conservat.

Verùm ab omnibus rejicitur & meritò. Nam hæc opinio Scripturæ testimoniis adversatur, ut etiam expendit S. Augustinus lib. 5. de Genesi ad litteram, cap. 20. *Sunt, qui arbitrantur, inquit, tantummodo mundum ipsum factum à Deo, cetera jam fieri ab ipso mundo, sicut ille ordinavit & jussit, Deum autem ipsum nihil operari, ac deinde allatis adversus eam opinionem variis Scripturæ testimoniis concludit: Movet itaque Deus occultâ potentia universam creaturam suam, eoque motu illa versata, dum Angeli jussa perficiunt, dum circumcunt sidera, dum alternantur venti, dum virgæ pullulant, &c. explicat secula, quæ in suos cursus non explicarentur, si ea ille, quæ condidit, provido motu ad ministrare cessaret.*

Repugnat etiam rationi. Nam Deus, ut est primum ens, ita & prima causa: unde ut ens creatum pendet ab eo in essendo, ita & causa creata in operando. Operari enim sequitur esse, ac illi commensuratur. Unde Apostolus ut rem notam in Areopago

Athe-

Atheniensis statuit, Deum non solum esse, sed & alia omnia omnibus dare, quod verum non foret, si solum daret esse, non verò actum operari. Ipse, inquit, dat omnibus vitam, & inspirationem, & omnia. Ac rursus, In ipso enim vivimus, movemur, & sumus; non utique ut in loco ambiente, sed ut in causa suo influxu in nobis operante non solum esse, sed & vivere, ac moveri, quod ad operationem pertinet. Id etiam luculentius constabit argumentis in hujus quæstionis decursu expendendis.

Nec urget, quod pro sua opinione affert Durandus, Effectus proprios causæ secundæ vim ejus non excedere, proindeque ad illos sufficere; nec dici posse, an Deus eadem, vel diversa actione eos cum creatura producat.

Ad 1. enim respond. cum Sancto Thoma Quæst. 3. de Potentia, artic. 7. Causam secundam sufficere in ordine suo, qui non excludit dependentiam ab alia superiori. Ad 2. verò respond. ex eodem Sancto Thoma ibidem, causam primam etiam eadem operatione effectum attingere, qua attingitur à causa secunda, quatenus operatio causæ secundæ est ab ea per virtutem Dei, ut operatio instrumenti est etiam à causa principali. Nihil enim prohibet, quin una & eadem actio procedat à primo & secundo agente, ut dicit 1. par. quæst. 105. art. 5. ad 2.

Constat itaque, causas secundas egere influxu Dei, non solum quo earum virtutes activas contulit & conservat, sed etiam quo & ipse aliquid confert, dum actu agunt. Verùm cum duobus modis intelligi possit hic influxus: primò ex parte effectûs tantùm, per modum simultaneæ & externæ cooperationis, ita ut Deus simul cum causa secunda eundem effectum producat, nihil influendo in ipsam causam; ut cum quis cum alio navem trahit, non aliquid socio confert, sed cum socio in navem agit: secundò etiam ex parte causæ, per modum prævi influxus in causam secundam, quo Deus eam ad agendum moveat, compleat, & applicet; ut cor cæteris membris vigorem prævium infundit, quo ad suas functiones excitantur & complentur: ingens est controversia, quonam ex his modis se habeat divinus influxus.

Et quidem Veteribus omnibus solenne fuerat, ut hunc  
Philos. R. P. Gaudin. IV. Pars. P in-

Influxum explicarent etiam per modum interioris virtutis, qua Deus occultâ potentia movet universam creaturam suam ad agendum, ut mox relatus Sanctus Augustinus loquitur; qua moventia secunda à primo movente mota cætera movent, ut loquitur Aristoteles; quæ recepta in causis secundis, juxta cujusque modum, eas complet, elevat, & applicat ad agendum, ut millies repetit S. Thomas.

At nupero seculo aliter visum Molinæ. Is in Libro, cui titulus est *Concordia*, & in Commentariis in questionem 14. primæ partis, artic. 3. disputat. 6. ingenuè fateatur, Sanctum Thomam sensitse, Deum movere & applicare causas secundas ad agendum, ut mox dixi; at id sibi non probari: quippe hunc motum & influxum Dei in causas secundas esse commentitium, nullâque ratione probari; atque adeo Deum non in causam, sed cum causa in ejus effectum influere per modum causæ partialis cooperando; ut equus equo currum trahenti, & nauta nautæ cimbam impellenti cooperatur. *Concursus Dei generalis*, inquit 1. part. quæst. 14. art. 3. Disput. 6. non est influxus Dei in causam secundam, quasi illa prius eo mota agat & producat effectum suum; sed immediatè cum causa in illius actionem & effectum, Et in hinc Disputationis, Cum dicimus, neque Deum per concursum universalem, neque causas secundas esse integras, sed partiales causas effectuum, intelligendum id est de partialitate causæ, ut vocant, non verò de partialitate effectus. Totus quippe & à Deo est, & à causis secundis; sed neque à Deo, neque à causis secundis, ut à tota causa, sed ut à parte causæ, qua simul exigit concursum & influxum alterius; non secus ac cum duo erabunt navim, totus motus proficiscitur ab unoquoque eorum.

Ex quo patet, juxta Molinæ, ac Sædatorum ejus sententiam, Deum non efficere, ut causæ secundæ agant, sed solum agere, cum illæ agunt. Atque ita, si res suis nominibus exprimantur, in ea opinione Deus agentium motor non est, sed cooperatur; nec dux actionis, sed socius; nec prima agendi causa, sed agentium concussa; nec dat illis agere, sed solum cum illis dat effectum esse; nec illis utitur, sed potius illa ipso: Non enim ea applicat, quod utentis est, sed ab iis applicatur. Unde cum creatura rationalis eo indifferenti concursu Dei rectè potius, quàm malè utitur, & illum ad bonum opus

opus applicat, non creatori tribuendum, sed creaturæ, ut etiam ipse Molina fatetur in suis Commentariis ad primam partem, quæst. 19 art. 6. disput. 3. ubi concedit, ex sua doctrina proficisci, ut virtutis actus, qui solo Dei generali concursu, & particulari arbitrii fit, non in Deum, sed in nos ipsos, tanquam in causam particularem, atque liberam ad illum determinantem referendus sit. Itaque, quod sumus, ac benè agere possumus, Deo quidem tribuendum; at quod boni viri sumus, ac benè agimus, nobis adscribendum, ut Seneca & post eum Pelagius docuere. Atque vel hinc constat, in quæ præcipitia hic dicendi modus, qui primâ fronte plerisque adeo commodus videtur, tandem perducatur.

Verùm hujus sententiæ Sectatores, cum Deo munus applicandi, ac determinandi creaturam in ordine Physico denegent, addunt tamen, id præstare, maximè in ordine gratiæ, per motiones morales, etiam prævias, rum exteriores, ut prædicationes, exempla bonorum, &c. tum interiores, ut sunt sanctæ cogitationes, inspirationes, illustrationes, &c. quibus allicit, ac excitat creaturam rationalem, quæ sola propriè hocce motionis genere capax est. At illud notandum, inde nihil speciale Deo tribui, cum non modò boni Angeli, sed etiam ipsi demones hocce genere motionis moralis voluntatem movere possint.

Alii, ac digniùs de influxu divino Thomistæ sentiunt. Docent cum tota Antiquitate, ac primatibus Theologicis & Philosophis, Deum non modò cum causis agere, sed etiam, ut illæ agant influxu suo, efficere, eas ad-agendum applicando; atque ita non modò cum illis, sed etiam per illas omnia efficere, ut integrè verum sit illud 1. Joan. nempe non modò sine Ilo factum esse nihil, sed etiam per ipsum omnia facta esse. Quod sine dubio longè amplioris est virtutis. Sic enim Deus non causarum socius est, sed princeps & dominus, illis utens ad suæ providentiæ finem; ac verè primus motor, primaque causa, à qua non modò effectus, sed & causæ omnes dependent. Unde ut cor jure primi viventis membris omnibus, eorumque facultatibus vitæ vigorem & agendi efficaciam confert eo influxu, quo subtracto statim labascunt, & ad suas functiones torpent; sic Deus, ut primum agens toti naturæ, ac agentibus omnibus, eorumque virtutibus activis ultimam agendi actualitatem

340 *IV. Par. Philosoph. Disp. II. Q. III.*

Influit, intimâ quadam, & ad omnem actionem, effectumque præviâ vi, qua subtrahâ virtutes omnes activas languerent, ut jure in sacris Ecclesiæ hymnis vocetur *Rerum tenax vigor*. Eo universali influxu vivificata omnia pro cujusque dispositione, ac conditione suas vires exserunt, ut supra relatus S. Augustinus expendit, Angeli jussa perficiunt, sidera circumeunt, vireta pullulant, animalia generant, &c. quatenus, ut ille ait, hæc causâ *provido motu administrata*, Deo non solum cum iis, sed etiam per eas agenti, ad finem divinæ providentiæ famulantur. Hinc quidquid boni est à causis secundis, Deo ut proprio auctori jure tribuitur; si quid mali & defectûs, in ipsas refunditur, quod ab ejus influxu ipsæ deficient. Ut animæ organa sua vivificant, quidquid rectè per ea fit, adscribitur; at si oculus caliget, si tibia curva claudicat, non animæ, sed organi vitium est.

Hinc influxum, quatenus causas secundas ad agendum movet, complet, & applicat, Thomistæ *Pramotionem Physicam* vocant, voce quoad usum aliquatenus novâ, quo ad sensum vetustissimâ. *Motionem* quidem, quia eo veluti impulsu cuncta ad agendum promoventur. *Præviâ* verò, quia omnem creati agentis actionem naturâ & causalitate præcedit. *Physicam* demum, ut eam quatenus agentia libera afficit, à motione morali distinguant. Non enim in objecti propositione sita est, sed in activa causarum applicatione. Solet etiam dici *Prædeterminatio Physica*, quod ad agendum determinet & applicet.

Sunt tamen, qui præmotionem illam Physicam admittunt quidem, autoritatum & rationum pondere convicti; at eam nolint esse prædeterminationem, quod, inquirunt, ad agendum hunc potius, quàm alium actum hæc generalis motio non determinet. Verùm hi frustra de voce litigant. Nam si hæc motio generalis sit, nulla vis creata eam subterfugiet, sed ad omnia omnino pari jure se se extendet. Cùm itaque causa secunda suâ virtute se determinat, id sanè non præstabit, nisi eâ universali & omnia pervadenti motione applicata; sicque ea motio determinativa rectè dicetur, quod per eam fiat, ut ipsa causa se determinet.

¶ Nec refert, quod ajunt, potius hanc motionem determinari per causas secundas, ut non semel docet Sanctus Thomas. Dicendum enim, ut etiam ipse se explicat, determinari passivè, ut à subjecto recipiente, quatenus

tenus in unoquoque agente recipitur, & operatur juxta modum ejus. Deus enim unumquodque movere & perficit juxta propriam dispositionem. Non verò activè, ita ut actione sua causa secunda divinam motionem applicet ad hunc potius, quàm ad illum effectum. Nam cum per eam causa quævis suam omnem habeat efficaciam, palàm est, in eam nullam exercere efficientiam; atque ita activè omnes causas determinat divina motio, eas à potentia ad ultimam agendi actualitatem transferendo; ipsa verò sic à nulla determinatur. Quippe ipsa est ultima actualitas in linea operandi; quæ à nulla formaliter & activè determinatur, sed solùm passivè, ut à subjecto recipiente, quatenus quidquid recipitur ad modum recipientis recipitur. Hæc aperta mens S. Thomæ. Hæc omnium verè Thomistarum doctrina, ex ipsa notione hujus motionis clarè sequens. Unde vel omnino negandum cum Molina, causas secundas moveri à Deo; vel admittendum, etiam prædeterminari, eo, quo diximus, sensu. Porro sub ea, & per eam causa libera seipsam determinat, ac non ipsam. Verùm hæc posterius. Itaque hæc motio etiam determinatio, imò *prædeterminatio* jure dici potest.

## ARTICULUS SECUNDUS.

*Quid sit concursus simultaneus. Quid præmotio physica. Quid motio moralis.*

**F**Requens est horum vocabulorum usus in hac questione. Unde ne eorum ignorantia tenebras questionis offundat, & Andabatarum more quasi clausis oculis de ignotis pugnemus, statim in ipso limine constituendum est, quid hæc vocabula significant.

Concursus simultaneus, ut ab iis, qui eum solùm admittunt explicatur, est influxus, per quem Deus causis secundis cooperatur, in quantum cum illis eundem effectum producit, illudque idem, quod creatura producit tanquam causa inferior ac limitatio, ipso quoque attingit & producit, tanquam causa superior & universalior.

salior. Unde concursus ille non movet, nec applicat intrinsecè causam creatam, imò non recipitur in illa, sed tantùm in effectu, ideoque per illum Deus nihil intrinsecè ponit in agentibus creatis, nec propriè facit, ut faciant, sed facit, cum faciunt. Est præterea talis concursus de se insufficiens, & indifferens ad producendum, vel non producendum effectum, & ad istud potius, quàm aliud ponendum; ideoque ut efficax sit, & hunc potius, quàm alium effectum producat, expectat creaturæ cooperationem; cui etiam sic se attemperat & accommodat, ut cum igne ignem, cum planta plantam, cum volente volitionem, cum volente nolitionem, cum alio aliud efficiat. Unde ex eo ratio reddi non potest, nec cur creatura agat potius, quàm non agat, nec cur istud potius, quàm aliud efficiat.

Premotio physica est influxus causæ primæ receptus, non quidem immediatè in effectibus, sed in causis secundis, quo Deus ipsis actualem efficacitatem inspirat, quo eas movet & applicat, non solum objectivè, ac moraliter, alliciendo & suadendo, sed etiam physicè & activè, interius inclinando, applicando, determinando, ac ultimam illam activitatem, ad quam statim sequitur actio, influendo; & ideo dicitur *Motio Physica*. Sed quia motio, & applicatio virtutis activæ ad agendum est prius natura, quàm ipsa actio, sicut omnis viâ est prior suo termino, & omnis causa suo effectui, ideo motio illa dicitur *prævia motio*, seu *præmotio*, quam ritè comparaveris illi impulsui, quo voluntas movet potentias sibi subditas, quo anima vivificat organa vitalia, quo cælum & sidera movent arbores ad fructificandum, quo manus movet baculum, & artifex securim, licèt ista omnia exempla non ex omni parte quadrent. Unde per illum influxum Deus activè & propriè facit, ut creatura faciat, redditque illam à se dependentem, non ut concausam concausæ, sed ut secundum agens primo agenti, & ut causam subditam, ac inferiorem superiori, à qua completur & applicatur, cui proinde non solum effectum suum debet, sed etiam propriam in productione effectus cooperationem.

Motio tandem moralis est invitatio quædam objectiva nihil imprimens voluntati, sed solum eam metaphoricè movens & trahens per modum allicientis suadendo, illustrando, deprecando, comminando, præcipien-

do, consulendo, &c. quomodo ait Poeta,  
*trahit sua quemque voluptas.*

& alius, *Corrumpunt bonos mores colloquia prava.* Unde solæ creaturæ cognitione præditæ sunt capaces illius motionis; nec enim ignis, v. g. vel arbor minis, aut precibus, aut blanditiis moveri possunt, ut patet; cum tamen ista moveant hominem. Immo aliquando bruta animalia istis movetur, in quantum cognitione aliqua prædita sunt.

Ex his habes definitiones & discrimina triplicis illius motionis. Definitiones quidem. Nam motio moralis est, Propositio objecti ad agendum invitantis, sive talis propositio interius fiat illustrando, sive exterius sensibilia objecta, quibus voluntas sollicitari nata est, offerendo. Concursus simultaneus est influxus, quo Deus agit, non in causam secundam, ut agit, sed in effectum simul cum causa secunda, eum scilicet attingendo sub altioribus & universalioribus formalitatibus, dum creatura illum sub limitatioribus attingit. Præmotio autem physica est influxus, quo Deus præviè, activè & intrinsecè applicat causam secundam ad agendum.

Discrimina verò. Nam motio moralis solum invitat ad agendum; physica verò intrinsecè & activè applicat ad agendum. Concursus autem simultaneus creaturæ agenti cooperatur. Prima movet solum objectivè, per modum finis alluciendo. Secunda movet effectivè, per modum agentis applicando. Concursus verò simultaneus nullatenus movet causam, sed se habet solum, per modum concausæ cooperando & adjuvando. Movere moraliter possunt omnes creaturæ, præcipue verò Angeli boni bona inspirando, Angeli mali tentando, Homines persuadendo. Movere physicè, præcipue voluntatem, soli Deo proprium est, qui solus omnes virtutes activas in manu sua habet, voluntatique illabitur, ac præest tanquam ejus author, conservator, ac moderator. Concurrere verò simultaneè, etsi speciali modo conveniat Deo, attamen & suo modo creaturis potest competere.

Res omnis sensibili exemplo declarari potest. Pictor dum præcipit discipulo, ut pingat, est motio moralis. Si apprehensam ejus manum simul cum penicillo moveat & applicet ad pingendum, est motio prævia physica. Si deum ipsius cooperando difficilliora tabellæ linea-



mentra perficiat simul cum discipulus faciliora expedire, erit concursus simultaneus. Ita quoque Deus dum bonum præcipit, suadet, consulit voluntati, eamque præmils, & pœnis excitat ad agendum, sive per suos prædicatores, sive per pias lectiones, seu per interiores illustrationes, est motio moralis. Dum voluntatem interioribus & activè applicat, movet, & inclinât ad amplectendum bonum, est motio physica. Dum nobis agentibus cooperatur, altiores formalitates operis attingendo, est concursus simultaneus.

Verùm circa duo postrema, concursum scilicet simultaneum, & præmotionem physicam, quæri potest primò an non semel admissâ præmotione superfluat concursus simultaneus, proindeque illi, qui tenent præmotionem physicam, negare debeant dari concursum simultaneum ab ea distinctum, utpote inutilem.

Respond. Concursum simultaneum probè explicatum debere ab omnibus admitti, etiam ab illis, qui præterea ponunt præmotionem physicam. Ratio est, quia non solum causæ secundæ dependent à Deo, ut primo motore & applicatore omnium virtutum activarum, sed enim quæcunque in rerum natura fiunt, ab eo immediatè attinguntur, ut à prima causa, quæ tamen non excludit causalitatem agentium creatorum. Unde non solum admitti debet divinus quidam influxus in causas secundas, quo ad agendum in ordine suo moveantur, ac applicentur: quique est ipsissima præmotio, sed præterea necessarius est alius, quo Deus tanquam prima causa immediatè influat in effectum, ipsum attingendo sub altiori quadam formalitate soli primæ causæ correspondenti, dum agens creatum illum attingit sub inferiori formalitate sibi propria; & hic influxus est concursus simultaneus. Quamquam autem hi duo influxus communiter comprehendendi soleant ab Authoribus, præcipuè antiquis, sub communi vocabulo *Divini influxus*, attamen re ipsâ distincti sunt, ac diversi; quia prævius recipitur in causa secunda, quam applicat ad agendum; simultaneus verd in effectu, quem producit, saltem eo modo, quo recipi dicitur. Primus cessat cessante causalitate agentis creati; secundus perseverat, quandiu manet effectus productus: ut in productione rei habet munus influxus effectivi, sic eâ in esse perseverante habet munus influxus conservativi. Primus nihil de effectu

Qua attingit, quod & agens creatum non attingat, quia eatenus effectum attingit, quatenus causam secundam ad illum attingendum complet, & applicat. At verò secundus qualdam formalitates in effectu attingit, quæ à causa creata non attinguntur, quales sunt eæ, quæ primæ causæ ita singulariter respondent, ut ab inferioribus nequeant respici. Ejusmodi est in primis materia prima in rebus corporeis, quæ à solo Deo immediatè creatur, & licet deinceps conservetur eadem actione, qua & composita genita ex illa, attamen non conservatur per illam actionem, ut precedentem ex influxu causarum secundarum, sed ut precedentem ex concursu Dei, qui est proprius author, ac conservator materiæ; & præterea *esse* absolutè, ac simpliciter sumptum in omnibus rebus est immediatè à divino concursu. Ut enim profundè advertit D. Thomas 1. part. quæst. 45. art. 3. ad 1. & 3. cont. Gent. cap. 66. causæ creatæ non producant *esse* absolutè, sed solam ipsum applicant ad hoc subjectum. Unde *esse* rerum, ut productum absolutè, soli virtuti divinæ correspondet; ut verò eductum de tali subjecto, correspondent virtuti agentium creatorum, à Deo tamen motorum. Et ideo solus Deus est immediata causa, cur res sint; agentia verò creata sunt causæ, cur res ab ipsis productæ taliter *esse* participant. Unde annotante eodem S. Doctore, præsupponunt semper subjectum capax tali, & tali modo participandi *esse*, de quo possint illud educere.

Dixi autem expressè in responsione, *concursum simul tantum probè explicatum ab omnibus admitti debere*, quia ut à Molina, ejusque Affectis explicari solet, ita ut scilicet sit quidam influxus partialis, Insufficiens, & quodammodo dependens à creatura; non solum non est necessarius, sed etiam indignus, qui primæ causæ adscribatur. Et quidem partialis esse non potest; nam oportet, Deum in ratione primæ causæ, ac eo in ordine totum effectum attingere, cum nihil in eo sit, quod ejus causalitatem subterfugere possit: unde influxus ille, quo effectum attingit, est totalis in suo ordine, proindeque, ut ait D. Thomas 3. contra Gentes, cap. 70. *Non sic idem effectus causa naturali & divina virtute tribuitur, quasi partim à Deo, partim ab agente naturali fiat, sed totus est ab utroque secundum alium & alium modum.* Unde Opusc. 1. cap. 23. rejicit expressè exemplum Mo-

### 346 IV. Part. Philos. Disp. II. Q. III.

linæ comparantis concursus Dei, & creaturæ duobus portantibus idem pondus, vel trahentibus eandem navim, ut videas, Adversarios longissimè hac in re à D. Thomæ mente aberrare. Concursus præterea Dei nequaquam dicendus est dependere à creatura, cui cooperator, tum quia contra ordinem est, ut superior quatenus superior dependeat ab inferiori: concursus autem ille est Dei agentis ad modum causæ superioris. Tum etiam quia, ut ait S. Thomas 3. contra Gentes, cap. 70. licet influxus Dei non producat effectum sine causa secunda, attamen hoc ipsum non est ex insufficientia & indigentia, sed ex abundantia & redundantia ipsius in creaturam, à qua participatur ejus virtus: Ergo ex hoc non dependet à creatura, sed solum eam à se dependentem constituit.

Verùm rogabis secundò, Qua ratione fieri possit, ut effectus, qui est totaliter à Deo, sit etiam à creatura, & quomodo si influxus Dei sufficit ad productionem effectus, cooperatio creaturæ non sit superflua?

Respond. Ex D. Thomæ mox relato, quia alio & alio modo respicitur à Deo, & à creaturæ: à creatura quidem, ut ab agente proprio, & sub ratione particulari talis entis; à Deo verò, ut à causa universalissima rerum, & sub ratione entis, absolute, ac simpliciter. Unde sub diversa ratione attribuitur causæ primæ & secundæ. Nam causalitas unius ordinis non impedit, nec excludit causalitatem alterius, quamvis sit totalis in suo ordine. Id totum exemplo sensibili declarari potest in tecto domus, quod portatur, & à parietibus tanquam à proprio, ac particulari suo fulcimento, & præterea à tellure, tanquam generali omnium corporum basi, ita ut quodlibet ex illis duobus sit totalis ratio in suo ordine. Quemadmodum ergo terra, licet sit sufficiens, & totalis omnium gravium basis, eaque proinde substeat, non impedit tamen, quin supra ipsam unum corpus aliud substeat, sed potius cum eo concurrat ad eam sustentationem: Ita Deus, licet sit sufficiens & totalis causa totius entis, proindeque totum ens ex se profundat, attamen non impedit, quin in entibus à se productis unum dependeat ab alio, tanquam à causa proxima, sed potius id ipsum facit, concurrente utroque præfato modo cum propriis, ac secundis causis ad productionem effectuum.

## ARTICULUS TERTIUS.

*Positum Deus de potentia absoluta causas secundas tam liberas, tam necessarias, physice præmovere, & applicare ad agendum.*

**P**roposito difficultatis statu, explicatisque terminis, ut gradatim accedamus ad ejus decisionem, in hoc articulo quaerimus, an Deus de potentia absoluta possit applicare, ac movere physice causas secundas ad agendum, quippe cum Deus plura possit, quæ tamen non facit. Quidam ex Adversariis Divinæ omnipotentis reverentiæ perculsi non audent negare, Deum posse causas secundas, etiam liberas, physice præmovere sine libertatis præjudicio; sed dicunt, id minime necessarium esse, eo quod causa libera possit seipsam applicare, ac determinare. Alii verd negant, etiam divinitus posse voluntatem moveri præviè & physice, sine libertatis præjudicio; rati, suæ sententiæ columnen præcipuum funditus rueri, si semel admittatur, possibile esse voluntatem præmoveri à Deo salvâ libertate. Sed mirum est, homines adeo liberales in admittendis casibus longè difficilioribus; ut quod materia esse possit sine forma; quod idem corpus possit simul esse quantitativè in duobus locis, &c. in hoc uno scrupulosos esse; quasi verd magnum inconveniens sit, Deum authorem voluntatis illam salvâ ejus libertate, posse applicare præviè, physice & infallibiliter ad id, quod sibi placuerit.

## PRIMA CONCLUSIO.

**D**eus potest physice præmovere causas naturales ad agendum.

Hanc conclusionem nemo potest negare salvâ Fide, qua tenemus, Deum esse omnipotentem, & rerum omnium Dominum. Non enim erit integrè omnipotens, nec rerum supremus Dominus, nisi virtutes naturales ita ipsi subiaceant, ut possit illas ad nutum vel suspendere ab actione, vel applicare ad agendum. Deinde si Angeli possunt physice applicare virtutes naturales, ut dum tempestates sicut, urbes evertunt, morbos inferunt

### 348 IV. Par. Philos. Disp. II. Qu. III.

runt, passionēs excitant, phantasiā concutunt, poterit à forclori Deus vires creatas applicare, cum, ut dicte Scriptura, *In manu ejus sunt omnes fines terra, & in ejus ditione universa sunt posita*, cujus Imperium sentiunt omnes creaturæ, quique deum est Rex universorum, ut ipsa movere & applicare ad utrum possit.

### SECUNDA CONCLUSIO.

**D**Eus non solum causas necessarias, & naturales, sed etiam liberas potest physicè præmovere, applicando scilicet eas activè, præviè, infallibiliter & intrinsecè ad operationem. Conclusio sequitur ex præcedenti. Nec enim Deus minùs dominatur voluntati humanæ, quàm cæteris creaturis. Attamen quia cardo difficultatis ipsi incumbit.

Probat. 1. Auctoritate Scripturæ, dicentis Proverbi-  
orum 21. Corda hominum esse in manu Dei, ut quò  
vulnerit, illa inclinet; & Isaia 20. Deum uti volun-  
tate hominum, sicut artifex utitur, securi quam versat,  
ut placet. Ipse etiam Deus, ut hanc mutandi, versan-  
tique cordis humani potentiam ostendat, dicit per Pro-  
phetam Ezechielem cap. 36. *Dabo vobis cor. carnum*, id  
est, durum, & rebellem vestram voluntatem mutabo,  
in voluntatem docilem & obedientem, & faciam, ut in-  
grateptis meis ambuletis, & iudicia mea custoditis, & ope-  
ramini. Quibus verbis, pluribusque aliis, quæ infra  
magis ponderabimus, Scriptura sacra, luculenter exprit-  
uit efficaciam divinæ voluntatis, ad movenda corda ho-  
minum, supremumque dominium, quo Deus potest  
etiam activè, intrinsecè, ac infallibiliter inclinare no-  
stras voluntates, id est, physicè præmovere. Hinc s.  
Augustinus rotas inculcat, *Deum habere cardium*, quò  
voluerit, inclinandum omnipotentissimam potestatem. Et  
in Enchirid. cap. 96. *Quis*, inquit, *ita desipiat, ut dicat,*  
*Deum malis hominum voluntates, quas voluerit, quando*  
*voluerit, in bonum convertere non posse*; aliàs, ut ipse dis-  
currit Enchiridii cap. 95. periclitatur ipsum nostra fidei  
confessionis initium, quas nos in Deum omnipotentem crede-  
re profiteamur, nisi possit Deus facere, ut aliquid velle-  
mus; idque per molitionem efficacem & potentissimam.  
Immo, ut idem dicit de Corrept. & grat. cap. 14. *Deus*  
*magis habet in sua potestate voluntates hominum, quàm ipsi*  
*homi.*

## De Præmotione. Art. III. 349

*domine* : Ergo , ut etiam expresse dicit S. Thomas qu. 22. de Verit. art. 8. si homo possit se ipsum liberè applicare ad agendum , poterit à fortiori Deus . Unde idem S. Thomas 1. part. quæst. 111. artic. 2. hanc Deo tribuit prærogativam , ut possit movere voluntatem , non solum persuadendo , id est , moraliter , sed etiam activè , interiorè inclinando ad id , quod voluerit , id est , physicè & infallibiliter . Sed utriusque sancti Doctoris loca exactius infra expendemus .

Probatur 2. Conclusio ratione fundatâ in triplici principio S. Augustini & S. Thomæ . Ille potest , nedum moraliter persuadendo , sed etiam physicè applicando , movere voluntatem , cujus voluntas est efficacissima , qui supremum dominium habet supra corda hominum , qui est creator ipsius voluntatis : Atqui Deus habet voluntatem efficacissimam , est supremus cordium Dominus , est author voluntatis humanæ : Ergo potest physicè & activè applicare , ac movere voluntatem . Minor est de fide . Major verò , præter quàm traditur à S. Augustino & S. Thomæ , quos suis locis infra citabimus , probatur quantum ad omnes partes .

Et primò quidem demonstratur ex efficacia divinæ voluntatis : ut enim ait S. Thomas 1. part. quæst. 19. art. 2. ad efficaciam divinæ voluntatis pertinet non solum ut res fiant , sed etiam ut fiant eo modo , quo vult fieri : Atqui nisi posset applicare physicè & præviè voluntatem ad liberè volendum , non posset facere , ut res fierent eo modo , quo vellent fieri Ergo potest physicè & præviè applicare voluntatem ad liberè volendum .

Probatur etiam eadem major ex secundo capite , scilicet supremo Dei dominio supra nostram voluntatem . Si quidem domini est uti re suâ , id est , applicare eam ad operationem : usus enim , ut definit S. Thomas , nihil aliud est , quàm applicatio rei ad operationem : Ergo cum Deus sit supremus voluntatum Dominus , poterit eas applicare ad operationem .

Probatur demum ex tertio , scilicet ex eo , quod Deus sit creator voluntatis : quia ille , qui est author voluntatis , potest eam transferre de uno ad aliud , eam interiorè inclinando per modum causæ efficientis , ut loquitur S. Thomas quæst. 21. de Verit. art. 10. & 1. 2. quæst. 70. art. 2. Atqui Deus est author voluntatis : Ergo potest eam activè inclinare ad volendum , transferendo ab uno actu in  
aliu

350 *IV. Par. Philos Disp. II. Q. III.*

allum, id est, physice præmovere; nihil enim aliud sonat physica præmotio. Minor est de fide. Major verò declarari potest ex D. Thoma, apud quem perpetuè inculcatur. Inclinatio enim sequitur naturam; unde sicut ab eo datur, qui dat naturam, ita & illi manet semper perfecte subdita, ut eam, prout libuerit, immutet, ac verset. Cum igitur voluntas sit inclinatio naturæ intellectualis, datur à Deo, qui est author rerum spiritualium, eique soli ita subditur, ut possit ab eo inclinari ac flecti, ut ipsi libuerit. Hanc rationem egregiè ponderat D. Fulgentius lib. de Incarnat. & Gratia, cap. 29. ubi ait. *Stane verò rerum ordo credi putativè permittitur, ut Deus, qui est creator hominis, valeat hominem facere, non mutare: & qui nullius eget adjutorio, ut hominem facias, operari tamen quod vult in hominis voluntate non possit? priusquam in homine ipsum velle repererit? Hanc amenitiam & à fidelibus suis arceat, & ab infidelibus auferat Deus.*

Respondebis 1. Deum posse quidem applicare voluntatem per motiones morales, & concursum simultaneum, non tamen per præmotionem physicam.

Sed contra. Motio moralis & concursus simultaneus non salvant efficaciam divinæ voluntatis, nec dominium, quod habet in corda hominum, nec ipsi tribuunt prærogativam dignam auctore voluntatis: Ergo præterea concedenda est aliqua intimior & fortior motio, scilicet physica. Consequentia patet. Quid enim potest excogitari præter concursum simultaneum, motionem moralem, & præmotionem physicam? Antecedens verò probatur; atque in primis de efficacia divinæ voluntatis. Hæc enim non salvatur per motionem ex se inefficacem, & concursum indifferentem: Sed motio moralis est ex se inefficax; concursus verò simultaneus est indifferens, id est, non magis inclinans ad agendum, quàm ad non agendum; expectat enim, juxta Adversarios, voluntatis humanæ cooperationem: Ergo nec motio moralis, nec concursus simultaneus salvant divinæ voluntatis efficaciam. Quod etiam non sufficit ad supremum dominium supra corda hominum, probatur. Supremum dominium non salvatur per motionem & concursum humanæ voluntati subditum, sed solum per concursum, qui sibi subdat humanam voluntatem: Atqui motio moralis secundum veritatem, & con-

& concursus simultaneus secundum Adversarios subduatur humanæ voluntati : Ergo non salvant supremum dominium supra corda hominum . Probatum minor . Nam concursus simultaneus de se indifferens est , nec facit , ut voluntas faciat , sed potius hoc ab ea expectat . Motio verò moralis desumit suam efficaciam à voluntate humanâ , in quam nihil possunt persuasiones , commotiones , blanditiæ , & aliæ motiones morales , nisi finat se ipsam moveri . Quod demum ex illis nulla Deo tribuatur prærogativa digna auctore voluntatis , probatur , & in primis de concursu simultaneo . Nam cooperari alicui rei convenit indifferentet & causæ & non causæ talis rei : Atqui concursus simultaneus est cooperatio Dei cum voluntate : Ergo per concursum simultaneum nulla tribuitur prærogativa Deo ut auctori voluntatis . De motione etiam morali idem evidentius constat , siquidem Angelus , quamvis non sit auctor voluntatis , potest tamen eam moraliter movere ; immò sæpe nostrâ improbitate fit , ut motiones morales , quibus diabolus nos movet tentando , sint efficaciores , quàm quibus Deus non movet : sæpe enim homines facilius credunt diabolo tentanti , quàm Deo bona suadenti : Ergo ex illa motione nulla Deo tribuitur prærogativa digna auctore voluntatis .

Repones , Deum posse quidem movere voluntatem ad volendum , etiam physicè & præviè , ut volunt Thomisæ ; sed tunc voluntatem non fore liberam .

Sed impugnantur responsio , primò urgendo auctoritates relatas . Nam Scriptura , D. Augustinus , & D. Thomas agnoscunt voluntatem liberam sub illa motionis efficacissima . Scriptura quidem : quia illi , de quibus Deus dicebat , facturum , ut in suis præceptis ambularent , sine dubio liberè in illis erant ambulaturi , aliàs nihil meruissent . Itidem S. Augustinus , siue dicat Deum malam voluntatem convertere in bonam , siue corda hominum inclinare in bonum , semper loquitur respectu operum bonorum & meritoriorum ; opus autem nec bonum est , nec meritorium , nisi sit liberum . Et tandem S. Thomas expressè in hoc reponit efficaciam divinæ voluntatis , ut possit non solum facere , ut faciamus , sed etiam ut liberè faciamus , id est , ut cum motione divina quantumvis efficaci libertatem conservemus : Ergo potest Deus nos movere physica illa applicatione , illâ libertate .



Secundò impugnatur urgendo rationes. Deus est Dominus & auctor voluntatis etiam reduplicativè ut libera est, id est, sine præjudicio libertatis: Ergo potest eam activè applicare ad actum ut liberum. Sed fatentur hac in parte Adversarii, quòd concipiant Dei motionem ad modum cujusdam virtutis è diametro oppositæ voluntati, & contra ipsam militantis, quam venientem fortior vincat, liget, & ut placuerit, etiam repugnantem trahat, non secus ac victor victum. Cum tamen illa sit quædam efficacissima quidem, sed blandissima vis omnibus cordis nostri fibris sese lenissimè insinuans, & à fine ad finem fortiter quidem, sed suaviter attingens, ut ait Scriptura. Unde applicat intellectum ad cogitandum, ac ad deliberandum; & voluntatem ad eligendum conformitur ad dictamen intellectus, in quo ratio libertatis consistit: & sicque per nos ipsos uberrimè agentes exsequuntur, quidquid per ipsam Deus destinaverit, ut non semel annorat S. Augustinus.

Addi posset pro confirmanda conclusione, vulgarissima quidem, sed efficacissima hac in parte ratio. Deus potest quidquid non implicat contradictionem. Atqui non implicat contradictionem, ut Deus activè, prævidèque applicet voluntatem ad liberè volendum: Ergo id potest. Major patet. Minor veid ex eo constat, quòd non satis appareat hæc implicancia. Quod enim Adversarii objicere solent, actum voluntatis sub illa motione fore liberum, ut supponitur, & tamen non fore liberum, abundè solvetur articulo 6. & 7. interimque ex eo confutari potest; quòd non sit contra rationem causæ liberæ creatæ, ut inclinetur ad suum actum ab auctore totius libertatis, dependeatque à suo creatore ut ab applicante, ut millies repetit D. Thomas: Ergo liberè agit etiam sub motione & applicatione Dei, proindeque actus remanet perfectè liber.

## ARTICULUS QUARTUS.

*Præmotio de facto Deus causas secundas.*

**H**ic cardo difficultatis vertitur, an scilicet creaturæ ita Dei præmotione indigeant, ut sine illa nunquam operentur.

Negant Molina & ejus affectæ. Sententia verò affirmativa est omnium, qui Molinam præcessere, si tamen paucos excipias, qui Durandi opinionem, & alias omnino improbables secuti sunt: quam enim aliam tenere poterunt nondum propalatâ inter Catholicos Molinæ sententiâ? Præcipuè cum Suarez dicat, non posse explicari concordiam divinæ Providentiæ cum libertate humana sine Molinæ invento, aut Thomistarum præmotione. Hanc sententiam tenent Thomistæ omnes cum utroque gratiæ Doctore Augustino & Thoma. Tenent primates Theologi & Philosophi, quorum catalogum texere longius esset. Tenent præcipuè Orbis Academiæ, Salmaticensis, Lovanienſis, Duacensis, &c. Tenent præcipui Religionum Ordines, & demum omnes, qui sincerè profitentur, se S. Thomam sequi, physicam præmotionem ut Scholæ Thomisticæ tesseram agnoscunt. Accedunt quoque primates Societatis, ut Salmeronius, Toletus, Bellarminus, Pererius, Azorius, Cosmas Alamannus, Henriquez, &c. quorum testimonia videri possunt apud R. P. Gonet, 1.2. disput. 6. art. 2 §. 4. Immo nuper anno 1654. quidam primæ classis Jesuita in Universitate Viennensi publicè defendit, *Iterum iterumque esse possibilem qualitatem, quæ ex essentia sua physica & reali infallibilem consensum induceret salvâ libertate*, ut refert Catamuel. lib. 1. Theologiæ fundamentalis, cap. 1. nota 4. & plures, quos ut fieri solet, educatio implicuerat opinioni contrariæ, ubi S. Augustinum & S. Thomam, eorumque inviolabilissima fundamenta paullo accuratius examinarunt, sapientiores facti, illam ejurarunt, ut referunt Salmaticenses. Secutus ergo saniores, & majorem partem.

## C O N C L U S I O.

**D**Eus non solum dedit & conservat virtutes activas causarum secundarum, & cum illis concurrat; sed etiam eas ad agendum applicat, applicatione præviâ & physicâ, quæ rectè *promotio*, seu *prædeterminatio physica* nuncupetur.

Explicatur magis hæc conclusio, in quam tota difficultatis moles incumbit. Dicimus ergo, Deum ut primum & universalem omnium motorem applicare physicè & præviè omnes causas secundas ad agendum; ita ut sicut in ratione primi entis influit continuè rebus omnibus ipsum esse, quod est ultima actualitas in linea entis, idque per influxum prævium & physicum, utpote qui causat ipsam rerum existentiam, sicut probat S. Thomas 1. p. q. 108. Ita quoque in ratione primæ causæ cæteris omnibus influit ipsum agere, quod est ultima actualitas in linea operandi, activè applicando virtutes operativas ad agendum juxta cujusque naturam & conditionem. Unde S. Thomas Opusc. 2. cap. 146. peregre inquit, *Quoddam sicut motus cordis, qui est ab anima in corpus, est vita corporis, ita motus, quo universum movetur à Deo, est quasi vita universi*; ideoque ob id dicitur Deus omnium *Vivificator, Motor, Gubernator, Vigor*. Hunc igitur influxum, hanc applicationem, qua Deus reddit causas secundas in actu secundo agentes, qua virtutes activas transfert ab origo ad exercitium, qua omnibus ultimum agendi vigorem influit, vocamus *promotionem*. Sic explicata conclusio,

In primis quantum ad priores partes, scilicet Deum dedisse & conservare omnes virtutes activas, est de fide; & supra demonstrata est cum ostendimus, Deum esse primum omnium principium. Quod etiam simul concurrat cum causis secundis, modò conceditur ab omnibus, & probatum, ac declaratum fuit supra art. 2.

Ultima verò, ac præcipua pars, Deum scilicet omnes causas activè præmovere, seu applicare ad agendum, probanda nobis est omni argumentorum genere. 1. Auctoritate Scripturæ Sacræ. 2. Auctoritate Conciliorum. 3. Ex ipsis Ecclesiæ præcibus, ac communi Fidelium consensu. 4. Auctoritate Patrum. 5. Antiquorum Philosophorum. 6. S. Augustini. 7. S. Thomæ. 8. Rationibus. 9. Exemplis. 10. Ex inconvenientibus, quæ ipsa promotione sublata sequuntur.

## S. I.

*Probatur Præmotio auctoritate Scripturæ.*

**I**nculcat sæpe nobis Scriptura suprenum dominum, efficacissimam potestatem, & infallibilem illam motionem, qua Deus omnia sibi subijcit, etiam corda hominum, quæ immutat & transfert ab uno affectu ad alium, & applicat prout placuerit, applicatione, loquam, cui nihil resistit. Unde Esther 13. dicitur, *Dominus rex omnipotens, in cujus ditione cuncta sunt posita, ita ut non sit, qui possit resistere voluntati ejus.* Sed hæc omnia nihil aliud sonant, nisi ipsissimam Thomistarum præmotionem; nam concursus simultaneus est de se indifferens, & magis expectat, quàm dat applicationem agendi, juxta Adversarios: Motiones verò morales sunt ex se inefficaces: Ergo juxta Scripturam admittenda est physica præmotio. Loca omnia prosequi longius esset, hic solum quædam expendemus.

Illustri præcipue locus est Isaia 10. ubi Deus assertit, se movisse cor Sennacherib Regis Assyriorum, ut artifex suam securim, & manus baculum moveret. Unde vocat *Virgam furoris sui & baculum*; ejusque superbiam inculpans ait, *Numquid gloriabitur securis contra eum, qui secatur ea, aut exaltabitur serra contra eum, à quo trahitur? quomodo si elevetur virga contra elevantem se, & exaltetur baculus, qui utique lignum est.* Qua expressione clariore potuisset Scriptura physicam præmotionem nobis explicare, & dependentiam creaturarum causarum à Deo creatore? Neque dici potest, hic intelligi motionem moralem; nam hæc responsio destruit textum. Si enim Deus movit solum moraliter: Ergo non sicut artifex securim, sed sicut spes prædæ movet militem, minister Regem, consiliator eum, cui dat consilium.

Expressus est etiam locus Prov. 21. *Sicut divisores agrorum, ita cor Regis, in manu Domini est: quocumque voluerit, inclinabit illud.* Vides dominum Dei supra corda regum hic luculenter expressum per dominum agricolæ supra aquas, quarum rivulos per agrum sine vi derivat, eas vel coercendo, vel impellendo, prout placet; ita Deus habet in manu sua corda hominum, quæ vel cohibere, vel inclinare potest, ut vult, absque ulla resistentia. Unde

de meritis S. Augustinus de Correp. & grat. cap. 14. *Deus de ipsis hominum voluntatibus quod vult, cum vult, facit.* Hoc domino usus est Deus, dum irati Regis Assueri, cor transtulit ab indignatione ad mansuetudinem, Esther c. 14. ut notat, ac ponderat S. Augustinus lib. 2. contra duas Epistolas Pelagianorum cap. 20. Utitur etiam quotidie, dum non solum suadet interiori inspirando, sed etiam immutat cor principium populi terra, ut dicitur Job. 12. cuius exemplum habetur in Saule, Cui Deus immutavit cor aliud, ut dicitur 1. Reg. c. 10. Neque tantum principium, sed etiam omnium hominum, quorum corda applicat ad se, ut dicitur Jeremiæ 31. *Applicabo, & accedent ad me.* Unde Jeremiæ 31. introducitur populus Dei dicens, *Converte me, & convertar, quia tu Dominus Deus meus; ut indicetur motum cordis humani à Deo incipere.*

Accedit celebris D. Paulli autoritas Rom. 9. dicentis de bonis operibus, *Non est volentis, neque currentis, sed misereantis Dei,* qui, ut idem Apostolus dicit ad Philip. 2. *operatur in nobis velle, & perficere.* Quæ verba intelligi non possunt de motione morali, cum illa nihil operetur, sed solum ad operandum invitet; imò totam efficaciam mutucentur à voluntate consentiente: Ergo si solum Deus moveret nos motione morali, bonum opus non esset propriè Dei moventis, sed voluntatis consentientis, & vocem Dei audientis. Neque etiam intelligi possunt de concursu simultaneo; ut enim arguit S. Augustinus in Enchiridio, cap. 32. *Si ideo dictum est, Non est volentis hominis, sed misereantis Dei, quia voluntas hominis id sola non implet, (id est, quia fit ex concursu simultaneo Dei & hominis) cur non & contrario restat dictum, Non est misereantis Dei, sed volentis hominis, quia id misericordia Dei sola non implet?* Ubi funditus evertit sententiam Adversariorum per solum concursum simultaneum explicantium activam Dei motionem; & postea concludit, *Restat, ut totum sit Dei, qui voluntatem hominis preparat, & preparatam adjuvat:* id est: non solum cooperatus voluntati agenti, sed etiam applicat eam ad agendum.

Id confirmant ea Scripturæ loca, in quibus apertè docet, omnia esse à Deo, & per eum fieri. Joan. 1. *Omnia per ipsum facta sunt, & sine ipso factum est nihil.* Ad Romanos 11. *Quoniam ex ipso, & per ipsum, & in ipso sunt omnia.* 1. Corinth. cap. 4. *Quid habes, quod non accepisti? & cap. 12. Operetur opus in omnibus:* Ergo operatur ipsum in-

Influxum & cooperationem creaturæ, idque præviè: nam influxus, quo causa aliquid efficit, est eo prior natura & causalitate. Unde Aponolus non dixit *operari omnia cum omnibus*, sed *in omnibus*, ut significaret, non solum creaturum, sed etiam quidquid entis & perfectionis in ea, vel ex ea est, esse opus Dei. Atque hinc excluditur, quod reponi posset, Deum creaturæ influxum eatenus causare, quia vim activam, qua cooperatur & agit, primò contulit. Nam eo sensu jam non operaretur omnia in omnibus, ut ponderat S. Augustinus Epist. 146. Deinde quis dixerit, partem operari in oculo visionem, quòd ab eo sit facultas, qua filius videt? Apertius id constat in causis liberis, de quibus præcipuè loquitur Apostolus. Nam liberum arbitrium vi suæ creationis non habet, ut Deo concursum suum ad bonum opus offerenti, ac illud suadenti consentiat & cooperetur, porius quàm dissentiat: Ergo si consentiat, hoc ex se habebit; id enim non fit, nec vi actionis creativæ, nec vi concursus indifferents, nec vi motionis morali. Ergo habebit aliquid, quod non acceperit à Deo, & quod Deus in eo non operatur, quod est contra Apostolum.

Concludamus itaque, si veræ sint, ac minimè hyperbolicæ expressiones Scripturæ, quibus nobis commendat & explicat vim divini influxus, ut haberi debent circa controversiam, hunc talem esse, ut non solum Deus cum causis agat simul convertendo, sed etiam per causas, eas applicando, illque ut sibi subditis virtutibus ad effectus suæ providentiæ utendo. Sic enim rectè intelligitur *operari omnia*, non modo cum omnibus, sed etiam *in omnibus*; omnia ex ipso & per ipsum esse, ac fieri; corda regum esse in manu ejus; se habere ad eum ut baculum in manu hominis, & securum in manu artificis; ab eo immutari, & applicari, &c. Hæc adversus præmotionem integrè constanter negatà dimittunt, ac improprie vix explicantur.

S. II.

*Probatur Præmotio ex Conciliis.*

**H**unc locum latè urgent nostri Theologi. Nos eo pressius utemur. In Conciliis contra Pelagium habitis, præcipuè Arausicano a. decernitur, Hominem de suo nihil boni habere, sed quidquid boni habet, id à Deo  
 illi

# 358 IV. Part. Philos. Disp. II. Qu. III.

tribui: *Multa*, inquit Concilium can. 20. *in homine bona sunt, quæ non facit homo: Nulla verò facit homo bona, quæ non Deus præstat, ut faciat homo. Nemo enim habet de suo, nisi mendacium & peccatum*, ut subdit can. 22. Quo decretu radicatus extirpatur Hæresis Pelagii. Nam si quid boni, quantumvis exigui, ita homini vindicetur, ut à Deo non acceperit, radix erroris retinetur, surculi tantum amputantur: Sed semotâ præmotione, retento solo concursu simultaneo cum motione morali, cooperari Deo in bonis operibus, quod sine dubio bonum est; immo quod bonos à malis discernit, non erit à Deo, sed ab homine; Non enim dici potest dari homini à Deo, quatenus ipse dedit liberum arbitrium, ita enim dicebat Pelagius: Nec per concursum simultaneum; hic enim non dat influxum creaturæ, sed expectat: Nec per solas motiones morales, quæ non dant consensum voluntati, sed magis ab ea expostulant: Ergo juxta hæc Concilia admitti debet præmotio, quæ propriè Deus præstat homini, ut sibi in bonis cooperetur.

Eandem admittendam ex Concilio Tridentino probari potest, ac quod fortè mireris, ex ipso eo loco, quem adversus illam plerique urgent. In sacra illa Synodo die 13. Januarii anno 1547. Sessione 6. can. 4. contra Lutherum & Calvinum definitum est, *liberum arbitrium motum ut excitatum à Deo, cooperari divinæ motioni, & posse dissentire, si velit*, id est, retinere sub divina motione potestatem ad oppositum. Concedo, ibi traditam esse ipsissimam præmotionem Thomistarum, & simul declaratum non auferre libertatem, seu potentiam ad oppositum, quæ duo sunt capitalia sententiæ nostræ columnina. Sic igitur argumentor.

Concilium admittit illam motionem, cum definit, voluntatem humanam cooperari, & cum illa retinere potentiam ad dissensum: Atqui Concilium ibi definit, voluntatem cooperari præmotioni physicæ, & cum illa retinere potentiam ad dissensum: Ergo ibi Concilium admittit præmotionem physicam. Major patet. Nam quod non est, non habet proprietatem: unde motioni, quæ non datur, non possumus cooperari, nec dici cum illa retinere potentiam ad oppositum. Minor probatur. Concilium ista dicit, loquendo de illa motione, Cui Calvinus & Lutherus dicebant non cooperari, & cum illa non retinere potentiam ad dissentiendum: Atqui hæc est ipsa præmotio phy-

physica: Ergo Concilium ibi loquitur de præmotione physica. Minor est Adversariorum, qui Thomistis objiciunt, eos docere Calvini & Lutheri motionem, quamvis nunc adeo ineptâ recriminatione parcius uti soleant. Major vero probatur. Nam Concilium ibi agit contra Calvinum & Lutherum, quorum doctrinæ opponit contradictorium decretum: Ergo debet loqui de eadem motione, de qua loquuntur Calvinus & Lutherus, aliâ nihil directè & contradictoriè contra illos deciperet. Et quæso te, si Titius contenderet, vineam suâ injustè usurpata à Sempronio, & Judex definiret, donum esse restituendum, appositane esset sententia ad decisionem litis, quæ nulla est de domo, sed de vinea? Ita pariter si hæreticus contendit, creaturam non cooperari præmotioni physicæ, ac cum illa non retinere potentiam ad dissensum, & Concilium definiat de alia motione, ut de morali, aut simultaneo concursu, profectò nihil definit contradictoriè, sed adhuc definiendum restat, an motio illa, de qua loquitur hæreticus, auferat potentiam dissentendi.

Argumentum validius erit, si tantisper hîc duo ponderemus. Primum est, Sapientissimos Concilii Patres optimè novisse, Calvinum & Lutherum, cum dicerent, motionem Dei absorbere voluntatem, ut nec cooperandi, nec dissentendi locum ei relinqueret, locutos fuisse non de motione morali, aut simultaneâ primæ causæ cum secundis cooperatione, sed de motione interiori physicè applicativâ voluntatis. Si igitur hæc physica motio aut minùs admittenda, aut minimè cohærens cum libertate visa illis fuisset, an non connaturalissima pravæ hujus doctrinæ extirpandæ via erat, ut saniores aliam motionem commendarent, illam ut spuriam aut apertè damnarent, aut certè minimè retinerent? Atqui non modò non damnant, sed etiam retinent; nec retinent tantùm, sed præterea ab impuris characteribus, quos illi affigebant hæretici, sedulò vindicant; verantque, sacrum illum divinæ potentiae radium intersectæ libertatis calumniâ infamare. Ergo sua illa decisione omnino favent Præmotioni physicæ.

Alterum verò illudque faventissimum est, quod Patres Concilii, qui decretum præfatum formavere, doctrinam præmotionis in suis scriptis expressè docuerunt. In primis enim Cornelius Mussus Episcopus Ordinis minorum, qui ejusmodi decretam disposuit, eam docuit lib. 2. de Divina Historia c. 20. cujus cum authoritas sit maximi momenti-



menti ad penerrandam Concilii mentem, idcirco placeat ejus verba hic attexere: *Moventur*, inquit, *à Deo omnia tanquam à primo movente, quod nisi moveat prius, necesse est, quod nihil omnino moveat in verum natura*. Referuntur quoque Cardinalis Seripandus ex Ordine D. Augustini super cap. 8. Epist. ad Rom. Joannes Antonius Delphinus à Casali majori Ordinis Minorum Episcopus lib. 4. de Libero Arbitrio. Andreas Vega itidem Ordinis Minorum qu. 21. de justificatione, & lib. 6. supra Trident. cap. 6. ubi vocat præmotionem, *ignotam divina virtutis applicationem, & voluntatis nostra mītrificam inflexionem & inclinationem*. Citatur Salmieronius ex primis sanctissimi Patriarchæ Ignatii Sociis, disp. 19. In Epist. ad Rom. ubi etiam utitur nomine *firma, atque invincibilis prædeterminationis*. Idque ut mittam quàm plures alios, cum præcipuè omnes Ordinis nostri Patres, qui numerosissimi Concilii Tridentino interfuerunt, recensenturque viginti tres inter Prælatos, novendecim inter Theologos, præter eos, qui à Principibus, præcipuè à Summo Pontifice missi sunt, qui omnes Thomisticæ doctrinæ principiis imbuti non aliam aut in sacro Concilio, aut in libris à se conscriptis docere potuerunt, & quod majus est, illi idem magna ex parte fuere, quos deinceps exorta Molinæ opinio adeo vehementer commovit.

Urgentius adhuc argumentum ad evincendam Concilii Tridentini mentem pro præmotione physica desumitur ex Catechismo ejusdem Concilii. Nam illa motio est de mente Concilii Tridentini, quam tradidit in suo Catechismo: Sed Concillium Tridentinum ipsissimam præmotionem physicam tradidit in suo Catechismo: Ergo est de ejus mente. Major est certa. Nam in Catechismo Concilii doctrina ejus. Minor constat verbis ipsis Catechismi Tridentini 1. part. de 1. Symboli articulo num. 22. *Non solum Deus universa, quæ sunt, providentiâ suâ regitur, atque administrat, verum etiam, quæ moventur, aut aliquid agunt, intimâ virtute ad motum, atque actionem ita impellit, ut quamvis causarum, secundarum efficientiam non impediat, præveniat tamen, cum ejus occultissima vis ad singula pertineat. Et quemadmodum Sapienter testatur, Attingit à fine usque ad finem fortiter, & disponit omnia suaviter. Quare ab Apostolo dictum est, cum apud Athenienses annunciarer, Dum, quem ignoranter colebant, non longè est ab unoquoque nostrum; in ipso enim vivimus, movemur, & sumus. Potuit*

## De Præmotione. Art. IV. 361

tuissetne Thomista luculentius exprimere, & clarioribus coloribus depingere præmotionem physicam? Planè eum, aut protervum esse oportet, qui non videat, ipsissimam, quam tuemur, sententiam ibi appetè, fuisse traditam.

Adversarii, cum hac autoritate se insigniter premi, ac penitus confici sentiant, triplicem solutionem excogitant. Primò, Catechismum non esse tantæ autoritatis, ut quem composuerunt ipsi Patres Ordinis Prædicatorum, nempe Leonardus de Marinis Archiepiscopus Lancianensis, Egidius Falscararius Episcopus Mutinensis, Franciscus Forerius Concilii Tridentini Secretarius, approbaveritque S. Pius V. ex eodem Ordine Pontifex.

Sed responsio temeraria est, atque ideo ut sanctæ Sedi omninò injuriosa. ex Præfatione Delrii Jesuitæ ad lib. Disquisit. Magic. jussu Summi Pontificis expuncta. Deinde advertere debuerant Adversarii, non solum à Sanctissimo Pontifice S. Pio V. sed etiam à Gregorio XV. insigni Societatis benefactore approbatum fuisse hunc Catechismum, & ab omni universa Ecclesia exceptum, ut genuinum Concilii Tridentini fœrum & interpretem. Unde relicta illà solutione, ut quæ pœnam magis, quàm longiorem impugnationem mereatur,

Respondent secundò, ex eo loco solum infetri, præmotionem esse doctrinam sanam & Catholicam, non tamen articulum Fidei. Modesta quidem, & verissima responsio. Libenter enim admittimus, præmotionem non esse articulum Fidei, alias eam negantes essent hæretici, quod absit. Satis est, quod Ecclesia in celeberrimo illo Cathecismo sanam doctrinam fidelibus proponens, Thomisticam præmotionem tanquam Catholicam sententiam, & ad explicandam Dei omnipotentiam omnimodò idoneam expenderit. Hic solum operæ pretium est ponderare eorum inscitiam & malam fidem, qui dicunt, præmotionem esse Alvaris & Bannesii, duorum Ordinis Præd. Doctorum, qui post Concilium Tridentinum scripsere, inventum. Quibus adhuc non modò ineptiores, sed maligniores longè sunt, qui apud ignaros mullant, præmotionem physicam esse à Concilio Tridentino damnatam, & parum diversam à sententia hæreticorum. Planè dedecet viros, ne dicam Catholicos, sed bonæ fidei vestigium retinentes, tam insulis uti calumniis.

Respondent tertiò aliqui, qui amant luci meridiana  
tenebras offundere, Catechismum loqui de motione  
moralì, Sed hæc solutio ne quidem apparentiam pro-  
babilitatis habet. Et facillè refutatur ex ipso textu. Lo-  
quitur enim Catechismus de motione communi omni-  
bus agentibus, qualis non est motio moralis; sola enim  
agentia libera propriè sunt illius capacia; Ergo non lo-  
quitur de illa. Deinde motio moralis non pertinet ad at-  
tributum omnipotentiae, cum homo & angelus possint  
movere moraliter hominis voluntatem. Concilium au-  
tem ibi intendit ostendere vim, & efficaciam divinae  
Omnipotentiae, ut patet ex articulo Symboli, occasio-  
ne cuius hæc dicit; Ergo non loquitur de motione mora-  
li. Demum motio moralis nec occulta est, nec *intima*  
*virtutis* nomine propriè potest explicari; Ergo de illa non  
loquitur. Adde præterea, quòd Catechismus loquitur  
de illa motione, de qua loquebatur Apostolus Act. 17. di-  
cens. *In eo* (scilicet Deo) *vivimus, movemur, & sumus.*  
Sed nemo dicet, hunc locum Apostoli intelligendum esse  
de motione moralì; Ergo nec de illa loquitur Catechis-  
mus Concilii.

## §. III.

*Probatur Præmissio ex Ecclesiæ precibus, & communis  
fidelium consensu.*

**T**heologi fusiùs hoc argumentum prosequuntur  
agendo de efficacia divinorum decretorum; po-  
tèst tamen adaptari præmotioni physicæ sub hac forma.  
Datur illa motio, quam Ecclesiæ petit à Deo? Atque  
Ecclesiæ non petit à Deo concursum simultaneum, aut  
solam motionem moralem, sed etiam physicam & præ-  
viam, quæ scilicet activè, & efficaciter immutet vo-  
luntatem humanam; Ergo datur illa motio prævia, phy-  
sica, & efficax. Probatur minor. Et in primis, quòd  
Ecclesiæ non petat in suis precibus concursum simulta-  
neum, de se patet; quippe hic concursus sine miraculo  
desse nequit, sed omnibus etiam non præstantibus præsto  
est. Unde sicut nemo petit à Deo, ne cælum cadat,  
aut ut Sol luceat, & ignis comburat, quia hæc sine mi-  
raculo

## De Præmotione. Art. IV. 263

æaculo aliter esse non possunt, ita quoque nemo petere concursum simultaneum, qui sine miraculo deesse non potest. Quid verò Ecclesia non petat solas motiones morales, quæ consistunt in propositione motivorum excitantium, sed etiam motionem physicam & præviā, Intrinsicè & activè immutantem corda nostra, probatur ex expressionibus, quibus suas preces concipit. Nempe hæc sunt. *Ut Deus rebelles nostras ad se compellat voluntates. Ut infideles ex nolentibus credere volentes faciat, ut applicet cor nostrum bonis operibus. Ut det nobis bonam voluntatem. Ut conveniat & pertrahat nos ad se. Ut auferat cor lapideum, & det nobis cor carneum, seu docile. Ut immutet voluntates nostras, easque inclinet ad bonum, &c.* Sed hæc omnia fieri nequeunt à motione morali, quæ nec immutat corda, nec bonam voluntatem subinfiltrat, nec transfert nos à malo in bonum, nec facit nos ex nolentibus volentes, &c. sed solum suadet, invitat, & allicit: Ergo præter istam motionem moralem Ecclesia petit aliam, fortiozem, & victricem humanæ obstinationis, qua Deus, quamvis pertinaces, suaviter quidem, sed tamen fortiter, & ineluctabiliter nos trahit, & applicat ad se, corda nostra immutando & faciendo, ut ea nobis placeant, quæ antea displicebant, & ut liberrimè velimus, quæ antea pertinaciter recusabamus.

Confirmatur primò ex promissionibus divinis. Sæpe enim Deus promittit amicis suis futura opera hominum, ut promittit Abraham conversionem gentium. Ut autem arguit S. Augustinus, Deus promittit ea, quæ ipse factururus est; absurdum enim est dicere, Deum promittere, & homines Dei promissa adimplere: Ergo Deus ipse facit ipsam conversionem hominum, non solum quia *persuadet*, ut convertantur, (hæc enim non est propriè *facere*, sed *ad faciendum invitare*) sed quia interiorius corda hominum immutat, ea inclinando per activam motionem à malo in bonum.

Confirmatur secundò ex ipso consensu fidelium, qui dum aliquid boni egere, totum illud Deo veluti primo authori cor nostrum applicanti attribuunt; immò suam cooperationem fatentur esse munus divinæ Bonitatis. Ergo ne falsa sit pia ista confessio, fatendum est, Deum non modò snatorem esse bonorum operum, in quantum movet moraliter; nec solum cooperatorem, in quantum simultaneè concurrat; sed etiam authorem, in

quantum activè movere interiùs, & applicat corda nostra. Unde ipsi adversarii sententiam illam, quam in disputationibus adeo acriter impugnant, re ipsa quotidie ad aras piè, sincerèque profitentur.

## §. IV.

*Probatur Promotio ex Patribus.*

**N**omine *Promotionis*, ut jam dictum est, intelligimus motionem omnium causarum, ut ita dicam, vivificatricem, & veluti vitalem impulsum, quo Deus causis secundis ultimam agendi activitatem infundit, easque applicat. Hanc motionem docuerunt Patres, dum sæpius asserunt, causas secundas non agere, nisi moras & applicatas à Deo rerum omnium motore, ac prædeterminatore; sic enim eum vocat Dionysius §. de Divin. Nominibus, dum voluntatem Dei asserit esse rerum omnium prædeterminativam, proindeque nostrarum quoque voluntatum. Unde eodem cap. de Deo inquit: *Principium unum est, ex quo est ipsum esse & omnis virtus, omnis habitus, omnis actus, & omnis motus: & sæpe repetit, Deum omnia, quæ agunt, movere.* D. Ambrosius lib. de dignitate hominis cap. 2. Deus, inquit, unus est omnia vivificans, movens, & gubernans; sicut anima in corpore ubique tota viget, vivificans illud movens, & gubernans. Ubi explicat modum, quo Deus creaturas movet, exemplo animæ: quem imitatus S. Thomas 1. 2. qu. 17. art. 8. ad 2. ait, *Sicut Deus movet mundum, ita & anima corpus.* Certum est autem, animam etiam physicè, & præviè membra movere. Et D. Basilii Constitutionum cap. 1. Deus, inquit, *natura Dominus est, & aliter, quàm ille promissit, res cadere non potest; Unum enim potens est, & arbitrato suo cuncta commutat.* Et Chrysostomus Homil. 13. in Matthæum, *Cuncta, inquit, ab illa nihil laborante Dei manu, tum creata, tum mota in nostram dispensantur salutem.* Unde Epiphanius vocat Deum totum moventem & efficientem. Gregorius etiam in Moral. ait, *Qua creata sunt, in tantum moventur, in quantum occulto Dei instinctu disponuntur; insin-ctum nempe communi omnibus creaturis, qui sine dubio non est moralis, sed physicus.* Et Bernardus libro de Grat. & lib. arbitrio, Deus, inquit, *voluntatem appli-*  
cat



go enim, qua loquendi proprietate dici potuit, *Deum movere causam secundam ad agendum*, si nullam in illa motionem producit? *eam applicare*, si solum ipsius cooperationem expectans, ei agenti cooperatur? Deinde saltem ex hac responsione habetur, Antiquos Philosophos propriè & sine metaphora explicatos in hac parte consentire Thomistis. Unde rejecta responsione,

Respondent alii, & sanè longè conformiùs ad sua principia, hæc omnia axiomata falsa esse; nec Deum activè movere, aut applicare causas secundas, quia in illis nullam motionem imprimit, qua applicentur actioni; sed solum cum illis simultantè concurrere, associando suam virtutem virtuti creaturæ, ut ex hac societate unus producat effectus.

Ceterum hæc responsio non solum toti derogat antiquitati, cum primæ Philosophi hæc axiomata tam rata habeant, sed etiam D. Augustino, & D. Thome, Immaculatis Patribus, qui illa inculcant agendo de providentia Dei, ac de dignitate primi Motoris.

Pigret has communes auctoritates expressus est Aristoteles 2. Phys. cap. 3. ubi præmotionis principia profundè statuit, ac ex iis ad investigandam Dei existentiam sibi viam facit. Itaque statim constituit, in subordinatis secundum movens non movere, nisi motum à primo: *Utrumque*, inquit, *movere dicimus, & quod est postremum, & quod est primum inter moventia, sed magis quod est primum, quia sine primo postremum non movebit, primum autem sine postremo movebit*. Huic principio aliud adjungit: *Id quod movetur ab aliquo, (id est, quod non est sua vis motiva, sed in quo distinguitur substantia movens à virtute movendi) non esse primum movens*. Tum quia ita movet, ut etiam moveatur, ut animal movet & movetur: primum autem movens debet esse immobile; non enim ab alio priori moveri potest, quia est primum; nec à se, quia quidquid movetur, ab alio movetur. Tum quia *Quod per se est causa, semper est prius eo, quod est causa per aliud*. Et ideo oportet, ut primum movens non alio, sed se ipso moveat, seu sit sua vis movens. Ex his principijs colligit, oportere dari primum principium movens immobile, quod non alio, sed se ipso moveat, seu sit ipsa sui vis movens. Arque hinc laudat Anaxagoram, quòd dixerit mentem immobilem, ac non mixtam (nempe ex eo, quod movet, & quo movet)

esse primum omnis motus principium. Cum itaque ad eam mentem omnia alia moventia comparentur, ut secunda moventia, concludit cap. 8. ea omnia movere, ut mota ab ipsa: *Omniū, inquit, quæ movent & moventur, principium est id, quod est immobile.* Quæ sanè est ipsissima Promotionis doctrina hoc Aristotelis argumento demonstrata.

Secunda moventia, seu agentia, non movent, nisi mota à primo, ut statuit cap. 5. Sed omnia alia, præter Deum, sunt secunda moventia; primum enim movens immobile non potest esse nisi unum, ut statuit c. 7. Ergo omnia alia moventia, seu agentia, non movent, nisi mota à primo, nempe Deo.

Ad hæc dici posset, Aristotelem solum velle agentia secunda moveri à primo, quatenus ab eo, cum producuntur, virtutem, qua movere possunt, accipiunt; & dum actu agunt ejus concussu, non prævio quidem, sed simultaneo.

Verum hæc Adversariorum doctrina & responsio prorsus aliena est ab Aristotelis intento. Nam 8. Phys. cap. 5. non agit de productione aliorum entium à primo ente; sed de dependentia secundi moventis qua talis à primo movente, seu sit ab eo productum, sive non. Atque de eo jam producto constituit, non posse actu movere, nisi moveatur à primo, propter dependentiam in ipsa ratione secundi moventis à primo importatam. Unde in fine Metaphys. comparat Deum Duci exercitus, cujus munus est non modò milites instituere, ac suis quemque officiis deputare, armisque instruere, sicque ad pugnandum in ordine suo aptos efficere; sed maxime eos jam ita paratos, cum actus pugnandum est, actualiter movere, dirigere, & applicare. Sic juxta mentem Arist. Deus non solum omnia agentia instituit, ac suis facultatibus instruxit, sed maxime proprio jure primi moventis, ut actu agant, movet, & applicat; aliàs ducis munere non fungeretur. Atque hinc liquet ex Aristotele, concursum simultaneum, sive illum agnoverit, sive ignoraverit, non sufficere. Non enim per eum Deus causas movet ad agendum, sed his agentibus cooperatur; nec ducis applicantis munus exercet, sed concansæ cooperantis, velut cum dux militibus pugnantibus & ipse compugnat, socii potius, quàm ducia vices agit: Ergo juxta mentem Aristotelis dicendum



non solum Deum agentibus secundis vires agendi contulisse, nec solum his agentibus coagere; sed maxime ea ad agendum movere. Hinc lib. 7. Mor. Eundem. cap. 18. Movetur, inquit, omnia ab inexistente in nobis Numine. Idque motione prævia, quia Motio moventis prior est motione mobilis ratione & causalitate.

Id totum luculentius expenditur in libro de Mundo ad Alexandrum, Cap. 6. sive sit Aristotelis, ut vulgo censetur, sive alterius antiqui hanc doctrinam Aristotelis de primo motore omnia applicante & movente exemplo. Ducis exercitus ab Aristotele trito sic præclare illustrantis. Quod in hisce rebus agitur, magnopere simile est his, quæ belli tempore inter homines fastidantur. Namque statim, ut classicum exaudiri captum, alios videas scuta sibi aptantes, lorica alios inducentes, alios cretas, vel galeam sumere, vel baltea se cingere festinantes, &c. cum interim sua uno ductore omnia moveantur, &c. Eodem & nos ipsos, modo censere convenit de Universo. Cum enim ab una vi impulsrice ciantur omnia, sit utique quod cuique commodum est & conveniens. Nec verò si ea vis ipsa, nec videri ab hominibus, nec apparere potest, quoque patto id obstat aut illi ad ea, quæ diximus, agenda, aut nobis ad fidem hisce accommodandam. Nam ut anima ipsa, quæ vivimus, cum haudquaquam sub aspectum nostrum sita sit, operibus tamen ipsi videtur. Hic quæso attende. 1. Exemplum ducis moventis exercitum. 2. Exemplum animæ suæ organa moventis. 3. Hosterninos, quibus divina motio exprimitur, Vis impulsrix, quæ omnia ciantur. 4. Quomodo hæc vis unumquodque moveat, & applicet ad agendum juxta propriam conditionem.

His adde Platonem docentem, causas secundas esse instrumenta Dei, & Deum esse ut animam mundi, nec quidd ejus pars, sed quidd motor sit omnia movens & applicans, ut anima movet & applicat membra sibi subdita. Adde etiam Homerum dicentem, Talem esse hominum voluntatem, qualem eam in dios Jupiter inducbat nomine Jovis intelligens illam primam omnium causam moventem hominum moventem. Adde Anaxagoram docentem, Mentem supremam omnia movere & disponere. Ex his luce meridiana clariùs perspicies, Doctrinam præmotionis non esse inventum nuperum, sed vetus dogma ab Aristotele, & aliis Antiquis traditum, expressum, explicatum, his verbis, his exemplis, his argumen-

tis, ac nunc à Thomistis traditur, exprimitur, explicatur, ac defenditur; immò & ante illos à Sanctis Patribus, à S. Ambrosio, qui ob id comparat Deum Animæ, quoddam sic omnia moveat & gubernat, ut anima corpus, lib. de Dignitate hominis cap. 2. à S. Augustino, qui lib. 5. de Genesi ad litteram, cap. 20. verbis paullo altis, sed eodem sensu & modo, ac in libro de Mundo ad Alexandrum, hunc impulsus Dei omnia moventem expendit; à S. Thoma hoc ipsum ducis exemplum usurpantis in 3. Dist. 23. quæst. 3. artic. 2. Quibus si adjungas aliud non tacendum, Adversarios, sublatâ præmotione, jam ab his Veterum expressionibus, exemplis, argumentis velut à scopulis abstinere, ac oppositis uti; Deum non movere causas secundas, sed iis cooperari; non influere aliquid in eas, sed cum iis in effectum; non eas applicare, sed expectare; non ducere motu proprio, sed iis accedere concursu simultaneo; non se habere ad eas, ut Animum ad membra, quæ movent, sed ut nauta ad socium, cum quo navem movet, &c. habebis liquidd ex ipsis contra ipsos, quàm longè ab Antiquis discesserint, ac peremptoria judicio ex ore eorum eos judicabis.

## §. VI.

*Probatur Præmotio auctoritate S. Augustini.*

**S**ententia S. Augustini circa materiam de Auxiliis, Ecclesiæ doctrina est, ut constat ex Conciliis Milevitano, Carthagenensi, Arausicano, & ex pluribus summis Pontificibus Innocentio, Zosimo, Bonifacio, Hormisda, Clemente VIII. & Paulo V. Unde cum præmotio præmotionis aded sit affinis quæstioni de Auxiliis, maximi quoque ponderis est in illa auctoritas D. Augustini. Neque verò hac in parte minus expressa est, quàm magna: liceret enim non quædam loca, sed libros integros afferre, de Gratia Christi, de Prædestinatione, de Correctione & Gratia, & alios ejusmodi, in quibus asserit, Deum ita movere voluntates hominum, ut sine præmotione physica explicari nullo modo possit. Unde Molina ingenuè agnoscit, S. Augustinum sibi non satis favere, sed explicandi modum à suo alienum tenuisse, quamvis ejus Assensum cum, ut possunt, explicare conentur.

Probatum itaque Physica præmotio auctoritate, ac principiis S. Augustini. Ille docet physicam præmotionem, qui ducet, voluntatem applicari à Deo motione, qua facit, ut faciat; quæ sit efficax efficacia fundata in omnipotentia Dei & domino, quod habet in voluntatem creatam, per quam inclinatur cor ad agendum, ab uno ad alium affectum transfert, in nobis, & per nos agit quidquid voluerit, &c. Sed hanc motionem ubique docet, & commendat S. Augustinus: Ergo physicam præmotionem docet. Major constat: non enim aliud Thomistæ nomine physica præmotionis intelligunt. Deinde concursus simultaneus non facit, ut faciamus, sed conficiamus; nec per nos agit, sed nobiscum; immò potius non per ipsum, cum à nobis determinetur & applicetur. Nec itidem moralis motio facit, ut faciamus, sed ad id invitat, nec ejus efficacia, si qua polleat, ex Dei dominio & omnipotentia profuit, sed ex objecti amabilitate; nec tanta est, quin sæpe nulla sit, ac frustra nos sollicitet, &c. Minor verò patet legenti S. Augustinum de Grat. & Libero Arbitrio cap. 20. *Deus, inquit, dominatur voluntati hominum, ex quo principio capite sequenti infert, quod agit omnipotens Deus in cordibus humanis motum voluntatis ipsorum, & operatur ad inclinandas eorum voluntates* Et de Correptione & Gratia cap. 24. *Deus de voluntatibus hominum, quod vult, cum vult, facit; habet enim cordium inclinandorum omnipotentissimam potestatem*. Et jam citato Libro de Gratia & Libero Arbitrio, cap. 17. *Deus, inquit, facit, ut faciamus, præbendo vires efficacissimas voluntati*. Hæc & similia nullies reperit, quæ nisi sint ipsissima Præmotio, nescio quibus verbis luculentius exprimi possit.

Confirmatur. Pelagius non negabat concursum simultaneum, quem videtur intellexisse per *adjutorium possibilitatis*, nec motiones morales, ut excitationes, Illustrationes, &c. ut evidenter constat ex libro de Gratia Christi, & tamen ipsum impugnabat Augustinus: Ergo præter concursum simultaneum, & motionem moralem exigebat aliam motionem, quæ non daret tantum posse, nec ad agendum duntaxat moraliter excitaret, sed voluntatem interiori applicaret actioni. Denique, omnia argumenta, quæ Adversarii solent objicere Thomistis, S. Augustinus sibi proponit & solvit; ut quod tolleretur libertas; quod Deus esset auctor mali;

quod

quod præcepta essent impossibilia, &c. Ergo S. Augustinus idem tenuit, quod docent Thomistæ; idem refutavit, quod in Adversariis refutant Thomistæ.

Unum responderi posset, Motionem illam à S. Augustino contra Pelagium defensam, esse ordinis supernaturalis, ac homini lapsopropriam; adeoque longè diversam à Thomistica præmotione omnibus communis.

Sed contra. Licet S. Augustinus in suis contra Pelagianos Tractatibus agat præcipuè de motione supernaturali, & homini lapsonecessaria eam tamen his probat principiis, quæ generaliter evincunt præmotionem etiam naturalis ordinis, nempe ex omnipotentia & dominio Dei, ex dependentia creaturæ à Deo; ex eo quod à Deo sit omne bonum; & ab eo & per eum sint omnia; operetur omnia in omnibus, proindeque etiam motum voluntatis humanæ, &c. Quæ principia à S. Viro usurpata præmotionem Thomisticam palàm convincunt. Verùm præterea eam in ordine naturali apertè docet loco à nobis relato 5. de Genesi ad Litt. cap. 20. *Mover,* inquit, *Deus occultâ potentia universam creaturam, eoque motu, illa versata, dum Angeli jussu perficiunt, dum circum-eunt sidera, dum alternant venti, dum abyssus aquarum lapsibus, ac diversis etiam per aerem conglobationibus agitur, dum vireta pullulant, suæque semina evolvunt, dum animalia gignuntur, varioque appetitu proprias vias agunt, dum iniqui iustus exercere permittuntur, explicat secula, qua illis, eûm primum condita sunt, tanquam implicita indiderat; qua tamen in suos cursus non explicarentur, si ea ille, qui condidit, provido motu administrare cessaret. Ac rursus in fine libri, Deus omnia, qua simul fecit; administratorio actu gubernans & movens, sine cessatione operatur.* Vides hic suis Characteribus expressam præmotionem occultâ potentia, qua Deus omnia omnino tum libera, tum necessaria agentia mover; qua illa versata suos actus peragunt; motus providi, per quem omnia administrantur, & sine quo cuncta cessarent; actus agentia jam à Deo condita moventis. Talem Adversarii admittant, nihil ultra requiremus: Ergo S. Augustinus non modò in ordine gratiæ, sed etiam in naturali ordine, ac respectu omnium agentium idem, ac Thomistæ, docet, ea non agere, nisi actualiter mota à Deo. Hinc Hilarius inrer sententias S. Augustini hanc refert: *Divina voluntas est causa omnium corporalium, spiritualium-*

# 372 IV. Part. Philos. Disp. II. Q. III.

que motionum. Nihil enim fit visibiliter, quod non de invisibili, & intelligibili summi Imperatoris aula vel jubeatur, (pro bonis) vel permittatur (pro malis) Sent. 56.

## §. VII.

*Probatur Præmotio ex S. Thoma.*

**P**ræmotionem doceri à S. Thoma ipse Molina facit-  
tur Concordiæ Disp. 26. & 1. part. quæst. 14. art. 13.  
Disput. 6. Item Conimbricenses 2. phys. cap. 7. quæst.  
13. art. 1. Item Libellus de Ratione studiorum com-  
positus à Patribus Societatis cap. de Delectu opinio-  
num; non quidem ille, qui posterius editus circum-  
fertur, in quo ingenuum illud testimonium suppressum  
fuit, sed primæ editionis Romanæ ann. 1586. de quo  
vide R. P. Gonet 12. Disp. 6. art. 2. §. 5. Immo ipse Sua-  
rez agnoscit eam doceri à S. Thoma Quæst. 3. de Potent.  
art. 7. Sed addit illam in Summa tacite retractasse, quod  
in ea Quæstione de Potentia docuerat: quia, inquit  
1. part. quæst. 105. art. 5. explicans modum, quo Deus  
mover creatura, non meminit motionis receptæ in  
creatura; nec dicit simpliciter, eam applicari à Deo, ut  
dixerat Quæst. 3. de Potent. sed quasi applicari. At vir  
prudens non erat tam futili fundamento hanc retra-  
ctionem S. Thomæ imponere. Pari licentiâ dici pos-  
set, S. Joannem Evangelii sui cap. 1. quæ prius de Fi-  
lio Dei magnificè dixerat, retractare, ac illum non  
verè filium innuere, quod subdat, *Vidimus gloriam  
ejus quasi unigeniti à Patre*. Sanè tantum abest, S. Tho-  
mam eo loci præmotionem inficiari, ut Molina & Co-  
nimbricenses supra citati, cum agnoscunt eam doceri  
à S. Thoma, hunc locum ut expressissimum laudent.  
Nempe in eo apertè, sed pressè, idem docet ac Quæst.  
de Potentia, Deum non modò causis secundis agendi  
vires contulisse & conservare, sed etiam eas ad agens  
dam movere, quod, ut utroque in loco ait, in subor-  
dinatis necesse sit; *primum agens movere secundum ad  
agendum*. Pbrò si mover, motione movet, non in se,  
sed in causa mota recepta; nam movere sine motione  
repugnat: Ergo ibi docet hanc motionem à Deo in  
causis secundis impressam, ob quam secundum agens  
statim agere in virtute primi, ut utroque in loco asserit.

Ac

Ac subdit, Deum ea motione *movere causas*, quasi applicando earum virtutes, sicut Artifex applicabat securim i quibus verbis non negat, eas verè applicare; sed docet, hanc motionem esse ad instar, seu per modum applicatio- nis, quo sensu particula *quasi* sepe usurpatur, ut à San- cto Joanne loco laudato. Ac si velis quasi sumi à Sancto Thoma in sensu diminutivo, id referri debet ad subse- quens exemplum artificis applicantis securim, ut innuat, non esse omnimodam paritatem. Ceterùm causas secun- das à Deo applicari etiam sine restrictione asserit, cum sepius in Summa, tunc eo ipso articulo 3. Unde eva- nescit hæc fictitia retractatio, ac ubique sibi consenti- ens S. Thomas præmotionem constanter docet. Loca omnia referrè nimium foret; innumera enim sunt. Plura col- legit R. P. Gonet 1. 2. Disp. 6. art. 2. Nos hic pauca expen- demus.

Probatur itaque Præmotio ex S. Thoma. Præmotio phy- sica est, quæ Deus omnes causas tum necessarias, tum li- beras movet ad agendum, non per modum finis moraliter elliciendo, sed per modum agentis activè applicando mo- tione prævia ad actionem, recepta in causa agente, & non in ipso effectu; quam ramen infallibiliter sequitur effe- ctus: Sed ubique hanc motionem S. Thomas docet: Ergo docet præmotionem. Major constat. Minor probatur ex S. Thoma.

Et quidem Deum movere omnes omnino causas ad agendum docet 1. 2. quæst. 109. art. 1. *Quantumcumque, inquit, natura aliqua corporalis, vel spiritalis ponatur per- fecta, non potest in suum actum procedere, nisi moveatur à Deo.* Et artic. 9. *Nulla res creata potest in quemcumque actum prodire, nisi virtute motionis divina.* Id milles- imo probat Aristotelis principio 8. phys. cap. 5. *Considerandum, inquit 1. part. quæst. 105. art. 5. quid sit multa agentia subordinata, semper secundum agens agit in virtute primi. Nam primum agens movet secundum ad agendum. Et secundum hoc omnia agunt in virtute ipsius Dei.*

Quòd verò hæc motio non sit moralis, seu per modum finis elliciendo; sed physica, seu per modum agentis applicando, constat vel ex eo, quòd sit communis omnib. causis, quod dicit nequit de morali; ac disertè docet Sanctus Thomas 1. part. quæst. 105. art. 4. & 5. & quæst. 112. artic. 2. ubi distinguit has duas motiones, per mo- dum

dum objecti & finis alliciendo; & per modum agentis in-  
 verius activè inclinando; ac utramque, maximè secun-  
 dam, Deo tribuit respectu voluntatis creatæ, quæ pro-  
 priè sola capax est motionis moralis. *Utroque modo*, inquit  
 quæst. 105. art. 4. *proprium est Dei movere voluntatem, sed*  
*maximè secundo modo, eam inclinando.* Et ne quis putet,  
 Deum hoc modo solum movere voluntatem ad bonum  
 In communi, quæst. 111. art. 2. hoc jus ei vindicat respec-  
 tu cujusvis actûs: *Immutare*, inquit, *voluntatem est pro-*  
*rium Dei, secundum illud Proverb. 21. Cor regis in manu*  
*Domini; quocumque voluerit, vertet illud.* Et Quæst. 22. de  
 Verit. art. 9. *Voluntas*, inquit, *potest immutari ab aliquo*  
*dupliciter. Uno modo sicut ab objecto suo; ecce moralem mo-*  
*tionem. Alio modo per modum causa efficientis, ecce phy-*  
*cam. Et sic, nempe physicè, nulla creatura potest directè*  
*agere in voluntatem, ut eam immutet necessariò, vel qualiter.*  
*cumque inclinet, quod Deus potest. Solus enim, ut subdit,*  
*potest inclinationem voluntatis, quam ei dedit, transferre de-*  
*uno in aliud secundum quod vult. Atque id sic probat art. 8.*  
*Sicut omnis actio naturalis est à Deo, ita omnis actio volunta-*  
*tis in quantum est actio, non solum est à voluntate, ut imme-*  
*diatè agente, sed à Deo, ut à primo agente, qui vehementissimè*  
*imprimis. Unde sicut voluntas potest immutare actum suum*  
*in aliud, ita & multo amplius Deus.*

Quodd verò motio Dei sit prævia ad actionem creatu-  
 ræ, non solum docet, sed probat S. Thomas 3. Cont. Gent.  
 cap. 149. quia, inquit, *motio moventis præcedit motionem*  
*mobilis ratione & causalitate.* Idque liquet alio S. Thomæ  
 principio. Nam prius est, causam secundam esse comple-  
 tam ad agendum, quàm agere. Porro inquit 3. Cont. Gent.  
 cap. 66. *Complementum agentis secundæ est ex virtute agen-*  
*tis primæ. Unde in 3. Distinct. 23. quæst. 3. artic. 1. In agen-*  
*tibus subordinatis, inquit, actio primæ agentis est prior in-*  
*movendo, quia actiones omnium secundarum agentium fun-*  
*dantur super actionem primæ agentis, qua cum una sit com-*  
*munitè omnes firmans, specificatur ejus effectus in hoc & in*  
*illo secundum exigentiam illius. Sicut uno præcepto ducis*  
*præcipientis bellum unus accipit gladium, alius parat equum,*  
*& sic de aliis.*

Quodd autem motio Dei recipiatur non in effectu, sed  
 in ipsa causa, perpetuo docet. In 1. Distinct. 28. quæst. 1.  
 art. 5. *Virtus*, inquit, *causa prima recipitur in causa secunda*  
*secundum modum causa secunda. Et Quæst. 3. de Potent. art.*

9. cum dixisset, Deum esse causam actionis causa secunda; non solum in quantum dat & conservat virtutem ejus, sed etiam quatenus movet & applicat virtutem ad agendum, id ubertius sic explicat ad 7. Virtus naturalis, qua est rebus naturalibus in sua institutione collata, inest eis ut quadam forma habuisse ratum & firmum in natura. Sed id, quod à Deo fit in re naturali, quo actualiter agat, est ut intentio sola habens esse quoddam incompletum, nempe per modum motionis transeuntis. Quem locum adeo expressum sensit ipse Suarez, ut vir ad eludenda S. Thomæ testimonia solertissimus nullam evasionem excogitare valens, coactus fuerit confugere ad ficticiam illam retractationem, de qua supra.

Denum hujus motionis efficaciam & infallibilitatem docet S. Thomas ubique, ex efficacia & universalitate divine voluntatis, cujus est executio. Deus, inquit Qu. 6. de Malo, art. 2. movet immutabiliter voluntatem propter efficaciam suam voluntatis. Unde ait 1. 2. qu. 10. art. 4. Si Deus moveat voluntatem nostram ad aliquid, impossibile est, ut ad illud non moveatur. Ergo S. Thomas præmotionem docet, qualem nunc docent Thomistæ, physicam, præviam, infallibilem, &c.

Nec dici potest, S. Thomam loqui solum de motione morali; id enim repugnant ejus apertissimis verbis supra relatis. Nec de concursu simultaneo Adversariorum; hic enim non movet, nec applicat causas; nec recipitur in illis, nec prævius est, nec infallibiliter infert effectum. Imò qualem docent Adversarii, rejicit Sanctus Thomas Opusc. 1. cap. 23. Duplíciter, inquit, aliquid dicitur cooperari alteri. Uno modo, quia operatur ad eundem effectum, sed per aliam virtutem; sicut minister Domino, & instrumentum artificis, à quo movetur. Alio modo, in quantum operatur eandem operationem cum ipso; sic diceretur de duobus portantibus aliquod pondus, vel de pluribus trahentibus navim, quod unus alteri cooperatur. Secundum primum modum creatura potest dici cooperari Creatori. Secundum autem modo creatura Creatori non cooperatur.

At inquires. Ergo nec S. Thomas non admisit concursum simultaneum? Resp. Spuriū, Deoque indignum, qualem ponunt Adversarii, non admisit, sed expressè rejecit. Ac legitimum admisit, quo Deus, non ut causa partialis, sed ut Author totius entis, immediatè insluit in omnes causarum effectus, ac continuè conservat in esse.

Camp



*Cum enim, inquit 1. par. qu. 8. artic. 2. Deus sit ipsum esse, oportet, quoddam esse creatum sit proprius ejus effectus. Hunc autem effectum causat Deus in rebus, non solum quando primum esse incipiunt, sed quando in esse conservantur. Unde est in omnibus & intimè. At propterea non excludit virtutes agentium secundorum, quæ pro suo modulo influunt in suos effectus, sed mora & applicata à Deo. Primus Dei influxus est concursus ille generalis, quem Adversarii nomine concursus simultanei vocant, sed re ipsa præpostere explicant. Alter verò est, quem Thomistæ præmotionem vocant. Uterque est ab una simplici virtute Dei, quæ dat causæ actu agere, sicque præmover eam, & effectus actu esse illum sub universali entis participati ratione attingendo, sicque non solum per causas, sed cum causis agit. S. Thomas hos influxus ita distinguit, ut licet per impossibile Deus non esset causa universalis essendi, proindeque secundo modo non influeret; attamen supposita ratione primi motoris in secunda moventia priori modo influeret, quia ut docet 1. p. q. 103. art. 5. si sint multa agentia subordinata, semper primum agens movet secundum ad agendum, abstrahendo ab eo, quoddam illud produxerit, aut non produxerit.*

Unum dici posset, S. Thomam præmotionem, seu *Præviā motionem*, ubique docere; nullibi prædeterminationem.

At jam ostendi art. 2. præmotionem esse prædeterminationem. Nec verò *Prædeterminationis* nomine aliud intelligimus, quàm præviā motionem & applicationem ad agendum, seu ad exercitium actus applicantem, quam docuisse S. Thomam constat ex locis relatis.

Adde pro coronide, rationes omnes, quibus Thomistæ præmotionem, seu prædeterminationem probant, desumptæ à S. Thoma; objectiones, quas Adversarii contra profecerunt, proponi à S. Thoma; solutiones, quas illi adhibent Thomistæ, adhiberi à S. Thoma, ut amplius infra constabit. Ergo tandem rem, ac illi, docuit S. Thomas; imò nec nomina tacuit, ut infra ostendam in solutione objectionum.

## J. VIII.

*Probatur Promotio rationibus.*

**J**USTISSIMA causa equis semper rationibus abundat. Quæ verò justior esse potest, quàm quæ dominium Dei & dependentiam causarum secundarum à prima defendit? Nobis itaque hoc nunc agentibus plures, ac valide rationes se offerunt, è quibus eas præcipuè seligemus, quas ipse S. Thomas usurpat.

## R A T I O P R I M A.

*Promovet Deus, quia Primus motor.*

**H**ÆC ratio sic expendi potest. Cause secundæ non agunt nisi motu & applicatæ à Deo: Sed hæc motio, seu applicatio, est physica & prævia: Ergo datur physica præmotio. Minor duo dicit. 1. Quodd motio cause secundæ à prima, si detur, sit physica. 2. Quodd sit prævia. Primum constat, quia non est motio per modum objecti & finis, quæ dicitur *moralis*; sed per modum cause efficientis, quæ dicitur *physica*. Est enim à prima causa formaliter ut tali, id est, exercente munus primæ cause efficientis & non objecti alticientis. Deinde est motio communis omnibus causis secundis; qualem esse moralem palam repugnat. In hoc nulla est difficultas. Secunda verò pars minoris etiam constat. Nam causa est prior effectu, & motio suo termino: Sed actio cause, quæ agit ut mota & applicata ab alia, est effectus & terminus illius motionis; movetur enim ad agendum, & agit quia movetur & applicatur. Ergo motio illa est prior actione cause secundæ. Unde S. Thomas 3. cont. Gent. c. 149. ex Aristotele ut principium per se notum statuit, *Motio moventis est prior motione mobilis ratione & causa*. Itaque minor constat.

Major verò (præterquam effectum est tum apud Patres,  
tum

tum apud Philosophos, tum apud omnes reitum & ratum, qui ideo Deum *Primum Motorem* vocant, quod omnia moveat, seu, ut loquitur Boetius, *immotus manens deus cuncta moveri*, adeo ut citra temeritatem negari nequeat) sic probari potest. In moventibus & agentibus subordinatis secundum non agit nisi motum & applicatum à primis. Sed omnes causæ secundæ sunt subordinatæ Deo ut primo moventi & causæ primæ: Ergo non agunt, nec movent, nisi motæ & applicatæ à Deo. Minor constat. Major declaratur, primò inductione à S. Thoma 3. cont. Gent. cap. 67. Sic in naturalibus corpora inferiora moventur & excitantur ad agendum virtute superiorum corporum. In animalibus inferiores potentia moventur & applicantur à superioribus, ut in homine omnes aliæ à voluntate. In artificialibus inferiores Artifices moventur & applicantur à superiore artifice, cui subduntur. In politicis inferiores ministri à principe. In exercitu milites à Duce, &c. Tum ratione. Nam in ea dependentia & applicatione sita est subordinatio causarum, ut inferior superiori subdatur, ei inserviat, ejus applicationem expectet. Unde cum agit, non ut mota ab ea, sed ut se movens, hoc ipso subordinationem ejus effugit, ut cum miles non iussus pugnat; cum appetitus non applicatus à voluntate, sed suo impetu, prorumpit in aliquem effectum, jam subordinatione non est. Adde inconveniens. Movens non motum ab alio in aliquo opere, est in eo primum movens: Ergo hoc ipso quod est secundum movens respectu alicujus operis, oportet, ut non moveat nisi ut motum ab aliquo primo.

Hic aqua hæret adversariis. Molina a. p. qu. 14. art. 13. Disp. 6. negat diserte, causas secundas moveri à Deo. Suarez Metaphys. Disp. 22. Sect. 2. n. 47. & 49. dicit, moveri quidem, sed admodum improprie. Itaque omnes Antiquos ineptos facit, qui in re tanti momenti adeo improprie locuti sunt. Alii dicunt, moveri per concursum simultaneum. Nihil absurdius. Nempe ut si dicas, nautam moveri à socio, quia ipse non eum, sed cum eo navim movet. An non pari jure dici posset, Deum moveri à causa secunda, quia ipsa cum eo movet subiectum, in quod agit?

Confirmatur. Si causa secunda non prævio motu applicata, sed simultaneo concursu adjuta suum produceret effectum, nec causa secunda, nec ejus effectus penderent à Deo ut à causa proprie prima, sed solum simultaneis. Consequens est absurdum: Ergo & antecedens. Probatur  
*sequet-*

## De Pramotione. Art. IV. 379

sequeſa. 1. Ex iſtis terminis. 2. Exemplo trito adverſario-  
rum, plurium ſimul trahentium navim, quorum neuter  
reſpectu alterius cauſa prima dici verè poſſeſt. 3. Ex modo,  
quo Adverſarii concurſum ſimultaneum explicant, ut in-  
fluxum partialem, ſc. ſolo inſufficientem, qui proinde, ut  
agat, tam eget influxu cauſæ creatæ, quàm illa ipſo.

Reſpondent, Deum dici cauſam primam, non præciſè  
quia concurrir, ſed quia virtutem, qua ei cooperatur cau-  
ſa ſecunda, illi dedit.

Sed contra. Ergo Deus non erit cauſa prima ex eo in-  
fluxu, quo nunc agit, ſed quo olim egit, cum cauſam pro-  
duxit, quod planè abſurdum: imò nec propriè dici poterit  
cauſa prima ex eo, quòd cauſam, quam adjuvat, produxit.  
Id eo exemplo conſtat. Cùm pater trahit navim cum filio  
ſuo, etſi virtutem, qua filius agit, dedit; non tamen ob  
id propriè & formaliter dici poſſeſt actu agere ut cauſa  
prima, ſed ut concauſa reſpectu filii & motus navis; nec  
filius ut actu agens eſt ſubordinari, ſed ſolùm coordinari  
intelligitur.

## S E C U N D A R A T I O.

*Pramovet Deus, quia cauſa ſecunda ſunt in-  
ſtrumenta Dei.*

**H**anc rationem Deus ipſe adhibet Iſaïæ 10. ubi ut  
deprimat regis Aſſyriorum ſuperbiam, expreſſis  
verbis hoc juſ cauſæ principalis utentis creaturâ ſuâ ut  
inſtrumento ſic ſibi vindicat: *Numquid gloriabitur ſecuriſ  
contra eum, qui ſecat in ea, aut exaltetur ſerra contra eum,  
à quo trahitur? Quomodo ſi elevetur virga contra elevan-  
tem ſe, & exaltetur baculus, qui utique lignum eſt.* Hic loquitur  
de Rege, nempe de cauſa libera nulli mortalium ſubdi-  
ta, quæ ſi atteſtante Deo, ejus inſtrumentum ſit, idem à  
fortiori dicendum de omni alia cauſa. S. Thomas hac ra-  
tione ſæpe utitur. 3. de Potent. art. 7. 3. cont. Gent. c. 66.  
67. 147. ubi ſic ſcribit: *Sub Deo, qui eſt primus intelligens  
& volens, ordinantur omnes intellectus & voluntates, ſicut  
inſtrumenta ſub principali agente.* Idem millies repetit de  
omnibus creaturis.

Pro-

Probatur itaque præmotio ex eo capite. Instrumentum non agit ad effectum causæ principalis, nisi ut applicatum, proindeque præmotum à causâ principali: Sed creaturæ in omni operatione sua agunt ad effectum proprium Deo: Ergo debent ab eo applicari, proindeque præmoveri. Major probata fuit à nobis in physica, cùm de instrumentis. Et præterea suaderi potest, quòd de ratione instrumenti sit, ut eo causa princeps utatur: usus autem est applicatio ad opus: unde his uti dicimur, quæ ad aliquid applicamus. Minorem sic probat S. Thomas. Ratio entis est proprius effectus Dei: nam causæ universalissimæ debet correspondere effectus universalissimus. Porro nihil universalius ente: Sed omnis creatura, dum aliquid agit, attingit rationem entis, hæc enim intimè includitur in omni effectu: Ergo agit ad effectum proprium Dei.

Hæc S. Thomæ ratio illustrari potest exemplo artificis. Sic videmus, rationem universaliorem, v. g. totius domus ordinem, esse proprium effectum artificis superioris; partes verò ejus respici à particularibus artificibus ut proprios effectus, aliam à fabro ferrario, aliam à fabro lignario, aliam à cæmentario, &c. Quia tamen in his includitur aliquid ordinis ad rotam domum, sub ea ratione non spectantur ab inferiori artifice, nisi ut ab instrumento; adeoque nec ad eas sic spectatas agit, nisi sub applicatione architecti. Unde cùm latomus lapidem in ordine ad domum sub tali figura disponit, si figuram præcisè spectes, ad eam se habet latomus ut causa principalis; proprium enim ejus opus est: at quatenus refertur ad domum, ad eam se habet ut causa instrumentalis, sub architecto ut causa principali applicante. Sic ratio universalis entis est effectus Deo proprius, entia verò particularia distribuuntur inter causas particulares ut proprii effectus. Quia tamen in his includitur ratio entis ut sic, sub eo respectu spectant ad Deum, ut ad causam principem; ad causas verò secundas, ut ad instrumenta Dei. Unde, ut dixi de particularibus artificibus, si præcisè spectes hanc rationem entis, ejus causa principalis est causa secunda: at ut relata ad ens in communi, jam spectat ad Deum, ut ad causam principalem; ad creaturam verò, ut ad instrumentum, sub Deo applicante agens.

Respondent Adversarii r. Creaturas propriè non esse instrumenta Dei. At repugnat non modò jam facta ratio, sed etiam adducta ipsius Dei auctoritas.

Re-

## De Promotione. Art. IV. 381

Respondent 2. Instrumenta non debere moveri à causa principe . At id vindicavimus agendo de instrumentis . Deinde, quidquid sit de instrumentis naturalibus , certè artificialia videmus non agere nisi ut ab artifice mota . Porro Deus dicit, creaturas , etiam liberas , se habere ad illum, ut ad artificem ejus instrumenta . Reponent fortè, impropriam esse locutionem . Reponam, imò falsam omnino fore, si Deus solùm simultanéè concurreret.

### T E R T I A   R A T I O .

*Deus promovet , quia est causa influxus  
causa secunda.*

**H**ÆC ratio , quæ desumitur ex S. Thoma in 2. Dist. 37. quæst. 22. art. 2. sic formari potest . Ille causam promovet , qui ejus actualem influxum in ea causat : Sed Deus actualem influxum causæ secundæ in ea causate Ergo eam promovet . Major constat . Causa enim est prior effectu : Ergo influxus alium causans est eo prior . Minor verò probatur . Omne ens, omnisque ejus differentia est à Deo, idque adeo certum est, ut S. Thomas oppositum hæreticum censuerit : Sed quoddam creatura, cum antea solùm posset , nunc actu agat & influat , est aliquid , ut constare Ergo hoc est à Deo.

Dices, esse à Deo simultanéè concurrente.

Sed contra. Concursus simultaneus , ut ab Adversariis explicatur , non dat , sed expectat influxum creaturæ ; ideoque ab illis *partialis* dicitur , quoddam aliquid ex parte creaturæ illi accedat . At si contendant, illud ipsum, quo creatura in ratione actu agentis , & Deo cooperantis constituitur, ab eo in ea causari , jam nec *partialis* erit , sed *totalis* ; nec simultaneus , sed *prævi*us ; nec solùm *adjuvans*, sed *promovens*.

Repones, influxum creaturæ esse à Deo , quatenus dedit virtutem, à qua procedit & causatur .

Sed contra. Cum Deus virtutes activas contulit, dedit quidem posse, sed non dedit actu agere & influere . Unde causam secundam eo influxu à se pendere fecit, ut ens secundum à primo ente ; sed non ejus influxum , ut à causa  
su-

superiori, hunc in inferiori causante: Ergo si illum præterea ei non influat, propriè non erit à Deo.

Argumentum urgentius est in causis liberis. Nam cum bene utuntur libero suo arbitrio, bonus hic usus, & actus cum consequens non eo solo referri potest in Deum, quòd illis liberum arbitrium contulit. Hoc enim cum Pelagius diceret, damnatus est ab Ecclesia, & meritò. Cum enim liberum arbitrium vi suæ creationis æqualiter se habeat ad *agere & non agere*, ad bonum & malum, ex creatione sua non habeat, ut hinc & nunc bene agat. Itaque si Deus liberum solum arbitrium dederit, non usum ipsum; cum homo per illud bene agit, meliorem se ipse efficiet, quàm à Deo factus sit, quod ut execrandam superbiam detestatur S. Augustinus lib. 12. de Civit. Dei, cap. 9. Nec dicas, id dicere non posse, quia adjuvatur à Deo. Nam & illud adiutorium ab Adversariis Indifferens statuitur. Quid itaque faciet, ut illæ vires, rum Innata hominis, cum adjuncta Dei, ad bonum & malum Indifferentes, ad bonum potius flectantur? Sanè, juxta Adversarios, ipse homo propriè, ac per se causa sibi erit tanti boni, ut etiam fatetur Molina supra relatus. At contra reclamant orans Ecclesia, immo ipse Molina, dum loquitur cum Ecclesia hanc non minùs veram, quam humilem confessionem toties repetentes: *Deus, à quo bona cuncta procedunt. Deus auctor, cujus est totum, quod est optimum. Deus omnium bonorum largitor, &c.* Ac paullo plenius Apostolus: *Quoniam ex ipso, & per ipsum, & in ipso sunt omnia, ipsi gloria in sæcula. Amen.*

#### QUARTA RATIO.

*Deus promovet, quia est universalis provisor.*

**H**ÆC ratio, quam sæpe expendit S. Thomas, sic formati potest. Ille, qui respicit finem ultimum Universi, omnes causas sibi cooperantes debet applicare, & movere ad hunc finem: Sed Deus respicit finem totius universi: Ergo ejus est omnes causas ad illum movere & applicare. Minor constat: est enim universalis Provisor & Governator: Major verò probatur. Ille, qui finem ultimum Universi respicit, debet omnia in illum dirigere & perducere, ut Ducis est, qui victoriam propriè ut finem respicit, omnes milites ad eam dirigere, & tandem perdu-

## De Præmotione. Art. IV. 383

ducere : Sed non potest dirigere , nisi applicet & moveat ad agendum conformiter ad hunc finem ; nam simul concurrente non dirigit , imò concursus simultaneus , ut explicatur ab Adversariis , potius dirigitur à causa secunda , quàm dirigit : Ergo debet movere & applicare . Vide S. Thomam 1. 2. quæst. 9. art. 1.

Illustratur hoc argumentum ex his , quæ humana ratio facit , Cùm enim alicui cura finis ultimi in negotio imponitur , quantum potest caveretur , ut omnes ad hunc finem collaborantes ipsi maximè subdantur , nec solum ei coopererentur , aut ille ipsis , sed potius ut nihil omnino agant , nisi ex ejus ductu & applicatione . Hoc enim ad rectam rationem maximè pertinere mens humana clarè perspicit nec aliter finem posse commodè obtineri . Hinc Romani , duces inferiores injussu imperatoris pugnantes , etiam si vincerent , pledebant . Cùm itaque Universum summè , & potentissimè ratione optimè sit constitutum , necesse est , ut in eo inferiores causæ illi , quæ præest , & finem ultimum respicit , perfectissimè subdantur , nec quidquam moliri queant , nisi ejus ductu & applicatione . Arque ita factum Scriptura passim testatur , cùm ait , omnia Deo servire , in manu ejus esse , ejus præcepto agere , ejus verbum facere , &c. quod cum ad creaturas irracionales extendatur , intelligi nequit de ordinatione aliqua morali , sed de impulsu physico cuncta in finem à Deo intentum applicante .

Confirmatur . Cùm providentia sit infallibilis , necesse est , ut res sibi subditæ ad finem suum infallibili directione perducatur : Sed sola præmotio id præstare potest : Ergo datur . Major constat . Minor probatur , Nam quidquid præter eam ponunt Adversarii , fallibile est ; concursus enim simultaneus est Indifferens , motiones morales sæpius inefficaces : Ergo infallibilitas divinæ providentiæ exigit aliquid amplius & efficacius , nempe præmotionem , ut certissimam ejus executricem . Hinc S. Thomas 1. par. qu. 103. art. 8. *Omnia* , inquit , *inclinatio sive naturalis , sive voluntaria , nihil aliud est , quàm impressio à primo movente , sicut inclinatio sagitte ad signum determinatum nihil aliud est , quàm impressio à sagittante .* Ex quo concludit , quod divinæ Gubernationi nihil resistit , *Eo quod* , inquit , *omnia , quæ aguntur vel naturaliter , vel voluntariè , quasi propria sponte perveniunt in id , ad quod divinitus ordinantur .* En germanam , nobilem , Deo dignam , Scripturis conformem rationem explicandi infallibilitatem Providentiæ , in ipsa præ-



promotione, seu impressione à primo movente in omnia derivatâ fundatam; quam deferentes Adversarii Scientiæ mediæ providentiam, ne oberraret, dirigentis commentum excogitare coacti sunt. At hæc fusiùs Theologi.

### Q U I N T A   R A T I O .

*Causa creata debet promoveri à Deo, quia est indifferens & contingens.*

**C**onstat, plerasque esse causas ex se indeterminatas & contingentes. In his speciali ratione necessitas promotionis sic vindicari potest. Ab eo, quod est ad utrumlibet, non sequitur aliqua actio, nisi ab aliquo alio determinetur ad unum: Sed pleræque causæ secundæ sunt ex se indifferentes ad utrumlibet, maximè voluntas humana: Ergo non agunt, nisi determinentur ad unum, scilicet à causa prima, quæ sola potest determinare voluntatem. Minor constat. Major est axioma à Commentatore 2. Physic. posium, quod sæpius usurpat S. Thomas. Et est per se notum. Nam nulla est ratio, cur causa, quandiu est indifferens, & æqualiter se habet ad opposita, in hoc potius, quàm in aliud propendeat. Porro nihil est, nisi sit aliqua ratio, cur sit potius, quàm non sit.

Respondebis. 1. Causam determinari per suam actionem.

Sed contra. Non effectus causam, sed causa effectum determinare potest. Actio verò comparatur ad causam, ut ejus effectus. Deinde cum causa indifferens est ad agendum & non agendum, nulla est ratio, cur actio exeat potius, quàm non exeat à causa, proindeque illam determinet.

Respondebis 2. Causam liberam determinari ab objectis; ut homo indifferens ad amandum potius, quàm non amandum, determinatur ad amotem per beneficium ab alio receptum.

Sed contra. Objectum solum determinat ad speciem, non ad ipsum exercitium. Immo positâ objectivâ illa determinatione voluntas est adhuc indifferens, & ad speciem & ad exercitium, maximè secundum Adversarios; quippe libertatem definiunt, qua voluntas positâ omnibus prærequisitis potest agere & non agere, imò plerumque opposita agere. A quo ergo determinabitur? Adde,

ne

ne præter objectum, concursum simultaneum. At & ipso indifferens est, potiusque à voluntate determinari magno consensu ejus defensores asserunt.

Reponunt tandem, & melius juxta sua principia, voluntatem, etsi indifferentem, seipsam determinare; illudque Axioma esse falsum.

At adeo menti perspicuum est, ut quivis non præoccupatus eorum potius opinionem falsam censeat, ut quæ cum vero clarè percepto non cohæret. Deinde voluntas creata jam foret primum determinans; non enim ab alio determinaretur. Porro tam repugnat, ut sit primum determinans, ac ut sit primum movens, prima causa; immo hæc ex illo clarè sequuntur: fore enim in eorum opinione primum moveus, primaque causa suæ determinationis.

Dices, Voluntatem divinam se ipsam determinare, cum sit indifferens. Quid ut & creata?

Resp. Quia est creata; & ideo non prima, ac potentia-  
litati permixta. At voluntas divina, cum sit prima, summè in actu determinat se ipsam; aut potius determinat sua objecta. Non enim illa, ut voluntas humana, est in potentia ad suum actum, ut egeat alio eam in actum reducete, & sic determinante, sed tota potentialis indifferentia est ex parte objectorum, quæ ipsa suo actualissimo dominio determinat. At hæc ad reconditionem Theologiam spectant.

Cæterum, ut videas quantum hic aberrant Adversarii à doctrina S. Thomæ, ille cum hoc Axioma objecisset adversus libertatem divinam 1. part. quæst. 19. art. 3. ad 5. Axioma ut certum supponens ita respondet: *Dicendum, quoddam causa, qua ex se est contingens, oportet, quoddam determinetur ab aliquo exteriori ad effectum. Sed voluntas divina, qua ex se necessitatem habet, determinat se ipsam ad volitum, ad quod habet habitudinem non necessariam.* Vides omnem aliam causam indifferentem, & contingentem debere ab alio determinari juxta S. Thomam.

At, inquires, S. Thomas sæpe dicit, voluntatem se ipsam determinare per rationem, idque proprium esse causæ liberæ.

Fateor, sed sub Deo applicante, & movente, ut idem dicit S. Thomas conceptis verbis 1. part. qu. 83. art. 1. ad 3. Sed de hoc infra. Interim breviter accipe, quomodo voluntas creata se determinat. Deo applicante, va-

luntas ex se indifferens ad agendum & non agendum, determinatur ad agendum; ac primò prorumpit in amorem boni ut sic, qui ideo tribuitur Deo speciali modo, quòd voluntas ita à Deo ad illum determinetur, ut ipsa se non determinet. Vi illius actûs ratio inquirat, quid agendum ad illud bonum, ac mixtis variis actibus utriusque illius potentia tandem prorumpitur in iudicium practicum, *hoc hoc & nunc esse eligendum*, ex quo sequitur determinata electio; sicque liberum agens dicitur se ipsum determinare, quod proptiâ ratione & voluntate concurrentibus hoc iudicium determinans sibi formaverit, sed tamen sub Deo semper has potentias juxta propriam conditionem ad agendum applicante. Unde semper se habet, ut primum determinans tollens indifferentiam passivam voluntatis, ac illi conferens indifferentiam illam activam & dominativam, qua sibi per rationem lectiones proprias determinat. Sicque utrumque conciliatur ac coheret, & voluntatem seipsam, & Deum voluntatem determinare. Nam illa se determinat, ut secundum agens per suam deliberationem. Deus verò illam determinat, ut primum agens per præmotionem, quæ applicat ad exercitium.

## S E X T A   R A T I O.

*Deus promoves, quia est omnium Dominus.*

**H**AC ratione maximè utitur S. Augustinus, quæ sic formari potest. De ratione domini est applicare sibi subditos ad suas operationes, applicatione quidem morali per imperium, si dominium ejus morale sit, ac solum moraliter ei subditi subjiciantur; physicè verò, si physicum, ac in ipsa rerum natura constitutum habeat dominium; Sed Deus est supremus omnium dominus, non purè moraliter ex aliqua subordinatione morali, sed naturaliter ex ipsa creaturæ naturali conditione: Ergo ad eum spectat omnia naturalia applicare. Minor constat. Major etiam. Nam actus domini est se sibi subditâ ad nutum uti. Porro usus in applicatione consistit.

Confirmatur. In doctrina Adversariorum ne vestigium quidem divini domini apparet. In actionibus creatura potius dominatur, Deus ad summum necessarius ad-

## De Præmotione. Art. IV. 387

adjutor cernitur. Causas quidem condidit, sed eas statim emancipavit, ut paret jam adultum filium. Hæc ora suo jure, ut liber, agunt. Adest solum illis Deus semper ad coagendum paratus, expectans, non efficiens, ut agant. Ad liberas præterea fungitur munere consiliarii per motiones morales; sicut exploratoris per scientiam mediam; Domini aliquantulum per leges, sed dominio purè morali, cui ut plurimum homines repugnant; naturalis ac efficacissimi, quale summum, ac supremum naturæ principem decet, ne umbram quidem hinc vides. Nam quoddam terum actiones impedire queat concursus subtractione, aut extendere uberiori concursu, dominium concursus sui, non actionis creaturæ, arguit. Sic enim & loci & servi ad aliquod onus necessarii illud impedire queunt, aut promovere. Quomodo ergo habet illud Regii Vasis? *Quoniam omnia servant tibi*. Verear, ne in Adversariorum sententia penè verius dici posset, *Quoniam tu servis omnibus*. Hinc inaudita apud Antiquos interpretatione huc detorquent illud Isaia 43. *Servire me fecisti in peccatis tuis*, quod ab it, dictum sit de divino influxu, quasi serviat ad peccandum; sed ut omnes alii exponunt, intelligitur de victimis, de quibus eo loci Propheta loquitur, quas sacerdotes ad sua lucta convertebant. Vel juxta Lactantium & S. Hieronymum, exponitur de Christo, qui propter peccata nostra servi formam accepit, & tot labores pertulit. Unde non dicit Scriptura, *Servire me fecisti peccatis tuis*, quasi ad peccandum tecum; sed *in peccatis tuis*: id est, ob peccata tua, ut ea delerem. Unde subditur, *Ego sum, qui deleo iniquitates tuas*.

### S E P T I M A   R A T I O.

*Causa creata eget præmotione Dei, quia ex se alii non est, nisi in primo actu.*

**H**Æc ratio profundissima est & efficacissima, quam hic accuratius expendemus ex penitissimis S. Thomæ principiis.

Itaque sic argumentor. Impossibile est, ut creatura agat, nisi constituta sit in ratione principii in actu secundo operativi; Atqui constitui nequit in ratione principii in actu secundo operativi per suam virtutem.

R. 2

agen-

agendi, nec per concursum simultaneum, sed per solam præmotionem: Ergo ut creatura agat, eget præmotione. Ut argumentum omni ex parte vincat, utraque præmissa demonstranda nobis est.

Major supponit rem apud omnes certam, nempe duplicem statum virtutis activæ, habituales, & actuales; seu in actu primo, & in actu secundo. Sic qui scientiam habet, sed actu non cognoscit ea, quæ scit, dicitur sciens habitualiter, seu in actu primo. Dum vero actu per scientiam cognoscit, dicitur sciens actualiter, seu in actu secundo: in quo statu scientia sine dubio perfectior & actualior est, quàm in primo. In priori enim habet aliquid potentialitatis admixtum; nam si omnem propriam actualitatem haberet, suum actum exereret. Unde quia scientia Dei est actualissima, & nullo modo in potentia, semper actum cognoscit ea omnia, ad quæ se extendit. Eâ distinctione suppositâ, Major argumenti adeo clara est, ut nemo eam inficiari queat. Nam quod solum habet principium operativum habitualiter, & in actu primo, actu non agit; immò implicat contradictionem, ut agat quandiu tale agendi principium in eo statu imperfecto, & otioso manet: Ergo ut creatura actu agat, oportet, ut sit constituta in ratione principii actualiter, perfecte, & complete operativi. In hoc nulla est difficultas.

Minor verò probatur. Et in primis creaturam non constitui per concursum simultaneum Adversariorum in ratione principii in actu secundo operativi constat, nec ipsi diffiteri possunt. Nam hic concursus semper præsto est. Unde si per eum agens constitueretur in ratione principii operativi, omne agens esset semper operativum in actu secundo. At manifestum est; pleraque agentia esse solum operativa in actu primo, ut sciens, dum dormit. In hoc itaque nulla est difficultas.

Quod verò nec per suam virtutem activam creatura constitueretur in ratione principii in actu secundo operativi, probatur. Virtus activa creaturæ est solum operativa in actu primo & habitualiter, seu est primum operandi principium, non ipsa ultima actualitas: Ergo non constituit agens in ratione principii in actu secundo operativi. Consequentia est evidens. Antecedens probatur ratione S. Thomæ 1. p. quæst. 54. art. 5. *Impossibile est, inquit, quod aliquid, quod non est actus purus, sed habet ali-*

## De Præmotione. Art. IV. 389

*aliquid de potentialitate permixtum, sit sua ultima actualitas: Atqui virtus activa creaturæ non est actus purus, sed habet aliquid de potentialitate permixtum: Ergo non est sua ultima agendi actualitas, sed solum actus primus existens in potentia ad ultimum agendi actualitatem. Idem manifesta inductione confirmatur. Sic in agentibus liberis (de quibus præcipua nobis cum Adversariis quæstio est, an ageant præmotione) virtus eorum activa, nempe intellectus & voluntas, est solum ex se operativa in actu primo: unde sæpe visuntur in statu actus primi, seu habituali & otioso. Porro si nobilissimæ hæc facultates ex se sunt solum activæ in actu primo, idem à fortiori censendum de ignobilioribus. Arque in plerisque id experientia confirmat. Sic appetitus sensitivus, & facultas motrix, non sunt activa per se in actu secundo. Non enim semper sunt in actu, sed sæpe in otio; immo etiam cum nihil illis deest ad operandum, solo voluntatis nutu suspensa manent & feriuntur. Idem dicendum de sensibus; plerumque enim & ipsi otiantur, uti & facultas altera in sene, generativa in puero, seminalis in ovo & grano, quæ nihil molitur, etsi materia adsit, donec excitetur. Immo calor licet maxime activus videatur, ex se non est nisi activus in actu primo, ac separari potest à suo actu secundo; ut constat in calore, ut vocant, potentiali; de quo vide in Physica, ubi de Elementis. Idem sentiendum de omni qualitate naturali activa, licet quædam semper esse videantur in actu secundo, non quod tales sint ex sua essentia, sed quod semper adsit id, quo tales sunt: At re ipsa in iis etiam duplex status distinguitur, potentialis, seu actus primi; & actualis, seu actus secundi: Ergo virtus activa omnis agentis creati seu liberi, seu naturalis, non est ipsa ultima actualitas operandi, seu principium in actu primo, & habitualiter ex se operativum: Ergo ut agens creatum constitutur in ratione principii in actu secundo & completo activi, præter virtutem suam activam, & concursum simultaneum, admittenda est aliqua ulterior actualitas à primo agente, qui semper est in actu derivante, qua virtutes activæ creatæ ab illo statu habituali & otioso ad ipsam agendi exercitium, pro suo quæque modo, reducantur; quæve ultimo complente fiat, ut hic & nunc suas actiones, effectusque parturiant; ut sic ultima essendi & agendi*

actualitas sit à Deo, ut proprius ejus effectus. Porro hic ultimus agendi vigor à prima causa in omnes alias effusus, & reducens eas ad ipsum agendi exercitium, à nobis *Pramotio* vocatur.

Respondebis, Agentia creata constitui in ratione principii in actu secundo operativi per propriam actionem à se productam, quæ ideo dicitur actus secundus operandi.

Sed contra. Actio duobus modis sumi potest. Primo pro ipsa ultima activitate complente potentiam ad agendum, non ab ipsa potentia producta, (repugnat enim, ut aliquid majorem sibi perfectionem det, quàm habeat) sed ab eo, qui potentiam applicat, & reducit in actum, accepta; quo sensu aliquando sumitur actio à S. Thoma, ut notavi 1. p. *Physicæ*, Disput. 3. qu. 2. art. 2. & sic verum est, agens constitui in ratione principii in actu secundo operativi per suam actionem, illamque esse ultimam agentis actualitatem, ac propriè actum secundum: sed eo sensu actio erit ipsa *pramotio*. Secundò actio sumi potest pro aliquo ab agente producto, ut sumitur ab adversariis. Hoc sensu sumpta actio, etsi denoninet formaliter causam agentem, non tamen ipsa potest esse actualitas complectens causam in ratione principii activi, & ratio cur agens antea illam non profundens jam eam profundat; aliàs esset causa, cur ipsa esset, id est, causa sui ipsius, quod manifestè repugnat. Itaque præter actionem sic sumptam, immo priùs naturà, quàm agens eam producat, oportet, ut intelligatur ultimò complerum in ratione principii activi. In tantum enim agit, in quantum est in actu: Ergo priùs est, ut sit perfectè & integrè in actu, quàm ut quidquam ex eo prodeat. Unde quærenti, cur Petrus v.g. non semper actu contempletur ea, quorum habet scientiam, si diceret, quia contemplatio actu non producitur ab eo, derideretur inepta responsio. At si diceret, quia ejus scientia non est summè actualis, sed solum actus primus contemplandi, expectans, ut reducatnr aliunde ad actum secundum, aptè responderet; solumque restaret quærendum, quid sit, quod hanc scientiam reducit ad actum secundum contemplandi. Et in hoc nulla est difficultas.

Repones. Facultates inferiores applicari ad actum à superioribus creatis, ideoque non egeere *pramotione*. Ut vis seminalis grani, hieme torpens, excitatur verno solis

solis calore. Facultas motrix hominis applicatur ad exercitium ab ejus appetitu, appetitur ab imaginatione, imaginatio à ratione, ratio à voluntate, quæ in homine movet ad exercitium alias facultates.

Hoc argumento quidam persuasi dicunt, Deum non præmovere immediatè omnia, sed solum prima agentia ipsi immediatiora, eaque solum ad primum actum, quo se deinceps & alia movent: ut voluntas, inquit, solum movetur à Deo ad primum actum, qui est volitio finis; ipsa verò in actu facta movet intellectum ad deliberandum de mediis, & per hanc deliberationem movet se ad electiones suas, Deo ad eas non applicante. Hanc verò putant esse mentem Aristotelis 8. Phys. c. 7. & S. Thomæ 1. 2. q. 9. art. 4. aliisque in locis.

Sed falluntur; nec advertunt, quàm latè pateat hoc S. Thomæ principium 1. 2. quæst. 9. art. 4. *Omne quod est, quandoque agens in actu, & quandoque in potentia, (id est, cujus vis activa non est ultima sua actualitas) indiget moveri ab aliquo. Oportet enim, ut id, quod est in potentia reducat in actum per aliquem, quod est in actu, ut ait art. 1.* Nam etsi eo principio apertius probetur, quibusdam gradibus esse deveniendum ad aliquem primum motorem, à quo incipiat motus cum naturæ, tum voluntatis, quique specialius, ac singulariùs moveat prima moventia naturalia, & voluntatem ad primum actum; attamen si profundius penetretur, probat, Deum immediatè movere secunda moventia, etiam quæ moventur ab aliis creatis, & voluntatem, etiam ad eos actus, ad quos se ipsam movet & applicat. Nam virtus illa derivata à Superiori movente creato, magis complens inferis agens, non est sua ultima actualitas, cum nec ipsa virtus superiori agentis, cujus est participatio, sit sua ultima actualitas, ut constat in doctrina S. Thomæ 1. part. qu. 54. art. 1. Unde est solum ex se activa in actu primo. Sed juxta S. Thomam virtus, quæ est solum activa in actu primo, ut agat, debet reduci ab aliquo ad actum secundum & ultimum: Ergo agens creatum, quantumvis instructum, cum propriâ, tum ab aliis superioribus participatâ virtute, adhuc eget reduci ad actum ultimum ab aliquo, nempe ab eo, cujus virtus est sua ultima actualitas, quique proinde solus eam dare aliis potest.

Et hoc est, quod dicit S. Thomas 3. contra Gentes



c. 66. *Ultimum complementum agentis secundi est ex virtute agentis primi. Unde Quæst. 5. de Potent. art. 7. docet, omnem omnino virtutem creatam, sive immediatè à Deo collatam, sive ab aliis agentibus acceptam egere motione divinâ. Et 1. 2. q. 109. a. 1. Quantumcumque, inquit, aliqua natura, sive corporalis, sive spiritalis ponatur perfecta, non potest in suum actum procedere, nisi moveatur à Deo. Nempe quia semper ultima actualitas agendi in omni agente, sive superiori, sive inferiori, est immediatè à Deo, ut à primo, & per essentiam agente; sicut ultima essendi actualitas in omni ente, sive à solo Deo, sive etiam à causis secundis producat, est à Deo immediatè, ut ab ente primo & per essentiam, tanquam proprius ejus effectus. Arque hinc probat S. Thomas 1. p. quæst. 8. art. 1. Deum esse præsentem immediatè in omni re. Et quæst. 3. de Potent. art. 7. operari immediatè in omni operante. Itaque agentia creata superiora perficiunt quidem inferiora magis complendo earum vires activas, & voluntas per judicium pradicum movet se, ac determinat ad eligendum; attamen nec virtus agendi à superiore inferiori communicata, nec judicium pradicum in vi intentionis formatum est ipsa ultima actualitas, qua agens inferius agit, & facultas electiva eligit sed se habent, ut aliquæ aut dispositiones, aut formæ prærequisite, quibus positis Deus, qui unumquodque movet juxta suam dispositionem, applicat facultates iis affectas ad agendum. Et sic dicitur, *attingere à fine usque ad finem fortiter*, id est, à primo agente creato usque ad infimum, & *disponere omnia suaviter*. Hæc paullo fusiùs, sed rei momentum id exigebat.*

Hanc sublimiorem, & abstrusorem doctrinam egregiè illustrat Marcellus Ficinus ex S. Dionysio & Platone, exemplo sensibili, quo etiam usus est S. Thomas 3. contra Gent. c. 67. Sic, inquit, videmus, quoddam Sol, qui est veluti principium totius visibilitatis, corporibus dedit colores; si ita non est, suppose. Hi colores, ut diminutæ lucis participationes, visibiles quidem sunt, sed solum in actu primo; ideoque ut in actu secundo moveant oculum, & actu videantur, egent semper prævio quodam Solis illustrantis influxu, quo complente jam suum munus obeunt, alioquin nusquam. Eodem modo primum agens, qui est purus agendi actus, facultatem

rem agendi dedit creaturis ; at illa facultas , cùm deficiat ab illa pura agendi actualitate , potentialitati permixta est ; adeoque solùm activa in actu primo . Unde ut in actu secundo agat , indiget influxu sui principii eim. complente , & illi ultimam actualitatem inspirante , idque per modum motionis transeuntis , quia hæc ultima actualitas in solo actu puro esse fixum habet ; in aliis verb. esse fluens , ut loquitur S. Thomas Quæst. 3. de Potent. ar. 7. ac veluti per modum irradiationis , ut illuminatio in coloribus .

*Probatur Præmotio exemplis.*

**N**on desunt plura & aptissima exempla , quibus explicari & confirmari possit præmotio physica , quæque non semel variis in locis usurpat S. Thomas . Generaliter enim videmus in causis subordinatis inferiorum non agere , nisi moram & applicatam à superiore , ut inquit . 1. par. quæst. 105. art. 3. Ideoque 3. contra Gentes cap. 147. præclare ait , *Divina Providentia legens esse , ut unumquodque immediatè à proxima sibi causa moveatur .* Sic quia corpus , & omnia ejus membra subordinantur animæ , non agunt , nisi ex ejus motione & applicatione . Quia cæteræ potentia subordinantur voluntati tanquam suæ reginæ , non operantur , nisi quatenus moventur ab illa . Quia membra subordinantur cordi , nullus in eis motus , nisi prius ab illo vitalem influxum recipiant , quo intercepto , vel penitus cessante , ut in deliquio & morte , cætera membra torpent . Sic quia sublunaria subordinantur cælis , non agunt ; nisi prius vivifico siderum influxu excitentur , ut patet in plantis , quarum virtus languescens per hiemem siderum calore manet otiosa . Idem patet in artificialibus subordinatis . Sic enim prima horologii rota cæteris omnibus motum infundit . Idem in politicis . Sic enim propter subordinationem miles non agit , nisi applicetur à suo duce , & dux à Tribuno , Tribunus ab exercitûs Imperatore , Imperator à Rege . Et judices inferiores nihil validè decernunt , nisi in quantum mittuntur , & applicantur à supremo , nempe principe .

Certum est autem , omne agens creatum subordinari immediatè agenti increato , ac intimius ab eo pendere , quàm corpus ab anima , potentias à voluntate , membra

à corde, sublunaria à celestibus, &c. Ergo à fortiori debent prius applicari & moveri à Deo. Unde mirum est, Adversarios id denegare Deo, respectu causarum secundarum, quod uni causæ secundæ competere videmus respectu altetius, cum tamen magis dependeat causæ creatæ à Deo, quàm quælibet causa secunda ab altera.

*Probatur ultimò Præmissio ex inconvenientiis.*

**P**rimum Inconveniens, quod ex negatione præmotionis sequitur, est, Deum non fore causam primam totius entis. Ut enim arguit D. Thomas in 2. Disp. 39. quæst. 2. art. 2. *Non potest vitari, quin voluntas humana sit primum agens, si ejus actio non reducat in aliquod prius agens*: Sed per concursum simultaneum actio creaturæ reducit in Deum simultaneè agentem: Ergo ex illa sententia sequitur, Deum non esse primum agens.

Secundò sequitur, influxum Dei subijci creaturæ, illanique esse priorem Deo in causando. Dicunt enim Adversarii, influxum Dei semper esse paratum, ut creatura illo utatur, vel non utatur, prout tribuerit, ac proinde creaturam priorem, & Deum posteriorem faciunt in agendo, non prius est, qui utitur, quàm ille, quo utitur.

Tertio sequitur, Deum non esse dominum creaturæ, saltem liberæ. Docent enim Adversarii, Deum offerre suum concursum indifferentem voluntati, & per scientiam mediam, ut vocant, explorare quomodo sit consura, totamque Providentiæ reconomiam, & certitudinem committunt huic exploratrici scientiæ scilicet usurpantes illud effatum, *Nihil Providentia decernit, nisi Præscientia exploraverit*. Ergo Deus in eorum sententia potius explorator est nostrarum actionum, quàm dominus nostrarum voluntatem.

Quarto sequitur, aliquid fere impossibile Deo, nempe efficere, ut homo agat in illis circumstantiis, & cum illis morionibus moralibus, in quibus Deus prævidet, cum ex se ipso non esse acturum. Dicunt enim, divinum influxum expectare cooperationem creaturæ: Ergo per illum Deus non potest efficere, ut creatura consentiat, sed potius id à creatura expectat.

*Quin.*

Quintò sequitur, Creaturam aliquid habere, quod non acceperit à Deo. Usus enim concursus simultanei non datur ab ipso concursu simultaneo: Ergo nisi admittatur præterea concursus applicativus, creatura ex se ipsa, & non à Deo habebit saltem, quoddam utatur concursu simultaneo. Pono casum, Deus eundem concursum simultaneum offert Petro & Joanni, & Joannes illo rectè utitur, non verò Petrus: an non potest gloriari Joannes supra Petrum, se consensisse divino concursui, quod tamen est contra Apostolum dicentem, non esse glorandum ex eo, quoddam bene agimus; quia nihil habemus, quod non acceperimus. Hoc argumentum, sicut & plura alia inconvenientia, prosequi solent theologi agendo de voluntate, & scientia Dei, ejusque gratia; atque idcirco de his parcius nos.

Fateamur ergo tot testibus & rationibus convicti, Deum omnes creaturas, ad singulas actiones applicare, ita ut nihil in mundo fiat, nisi ex applicatione & præviâ Dei motione, illamque doctrinam esse omnium seculorum traductione propagatam, in Scripturis fundatam, in Conciliis approbatam, à Patribus inculcatam, à Philosophis probatam, à S. Augustino egregie propugnatam, à S. Thoma illustratam, rationibus confirmatam ac demonstratam, exemplis denique & omnium argumentorum genere stabilitam. Unde Deus non ob aliud primi motoris nomen obtinuit, quàm quoddam, quæ agunt, prius ab eo moveantur, & applicentur ad agendum.

## ARTICULUS QUINTUS.

*Utrum & quomodo Deus præmoveat ad actum peccati.*

**I**N peccato duo diligenter distinguenda sunt, *actio & malitia*, seu *effectus & defectus*. Peccatum enim est monstrum. Unde sicut in monstro duo sunt, entitas, & deformitas, ita in peccato invenitur entitas actionis, & deformitas malitiæ. Certum est, Deum non causare malitiam peccati, quamvis oppositum docuerit Calvinus, propter quam doctrinam ejus libri etiam à Lutheranis fuerunt publicè combusti; ut enim dicit Fulgentius, *Deus non est auctor illius, cujus est ultor*. Aliqui tamen ex Adversariis feruntur docere, malitiam peccati

esse à Deo simultaneè, quamvis non crediderim; homines Catholicos ita sentire posse: quippe, intolerabilis est hæc sententia; Deus enim nec author, nec socius esse potest peccati. Cæterùm quantum ad entitatem, seu actionem, quæ reperitur in ipso peccato, sic.

## C O N C L U S I O.

**D**eus causat actionem peccati, physicè præmouendo ad illam, non ut mala est, sed præcisè ut actio est. Ita S. Thomas 1. 2. quæst. 79. art. 2. & aliis in locis D. Augustinus lib. de Gratiâ & Libero arbitrio, cap. 2. ubi loquendo de Semel, dicit, *Deus voluntatem ejus malam, in hoc peccatum inclinavit.* Quod intelligendum est, non quantum ad malitiam, sed quantum ad substantiam actûs, seu, ut dici solet, non quantum ad formale, sed quantum ad materiale peccati; sicuti & alia ejusdem sancti Doctoris loca, in quibus dicit, Deum movere ad actiones malas.

Probatur primò, Conclusio argumentis omnibus, quibus supra generaliter ostendimus, Deum movere, & applicare creaturas ad omnes earum actiones: Sed in peccato reperitur actio: Ergo Deus movet ad illam.

Secundò. Quodlibet ens derivatur à primo ente, ut à prima causa. Sed actio peccati est aliquod. ens: Ergo derivatur à primo ente, ut à prima causa.

Tertiò. Omnis motus causatur à primo motore: Sed Deus est primus motor omnium spiritualium, & corporalium creaturarum: Ergo causat omnes illarum motus, ac preinde etiam actionem peccati. Hæc duæ rationes sunt S. Thomæ 1. 2. q. 78. art. 2.

**Quæst.** cur Deus, qui nos ita in sua potestate habet, ut nihil agamus, nisi moti ab ipso, nos movet ad actiones malas, & non semper ad bonas; præcipuè cum ipse adeo bonus sit, & bonorum amicus?

Respondeo, certissimum esse, quod Deus absolute posset impedire omnia mala, & facere, ut omnes semper bona agerent, neque id negari potest salvâ Dei omnipotentia. Unde ista difficultas omnibus solvenda est, & non solum Thomistis. Porro commodè solvitur dicendo, Sapientiam divinam non debere impedire omnia mala, sed plura permittere. Quia ut discurret D. Thomas 1. par. quæst. 22. a. 2. ad 2. Deus est proximus universalis omnium,

omnium rerum; de ratione autem provisoris universalis est, ut permittat quosdam defectus, ne impediat bonum Universi: si enim omnia mala impedirentur, multa bona deessent Universo; non enim esset vita Leonis, nisi esset occisio animalium; nec patientia Martyrum, nisi esset persecutio tyrannorum. Permittit ergo Deus mala in Mundo propter Universi pulchritudinem, ut ordinationes seculorum tanquam pulcherrimum carmen quibusdam antichetis honestet, inquit D. Augustinus 11. de Civit. Dei cap. 18. Nam Universi pulchritudo consurgit ex ordinata bonorum, & malorum commixtione, sicuti silentii interpositio dulciorem efficit cantilenam, ut ait S. Thomas 3. contra Gent. c. 23. & umbræ ipsæ tabellas exornant, sine quibus omnia pictura, quantumvis lucidissimis coloribus expressa, esset imperfecta. Unde præclare S. Augustinus Serm. de Machabæis: *Pictor novit, ubi ponat nigrum colorem, ut sit decora pictura; & Deus nescit, ubi ponat peccatorem, ut sit formosa creatura*: Deus tamen cum sit optimus, etiam ex illis malis, quæ permittit, majora bona semper elicit, juxta illud ejusdem S. Augustini in Enchir. cap. 11. *Deus non sineret, malum aliquod esse in suis operibus, nisi usque ad hoc esset omnipotens & bonus, ut beneficeret etiam de mala.* Adde præterea, quod Divinæ Sapientiæ lex exigit, ut Deus unumquodque moveat juxta ipsius conditionem, sicut perpetuo inculcat D. Thomas ex Dionysio. Cum igitur sint aliquæ creaturæ peccabiles & defectibiles, debet illas ita movere, ut in actione, ad quam movet, sæpe malitiam permixtat, quamvis eam nunquam attingat.

Quomodo autem fiat, ut motio divina ad istas malas actiones, non ut malæ sunt, sed ut actiones sunt, se extendat, egregie explicat D. Thomas quæst. 3. de Malo, art. 3. & 1. 2. quæst. 79. Nempe quia motus primi motoris non recipitur uniformiter in omnibus mobilibus, sed in unoquoque juxta illius conditionem. Cum ergo aliquid est in dispositione debita ad recipiendam motionem primi motoris, sequitur actio perfecta juxta intentionem primi moventis; sed si non sit in dispositione debita ad recipiendam talem motionem, sequitur actio imperfecta. Et tunc id, quod est de defectu, non reducit in primum movens, quia talis defectus non est in actione, nisi in quantum agens secundum deficit à primo mo-

vente : sicut quidquid est de motu in cibus claudicante, procedit ab anima movente tibiam ; quidquid verò est de defectu , est à tibia curva , secundum quod deficit ab opportunitate modilitaris . Sic ergo dicendum , quòd cum Deus sit primum principium omnium motionum , si voluntas fuerit in dispositione debita ad recipiendam motionem Dei , semper sequetur actio bona , ut patet in Beatis : si verò voluntas fuerit in prava dispositione , sequetur actio mala , ut patet in damnatis , qui semper peccant : si demum voluntas fuerit in dispositione variabili & defectibili , sequentur modò bonæ , modò malæ actiones ; ita tamen ut semper , quidquid est de bono , reducat in Deum ; quidquid verò admiscetur de malo , reducat in voluntatem creatam . Hæc ex D Thoma collegimus locis supra citatis , quæ videri possunt in fonte . Objectiones , quæ militare possunt contra hunc articulum , solventur simul cum aliis articulo sequenti.

## ARTICULUS SEXTUS.

*Explicatur natura præmotionis , & modus , quo dispensatur.*

**E**X his , quæ hætenus dicta sunt , satis demonstratum arbitror , quàm altis radicibus hæreat doctrina Præmotionis , eamque ad omnem omnino creaturam actum extendi . Verùm ad hæc omnia dicere fortè quis posset , Thomistas egregiè quidem probare , Deum movere causas secundas , etiam motione præviâ aliquo modo , vixque ullum posse id satis inficiari ; ac minimè explicare , quid propriè sit in creaturis illa motio , an sola præsentia Creatoris omnia portantis & vivificantis ; an qualitas creata addita creaturæ ; an influxus ille idem , quo Deus operatur esse in omnibus , constituiturque illis intimè præsens , &c. Quippe hæc non satis dicta , & intellecta miram caliginem offundunt eorum sententiæ , enervantque vim omnem probationum , quas pro præmotione stabilienda adducunt . Et quidem fateor , hæc obscurissima esse , atque in quibus elucidandis non soli Thomistæ laborant , sed & omnes Philosophi , ac Theologi . Et quæso te , si tam occulta sit virtus & ratio , qua infantilia membra formantur in utero , speras intellectu faciliorem fore rationem & virtutem , qua Deus Universalitatem rerum , ac causarum administrat ? Ad-

dide-

## *Explicatur Præmotio. Art. VI. 399*

diderim tamen de re occulta nihil præclariùs, verosimiliùs, ac profundius ab aliis circumferri, quàm quod ex S. Thomæ fontibus haurit Schola Thomistica. Nam, si verum fateri velimus, concursus simultanei Defensores, cum efficiendi vim, quasi ex æquo inter Deum, & creaturam partiuntur; cum virtutem Divinam in excubiis collocant explorantem, expectantemque creaturæ cooperationem; cum creaturas suo jure vendicant à subjectione Dei; cum chimerici commercii leges inter Has & Deum statuunt; cum inepra equorum in trahendo eodem cursu conjundorum exempla inducunt, aliquæ ejusmodi; planè ut benignius dicam, parum magnifice de primæ causæ majestate loquuntur. Age ergo quàm altius angelica D. Thomæ doctrina sese erexit, tantisper dicamus.

Atque ut rem radicitus aperiamus, Effectus omnes, qui in mundo sunt, dupliciter considerari debent. Primò sub ratione entis creati ex nihilo originaliter educti, & in nihilum rursus delapsuri, nisi continuò portaretur, ac manuteneretur omnipotenti aliquâ virtute. Secundò sub ratione entis educti, id est, per transmutationem facti ex alio ente. Quippe videmus primò, Universalitatem rerum creatam, ac continuò conservatam existere; in eâ verò ita constitutâ & existente unum ens ex alio fieri, ut ex ligno ignem. Unde secundùm hos duos modos respondent à duplici causa & virtute, nempe à virtute infinita Creatoris omnia in *esse* conservantis, atque ne in nihilum deciderent, manuteneris; & præterea à virtute finita causarum, quæ supposito illo generali influxu Creatoris, variis modis transmutant res sibi subjectas, atque ex una aliam efficiunt, prima virtus est immediatè, & unicè à Deo, imò est Deus ipse; quia nulla virtus creata & finita potest attingere ens sub ratione creaturæ, illudque ita portare, ut ex ejus subractione sequatur annihilatio. Neque verò aliud intelligi debet per concursum simultaneum probè acceptum, ut etiam diximus articulo secundo. Unde concursus ille non est aliqua qualitas, aut influxus à Deo, & effectu distinctus, sed est ipsa virtus Dei, ut importans ad extra effectum, illumque immediatè attingens sub ratione entis creati, siue cum sit, siue quandiu existit; diciturque *simultaneus*, quia cum nullus effectus producatur, in quo non sit imbibita ratio



creaturæ, oportet, cum causæ secundæ attingunt suos effectus sub rationibus sibi correspondentibus, simul Deum illos attingere hoc superiori influxu sub ratione entis creati.

At verò secunda illa virtus, nempe eductiva & transmutativa est, per quam propriè creatura agit. Unde non est Deus ipse præsens causis, sed perfectio quædam data à Deo causis secundis, illisque inherens ad producendas suas actiones, & per illas effectus. At quomodo detur à Deo creaturis, operæ pretium est, ut dicamus. Quippe ex eo pendet unicè noticia præmotionis, quæ & ipsa quoque comprehenditur sub illa virtute eductiva, ut ejus complementum.

Porro id commodè intelligi, explicative potest ex duobus profundissimis S. Thomæ principiis. Primum est, *Cum plures causa subordinata concurrunt ad effectum, oportere, semper universaliiores rationes correspondere universalioribus causis, nec attingi ab inferioribus, nisi quatenus agunt in virtute superiorum.* Secundum est, *Virtutem superioris causa, qua residet in ea plenè, ac permanenter, non communicat causa inferiori, nisi per modum fluentis.* Vide, quæ latè diximus in prima parte Physicæ agendo de Instrumentis. Cum igitur ad effectus per educationem productus concurrant plures causæ subordinatæ: aliæ inferiores, aliæ universaliiores, juxta illud, *Solus, & homo, generant hominem*, oportet, virtutem eductivam ita dispensari à Deo inter causas secundas, ut causis universalioribus dederit virtutes eductivas correspondentes universalioribus rationibus, quæ sunt in effectui educto, adeo ut inferiores causæ illas rationes non attingant, nisi in virtute superiorum, eaque per modum motionis transeuntis communicatæ, juxta secundum D. Thomæ principium. Porro in effectibus per educationem productis relucet aliqua ratio, quæ licet per educationem fiat, atque idcirco correspondere debeat alicui virtuti eductivæ, attamen adeo universalis est, ut nulla creata causa sit tam vastæ efficaciæ, quæ illam sibi ut propriam vendicat. Est ea *esse*, seu existentia, quæ est ultima, perfectissimaque formalitatum per educationem productarum, adeo universalis, ut nullus sit effectus, in quo non reluceat. Illa ergo soli universalissimæ causæ, nempe Deo, propriè correspondere debet, atque adeo, quamquam attingatur à causis secundis, non tamen attingitur.

## *Explicatur Præmotio. Art. VI. 401*

tur ab illis, nisi in virtute ipsius *Dei*, communicata causis secundis per modum motionis transeuntis, elevantis earum virtutes ad tam communem, & nobilem effectum, easque constituentes in ultima actualitate agendi, cui in effectu responderet ultima actualitaseducta, nempe *esse*, seu existentia. Atque id est, quod tam sæpe celebrat D. Thomas, cum ait, *Omnes virtutes creatas comparari ad Deum, ut instrumenta; causas secundas non dare esse, nisi in virtute Dei; ab eo moveri, applicari, compleri; esse in illis virtutem illam divinam per modum motionis transeuntis, ut est virtus artis in instrumenta, colores in aere, &c.* Sicque habentur non modò profundissima ponendæ præmotiõis fundamenta, sed etiam germani, ac Thomistici characteres, per quos possit innoscere: nempe ut sit vis quadam activa à Deo derivata in causas secundas, non ut perfectio stabilis adinstar earum virtutum activarum, quæ habentur ut proprietates, sed ut motio transiens & ultimò complens & applicans vim activam creaturarum, arque se habens in ordine agendi, ut *esse*, seu existentia in ordine essendi.

Hinc verò explicari facilè potest secunda Tituli pars, Quo modo præmotio dispensetur. Ut enim *agere* se habet ad agentia, sicut *esse* ad entia; Ita influxus, quo Deus tanquam primum agens cætera movet ad *agere*, se habet, ut ille, quo tanquam primus essendi fons omnia entia conservat in *esse*. Unà enim providentiæ ubique sibi consentientis lege hi duo divinæ Gubernationis effectus dispensantur; atque ita ex uno alius proportionem quadam innotescit. Itaque ut Deus res conservat juxta propriæ cujusque formæ modum, ac dispositionem, sic agentia movet ad agendum juxta propriæ virtutis activæ modum & dispositionem. Ut conservatio nulli rei deest, quandiu esse exigit; sic divina præmotio nulli agentis deest, cum agere postulat. Unde ut Deo conservatori essendi actualitas, non verò corruptio tribuitur; sic Deo promotori agentium actiones & effectus, non verò defectus adscribuntur. Atque ut divina conservatio à rebus conservatis contingentiam, & ad non essendum potentiam non aufert, quamquam in sensu composito repugnet, ut Deus rem conservet, & illa non sit; ita divina motio agentibus contingentibus, & liberis agentibus contingentiam, & libertatem non aufert, licet in sensu composito repugnet, ut Deus moveat ad agendum  
& ta-

& tamen agens non agat. Atque adeo imperitè adversus præmotionem objicitur, quòd Deum peccati autorem faciat, & libertati noceat; uti & imperitè objiceretur, quòd conservatio Deum corruptionis autorem faceret, & contingentiam essendi rebus eriperet. Sicut enim unaquæque res sub Deo conservante pro suo modulo, ac conditione, quandiu potest, fruitur *esse* suo, perinde ac si ex se ipsa existeret, quic licèt id habeat à Deo, ille tamen semper adest, nec rebus deficit, sed res propriâ corruptibilitate ei deficiunt; sic sub Deo movente unaquæque causa pro suo modulo, & conditione operatur, perinde ac si ex ipsa hunc motum omnino haberet: quia licèt egeat Deo movente, ille semper adest, nec deficit agentibus, sed illa potius ipsi, cum agendo, aut ab agendo deficiunt. Rursus ut sub Deo conservante non impeditur, ut omnes res ab alia superiore pendeat & conservetur, quatenus ab ea formam, aut dispositiones ad essendum requisitas accipit; si nec sub Deo promotore impeditur, ut causa secunda inferior à superioribus moveatur, quatenus ab illis aliquid virtutis, & dispositionis ad agendum prærequisitæ accipit. Immo sicut in rebus aliquæ se ipsa conservant, ut homo & animal dicuntur conservare ac protegere, quatenus sub Deo, ut generali conservatore, sibi procurant pleraque ad sui conservationem necessaria; ita & quædam dicuntur se ipsa movere, & determinare ad agendum, nempe omnia agentia libera, quatenus sub Deo, ut generali motore, ipsa sibi per suam rationem fabricant formas ad actionem determinantes, nempe judicium practicum, quo se ex intentione finis determinant, & movent ad electionem mediorum. Sed sicut nihilominus Deus tanquam generalis conservator immediatè omnia conservat, quia illis ultimo ad essendum dispositis immediatè tribuit ultimam essendi actualitatem; ita & tanquam generalis motor omnia agentia immediatè movet ad agendum, quia illis ultimè ad agendum dispositis ultimam agendi activitatem tribuit. Rursus ut Deus specialius, & immediatius prima entia creata conservat, ut cælos & angelos, quia alia, à quibus conserventur, non supponunt; ita & prima agentia creata, & ad primas actiones specialius, ac immediatius movere dicitur, quia nihil aliud, quo moventur, supponunt.

At ne singula prosequar, sicut Deus duobus modis ali-

## *Explicatur Præmotio. Art. VI. 403*

aliquid conservare dicitur, uno modo, ut conservator universalis, influxu scilicet juxta communis providentiæ leges dispensato; alio modo, ut conservator particularis, speciali quadam ratione interitus manutenendo in *esse*, vel exterius protegendo specialiter per amotionem eorum, quæ corrumpere possent, ac procurationem eorum, quæ juvare possunt. Sic Deus duobus modis agentia movere dicitur, uno modo, ut motor generalis, motione secundum communis providentiæ leges dispensatâ; alio modo, ut particularis motor, speciali quadam ratione interitus instigando, & applicando ad agendum, vel exterius amovendo ea, quæ actionem impedire possent, & ea, quæ ad illam ultimum disponunt speciali providentiâ procurando, quo posito statim adest præmotio.

Rursus, sicut Deus utroque modo conservat res fortiter & infallibiliter, quandiu eas conservare decernit; suaviter tamen non violatâ rerum naturâ, sed omnibus sponte suâ veluti concurrentibus sub Deo ad effectum ab eo intentum conservandum. Ita pariter Deus utroque modo fortiter & infallibiliter omnes actiones, quas effici decrevit, & ut effici decrevit, in suo tempore obtinet; suaviter tamen servatâ cujusque agentis conditione, ac agentibus ipsis ad actiones à Deo intentas sub eo movente concurrentibus. Porro hæc utraque infallibilitas provenit, non quidem semper ex intrinseca mediorum, quibus Deus utitur, indefectibilitate; sed ex efficacia & universalitate voluntatis Dei, qui cum omnia in manu habeat subsidia essendi & agendi, ita ut opus est dispensar, & sua providentia munit, ut licet deficere possint propter causarum, ac rerum defectibilitatem naturam, ab eo tamen, quem decrevit, effectum nunquam re ipsa deficient.

Ex his ritè intellectis non solum existentia, natura, & vis præmotionis clarè, quantum rei conditio, aut potius infirmitas humani ingenii patitur, demonstrata manet; sed etiam, quæ adversus eam obijci solent, facillimè solvuntur. Nec enim robur habent, nisi ex non recta ejus idea, quam Adversarii sibi efformant; aut ex terminis, quibus à suis explicari, ac defendi solet, qui licet rem verissimam plerumque significant, aliquando tamen non eam audientium captui satis accommodant.

## ARTICULUS SEPTIMUS.

*Solvantur objectiones.*

**E**x quadruplici capite peti solent. 1. Ex Autoritate. 2. Ex causalitate peccati. 3. Ex inutilitate Præmotionis. 4. Ex læsione libertatis. Cæterum argumenta à priori nulla ferè apud Adversarios exstant.

Obj. Ex primo capite. Aristotelis effatum est, *Agens agendo non mutari, sed mutare*: Arqui si præmoveretur physicè, mutaretur: Ergo physicè non præmoveretur.

Resp. Distinguo: non mutatur agendo, concedo; ad agendum, nego. Nam ex Aristotele 8. Phys. c. 5. *Moventia secunda non movent nisi mota*, proindeque mutata à primo.

Quantum ad Autoritates S. Thomæ, quas partim truncatas, partim nihil ad propositum facientes, partim sinistro sensu explicatas accumulavit Adversarii, cunctas refutare prolixius esset. Unde pro solutione omnium assignabimus quatuor generales regulas ex ipso S. Thoma de promptas, (quis enim melius explicet S. Thomam, quàm ipse S. Thomas?) quibus expediri facillè possint omnes hæc auctoritates:

Prima est. Quoties S. Thomas, aut alii Patres dicunt, Deum non prædeterminare actiones nostras, id intelligitur de prædeterminatione, quæ est per modum naturæ; seu per impositionem necessitatis; qualis est determinatio ignis ad comburendum, & avis ad tali modo nidificandum; non verò de prædeterminatione, quæ est per modum liberi, id est, per modum applicationis ad exercitium actûs liberi. Hæc Regula expressè traditur à S. Thoma 2. p. q. 32. art. 1. ad 1. & 3. cont. Gent. c. 90. ubi explicans illud Damasceni, *Deus non prædeterminat ea, quæ sunt in nobis*, dicit, D. Damascenum suinere prædeterminationem pro impositione necessitatis, *qualis est in rebus naturalibus*: ex quo infert, per illa verba non excludi prædestinationem, nec proinde præmotionem, quæ est Divinæ Providentiæ, ac prædestinationis executrix.

Secunda regula est. Cum S. Thomas, aut alius author alicujus auctoritatis in his materiis dicit, *voluntatem me-*  
*am*

## Solvuntur objectiones. Ar. VII. 405

*vere se ipsam, se determinare, esse dominum sui actus, eligere hoc potius, quam illud, esse positam in manu consilii sui, &c.* hoc intelligendum est in proprio ordine, seu per modum agentis proximi, quod tamen non excludit, sed supponit motionem & applicationem primi agentis: Non enim est de necessitate libertatis, quod voluntas sit prima causa sui, sicut nec ad hoc, quod aliquid sit causa alterius, requiritur, quod sit prima causa. Deus igitur est prima causa movens causas naturales & voluntarias: & sicut naturalibus causis, eas movendo, non aufert, quin actiones earum sint naturales; ita movendo causas voluntarias non aufert, quin earum actiones sint voluntariae, sed potius hoc in eis facit: operatur enim in unoquoque secundum ejus proprietatem. Hæc S. Thomas 1. p. q. 83. ar. 1. ad 3. & aliis in locis.

Tertia Regula est. Cum S. Thomas dicit, Deum movere voluntatem nihil imprimendo in illa, non excluditur ipsa motio, (implicat enim, aliquid movere aliud non imprimendo ipsi motionem) sed solum excluditur infusio novi habitus. Id enim, per quod Deus facit, ut creatura actu agat, est solum in illa per modum motionis transeuntis, non vero per modum qualitatis permanentis. Ita D. Thomas 3. de Potentia, art. 7 & q. 22. de Veritate, art. 8.

Quarta demum regula est. Cum S. Thomas dicit, Deum movere voluntatem ad bonum in communi, aut ad bonum supernaturale; voluntatem vero movere se ipsam ad bona particularia naturalia, sive vera, sive apparentia, hoc intelligendum est de motione speciali. Nam Deus speciali quodam modo movet voluntatem ad primam volitionem boni in communi, & ad bona supernaturalia. Cæterum voluntas per generalem motionem, quæ ipsi datur juxta consuetum providentiæ cursum, quam exprimimus nomine *promotionis*, quæque est ut ultimus vigor agendi à primo actionum fonte derivatus, se ipsam movet & determinat ad alias actiones. Nam ex S. Thoma, *Nulla natura quantumvis perfecta procedit in suum actum, nisi moveatur à Deo.* Hæc regula sumitur ex D. Thoma 1. 2. q. 109. ar. 1. ubi distinguit duplicem motionem, unam generalem, sine qua creatura nihil agit, & aliam specialem, qua indiget ad quosdam actus, ut peccator ad contritionem & pœnitentiam agendam indiget speciali motione divini gratiæ.

Ex his facile explicantur autoritates S. Thomæ, & aliorum.

aliorum Patrum. Cum enim S. Thomas in 2. d. d. 39 qu. 1. art. 1. dicit, actum voluntatis non esse ab alio exteriori principio *determinatè*, vel ut alii legunt, *determinante*, & determinationem alienam esse inimicam libertatis, loquitur de determinatione per modum naturæ, quæ non relinquit voluntati locum eligendi, & seipsam proximè determinandi, non verò de illa determinatione, quæ fit per modum liberi, id est, quæ est applicatio descendens à primo libero, movens, & complens voluntatem ad eligendum & se determinandum.

Cum verò S. Thomas dicit, *voluntatem seipsam movere, determinare, applicare, & esse dominam sui actus*, hoc intelligendum est per modum causæ proximæ, quæ non excludit dominium, motionem, & applicationem primi moventis, ut patet ex secunda regula. Et hæc duæ regulæ sunt principales.

Quando verò 1.2. quæst. 9. art. 6. ad 3. dicit, *Deum movere voluntatem ad volitionem boni universalis, voluntatem verò sub hac motione se determinare ad hoc bonum verum, vel apparens*; hoc intelligendum est de motione speciali, quæ locum habet tantum in prima volitione, & actibus supernaturalibus. Caterum voluntas in aliis volitionibus se determinat ut completa illa generali Dei motione, qua creaturæ applicantur ad omnes & singulas actiones, ut dictum est in quarta regula. Unde S. Thomas nunquam dicit, voluntatem ita se movere ad electiones, ut ad eas à Deo non moveatur; sed è contra expressè dicit, Deum movere voluntatem ad quodcumque voluerit. Vide loca relata supra §. 7. art. 4. Ejusmodi explicationes adeo claræ sunt versatis in doctrina D. Thomæ, ut nullus de his ambigere possit, nisi qui D. Thomam vel non legit, vel sinistris oculis percurrit, non ut ejus mentem exploret, sed ut illum invitum ad suas opiniones pertrahat.

Dices. Nunquam S. Thomas usus est nomine *Pramotionis*, & *Prædeterminationis*: Ergo eam non agnovit.

Respond. 1. Nego consequentiam; sufficit enim, ut rem ipsam docuerit, quam intelligimus nomine *Pramotionis*, & *Prædeterminationis*. Scriptura nomina *Incarnationis*, *Trinitatis*, *Consubstantialis*, *Purgatorii*, *Transsubstantiationis* non usurpat nec minùs tamen docuit hæc mysteria, quia res, quæ his vocabulis intelliguntur, sub aliis terminis expressit. Ita S. Thomas, etsi nusquam no-

men

men *Pramotionis* usurpasset, nihilominus rem ipsam docuit, quia illam alio terminis explicavit.

Respond. 2. *Movere ad agendum*, idem esse, ac *promovere*, juxta illud principium S. Thomæ & Aristotelis de his, quæ movent mota, *Motio moventis est prior motione mobilis*. Unde sufficit, S. Thomam dixisse, *Deum movere creaturas ad agendum*, ut *præmotionem* doceat. Sanè dicimus, *artificem movere malleum*, non verò *promovere*, quamvis ista motio sit prævia motio; & ipsi Adversarii ea, quibus Deus moraliter nos excitat, vocant *motiones morales*, cum tamen constet, ejusmodi motiones esse prævias. Cur ergo à patre S. Thomas præviā motionem non vocaverit simpliciter motionem? Præcipue cum ipse pro certo haberet, motionem moventis esse priorem motione mobilis.

Respond. 3. S. Thomam etiam usurpasse nomen *præmotionis*, & *prædeterminationis*. Nam Quodlib. 12 dicit, *omnia prædeterminari à divina providentia*. Et locis supra relatis tradit, motionem Dei moventis esse *præviā motionem*; Ergo *præmotionem*.

Instabis auctoritate Cajetani egregii S. Thomæ interpretis. 1 p. qu. 19. art. 8. ubi sic scribit: *Dupliciter contingit, causam secundam moveri à prima. Uno modo Motione præviā propria actioni, sicut baculus movet lapidem motus à manu. Alio modo motione intrinsecè cooperativā propria actioni*. Et subdit: *Non oportet, cum aliquis vult aliquid, seu cum sol illuminat, primam causam præviā motione cooperari; sed sufficit, & exigitur, eam intrinsecè cooperari tui electioni, vel illuminationi. Quia cooperatio est in unoquoque secundum naturam uniuscujusque. Et sic disponit omnia suaviter*. Unde negat, *Esse durationem naturæ, in cujus primo instanti causa prima respiciat effectum*, & in secundo causa secunda; Ergo præviā juniorum Thomistarum motionem Cajetanus expunxit.

Respond. Distinguo: Non oportet causam primam cooperari motione præviā, simpliciter quoad omnia, ita ut nihil virtutis, cui cooperetur, & à qua modificetur, supponat in causa secunda, concedo; motione præviā, secundum aliquid, & posteriori secundum aliud, nego. Itaque Cajetanus hic vocat *motionem præviā propria actioni causa secunda*, quæ non supponit in ea virtutem, cui cooperetur, & à qua modificetur. *Cooperativam vero actioni propria*, quæ licet actionem causalitate præcedat,



dat, non tamen est tota actionis ratio, sed supponit in causa mota virtutem agendi, quam compleat, cui cooperetur, & à quo modificatur, qualem esse præmotionem ulterius faremur. Et idem præmotionem nostram non excludit, sed exigit. Hanc esse Cajetani mentem constat. 1. Ex exemplo, quo explicat motionem præviam, quam excludit; nempe baculi moventis, præcisè quia movetur: non enim habet in se vim movendi, quam compleat, & cui cooperetur motio manûs, sed motio manûs est ei tota agendi ratio. 2. Ex terminis distinctionis. Non enim opponit motioni illi præviæ concursus simultaneum Adversariorum extrinsecè cooperantem, sed motionem intrinsecè cooperativam, quæ fit in unoquoque juxta naturam cujusque. 3. Quia motioni, quam admittit, proprios characteres præmotionis tribuit, nempe ut sit motio intrinsecè cooperans, in unoquoque recepta juxta ejus naturam, à qua, ut ibidem ait, proveniat ipsum movere, id est, agere causa secunda, & quæ virtutem causa secunda suo conjungat effectui, proindeque prior sit causalitate, quam agere causæ secundæ; non tamen virtute ejus. Itaque motio cooperativa Cajetani est ipsa nostra præmotio, non simultaneus Adversariorum concursus. Hanc verò in nullo priori respicere effectum, verè dixit Cajetanus, & nos fatemur. In hoc nulla est difficultas.

At inquires, cur dixit Cajetanus, illam non esse præviam actioni, quod tamen Thomistæ dicunt. Resp. Illud eo sensu, quo istos, docere esse præviam, nempe causalitate effectiva, quia docet, ex ea provenire actionem, seu agere & movere causæ secundæ. Sed quia modificatur ex virtute causæ secundæ, dixit, non esse præviam propria ejus actioni, quia hanc modificationem habet ex proprietate agendi causæ secundæ, & ideo non est prior actione propria causæ secundæ veluti in actu signato considerata, licet sit prior ea in actu exercito spectata. Unde Cajetanus hanc modificationem explicans non dicit, eam esse ab actione exercita causæ secundæ, sed ex natura, seu modo causa secunda, id est, ex proprio ejus agendi modo: quia, inquit, cooperatio, nempe motionis divinæ, est in unoquoque secundum modum uniuscujusque. Et ideo non est prior modo proprio agendi, proindeque proprietate actionis, sed solum ejus actuali exercito.

Objic.

## *Solvuntur Objectiones. A. VII. 409*

Objc. Ex 2. capite. Si Deus præmoveret nos, esset author peccati: Ergo non præmoveret. Probatur antecedens. Ille est author peccati, qui præmoveret ad actionem malam: Sed Deus præmoveret ad actionem malam: Ergo esset author peccati.

Resp. 1. Adversarios teneri ad solvendum hoc argumentum, & alia similia. Nam sicut Deus, secundum Thomistas, applicat ad omnes actiones; ita fatentibus Adversariis concurrir simultaneè ad omnes actiones: Ergo si hæc argumenta probent in via Thomistarum, Denique esse authorem peccati; probabunt in via Adversariorum esse cooperationem peccati. Quam ergo solutionem dabunt huic argumento, hæc eadem uti poterunt Thomistæ.

Respond. 2. Nego sequelam. Ad probationem distinguo majorem: Ille est author peccati, qui præmoveret ad actionem malam, præcisè ut actio est, nego; ut mala est, concedo. Et ad minorem, Deus præmoveret ad actionem malam, ut actio est, concedo; ut mala est, nego: seu, quod in idem redit, præmoveret ad actionem, ut fiat, concedo; ut malè fiat, nego. Deus enim, licèt si causa, ut actio fiat, non est tamen causa, ut malè fiat, & ut mala fiat. Sicut anima, licèt sit causa, cur tibia curva moveatur; non est tamen causa, cur tibia malè moveatur & claudicat. Unde sicut defectus, qui est in claudicatione, non refunditur in animam, sed in tibiam; ita nec defectus, qui est in actione mala, refunditur in Deum moventem, sed in voluntatem creatam deficientem. Solurio, & objectio habentur in S. Thoma 1. 2. q. 79. artic. 2. Videbis.

Inflabis. Homo est causa peccati, in quantum est causa ipsius actionis, quæ est peccatum: Ergo si Deus sit causa actionis peccati, erit etiam causa peccati. Probatur antecedens. Nam homo non intendit malitiam, sed solum ipsam actionem: Ergo præcisè est author peccati, quia est causa actionis.

Respond. Cum S. Thoma, qui sibi hoc Adversariorum argumentum objicit ibidem ad 2. Distinguo antecedens: Homo est causa peccati, in quantum est causa actionis peccati, præcisè ut actio est, nego, ut habet adjunctum defectum, concedo. Homo enim, quantumvis non intendat malitiam, est causa non solum actionis, sed etiam quod illa actio sit cum defectu: sicut calamus malè ap-  
Philos. R. P. Gaud. IV. Pars. S tus,

#### 410 IV. Par. Philosoph. Dis. II. Q. III.

tus; non solum est causa scriptionis, sed etiam defectus, qui est in scriptione. Deus autem, licet sit causa actionis, attamen non est causa, quod actio sit cum defectu; sicut peritus artifex est quidem causa, cur calamus pingat, non est tamen causa, cur male pingat; & anima est causa motus tibiæ curvæ, non tamen causa, cur defectus claudicationis reperiatur in tali motu. Unde sicut illi defectus scriptionis, & claudicationis non tribuuntur scriptori & animæ, sed calamo & tibiæ; ita nec defectus actionum tribuuntur Deo, sed creaturis, quamvis ipse moveat creaturas ad agendum. Solutio & exemplum posterius habentur in S. Thoma loco citato.

Urgebis. Defectus est inseparabilis ab actione peccati, v.g. ab odio Dei: Ergo si Deus premoveat ad actionem, premovet etiam ad defectum.

Resp. 1. Nego consequentiam. Licet enim in effectu inseparabiliter reperiatur defectus, non tamen propterea, quod est causa unius, est causa alterius, ut videre est in tibiæ claudicante, quoties movetur ab anima.

Respond. 2. Distinguo antecedens: Defectus est inseparabilis ab actione peccati, ut illa actio est à causa prima efficiente, nego; ut est à causa secunda deficiente, concedo. Utraque solutio insinuat in S. Thoma loco supra citato.

Dices. Cur me potius movet Deus ad actionem conjunctam cum malitia, quam ad actionem conjunctam cum bonitate?

Hic cardo difficultatis vertitur, à qua se non expediunt, qui imaginantur, voluntatem in perfecto æquilibrio constitutam, ac ex se non magis propendentem ad materiale mali, quam ad actum bonum, à Deo determinari ad materiale mali, ita ut non aliquid ex parte voluntatis, sed sola Dei determinatio illud equilibrium tollat. Hic dicendi modus parum sane conformis est divinæ bonitati, ac longè alienus à S. Thomæ doctrina, qui potius docet 1.2. quæst. 79. artic. 1. *Deum quantum est ex se omnia convertere in se ipsum, sicut in ultimum finem*; atque adeo ipsi repugnat, ut sit prima ratio, cur voluntas, si foret in equilibrio perfecto constituta, inclinetur in actum, quo à Deo, ut ultimo fine suo discedit. Unde quod inclinetur in actum deficientem à Deo, ut ultimo fine, id perpetuo adscribit S. Thomas dispositioni indigebit voluntatis. Itaque

Respond.

## *Solvuntur Objectiones. A. VII. 411*

Respond. Ex S. Thoma, quodd voluntas ad materiale mali potius determinatur, quàm ad actum bonum, oriri ex eo, quodd ita exigit ex propria dispositione. Hanc verò dispositionem remotam quidem & radicalem esse defectibilitatem tum voluntatis, tum intellectus, à qua proximè regitur. Proximam verò esse aliquam defectivam dispositionem ortam hic, & nunc ex defectivo illo arbitrio. Nam, ut supra dixit art. 5. ex S. Thoma Quæst. 3. de Malo, art. 3. *Motus primi moventis non recipitur uniformiter in omnibus mobilibus, sed in unoquoque secundum modum ejus. Cum itaque aliquid est in debita dispositione ad recipiendum motum primi moventis, sequitur actio perfecta secundum intentionem primi moventis: Sed si non sit in debita dispositione, & aptitudine ad recipiendum motum primi moventis, sequitur actio imperfecta...* Sic ergo dicendum, quodd cum Deus sit primum principium motionis omnium, quadam sic moventur ab ipso, quodd etiam se ipsa movent, sicut qua habent liberum arbitrium, qua si fuerint in debita dispositione, & ordine debito ad recipiendam divinam motionem, sequentur bona actiones, qua totaliter reducuntur in Deum sicut in causam. Si autem deficient à debito ordine, sequitur actio inordinata, qua est actio peccati. Et sic quodd ibi est de actione, reducitur in Deum, sicut in causam. Quodd autem est ibi de inordinatione, non habet Deum causam, sed liberum arbitrium. Itaque ex S. Thoma peccatum oritur ex eo, quodd liberum arbitrium movendo seipsum sub Deo movente, aliquid sui admiscet, quo deficit à recta dispositione. Id verò quomodo fiat, ex doctrina S. Thomæ sic explicatur. Deus ut universalis motor solus movet voluntatem ad primam volitionem boni in communi. Illa est motione in actu facta incipit ex se ipsa agere applicando intellectum ad deliberandum. Hic verò deliberat juxta dispositionem voluntatis; principium enim deliberationis practicæ est finis, qui unicuique talis videtur prout ipse est affectus. Unde si voluntas fuerit aut præcedente malo habitu corrupta, aut præsentē passione illecta, deliberatio inclinatur facile in bonum apparens passioni, aut habitui conforme; & sic ponitur dispositio, qua fit, ut voluntas exigat secundum communem providentiæ cursum applicari ad electionem talis boni, quæ est peccatum. Et in hoc non est difficultas. Si verò nulla præsentē passione illecta, aut præcedente habitu corrupta sit, ut voluntas primi

#### 412 IV. Part. Philos. Disp. II. Qu. III.

hominis & angeli, defectiva illa dispositio oritur ex amore boni proprii. Nam, ut dicit S. Augustinus lib. 4. contra Julianum, c. 3. *Mens bona magis sibi placet, & se ipsa delectat, quam qualibet alia creatura.* Unde, ut ibidem notat, complacentia propriæ excellentiæ id sæpe præstat in creatura rationali perfecta & recta, sed Deum nondum vidente, quod amor boni sensibilis in homine lapsus. Nempe quatenus in illis mutuis intellectus & voluntatis motibus sub Deo, ut generali motore utrumque juxta propriam conditionem applicante, facile subrepat actualis amor propriæ excellentiæ, quæ ut presentior & inimior vividius movet voluntatem, quam divina ipsa bonitas sola fide obscure cognita; qui quidem amor nondum malus est, sed periculosus & tandem occasio mali, quatenus voluntas in eo occupata, ita movet intellectum, ut cum non possit omnibus attendere, magis attendat ad bonum illud proprium, quam ad regulam illud divino subicientem, connivendo scilicet ipsi voluntati, ex qua inconsideratione regulæ efformat judicium finale minus regulæ subiectum. Cum ergo voluntatis ea conditio sit, ut divinam motionem, qua applicatur ad eligendum, juxta dictamen ab intellectu ab ea moto efformatum suscipiat, eo posito dictamine jam non est in debita dispositione ad suscipiendam motionem ad actum perfectè bonum, sed ad actum deficientem à regula. Hinc clarè constat, ex ea, & intellectu proximè oriri, ut potius determinetur ad materiale mali, quam ad actum perfectè bonum; radicaliter verbè ex ejus, & intellectus eam regentis limitatione, ac defectibilitate. Et quidem posset Deus ex speciali gratia & protectione impedire, ne hi defectus in nostris deliberationibus subreperent. At hæc privilegiata protectio non debet esse communis; imò generalis provisoris munus exigit, ut hi defectus permittantur. Vide quæ diximus att. 5.

Repones. Deus est, qui fecit voluntatem defectibilem, & intellectum capacem erroris, aut inconsiderationis. Ergo radix peccati videtur refundi in Deum.

Resp. Nego antecedens. Sicut enim artifex aptando calami, est quidem causa bonæ dispositionis calami, non tamen defectuum, quibus subicitur ratione conditionis materiæ; ita Deus est quidem author voluntatis, & omnium bonarum ejus inclinationum, non tamen de-

## *Solvuntur Objectiones. A. VII. 413*

defectibilitatis ipsius. Et ratio est, quia voluntas, sicut & intellectus, est defectibilis ex eo, quodd sit ex nihilo, proindeque non summè, sed defectibiliter bona & recta. Deus autem non est causa, cur voluntas sit ex nihilo, sed hoc habet à seipsa; & ideo defectibilitas ei competit ex se ipsa. Unde radix peccati est ipsum nihilum, quod est veluti creaturæ peculium. Ex quo detegitur profunda simul, & solida humilitatis radix. Cùm enim nihil habemus ex nobis præter nihilum originale, & peccata, quæ ex nihilo, ut ex primo fonte oriuntur, cætera verb acciperimus à Deo, in nullo gloriari possumus, sed in omnibus Deum laudare. Hæc solutio desumpta est ex D. Thoma in 2. Dist. 37. q. 2. art. 1.

Replicabis. Deus est causa creaturæ, ut creata est: Sed creatura, ut creata, est ex nihilo: Ergo Deus est causa, cur sit ex nihilo.

Resp. Distinguo majorem: Deus est causa creaturæ, ut creata est, quantum ad ea, quæ accipit per creationem, concedo; quantum ad ea, quæ non accipit per creationem, nego. Pater autem, quodd per creationem creatura non recipit nihilum. Et ideo Deus non est causa, cur creatura sit ex nihilo, sed solum, ut quæ de se nihil est, sit quidquid est.

Obje. ex 3. capite. Per concursum simultaneum creatura sit dependens à Deo: Ergo superfluit præmotio.

Respond. 1. Distinguo antecedens: Est dependens à Deo, ut à cooperatore, concedo; ut à primo motore applicante, nego. Solutio patet ex ipsis terminis, quia per concursum simultaneum intelligitur influxus cooperans causæ secundæ, non tamen applicans causam secundam.

Resp. 2. Distinguo idem antecedens: Per concursum simultaneum causa secunda est dependens à prima, ex parte ipsius effectus, concedo; ex parte cooperationis, qua simul cum Deo producit effectum, nego. Cùm enim concursus simultaneus nihil ponat in causa secunda, sed totus recipiatur in effectû, producit quidem ipsum effectum, illumque à se reddit dependentem, sed non producit ipsam actualem cooperationem causæ secundæ. Unde præter concursum simultaneum, qui recipitur in effectû, admittendus est alius receptus in causa secunda, qui eam intrinsecè applicet ad cooperandum Deo.

#### 414 IV. Par. Philosoph. Disp. II. Q. III.

Instabis, Dici nequit, quis sit terminus illius præmotionis: Ergo nec quæ sit ejus ponendæ necessitas.

Hoc argumentum Suarez validum adeo putat, ut eo maximè niratut, illadque potissimè urgeat. Sed nihil infirmius. Respondeo enim, divinæ motionis duos esse terminos subordinatos; unum veluti proximum, alium remotum. Proximus est id, quod ponit in causa, nempe ipsa ultima agendi actualitas. Remotus verb, ac consequens, est effectus productus. Ut cum Sol colores illuminando efficit visibiles, terminus proximus hujus illuminationis est lumen colores afficiens; remotus verb ex eo consequens est effectus coloris illuminati, nempe emissio speciei coloris ad oculum.

Obje. ex 4. capite. Præmotio tollit libertatem: Ergo non datur. Probatut antecedens. Liber est, qui agit ex se ipso, & se ipsum determinat: Sed præmotus non agit ex se ipso; agitur enim & determinatur à Deo: Ergo non est liber.

Resp. Nego antecedens. Ad probationem distinguo majorem: Liber est, qui agit ex se ipso, & se determinat, tanquam proximum agens, concedo; tanquam primum agens, nego, id esse necessarium. Et ad minorem præmotus non agit ex se ipso, nec se determinat, ut proximum agens, nego; ut primum agens, concedo. Ut enim dicit S. Augustinus de his, quos Deus movet, *aguntur, ut agent, non ut ipsi nihil agent*. Unde præmotus agit, & determinat se ipsum tanquam proximum determinans; Non est autem de ratione libertatis, ut voluntas agat ex se ipsa, seque determinet, tanquam prima causa à superiori non dependens, sed tanquam causa proxima à primo motore applicata. Solutio est ex D. Thoma 1. p. q. 83. art. 1. ad 3.

Instabis. Causa libera debet esse indifferens: Sed præmotus non est indifferens: Ergo nec liber.

Resp. Distinguo minorem: Præmotus non est indifferens, indifferentia potentiâ & suspensa, concedo; indifferentia actuali, nego. Indifferentia potentiâ est privatio omnis actûs, cum capacitate ad illum; sic homo otiosus dicitur indifferens. Indifferentia verb actualis est positio unius actûs cum potentia ad oppositum: ut ille, qui diligit Deum, dicitur adhuc indifferens ad non diligendum, quia sic amat, ut retineat potentiam ad non amandum.

## *Solvuntur Objectiones. A. VII. 415*

amandum . Dicimus ergo, præmotum sub ipsa præmotione esse indifferentem indifferentiâ illa actuali , quia sic ponit unum actum , ut semper retineat potentiam ad non ponendum .

Urgebis . Præmotus ad amorem non potest non amare . Ergo nullo motus est liber . Probatum antecedens . Nemo potest id, quod implicat . Sed implicat, quod præmotus ad amorem non amet : Ergo non habet potentiam ad non amandum . Hoc argumentum est Achilles Adversarium , quamvis sit Therſite debilius . Unde

Resp. 1. Adversarios teneri solvere hoc argumentum . Nam etiam implicat ea , quæ sunt ordinata à divina providentia , non evenire ; ea , quæ sunt præscita à Deo , & prædicta à Prophetis , non fieri ; Christum præcepta Patris non implere ; imò hominem habentem gratiam congruam Adversariorum non agere . Et tamen nec Dei providentia , nec præscientia , nec prophetiæ , nec præcepta Patris , nec gratia congrua tollunt libertatem : Ergo Adversarii tenentur solvere hoc argumentum . Quo plerumque irretiti , quod nolint uti solutionibus Thomistarum , ita illi succumbunt , ut doceant , Christum Dominum non esse liberè mortuum , nec proinde meruisse , eo quod elegerit mortem juxta præceptum Patris , sed eo quod elegerit quasdam circumstantias , quas non præceperat Pater , sed ejus voluntati purè permiserat ; quod sine dubio intolerabile videtur , & Sacræ Scripturæ testimoniis adversum .

Resp. 2. Distingue antecedens : Præmotus ad amandum non potest non amare , potentiâ possibilitatis , nego ; potentiâ futuritionis , concedo . Explicatur . Potentia futuritionis est , quæ pro aliquo signo est exercenda . Potentia verò possibilitatis est , quæ non est exercenda , saltem pro aliquo signo , & sub aliqua suppositione , sed remanet in nudo possibilitatis statu . Dicimus ergo, quod præmotus ad amorem habet potentiam , non quidem futuritionis , sed possibilitatis ad non amandum , quia potentia non amandi ( suppositâ præmotione ad amandum ) non exercebitur , sed remanebit pro illo signo in sua possibilitate . Adversarii obſtupeſcunt ad illam distinctionem ; sed advertere debebant , plerumque causas etiam liberrimas habere solum potentiam possibilitatis ad plures actus : Sic Deus potest creare varios mundos potentia possibilitatis , quæ nunquam exercebitur : Sic



Christus, supposito præcepto Patris præcipientis mor-  
tali, poterat non mori potentia possibilitatis tantum,  
quæ scilicet nunquam erat exercenda: Sic demum dum  
unum agimus, verbi gratia, dum scribimus, possumus op-  
positum potentia possibilitatis tantum, quæ pro illo signo  
non exercebitur: Ergo potentia possibilitatis sufficit ad  
libertatem.

Et si dicas. Non datur potentia etiam possibilitatis ad  
id, quod implicat: Sed implicat, præmotum ad amorem  
non amare: Ergo ne quidem retinet potentiam possibi-  
litas.

Resp. 1. Non dari potentiam possibilitatis ad id, quod  
implicat simpliciter & absolute, bene tamen ad id, quod  
secundum se est possibile, & redditur solum impossibile  
ex aliqua suppositione: Sic enim Deus habet potentiam  
possibilitatis ad creandum alium mundum, etiam post-  
quam decreverit, se creaturum unicum; & tamen ex  
suppositione, quod Deus decreverit creare unicum, im-  
plicat, quod creentur de facto plures.

Resp. 2. Solutione communi, quæ in idem redit  
cum præcedenti: Præmotus ad amandum non potest  
non amare, *in sensu composito*, concedo; *in sensu divi-  
so*, nego. Distinctio est S. Thomæ quæst. 6. de Verit. art.  
4. ad 8. quam Adversarii maligna interpretatione con-  
nantur odiosam reddere, dicentes, Thomistas eam ita  
intelligere, ut præmotus possit oppositum, si tollatur  
præmotio; non possit verò, si ponantur præmotio, eo  
quod ferreis vinculis illius præmotionis sibi præscri-  
bitur omnis facultas faciendi oppositum: sicut homo li-  
gatus ad columnam potest ambulare, si tollantur vincu-  
la; non potest verò cum ipsis vinculis. Hæc explicatio  
falsa est, & Calvinistica, quam nunquam intenderunt  
Thomistæ. Dicimus enim, etiam sub ipsa præmotione  
ad amandum, remanere potentiam non amandi, &  
quicumque hæc negat, pro hæretico habemus, eo quod  
contradicat definitioni Concilii Tridentini. Sed dici-  
mus, illam potentiam non amandi non respicere noliti-  
onem amoris, ut ponendam simul cum præmotione ad  
amandum; ita ut aliquis in eodem instanti sit præmo-  
tus ad amandum, & tamen non amet, sed solum re-  
spicit nolitionem amoris, ut ponendam divisim à præmo-  
tione ad amorem, Sicut dum sedeo, etiam cum ipsa  
sessione habeo potentiam ad ambulandum, quæ ta-  
men

## Solvuntur Objectiones. A. VII. 417

men potentia non respicit ambulationem ut conjungendam cum sessione, (implicat enim, ut sedendo ambulem) sed solum ut ponendam divisim à sessione. Unde sicut sedens dicitur habere potentiam ad ambulandum in sensu diviso, non tamen in sensu composito; ita dicimus, præmotum ad amorem habere potentiam non amandi in sensu diviso, & non in sensu composito; & sicut propter potentiam in sensu diviso sedens sedendo est liber, ita quoque præmotus ad amorem liberrimè amat, eo quod talis potentiam retineat.

Quod autem ad libertatem sufficiat potentia in sensu diviso, & quod illa distinctio sit omnino admittenda, luce meridiana clarius demonstratur. Et in primis quod sufficiat ad libertatem: nam Deus post decretum, & Christus post præceptum sibi impositum est liber: quas etiam prædicuntur à Prophetis, eveniunt liberè: Imò in eo instanti, quo amo, sum liber; quis hoc negabit? Et tamen horum omnium oppositum non potest fieri nisi in sensu diviso; nam impossibile est, quod Deus conjungat oppositum ejus, quod decrevit, cum decreto; & Christus oppositum ejus, quod præcipitur, cum præcepto; & nos oppositum eorum, quæ prædicuntur, cum prædicatione, aut non amorem cum amore: Ergo sufficit ad libertatem potentia in sensu diviso. Deinde quod hæc distinctio sit indispensabiliter necessaria, ostenditur: nam certum est, quod in aliquo sensu non possumus resistere voluntati & motioni divinæ efficacis; ut enim dicitur Rom. 9. *Voluntati ejus quis resistit?* Et Ephes. 1. *Non est, qui possit tua resistere voluntati.* Et S. Augustinus de Correctione, cap. 14. *Deo volenti saluum facere nullum humanum arbitrium resistere potest.* Et D. Thomas 1. 2. quæst. 10. art. 4. ad 3. *Si Deus moveat voluntatem ad aliquid, impossibile est huic poni, quod voluntas ad illud non moveatur.* Et tamen aliunde certum est, nos posse facere contrarium ejus, quod Deus vult, etiam voluntate efficaci; aliàs enim non impleverimus illud liberè; Imò id expressè definit Concilium: Ergo necessariò distinguendus est duplex sensus, unus, in quo possumus; & alius, in quo non possumus.

Replicabis. Præmotus ad amorem, ut sit liber, debet posse conjungere non amorem cum præmotione ad amorem: Ergo nulla solutio. Probaturs antecedens. Liber debet posse conjungere non actum cum omnibus præ-

418 *IV. Par. Philosoph. Disp. II. Q. III.*

quisitū ad actum: Sed præmotio est de prærequisitis: Ergo ut quis sit liber, debet posse conjungere non amorem cum præmotione ad amorem.

Resp. Nego antecedens. Ad probationem, distinguo majorem: Liber debet esse conjungere non actum cum omnibus ad actum prærequisitis, prioritate temporis, transeat; prærequisitis solum prioritate naturæ, nego. Præmotio autem solum prærequisitur prioritate naturæ; nam in eodem instanti est præmotio & actus, quippe, ut patet ex superius dictis, causa per præmotionem sit ultimè operans & profundens actionem: unde eodem modo loquendum est de utroque. Sicut ergo ad libertatem non requiritur, ut aliquis possit simul amare & non amare; ita quoque nec requiritur, ut aliquis possit simul præmoveri ad amorem, & abstinere ab amore.

Dices. Præmotus nullam retinet potentiam ad oppositum: Ergo non est liber. Probaturs antecedens. Possibili posito in actu nullum sequitur absurdum: Sed si potentia ad oppositum præmotionis reduceretur ad actum, sequeretur absurdum, nempe eam esse, & tamen actum, qui secundum Thomistas semper cum ea conjungitur non esse: Ergo nulla datur potentia ad oppositum præmotionis.

Respond. Nego antecedens. Ad probationem distinguo majorem: Possibili posito in actu nullum sequitur absurdum, si ponatur in eo modo, quo poni potest, concedo; si poneretur alio modo, nego. Potentia autem ad oppositum præmotionis non est reducibilis in actum conjunctum cum præmotione, sed solum præcisum ab illa.

Objic. ex eodem capite. Voluntas præmota non est domina sui actus: Ergo non est libera. Probaturs antecedens. Non est domina præmotionis: Ergo nec actus, ad quem præmoveretur. Probaturs consequentia. Præmotio & actus sunt indispensabiliter conjuncta: Ergo si non est domina unius, neque iidem alterius.

Respond. Nego antecedens. Ad probationem distinguo, voluntas non est domina præmotionis, originativè sumptæ, seu ex parte principii, concedo; terminativè sumptæ, seu ex parte effectus, nego; & nego consequentiam. Id est, voluntas non est domina principii, à quo descendit præmotio, nempe ipsius

*Dei*

## Solvuntur Objectiones. A. VII. 419

Dei; est tamen plenè & perfectè domina termini præmotionis, nempe proprii actûs, etiam sub ipsa præmotione; ideoque ipsam suspendere, revocare, & interrumpere ad nutum potest. Neque ex hoc ullatenus derogatur efficacitati Dei moventis, quia hoc ipsum, quodd voluntas actum, quem ex præmotione inceperat, revocat, non est sine præmotione Dei, ideoque sub Deo ut primo motore voluntas liberrimè ab uno actu ad oppositum excurrit, & innata libertate per diversa vagatur, & tamen divinæ motionis causalitatem nullatenus transilit. Cum enim Deus (non secus ac S. Thomas 1. part. quæst. 103. art. 7. agendo de divina gubernatione argumentatur) sit universalis motor omnium agentium, ea, quæ ab ipso moventur, possunt in diversa & contraria ferri, absque eo quodd ejus motionem effugiant, quia nihil sine eo movente & applicante agunt.

Illustratur hæc solutio, quæ est Joannis à S. Thoma, egregii sanè Thomistæ, ex analogia, quam supra expendimus art. 6. Conversationis & Præmotionis. Ut enim Deus secundum nos per præmotionem dat *agere* omni agenti, ita & per conservationem secundum omnes continud influit *esse* omnibus entibus. Et ut secundum nos Deus est infallibilis in movendo; sic, juxta omnes, infallibilis est in conservando, ita ut nunquam divina conservatio frustretur effectu absolutè à Deo per eam intento. Sed sicut Deus sua conservatione rebus contingentibus defectibilitatem non aufert, nec impedit, quia plenè subjectæ sint agentibus creatis, à quibus dependent, eo quodd *unumquodque conservet juxta proprietatem naturæ ejus*. Ita eadem ratione Deus præmotione sua nostris actibus libertatem, & dependentiam à nostra voluntate non adimit. Unde sicut non obstante divina conservatione, qua Deus avem conservat, habet homo plenam v. g. potestatem supra vitam avis, quam in manibus tenens potest occidere, si velit, ac proinde supra conservationem avis, non quidem originativè, seu ex parte principii, (non enim potest destruere avem impediendo Deum, ne avem conservet) sed terminativè; quatenus suffocando avem, talem in ea dispositionem ponit, ut jam cesser conservatio. Ita pariter homo non obstante divina præmotione eum applicante ad actum, habet semper actum illum in sua potestate, ut illum

420 *IV. Part. Philos. Disp. II. Qu. III.*

revocet, suspendat, interrumpat, prout libuerit. Sicque efficiat, ut cesset ad eam præmotio, cuius proinde Dominus est, non quidem originativè sumptæ, seu ex parte principii, quasi Deum ipsum impedire possit à movendo; sed ex parte termini, quatenus talem ponere potest in actu præmotionem terminante dispositionem, ut jam cesset præmotio. Et hoc totum experientia constat, in actionibus agentium, tum naturalium, tum liberorum. Sic ignem actu comburentem domum, ac proinde ad id à Deo præmotorum, aquâ infusâ impedimus, ne ultra comburat illam, quam tutam combussisset, si aqua infusa non foret. Sic, ut narratur. 1. Regum 23. cum nuntiatum foret regi Saul, David esse in deserto Maon, statim ad eum capiendum cum exercitu perrexit; ac jam undique militibus suis circumdaturum tenebat absque ulla evadendi spe, re ipsaque opus adeo cupitum perfecisset, nisi eo momento veniens nuntius eum monuisset, à Philistinis proximos agros vastari. Eo enim accepto nuntio Saul novam inicit apud se deliberationem, qua cæptum opus interruptit, ut illis sibi, ac honestius iudicans communibus hostibus occurrere, quàm privatim inimicum capere. Idem in nobis experimur quotidie, cum cæptos actus novis deliberationibus interrumpimus, qui tamen diutius durassent, proindeque & ad eos præmotio, nisi illos nostro consilio interrumpendos liberrimè decrevissemus. Unde sub ipsa præmotione proinde nostræ subsunt potestati, ac si nulla foret ad eos præmotio, sicque ipsa præmotio ex parte termini est plenissimè in nostra potestate.

Nec tamen inde aliquid deperit Infalibilitati divinæ Providentiæ, quia cum omnia in manu ejus sint, hoc ipsam, quod voluntas liberrimè disponens de suis actibus, eum, ad quem antea præmovebatur, interrumpit, non est, nisi ex novo actu à Deo ut primo motore descendente, ac ejus providentiâ, quam nulla causa fugit, etsi sub ea liberrimè vagetur, ut sic fieret dispositio: Sicut quoddam res, quam conservat Deus, destrui possit, imò aliquando destruat à causa secunda, quæ diutius conservata fuisset, si à tali causa destructa non fuisset, non præjudicat Infalibilitati divinæ Providentiæ in conservando; quia re ipsa non destruitur à tali causa, nisi ut Deo semper subjecta, & ad id ab ejus providentiâ disposita. Unde tot à Deo conservata, & actus, ad quos

## *Solvuntur Objectiones. A. VII. 421*

quos præmover, licet semper contingentes sint, ac integre in potestate causarum secundarum, à quibus pendent, nihilominus infallibiliter sunt & permanent, quandiu voluerit Deus: quia cum omnia in manu habeat, sic ea disponit, ut actui & effectui, quem intendit, nihil obstat, sed omnia sponte sua collaborent. Id vides in exemplo allato; nam Deus ita res disponit, ut per ipsum Saulem liberrimè sub generali præmotione agentem, ac priores actus per posteriores deliberationes mutantem, obtinuerit, quod intendebat, ne occideretur David.

Hanc doctrinam ubique tradit S. Thomas. *Quia*, inquit, 1. 2. quæst. 10. art. 3. *Deus omnia movet secundum eorum conditionem, ideo sic voluntatem movet, quod non ex necessitate ad unum determinat, sed remanet motus ejus contingens.* Et ideo, inquit Quodl. 1. art. 7. ad 20. *sic Deus movet mentem humanam ad bonum, quod tamen potest huic motioni resistere.* Ac rursus explicans quomodo hæc contingentia, & potestas supra motionem divini, terminativè sumptam, ob quam hominem dicte posse ei resistere, non obstat divinæ voluntatis, ac providentiæ infallibilitati, id perpetuè reperit ex eo, quod Deus sit omnium causa, à qua descendunt omnes motus, & omnes rerum dispositiones, *Potest enim*, inquit 1. part. quæst. 19. art. 6. *aliquid fieri extra ordinem alicujus cause particularis; non extra ordinem causa universalis, sub qua omnes cause particulares comprehenduntur. Quia si aliqua causa particularis deficiat à suo effectu, hoc est propter aliam causam particularem impediens, qua continetur sub ordine causa universalis. Unde effectus ordinem causa universalis nullomodo potest exire. Cum igitur voluntas Dei sit universalis causa omnium rerum, impossibile est, quod divina voluntas suum effectum non consequatur. Unde quod recedere videtur à divina voluntate secundum unum ordinem, relabitur in ipsam secundum alium ordinem.* Idem habet 1. p. q. 22. art. 2. & q. 103. ar. 8. &c.

Hæc adeo plana sunt, ut iis rectè perceptis clarissime intelligatur ex infallibilitate Dei moventis nihil deperire juri, quod habet voluntas creata in suos actus; ac rursus hoc jus nihil præjudicare infallibilitati Dei moventis, sed utrumque perfectè conciliari; adeo ut hoc argumentum ex læsione libertatis petitum, quod tanti faciunt Adversarii, omnium penè sit infirmissi-

422 *IV. Part. Philos. Disp. II. Q. III.*

num. Ut tamen usque ad ultimas fibras eradicetur,

Dices. Etsi possim revocare actum meum, quem ex applicatione Dei pono, & contrarium facere; attamen ut id fiat, egeo novâ præmotione me applicante; Atqui præmotio sine adest, & à Deo nun datur: Ergo non habeo plenum, perfectumque dominium, sed potius merum instrumentum Dei sum, me prout placuerit versantis, ac utentis in ipso ad dominandum actibus meis; cæterum nihil veri domini mihi relinquentis.

Et confirmatur, ac roboratur magis hoc argumentum. Nam ut verè & non nomine tenus simus domini actuum nostrorum, debemus habere in nostra potestate omnia necessariò requisita ad illos ponendos, quando non sunt, & revocandos, quando sunt: Atqui præmotio Dei, quæ ad id necessariò requiritur, non est in potestate nostrâ; non enim possumus illam advocare, nisi Deus ultro conferat: Ergo non sumus perfectè domini actuum nostrorum secundum Thomistarum sententiam.

Respond. Nego minorem argumenti & confirmationis, quodd nempe præmotio (saltem ordinis naturalis, de qua solum hî loquimur) nobis desit, Deo eam, ut imaginantur Adversarii, gratis subrahente; ac quodd eam habere non sit in nostra potestate. Nam si, ut inquit S. Thomas ex Aristotele, *ea, quæ per amicos possumus, aliquantulum per nos possumus*, præcipuè si illi amici semper nobis adsint, nec unquam desinit officio suo ad ea, quæ nobis sunt eorum ope possibilia; à fortiori dicendum, tum præmotionem ipsam, tum actus, ad quos requiritur, esse in nostra potestate, cum Deus ut generalis motor in ordine naturali semper nobis præsto sit, ac intimè præsens, nec unquam motionem illam generalem subtrahat, sed unicuique agenti juxta propriam conditionem eam semper largiatur. Nam etsi motiones speciales sint purè gratulæ, nec omnibus dentur; attamen hæc generalis quanquam libet à Deo dispensetur, ita dispensatur unicuique agenti, ut nulli non adsit, prout cuiusque fert exigentia. Sed falluntur Adversarii, quodd non satis penetrent illud S. Thomæ principium, *Præmotio movet unumquodque juxta suam conditionem, ac dispositionem*: Ex quo sequitur memini deesse in his, quæ ad eum spectant; nec subtractione suæ motionis unquam in causa esse, cur non agamus.

## *Solvuntur Objectiones. A. VII, 423*

mus. Unde ejus motio semper est in nostra potestate, non quodd illi sublit, sed quodd illi nunquam desit.

Id explicari potest exemplo influxus conservantis, qui in rebus semper & tandiu adest, cum & quandiu exigit earum natura. Et ideo sicut ineptè conquereris, te non posse accendere lucernam, aut accensam conservare, quodd ad id necessarius sit influxus Dei conservantis; ita ineptè conqueruntur Adversarii, quodd si ad ponendos & revocandos actus necessaria sit pramotio, id ineptè in nostra non erit potestare. Ut enim influxus conservans nulli rei deest, quandiu existere, exigit; sic & pramovens omni agenti adest, cum agere exigit. Unde licet ab eo pendeamus, perinde agere possumus, ac si illum ex nobis ipsis haberemus. Sicut surculus trunco insitus ejus influxu eodem modo fructus suos profere, ac si propriae radice succo vegetaretur. Itaque, quod fortè mireris, sed tamen re diligentius discussâ verissimum perspicies, quæstio de pramotione libertatem ne minimum quidem respicit, sed est inter nos & Adversarios qualis foret inter duos Hortulanos, qui videntes florentem, ac fructificantem surculum, cujus extremitas & radix eos lateret, inter se disceptarent, an surculus ille propria radice vegetaretur, an alicui trunco insitus ab eo in fructificando penderet. Nam quovis modo se haberet, eodem pacto fructificaret. Quæstio solum inter eos foret, an necne, ab aliquo priori principio in hoc opere penderet. Sic est præsens quæstio. Nos censemus, voluntatem creatam esse veluti insiram divinâ, ac causas secundas primæ causæ; à qua prius influente pendere, ut surculus à trunco, cui semper hæret. Adversarii contendunt, voluntatem haberet in seipsa primas suæ determinationis radices, nec à Deo prius influente pendere, sed esse ut emancipatum à trunco surculum, quia jam propria radice vivit, nec actu à trunco in fructificando pendet, licet olim ab eo pullularit. Vides eo sensibili exemplo, ut ne sit, voluntatem perinde liberam fore, quia ut truncus insito surculo idem præstat, ac emancipato proptia radice sic Deus intimè præsens & conjunctus voluntati prævio suo influxu idem illi præstat, quod ipsa sibi, si foret primæ suæ determinationis causa. Unde pramotio libertatem ne minimum quidem destruit, sed solum ejus à primo libero dependentiam adstruit. E contra opinio Adversariorum non majorem vindicat voluntati libertatem.

*scd*



sed nullo fructu ejus à Deo dependentiam emoliri conatur. Itaque eò tendit, non ut homines liberius agant, sed ut superbis de se præsumant. Nostra verò, ut perinde liberè vivant, sed ut humilior de se sentiant, ac omne bonum suum Deo, ut primo fonti acceptum, referant.

Instabis tandem. Applicatio præveniens exercitium libertatis non est libera: Sed præmotio prævenit exercitium libertatis nostræ: Ergo non est libera.

Resp. 1. Distinguo majorem; non est libera, formaliter, transeat; (distingui enim posset ex parte termini, & ex parte principii) causaliter, nego. Causat enim ipsum exercitium nostræ libertatis, & proinde est libera causaliter. Non est autem necesse, ut sit formaliter libera, quia sicut principium meriti non cadit sub merito, & principium deliberationis sub deliberatione, & principium discursus sub discursu, ita principium totius libertatis actualis non debet cadere formaliter sub actuali libertate. Præmotio autem est principium totius actualis libertatis.

Ref. 2. Quod applicatio præveniens usum libertatis creata potest esse libera, si descendat à primo libero; præmotio autem descendit à Deo, qui est fons totius libertatis unde illam non tollit, sed magis complet tanquam participatio quædam actualis libertatis Divinæ. Ita D. Thomas 1. cont. Gent. cap. 68. *Dominum, inquit, quod habet voluntas supra suos alios, per quod in ejus est potestate velle & non velle, excludit quidem determinationem virtutis ad unum* ) nempe per modum naturæ, qua virtus activa sit ex sua natura limitata ad unam agendi rationem, ut explicuimus initio articuli, regulâ primâ (*& violentiam causa exterius agentis. Non autem excludit influentem superioris causa, à qua est ei esse & operari.*

ARTICULUS OCTAVUS.

*Declaratur ampliùs concordia libertatis cum Præmotione ; ac ea in re Thomistas esse omnium remotissimos ab Hæreticis.*

**E**X iis , quæ hæcenus dicta sunt , deduci possunt quatuor modi libertatis cum Præmotione conciliandæ.

Primus sumitur ex efficacia & universalitate divi-  
na voluntatis , cujus præmotio est quidam effluxus . Divina enim voluntas ita universalis est , ut omnia omnino complectatur , adeoque ad effectus liberos , quos decrevit , exsequendos per creatam voluntatem , ita omnia disponit , ut certissimè fiant , & tamen liberrimè , ipsis causis tum liberis , tum naturalibus ad id sub ejus directione propriâ inclinatione ultrò concurrentibus . Adeo verò efficax est , ut non solum actûs substantiam , sed etiam libertatis modum attingat ; & ideo ad ipsius efficaciam spectat , non solum ut actûs fiat , sed ut liberè fiat , cum vult liberè fieri . Hic explicandi modus est S. Thomæ 1. p. q. 19. art. 1. aliisque in locis . Hinc Anselmus lib. 2. *Cur Deus homo* , Sic exprimit . *Quoniam quod Deus vult , non potest non esse , cum vult , hominis , voluntatem nullam regi , vel prohiberi necessitate , ad volendum , vel non volendum , & vult effectum sequi voluntatem , tunc necesse est , voluntatem esse liberam , & esse quod vult Deus .*

Secundus modus desumitur ex illo Axiomate S. Thomæ & S. Dionysii , *Deus movet unumquodque secundum proprietatem ejus* . Cum igitur proprietas libertatis sit ut causa libera non naturali necessitate sit ad unum determinata , sed per deliberationem se applicet ad agendum ; Deus movet voluntatem ad hoc , ut deliberet , & per electionem se determinet . Quis autem possit suspicari ex ea motione oriri præjudicium libertatis , quæ nos movet ad deliberandum , ut quod per deliberationem nobis expedire judicaverimus , deinde ( Deo semper applicante ) eligamus . Sed egregiè falluntur Adversarii , quòd imaginentur Thomistarum præmotionem veluti adamantinam

nam catenam & ferreos compedes, quibus constricta voluntas fatali quadam necessitate alligata est, donec isti compedes solvantur, & aliis supervenientibus nova ei alligetur: Apage absurdam hanc ideam, Veram, ac germanam substitue: nempe præmotionem esse influxum à prima causa in secundas pro cuiusque modo manentem, quo cum exigunt, quando exigunt, eo modo quo exigunt, ad agendi exercitium applicantur; qualis est influxus ab uno trunco in diversæ speciei furculos sibi infixos, quo quisque suo modo vegetatur, ac fructificat; aut quod exemplum magis quadrat, qualis est influxus divinus omnia, prout cuiusque fert conditio, conservans. Videbis luce hac meridiana clariùs, eo creatam libertatem non lædi, sed perfici, non impediri, sed compleri.

Tertius modus desumitur ex ipsis libertatis principis. Libertas enim consistit in eo, quodd voluntas agat, non quia est, sed quia vult, ut in Morali agendo de indifferentia ad libertatem requisita expendimus; id est, ut voluntas agat non naturali impulsione, sicut lapis dum tendit deorsum, sed ex propria electione: cuius electionis adhuc domina est, in quantum potest de illa disponere vel retractando, vel suspendendo, vel continuando, prout libuerit; id enim quotidie in nobis experimur, dum nostras electiones retractamus, suspendimus, & immutamus, prout placuerit. Deus autem per suam motionem hoc dominium nobis non eripit, sed magis complet. Actus enim, quem præmotus ponit, semper est in ejus potestate, ita ut sæpe ipsum suspendat, & ad libitum mutet, Deo tamen ad hæc omnia influente per modum primi motoris.

Quartus modus, quo sæpe ulla S. Thomas petitur ex ipso præmotionis principio, qui Deus est, nempe primum liberum, primaque radix libertatis, ac propria voluntatis causa: quo fit, ut repugnet, ab eo sic agente violari libertatem. Cum itaque duobus modis agat in voluntate, uno modo, ut generalis motor, per præmotionem ordinis naturalis, eam juxta communem rerum cursum ad suas actiones applicando; alio modo ut specialis motor, per inspirationes & instinctus, quibus eam movet ad determinata quædam bona, utroque modo libere sub eo movetur. Primum quidem, quia hæc motio voluntati omnino sese accommodat, ut influxus trunci, furculo, quem alit & vegetat. Secundò verò, quia tunc Deus voluntatem ipsam  
sibi

## *Ostenditur Thomist. Art. VIII. 427*

sibi accommodat eam interiùs immutando, ac tali modo disponendo, ut determinatum hoc bonum, quo antea minus afficiebatur, eam aliter dispositam nunc maximè delectet. Unde illud ut sibi maximè conveniens eligit, ac interiorem ad illud instinctum, qui præcedit deliberationem, atque ita nondum plenè liber est, sed solum penè voluntarius, suâ deliberatione & electione confirmat, sicque evadit liberrimus. Id videre est in maximis peccatoribus subito mutatis, quibus maximè placent bona spiritualia, quæ antea fastidiebant; displicent sensualia, quibus inhiant, Deo interiùs cor mutante. At hic movendi modus ad Theologos spectat. Hic solum obiter nota, duas vias, quibus Deus infallibiliter obtinet consensum liberum à voluntate. Primò, ut generalis motor, non eam interiùs aliter aptando, sed res exterius sic disponendo, ut sub Deo communiter movente propriis deliberationibus collaboret ad finem divinæ providentiæ; ut latè supra explicui. Secundò, ut specialis motor, non rebus exterioribus mutatis, sed ipsa interiori dispositione voluntatis, quam cum sit ejus author & naturalis Dominus, sic immutat, ut ei jam placeat, quod antea displicebat. De hac dicit Ezechielis 36. *Dabo vobis cor carneum, & faciam, ut in præceptis meis ambuletis.* Et Job. 12. *Deus immutat cor principum populi terra.* Hæc semper ad bonum movet; prior etiam materiale peccati respicit.

Ex his omnibus habes, quàm commodè divina motio cohæreat cum libertate; si tamen sincerè explicetur, nec detorqueatur in sensus malignos, chimericos, & omninò alienos, uti sæpe fit ab Adversariis.

Supereft nunc altera tituli pars, ac postremus in ea questione nobis propositus labor, ut scilicet tandem ostendamus, Thomistas in hac de divina motione questione ab Hæreticis esse omnium remotissimos.

Circa motionem divinam duplex præcipue fuit hæresis, altera Pelagii, altera Calvinii. Calvinus enim docuit, libertatem per peccatum originale funditus peritisse, in quantum concupiscentia rebellis vitæ necessitate voluntatem, ita captivat, & subjicit, ut nihil veri dominii in actus suos ei permittat: unde infert, non dari meritum, quia ubi libertas non est, meritum esse non potest. Tum verò omnia hominum operata esse peccata ex se mortalia, etiam quæ maximè laudantur in Sanctis, eo quòd ex corruptâ radice, illisque suam malitiam com-

mu-

municante, pullulent; dicit tamen, illa peccata non imputari electis. Idem autem, quod tribuit concupiscentiæ, tribuit etiam Divinæ motioni, in quantum siquæ concupiscentia necessitat voluntatem, ut impetum ejus sequatur, nullumque in ea dominium relinquit; ita pariter dicit, divinam motionem necessariò trahere voluntatem; ita ut nullatenus possit dissentire: unde apud illum voluntas absolutè caret libertate, quia in omni actione vel est serva concupiscentiæ, vel captiva divinæ motionis, cujus efficacici nullo modo reniti potest. Et si aliquando dicat, sub motione Dei nos retinere potentiam ad oppositum, solum loquitur de potentia passiva & contingentici, qualis est in baculo, qui dum movetur sursum, retinet potentiam passivam, ut moveatur deorsum. Cæterum constanter negat, remanere potentiam illam dominatricem, qua voluntas verè sit domina sui actus, ac proinde libera. Putat enim, tale dominium, in quo consistit libertas, non posse stare cum efficacici divinæ motionis, aut depravatione concupiscentici.

Et contra Pelagius, negabat, hominem aliquid detrimenti contraxisse per Adami peccatum; immò censebat, voluntatem esse adeo fortem & independentem, ut sine ullo auxilio efficacici posset agere bonum; præcipuè quia concipere non poterat libertatem posse stare cum illa motione divina efficacici, quam admittebat S. Augustinus. Cæterum admisit quendam concursum, quem vocabat *Possibilitatis adiutorem*, & qui videtur correspondere concursui simultaneo Adversariorum. Admittebat etiam motiones morales excitantes, illustrantes, suadentes, ut refert S. Augustinus lib. de gratia Christi, cap. 7 & 10.

Ex quibus manifestè constat, hæc duo monstra scilicet hæresim Calvini & Pelagii, quamvis inter se pugnent, eidem tamen principio inniti, scilicet quod motio efficacici tollat libertatem & potentiam ad oppositum. Ex quo principio subsumit Calvinus. Atqui datur motio de se efficacici. Ergo non datur libertas. Pelagius verò p̄ contra. Atqui datur: Ergo non datur motio de se efficacici. Rogo autem, quinam sint remotiores ab istis duobus scopulis; & ab istis duabus hæresibus; vel qui foveant, immò qui stabiliunt pro fundamento suæ doctrinæ principium illud, cui utraq; hæresis incumbit; vel qui penitus avertunt fatale istud principium & falsitatis columnam? Profectò majus est ipsam hæresim radicem funditus exstirpare,

## Ostenditur Thomist. Art. VIII. 429

re, quàm illam fovendo, & nutriendo nascentes inde venenatos surculos tantùm amputare. Atqui Adversarii Thomistarum foveant hoc principium, cui utraque prædicta hæresis incumbit, scilicet *motu divina tollit libertatem*; immodò illud supponunt pro fundamento suæ doctrinæ. Thomistæ verò ejusmodi principium radicitus extirpant docentes, *cum divina motione, ejusque efficacia possere libertatem*: Ergo doctrina Thomistarum est omnium remotissima ab utraque hæresi, Pelagiana scilicet, & Calviniana; ipsasque radicitus evertit. Hinc est, quod meritis adhibetur in Catechismo Tridentino veluti antidotum contra hæreses efficacissimum; & nuper Alexander VII. eam contra errores Jansenii Lovaniensibus adeo commendavit tanquam *tutissimam & inconcussam*.

Hæc de celebri illa quæstione dicta sufficiant, in quibus etsi non omnia, quæ à Thomistis pro tam justæ causæ patrocinio adduci solent, comprehenderim, nec singula, quibus ab Adversariis impugnari solet, retulerim (quippe cum sollicitata tota altercationibus humani ingenii fecunditas immensa hæc re profuderit, & nova in dies patguriat) satis tamen me egisse arbitror, ut quisque perspiciat quàm altis fundamentis Thomistarum sententia nitatur; quàm sanctè illi de Deo sentiant; quàm altè illius in omnes creaturas dominium stabiliant; quàm profundè omnium causarum ab eo dependentiam scrutentur; quàm justè hæc sententia à tot sanctissimis, doctissimisque viris pro aris & focis defendatur; quàm sit antiqua, pia, & Sanctorum doctrinæ conformis; quàm facillè contra impugnatores propugnetur; quàm injustè à Scholis, aut malignis, tanquam dura, immodò erroribus affinis apud plebeculam traducatur; quàm imperitiè læsæ libertatis rea traducatur; quàm sit ab hæreticorum doctrinis aliena,

## QUÆSTIO QUARTA

*De Accidentibus spiritualibus, præcipue de Scientia.*

**H**Actenus de spirituali Substantia; nunc dicendum de ejus Accidentibus. Horum quædam resident in voluntate, ut Virtutes morales; quædam verò in intellectu, ac Virtutes intellectuales vocitantur. De prioribus satis in Morali egimus; nunc de Virtutibus intellectualibus dicendum. Ac quidem 1. De his in genere. 2. De scientia. 3. De unitate Scientiarum. 4. De comparatione Scientiæ cum opinione. 5. De ejusdem comparatione cum Fide divina.

## ARTICULUS PRIMUS.

*De Virtute intellectuall in genere.*

**E**Th Virtutis nomen sæpe usurpetur pro activa ipsa potentia; in his tamen potentiis, quæ se habent ad opposita, seu ad bene & male operandum. Virtus propriè dicitur, habitus determinans potentiam ad bene se habendum circa proprium objectum.

Quid, & quotuplex sit habitus in genere, diximus in Logica, cum de Prædicamento qualitatis, ejusque divisione. Quæ verò sit causa habituum spiritualium, quæve ratione tum in voluntate, tum in intellectu producantur, diximus in Morali, cum de virtute morali in genere, ejusque causis egimus. Quomodo intendantur habitus, an per additionem gradus ad gradum, an potius per modum perfectiorem essendi in subjecto, constat hoc secundo modo intendi ex his, quæ in universum diximus in Physica de qualitarum intentione. Itaque superest, ut de his habitibus hîc dicamus, qui residentes in intellectu, *Virtutis intellectuallis* nomine censentur. 1. Quid sint. 2. Quotuplices sint. 3. Demum de singulis.

Definitur Virtus intellectuallis, *Habitus determinans*

## De Virtute Intellectuali. Art. I. 431

nans intellectum ad attingendum infallibiliter verum.

In ea definitione *habitus* est genus, quo virtus intellectualis cum aliis convenit: cæteræ particulæ illam ab aliis discernunt. Dicitur itaque *atingere infallibiliter verum*, quia cum virtus sit perfectio potentia, debet illam determinare ad attingendum proprium objectum modo perfecto. Objectum autem intellectus est verum: unde virtus intellectualis debet illum determinare ad verum modo perfecto attingendum, id est, infallibiliter. Ex quo liquet, Opinionem, Fidem humanam, Suspicionem, & si qui sint alii habitus huiusmodi fallibiles, eos rationem virtutis non habere.

Dividitur Virtus intellectualis in quinque species. Hæ sunt Intelligentia, Sapientia, Scientia, Prudentia, & Ars.

Declaratur hæc divisio. Cum veritas sit bonum intellectus, quod intellectualis virtus respicit, juxta veri divisionem dividitur virtus intellectualis. Porro verum duobus modis cognosci potest. Primo, ut per se notum, seu quod non alio motivo, quam propria perspicuitate intellectum convincit; cujusmodi sunt prima principia. Virtus determinans intellectum ad tale verum dicitur *Intelligentia*. Secundò, est aliud verum, quod cognoscitur, non ut per se notum, sed ut deductum ex principiis per se notis; & si quidem deducatur ex universalissimis principiis, pertinet ad *Sapientiam*; si verbò deducatur ex principiis magis particularibus, pertinet ad *Scientiam*. Porro intellectus non solum cognoscit verum in se, illud speculando, quod sit per tres priores illas virtutes, sed etiam ex cognitione veri dirigit potentias operativas ad rectè operandum tum in agibilibus, quales sunt operationes voluntatis & passionibus appetitus; tum in factibilibus, quales sunt operationes externæ, ut *edificare, navigare, militare*, &c. Unde præter tres enumeratas virtutes aliæ duci necessariæ sunt, una, quæ respiciat verum in agibilibus, qua scilicet rectè judicat intellectus, quid sit agendum & non agendum ad bene vivendum; & hæc dicitur *Prudentia*. Altera, qua intellectus rectè judicet, quomodo disponenda sit externa materia, ut opus externum rectè fiat, puta lapides ad domum; & hæc virtus intellectualis *Ars* dicitur.

Dices. Fides divina est Virtus intellectualis: Sed non



non continetur in prædicta divisione : Ergo inadæquata est.

Resp. Eidem importare quandam imperfectionem ex propria ratione , nempe obscuritatem . Et ideo ex proprio genere deficit à ratione intellectualis virtutis ; nec illam habet , nisi quatenus nos conjungit Deo , in his , quæ excedunt omnem facultatem nostram , in quibus , etiam imperfectè conjungi Deo melius est , quam perfectè se habere ad objecta connaturalia , juxta illud Apostoli 1. ad Corinth. 2. *Quod infirmum est Dei , fortius est hominibus.* Unde fides divina non est simpliciter virtus intellectualis , sed Theologica . Ita S. Thomas 1. 2. quæst. 62. art. 3. ad 2.

Intelligentia definitur , Håbitus primorum principiorum , seu quo principia per se nota cognoscuntur . Dividitur in Håbitum primorum principiorum speculativorum , qui nomen genericum retinet ; & Håbitum principiorum practïcorum , qui *Synderesis* vocitatur . His duobus continentur omnia scientiarum , virtutumque moralium .

Sapientia definitur , Certa & evidens rerum cognitio per altissimas causas . Propriissimè sumpta est unica ut annotat S. Thomas 1. 2. quæst. 57. art. 2. nempe Meraphysica , quia hæc sola respicit primum totius cognitionis humanæ principium , ac universalissimam entis rationem , & ideo judicat de omnibus aliis , quia judicium ultimum & perfectissimum non est nisi per reductionem ad altissimas causas , & universalissima principia . Attamen paulò latius sumpta Sapientiæ ratio tribuitur etiam aliis Philosophiæ partibus , quòd procedant ex altioribus principis & circa objecta universaliora , quàm ceteræ naturales scientiæ , ut diximus in Quæstione Proæmiali Philosophiæ .

Scientia definitur , Cognitio certa & evidens rei per causas inferiores . Unde non differt à Sapientia nisi secundum perfectionem objecti , & medii . Ceterum quoad substantiam conveniunt .

Prudentia definitur , Recta ratio agibilium , seu Håbitus rectificans rationem circa agibilia : de qua in Morali dictum satis .

Ars definitur , Recta ratio factibilium , seu Håbitus mentem rectificans circa factibilia . Differunt agibilia & factibilia , quòd agibilia dicantur ipsi actus voluntæ .

## *De Virtute Intellectuali. Art. I. 433*

luntatis & appetitus, ut *amare, edisse, trahere, latari, &c.* Faciabilia verò ea, quæ fiunt in externa materia, ut edificare, agros colere, &c.

Ans alia *Liberalis* dicitur, alia *Mechanica*. Illa minùs propriè ars est; versatur enim circa opera ipsius Intellectus, ac plerumque veræ scientiæ rationem habet, nec nisi similitudinariè ars dicitur, quodd nempè regulis utatur ad aliquod opus intra intellectum, aut in signis & adminiculis quibusdam operis intellectus famulantibus, ut mathematicæ ad suas demonstrationes figuras concinnant, Astronomia sphaeras, & Astrolabra, Rhetorica gestus, vocem, ac sermonem disponit ad persuadendum, &c. At mechanica propriè ars dicitur; habet enim pro fine non ipsius intellectus functiones aliquo subsidio per regulas disposito adjuvandas, sed externam materiæ dispositionem, seu opus purè externum.

Artes liberales septem numerantur, Grammatica, Rhetorica, Dialectica, Arithmetica, Musica, Geometria, Astronomia. Quarum quinque posteriores etiam propriè scientiæ rationem obtinent. Duæ verò priores ad artis naturam propiùs accedunt. Hæ omnes hoc versiculo comprehenduntur.

*Lingua, Tropus, Ratio, Numerus, Tonus, Angulus, Astra.*

Mechanicæ itidem septem numerantur veluti genera, Agricultura, Venatoria, Militaris, Nautica, Chirurgica, Textrina, Fabrilis. Quas eodem ordine hic versiculus comprehendit.

*Ras, Nemas, Arma, Rates, Vulnera, Lana, Faber.*

Sub his innumeræ aliæ continentur, ut Pictoria, Palestrica, Coquinaria, Saltatoria, Citharistica, Mercatoria, &c. Et quidem harum quædam sunt ad vitæ necessitatem, ut Agricultura, Coquinaria, Pistoria, quæ ad cibos destinantur; item Fabrilis, Textrina, quæ recta & vestes parant. Quædam ad commodiùs degendam vitam, ut Navigatoria & Mercatoria. Quædam ad eam tuendam ab incommodis, ut Chirurgica & Militaris. Quædam ad eam expoliendam, ut Grammatica, & Rhetorica. Quædam ad delicias, ut Citharistica, Pictoria, &c. Notandum, artes pene omnes referri tandem ad scientias; à quibus suas regulas desumunt, nempe ad Mathematicas. Deficiunt tamen à scientiis, quodd hæ regulæ non solis demonstrationibus nitantur, sed

plerumque ferè potius usu, experientiâ, & successu.

Hic quæri posset, An & quomodo virtus intellectua-  
lis corrumpi possit.

Resp. ex S. Thoma 1. 2. qu. 93. Habitum duobus mo-  
dis posse corrumpi: per se, & per accidens. Per acci-  
dens corrumpitur, corrupto, aut insigniter alterato sub-  
jecto. Per se verò à contrariis causis. Habitus intelle-  
ctuales per accidens corrumpi nequeunt, saltem quo ad  
substantiam. Sunt enim in mente, quæ est incorruptibi-  
lis. Quia tamen hi habitus aliquid important ex parte  
virium sensitivarum, nempe aliquam dispositionem ha-  
bitui in mente existententi famulantem, ex ea parte per  
accidens corrumpi possunt, corruptâ, aut graviter alte-  
ratâ sensitivâ facultate. Hoc modo ægritudine, aut o-  
blivione quadantenus deperduntur, turbatis, aut de-  
lectis speciebus in facultate sensitiva residentibus, à qui-  
bus in usu suo pender scientia.

At per se corrumpuntur habitus intellectivi, etiam  
quoad substantiam à causis contrariis, si quas habeant.  
Porò evidens est, habitui primorum principiorum nihil  
esse contrarium. Non enim mens habere potest assensum  
contrarium primis principiis. At circa objecta aliorum  
habituum mens habere potest actum contrarium, per  
quem productus est habitus: ut recto discursui, per quem  
scientiæ habitus productus est, habere potest falla-  
cem discursum, quo decepta in actum contrarium fer-  
tur, & sic corrumpitur scientiæ habitus, ac erroris ha-  
bitus ingeneratur. Eodem modo virtutes morales cor-  
rumpuntur iteratis actibus vitiorum iis oppositorum.  
Imò non per cessationem actus corrumpi possunt, quasi per  
remotionem prohibentis corruptionem. Nam usu virtu-  
tis diu cessante, facilius occurrunt variæ operationes  
ipsi contrariæ, quibus habitus oppositus sensim irrept.

## ARTICULUS SECUNDUS.

*De Scientia secundum se.*

**H**ic paullo latius scientiam sumimus, prout etiam  
sapientiam comprehendit. Sic sumpta definitur,  
Cognitio certa & evidens rei per causam, seu Cogni-  
tio per demonstrationem acquisita. Demonstratio enim  
est, quæ probat evidenter conclusionem per causas.  
Hic

Hic verò *causa* dicitur ; non solum *rei* , seu in essendo ; sed etiam *cognitionis* ; seu in cognoscendo . Quo sensu clarior , ac nota propositio , ex qua alia ignotior evidenter deducitur ; causa ejus esse dicitur , nempe in cognoscendo . Hæc scientifica cognitio aliquando actualis est , ut cum actu consideramus ea , quæ scimus ; tumque dicitur *Actualis scientia* . Aliquando verò solum habetur habitu , ut à dormiente ; tumque *Habitualis scientia* dicitur .

Dari scientiam in Quæstione Proœmiali ad Philosophiam ostendimus , ubi argumenta contraria dissolvimus , nec ea hic repetere opus est .

Quorum sit scientia , ex ejus definitione constat . Nam omnium esse potest , quorum cognitio ex principiis evidenter certis necessariò deduci potest . Unde scientia esse potest etiam contingentium , & corruptibilem secundum universales rationes ; quia in communi , & quoad essentiam circa illa pleraque necessariò deduci possunt ex principiis per se notis , ut , Quod constat contrariis , esse corruptibile . Quod generatur , habere causas , &c. Deinde etiam de Ente rationis dari potest scientia , quia etiam circa ens rationis pleraque conclusiones ex certis principiis deduci possunt . Immo non entia , privationes , vacuum , umbræ , mors , peccata , &c. cum à ratione nostra concipiuntur ad modum entis , ac de his pleraque propositiones fiunt , quæ ex certis principiis necessariò deducuntur ; de his etiam potest esse scientia . At non item de singularibus contingentibus in particulari sumptis ; quia non habent principia & causa , cum quibus necessariò connectantur , sed ad ea se habent contingenter & fallibiliter . De singularibus tamen incorruptibilibus , ac indefectibilibus esse potest scientia , ut de Deo , Angelis , motu cælestium corporum , &c. quia de his etiam in particulari pleraque deduci possunt ex principiis necessariò , & evidenter certis .

Superest , ut de Scientiæ divisione dicamus . Primò dividitur in Speculativam & Practicam . Speculativa est , quæ sistit in contemplatione veritatis . Practica verò , quæ suas veritates ordinat ad opus ; ut Philosophus moralis contemplatur naturam virtutis , ut miles vivat & operetur .

Dividitur 2. Scientia in Subalternantem & Subal-

ternam . Scientia subalternata est , quæ desumit sua principia ex conclusionibus superioris scientiæ . Subalternans verò est illa superior scientia , ex qua desumit inferior sua principia . Sic Medicinæ principia probantur in Physica , & Musicæ principia probantur in Arithmetica .

Dividitur 3. Scientia in Naturalem & Supernaturalem . Naturalis est , quæ de rebus naturalibus , & lumine naturali cognoscibilibus agit . Supernaturalis est , quæ procedit per principium divinitus revelata . Hæc dividitur in Theologiam Beatorum , & Viatorum . Naturalis verò dividitur in Realem , & Rationalem . Rationalis est , quæ respicit ens rationis , & videtur esse unica , scilicet Logica : nam Rhetorica , & Grammatica , licet respiciant ens rationis , scilicet congruitatem , & ornatum sermonis ; deficiunt tamen à ratione scientiæ , & pertinent ad artes sermocinales . Scientia realis dividitur in Physicam , Mathematicam , & Moralem . Physica sub se continet Medicinam . Moralis verò Politicam , Oeconomicam , & Jurisprudentiam . Mathematica dividitur in Geometriam , quæ agit de quantitate continua ; & Arithmeticam , quæ agit de numero . Arithmetica continet sub se Musicam , quæ respicit proportionem numericas , ut sonoras . Geometria verò continet Astronomiam , Cosmographiam , Machinativam , & Opticam .

Quæres , An scientia subalternata scientiæ rationem obtineat in absentia subalternantis .

Negant plerique , etiam ex Thomistis . Nam , inquit , principia subalternata sunt certa in subalternante , ut principia Musicæ in Arithmetica . Quandiu ergo Musicus non est Arithmeticus , nescit sua principia , sed solum ea credit . Excipiunt tamen Theologiam , quia licet clarè non videat sua principia , attamen certa est de illis per fidem divinam infallibilem . Alii censent , esse veram scientiam , quamvis non sit in statu perfecto , donec conjungatur suæ superiori , in qua evidentiam habeat suorum principiorum : ut Musicus non est perfectè sciens , donec didicerit Arithmeticam , in qua probantur , & manifesta sunt principia Musicæ ; attamen est aliquo modo sciens . Hæc sententia videtur conformior S. Thomæ Qu. 14. de Verit. art. 9. & probatur ejus ratione , Ille habitus est verè scientia ,

etia, qui probat conclusiones ex principiis certissimis & evidentibus: Sed scientia subalternata, ut Musica, probat suas conclusiones per principia certa & evidentia: Ergo est verè scientia. Probatur minor. Nam principia Musicæ sunt certa & evidentia. Si autem talia principia non sunt evidentia formaliter respectu ejus, qui est Musicus, & non Arithmeticus; attamen sunt ipsi evidentia præsuppositivè, in quantum scilicet præsupponit illa, ut evidenter demonstrata ab Arithmetico.

Dices. Musicus, qui non est Arithmeticus, per se ipsum non cognoscit evidenter Musicæ principia, esto ea præsupponat cognita ab alio: Ergo per se ipsum non est sciens.

Resp. Satis esse, ut principia præsupponantur tradita ab aliquo, qui ea evidenter cognoscat; sicut patet in Theologia, quæ est verè scientia, quamvis ejus principia non sint Theologis evidentia, sed eradantur à Deo, cui sunt evidentia.

Instabis, esse disparitatem inter Theologum & Musicum, quod Theologus per fidem divinam habet certitudinem infallibilem principiorum suorum: at verò Musicus non habet, nisi ad summum fidem humanam, in quantum credit Arithmeticis dicentibus, Musicæ principia esse demonstrata in Arithmetica.

Resp. Musicum habere certitudinem infallibilem suorum principiorum, quia non tenet illa solum per fidem humanam, sed per quandam notitiam certissimam innixam communi, & indubitato Doctorum omnium consensui, ex quo convincitur, principia illa esse evidentia in se ipsis, ita ut stultus esset, qui illa negaret. Unde adhæret illis tanquam certissimis, assentiturque Arithmetico, non ut homini, sed ut demonstratori.

## ARTICULUS TERTIUS.

### De Unitate scientiarum.

**C**irca unitatem scientiarum tria quærentur. 1. Sitne scientia una simplex qualitas, vel coacervari plurium particularium scientiarum, ita ut tot sint scientiæ, v. g. in Logica, quot sunt conclusiones, ex quibus tanquam membris fiat unum corpus Logicæ. 2.

Unde sumatur unitas generica scientiarum, 3. Unde specifica.

### PRIMA CONCLUSIO.

**Q**ualibet scientia est una simplex qualitas, seu unus habitus perficiens intellectum circa omnes conclusiones huiusmodi scientiæ. Ita S. Thomas 2. 2. q. 54. a. 8.

Probatur ejus ratione. Qualibet scientia respicit omnes conclusiones sub unica ratione formali: Ergo, est unica. Consequentia patet. Sic enim potentia visiva est simplex qualitas, quamvis respiciat plures colores, quia illos respicit sub unica ratione visibilis, Probatur antecedens. Qualibet scientia respicit conclusiones sub unico lumine, scilicet sub unico primo principio, ex quo gradatim nascuntur cætera principia conclusionum: sicut enim in arbore unicus est truncus, ex quo plures rami sese diffundunt; Ita in qualibet scientia est unicum principium, scilicet objecti definitio, ex quo cætera principia continuâ serie nascentur.

Obj. Nova conclusio novam affert difficultatem: Ergo novum exigit habitum.

Resp. Distinguo antecedens; 'Addit novam difficultatem, formaliter, nego; materialiter; concedo, id est, nova conclusio affert materiam novæ difficultatis, sed quæ sciri potest per principia, quæ intellectus jam habet; unde non petit novum habitum, sed solum extensionem præexistentis ad novam materiam.

Instabis. Diversi actus generant diversos habitus: Sed pro qualibet conclusione est diversus actus: Ergo est diversus habitus.

Resp. Distinguo majorem: Diversi actus non subordinati, concedo; subordinati, nego. Idem enim habitus potest se extendere ad plures actus subordinatos, & quondam serie, ac concatenatione ex uno fonte nascentes.

Urgebis: Ergo, qui scit primam Logicæ conclusionem, habet totum habitum Logicæ, si unicus & simplex est.

Resp. Distinguo consequens: Habet totum habitum entitativè, concedo; extensivè, nego. Id est, habet quidem entitatem habitus scientifici; sed illa entitas non

non est adhuc extensa ad omnes conclusiones suas: extendetur autem, dum ipse proficiet in addiscendo Logica, & lumen adhuc modicum ulterius propagabitur.

## SECUNDA CONCLUSIO.

**D**iversitas generica scientiarum sumitur ex diversitate obstractionis à materia, quam dicit objectum scientificum. Ita S. Thomas Opusc. 79. q. 3. a. 1.

Declaratur conclusio. Cum enim objectum scientiæ tanto perfectius sit, quanto altius assurgit supra materiam; juxta diversos gradus elevationis supra materiam erunt diversi gradus generici scientiarum. Materia autem potest tripliciter considerari. Primo, ut affecta singularitate, & conditionibus individuans. Secundo, ut abstracta à singularitate, sed tamen subiecta qualitatibus sensibilibus. Tertio demum considerari potest præcisè secundum se, ut est radix quantitatis. Primo modo dicitur *materia singularis*. Secundo modo dicitur *materia sensibilis*. Tertio modo dicitur *materia intelligibilis*. Primus ergo gradus abstractionis est à materia singulari, cum scilicet res materiales considerantur in universali, (nam de singularibus materialibus non datur scientia) & primus iste gradus constituit primum genus scientiarum; quæ scilicet abstrahunt à materia singulari, ut Physica & Medicina, quæ considerant mutationes sensibiles in communi. Secundus gradus abstractionis est à materia, non solum singulari, sed etiam sensibili, quando scilicet res considerantur separatae, non solum ab omni singularitate, sed etiam à sensibili alteratione, ut Geometra considerat circulum & lineas non curando, utrum sint in materia frigida, vel calida; & iste gradus abstractionis constituit secundum genus scientiarum, quæ abstrahunt à materia sensibili, ut sunt Geometria & Arithmetica. Tertius gradus abstractionis est ab omni prorsus materia, quando scilicet considerantur quædam formalitates ita elevate, ut possint esse sine materia, ut Metaphysicus considerat veritatem, bonitatem, & alia, in quibus non involvitur materia, cum possint convenire rebus etiam spiritualibus; & hic gradus constituit tertium genus scientiarum ab omni materia abstrahentium, quales sunt Metaphysica & Logica.



## TERTIA CONCLUSIO.

**U**Nitas specifica cujuslibet scientiæ sumitur ex unitate principiorum. Unitas verò principiorum attenditur ex eorum subordinatione ad unum primum, in quantum scilicet principia ita sunt invicem ordinata, ut unum sit ex alio, vel utrumque ex aliquo tertio, donec fiat resolutio ad unum primum principium illius scientiæ, quod est definitio objecti, ex quo tanquam ex trunco cæterorum principiorum rami seriatiim nascuntur.

Probatur prima pars. Principia sunt lumen, & ratio formalis, sub qua scientiæ attingunt suas conclusiones: Ergo ex unitate principiorum desumenda est unitas scientifica conclusionum, ac proinde unitas specifica scientiarum.

Probatur etiam secunda pars, scilicet unitatem principiorum desumendam esse ex illa subordinatione, per quam unum ex alio deducitur. Tum autoritate Aristotelis cap. 23. de Demonstratione. Tum quia, ut dicit S. Thomas ibidem, principium subordinatum alteri desumit ab ipso virtutem: Ergo ubi sunt plura principia sub unogradatim ordinata, non est nisi unica virtus, & unum lumen in diversos veluti radios propagatum.

Obj. Principia omnium scientiarum reducuntur ad principia Metaphysicæ: Ergo si talis reductio daret unitatem specificam, non esset nisi unica scientia de omnibus rebus.

Resp. Cum S. Thoma de Demonstratione, lect. 41. principia inter se connexa esse, ut unum & dare unitatem scientiæ, quandiu manet intra eandem abstractionem, & idem genus scibilitatis. Quando verò principia gradatim ab uno descendendo transierint ad novam abstractionem, tunc variant speciem, & constituunt novam scientiam specificam, ut quandiu Metaphysicus discurret per sua principia de rebus communissimis, & ab omni materia abstractis, censetur habere unicam speciem scientiam: Sed cum principia nascentia ex Metaphysica incipiunt applicari enti mobili, & materiæ sensibili, tunc formant novam speciem scientiam, scilicet Physicam.

ARTICULUS QUARTUS.

*Utrum idem intellectus de eodem objecto possit simul habere Scientiam & Opinionem.*

**C**ertum est, scientiam & errorem non posse esse simul de eodem objecto in eodem intellectu. Dubitatur tamen de opinione, utrum scilicet idem homo de eadem conclusione, v. g. quod Deus existat, possit habere simul scientiam & opinionem, scientiam quidem, in quantum tenet hanc veritatem per medium demonstrativum, v. g. per ordinem Universi, quo luce clarius ostenditur, dari unum primum gubernatorem; opinionem verò, in quantum tenet eandem veritatem per medium probabile, ut quia id docuere sapientiores Philosophi, Pythagoras, Socrates, Plato, Aristoteles, &c.

Nota, scientiam duobus modis posse considerari. 1. Quoad actum. 2. Quoad habitum. Scientia actualis est ille actus, quo de facto assentimur conclusioni per demonstrationem probatæ. Scientia habitualis est quidam habitus ex tali actu relictus. Ex eo enim, quod aliquis semel convictus sit de veritate conclusionis, in eo manet aliqua facilitas, & determinatio ad assentiendum tali conclusioni, quoties sibi proposita fuerit. Hæc facilitas vocatur *habitus scientificus*, seu *scientia habitualis*. Similiter opinio considerari potest vel quoad actum, vel quoad habitum. Unde tripliciter comparari potest scientia cum opinione. Primum actus cum actu. Secundum habitus cum habitu. Tertium actus cum habitu. Quidam tenent, tam actum, quàm habitum scientiæ, & opinionis se posse compari. Quidam, neque actum, neque habitum opinionis, & scientiæ posse se compari. Quidam mediam viam tenent: dicunt enim, actum scientificum non posse coherere cum actu opinativo, nec habitum cum habitu; bene tamen actum cum habitu.

PRIMA CONCLUSIO.

**A**ctus scientiæ non potest compari actum opinionis, ita ut quis simul sit opinans & sciens respectu ejusdem conclusionis. Conclusio non sic intelligenda

est, ut duntaxat uterque actus non possit simul elici ab intellectu, sed etiam ut vigente memoriâ actus scientiæ non possit produci actus opinionis.

Ita conser S. Thomas variis in locis; apertè verò r. *Post. lect. 44. Manifestum est, inquit, quod non contingit omnino simul idem sciri & opinari, quia scilicet simul homo haberet estimationem, quod res posset aliter se habere, & quod non posset aliter se habere. Aristoteles idem ibidem affirmat, nempe Non fieri posse, ut idem quis opinetur, & sciat.*

Probatur Conclusio ratione S. Thomæ. Impossibile est, ut intellectus sit de eadem re certus & incertus: Sed intellectus sciens est certus de re, quam scit; intellectus verò opinans est incertus: Ergo idem intellectus de eadem re non potest opinari & scire. Major est certa. Nam certitudo repugnat incertitudini. Minor declaratur. Opinio enim essentialiter est cognitio incerta, per quam scilicet sic adhæremus uni parti, ut formidinem habeamus, ne altera sit vera. Scientia verò est cognitio certa & firma, per quam scilicet ita adhæremus uni parti, ut nullam de contraria formidinem habeamus.

Respondebis 1. Nihil obflare, quominus intellectus habeat duplex medium, unum certum & evidens, cui innitatur scientia; aliud incertum & dubium, cui innitatur opinio. Unde ratione dupliciæ mediæ erit certus & incertus, certus per unum, incertus per aliud.

Sed contra. Intellectus de eadem veritate non potest esse certus & incertus, etiam per diversa media; Ergo nulla solutio. Probatur subsumptum. Intellectus enim semel certus, & plene convictus de aliqua veritate non est amplius capax dubitandi de illa, quamvis ei proponantur media incerta: Ergo per diversa media non potest esse certus, & incertus de eadem veritate. Probatur antecedens tum ratione, tum experientiâ. Ratione quidem. Nam impossibile est, ut in eodem subjecto sit forma & privatio, ex quocumque capite procedat illa privatio; sicut impossibile est, quod dum sol illuminat aerem, aer sit obscurus ex quacumque causâ possit procedere obscuritas: Sed certitudo & incertitudo opponuntur, ut privatio & forma; incertitudo enim est privatio certitudinis: Ergo intellectum certus de conclusione non est capax incertitu-

itudinis, quamvis illi media incerta proponantur. Experientiâ quoque idem suaderi potest. Sentimus enim in nobis, quod si semel de re aliqua certi sumus per unum medium, non propterea sumus incerti, quamvis idem nobis persuadeatur per media incerta; ut quia certus sum me vivere, quantumvis aliquis multiplicaret media probabilia ad persuadendum me vivere; attamen propter illa media non me adduceret in aliquam dubietatem, & Incertitudinem illius veritatis.

Respondebis 2. Non esse de ratione opinantis, ut sit incertus ex parte sui, sed solum quod rem teneat per medium de se incertum.

Sed contra. De ratione opinantis est, ut sit incertus etiam ex parte sui: Ergo nulla responsio. Probarur antecedens, tum ex D. Thoma 2. 2. quæst 1. art. 5. ad 4. ubi expressè dicit, *De ratione opinionis esse, ut quod est opinatum, existimetur aliter se habere posse.* Tum ratione. Nam opinio definitur cognitio incerta & formidolosa: impossibile est autem, cognitionem esse formidolosam, nisi cognoscens sit etiam incertus, & formidine affectus, nam in tantum cognitio est formidolosa & incerta, in quantum intellectus formidat, ne id quod tenet, sit falsum, & oppositum illius sit verum. Et quo patet, totius questionis cardinem, & simul fundamentum conclusionis nostræ in hoc situm esse, quod opinans est incertus & fluctuans, è contra sciens est certus & firmus. Unde quia repugnat, eundem intellectum de eadem veritate simul esse certum & incertum, fluctuantem & firmum; ideo repugnat de eodem habere opinionem & scientiam.

Eâdem ratione convincitur, habitum opinionis esse non posse cum habitu scientiæ. Sicut enim repugnat, eundem intellectum esse simul certum & incertum actualiter, ita & habitualiter. Quippe hoc ipso, quod sit habitualiter certus, excluditur incertitudo habitualis.

## SECUNDA CONCLUSIO.

**A** Crus opinionis potest esse cum habitu scientiæ, si sit in tali statu, ut non possit prorumpere in actum.

Ratio conclusionis est, quia habitus non opponitur ratione sui actibus habitus contrarii, ut habitus iniustitiæ non opponitur actibus iustitiæ, sed illos pati potest: Ergo contingere potest, ut quis habens habitum scientiæ impeditum ab actu, exerceat actus opinati-  
vos; sicut qui habet habitum iniustitiæ, elicit tamen nonnunquam actus iustos. Utraque hæc conclusio magis confirmabitur ex dicendis articulo sequenti, conclusione 2. & 3. Quod enim ibi diceretur de actu scientiæ respectu habitus fidei, proportionaliter applicandum est opinioni & scientiæ.

Objic. S. Thomæ autoritatem in 3. Dist. 31. quæst. 2. art. 1. quæstiunc. 1. ad 4. ubi sic habet. *Dicendum, quod opinio & scientia, quamvis sint de eodem; non tamen sunt secundum idem medium, sed secundum diversa, & ideo possunt esse simul.*

Resp. 1. S. Thomam ibi sumere opinionem, non formaliter, & in statu opinionis, seu ex parte subiecti; sed materialiter, & ex parte mediæ, pro cognitione per medium probabile procedente. Fatemur enim, adveniente scientiâ remanere adhuc cognitionem per medium probabile acquisitam; sed negamus, habere amplius statum opinionis in præsentia Scientiæ. Quia opinio formaliter sumpta exigit subiectum dubium & fluctuans: unde cum per scientiam tollatur omnis dubitatio & anxietas à subiecto, tollitur etiam opinio in ratione opinionis.

Resp. 2. Thomam loco citato non loqui assertivè, sed permissivè. Nam solvebat argumentum ex paritate sumptum; nempe illud, opinio potest manere cum scientiâ: Ergo fides potest manere cum visione beatifica. Negat paritatem, quod scilicet quamvis opinio possit esse cum scientia, fides possit esse cum visione. Quasi diceret. Ego scientia pati possit opinionem, non tamen visio beatifica pati potest fidem, quia scilicet fides magis opponitur visioni, quàm scientia opinioni. Eodem loquendi modo sæpe utitur Sanctus Thomas solvendo argumenta adversariorum, quæ procedunt ex paritate: sæpe enim permittit adversariis suppositionem falsam, & negat paritatem, quia hoc sufficit ad solvendum eorum argumentum.

Objic. 3. Cognito procedens per medium probabile

le est opinio : Sed ex concessis intellectus sciens aliquam veritatem potest illam cognoscere adhuc per medium probabile : Ergo potest habere opinionem de illa.

Resp. Distinguo majorem: Cognito procedens per medium probabile est opinio, si sit cum formidine contrarii, concedo; si sit sine formidine contrarii, nego. Et ad minorem: Intellectus sciens aliquam veritatem potest illam cognoscere per medium probabile, cum formidine & incertitudine, nego; sine formidine, concedo. Et nego consequentiam. Non enim omnis cognitio procedens per medium probabile est opinio, sed solum illa, quæ est cum formidine contrarii. Intellectus autem sciens aliquam veritatem non potest habere formidinem de contrario illius veritatis; & ideo non potest habere opinionem de illa, quantumvis eam cognoscat per medium probabile.

Instabis. Posita causa ponitur effectus : Sed medium probabile est causa opinionis : Ergo posito medio probabili ponitur opinio.

Resp. Distinguo majorem : Posita causa ponitur effectus, si subjectum sit capax illius, concedo; si sit incapax, nego. Intellectus autem convictus per scientiam de aliqua veritate est incapax opinandi circa illam, quia est incapax dubietatis & incertitudinis : unde quantumvis habeat media probabilia circa illam veritatem, in illo tamen non producit opinio.

Urgebis. Intellectus est capax certitudinis, & incertitudinis circa idem : Ergo intellectus est capax scientiæ, & opinionis circa idem. Probatur antecedens. Non magis opponuntur certitudo & incertitudo, quam dolor & lætitia : Sed voluntas de eodem objecto potest habere dolorem & lætitiā : Ergo etiam intellectus circa idem potest habere certitudinem & incertitudinem. Probatur minor. Nam voluntas Christi simul gaudebat & tristabatur de sua passione : Sed passio Christi est unum & idem objectum : Ergo de eodem potest voluntas habere dolorem & lætitiā.

Resp. Nego antecedens. Ad probationem, nego minorem. Ad ejus probationem concessā majore distinguo minorem : Passio Christi est unum & idem objectum, materialiter, concedo; formaliter, nego. Nam in passione Christi plures erant formalitates ; erat enim afflictiva Christi,

& redemptiva hominum. Ut afflictiva Christi afferebat illi dolorem; ut redemptiva hominum causabat illi læticiam: unde non sequitur, quod dolor & læticia cadere possint supra idem objectum formaliter, sed solum materialiter.

## ARTICULUS QUINTUS.

*Possitne Scientia esse simul cum Fide Divina.*

**S**Tatus quæstionis satis constat ex dictis superiori articulo. Solum advertendum est, fidem definiri, Cognitionem certam quidem, obscuram tamen, Dei testimonio innixam. Hæc cognitio, non secus ac de scientia dictum est, potest dupliciter considerari. Primum in actu. Secundum in habitu. Fides actualis est actus, quo assentimur rebus revelatis. Fides habitualis est virtus in intellectu residens, qua inclinamur ad assentiendum revelatis. Hoc posito, quærimus, utrum fides, sive quantum ad habitum, sive quantum ad actum possit esse cum scientia; ita ut eadem veritas ab eodem intellectu possit esse simul scita & credita. Plures extranei affirmant. S. Thomas, Thomistæ omnes, & plures alii negant. Cum enim scientia duo habeat, evidentiam, & certitudinem, (dicitur enim cognitio certa, & evidens) sicut ratione certitudinis expellit opinionem, quæ incerta est; ita ratione evidentie excludit fidem, quæ obscura est.

## PRIMA CONCLUSIO.

**A**ctus fidei & actus scientiæ non possunt esse simul in eodem intellectu, de eodem objecto. Sic perperud docet S. Thomas, nempe ea, quæ sunt fidei, non posse esse scita. Omissis ergo auctoritatibus, quæ plurimæ referti possent.

Probatnr 1. Ratione Sancti Thomæ 1. 2. quæst. 67. artic. 3. Quæ opponuntur ex parte subiecti, non possunt esse in eodem subiecto: Sed actus fidei & scientiæ op-  
po-

ponuntur ex parte subjecti : Ergo non possunt esse in eodem subjecto . Major patet . Quia oppositio est causa incompatibilitatis : unde quæ opponuntur , non possunt se compati in eo, in quo opponuntur . Probatur minor . Subjectum videns , & subjectum non videns opponuntur . Sed subjectum fidei est non videns ea , quæ credit ; subjectum verò scientiæ est videns ea , quæ scit : Ergo fides & scientia opponuntur ex parte subjecti . Major patet . Siquidem videre & non videre manifestè sunt opposita . Minor verò probatur . Et in primis , quodd subjectum scientiæ sit videns ea , quæ tenet per scientiam , nemo negat ; nam scientia est evidens rei cognitio . Unde illa , quæ sunt scita , debent esse visa intelligibiliter , id est , evidentiā . Quantum verò ad secundam , & præcipuam partem , quodd scilicet subjectum fidei debeat esse non videns , id est , non habens evidentiā eorum , quæ credit , probatur tum autoritate Apostoli . 1. ad Corinth. 13. inuuentis , quodd ea , quæ sunt fidei , cognoscuntur solum in ænigmate , id est , sunt obscura credenti . Tum autoritate Patrum sæpe inculcantium , *fidem esse non visorum* : unde Augustinus , *Quid est fides ? credere , quod non vides* . Tum demum ex definitione fidei , quam tradidit S. Paullus ad Hebr. 10. dicens , *Fides est argumentum non apparentium* : Ergo de ratione fidei est , ut ea , quæ creduntur , non sint visa , sed obscura credenti .

Respondetis , intellectum posse simul esse videntem & non videntem eandem veritatem , in quantum illam attingit per diversa media . Est enim videns , quatenus eam attingit per medium scientificum ; & est non videns , quatenus illam attingit per testimonium dicentis , quod est medium creditivum .

Sed contra . Fides exigit essentialiter , ut intellectus simpliciter & omni ex parte non videat ea , quæ sunt fidei : Ergo nulla responsio . Probatur antecedens . Ea , quæ sunt fidei , debent esse obscura & ænigmatica respectu credentis , ut expressè dicit S. Paullus , & patet ex locis citatis : Sed ex quocumque capite aliquid sit evidens , non potest amplius dici ænigmaticum & obscurum ei , qui illud vides : Ergo fides essentialiter exigit , ut ea , quæ sunt fidei , ex nulla parte sint visa , seu evidentiā . Probatur minor . Tum quia obscuritas & inevidentiā est mera privatio : unde ex quocumque capite



plite oriatur evidentia alicujus veritatis, fingatur obscuritas circa illam, nec amplius potest dici *inevidens* & *obscura*. Tum quia aliàs sequeretur, ea, quæ sunt nobis notissima, posse dici ænigmatica, quia non percipiuntur ex aliquo capite; sicque dici posset magnum ænigma, *modò diem esse*, quia licet diem oculis evidenter percipiamus, non tamen ipsum percipimus auribus: Ergo ut aliqua res dicatur alicui obscura, debet esse ei *inevidens* ex omni capite.

Probat 2. Conclusio egregiâ ratione Sancti Thomæ Quæst. 14. de Veritate, art. 9. Fides exigit, ut intellectus assentiat rei creditæ ex confidentia luminis alieni, & quasi captivus per auctoritatem discens: Atqui ex quocumque capite intellectus habeat evidentiam rei, non assentitur ipsi quasi confidendo in alieno lumine, & se ipsum captivando sub alterius auctoritate, sed ut confidens in proprio lumine, & jam de veritate ex se ipso securus: Ergo intellectus ex quocumque capite habeat evidentiam rei, non retinet amplius fidem circa illam. Major constat. Tum ex ipso nomine; nam fides dicta est à *fidendo*, eo quodd scilicet per eam assentiamur rebus, non quasi securi de illis per lumen nostrum, sed quasi confidentes in veracitate dicentis, & nosmetipsos voluntariè captivantes sub illius auctoritate. Tum ex Apostolo dicente, *intellectum credentem captivari in obsequium fidei*: ut autem explicat Sanctus Thomas, captivus est, qui non est sub propria jurisdictione, sed retinetur extra proprios terminos per potestatem extraneam: Terminus autem, in quo naturaliter quiescit intellectus, est evidentia rei; & ideo intellectus credens dicitur *captivus*, quia cum sit extra naturalem terminum, scilicet extra evidentiam rei, attamen rei assentitur, quasi alligatus per alienam auctoritatem. Minor verò, quodd scilicet intellectus habens evidentiam rei, cui assentitur, non sit amplius captivus & confidens in alieno lumine, declaratur. Tunc enim proprios terminos attingit, scilicet evidentiam, & per se ipsum est certus: Ergo non censetur amplius *captivus* & *confidens in alieno lumine*, sed certus ex proprio lumine; & ideo Divus Paullus dicit, fidem in patria evacuantem esse, non quodd præcisè per testimonium Dei id fiat evidens in patria, quod erat sub illo obscurum in

via;

via ; sed quia per beatificum lumen illustratus intellectus adhærebit divinæ veritati , non quasi confidens testimonio Dei dicentis , sed quasi de illa per proprium lumen securus .

## SECUNDA CONCLUSIO.

**H** Abitus scientiæ & fidei non possunt esse simul in eodem, respectu ejusdem objecti .

**¶** Probatur . Non est possibile , ut idem subjectum sit habitualiter inclinatum ad actus oppositos : Sed actus fidei & scientiæ sunt oppositi , ut constat ex prima conclusione : Ergo intellectus non potest habere simul habitus inclinantes ad ejusmodi actus . 2. Sicut actus fidei exigit , ut intellectus non sit actu videns id , quod credit ; ita habitus fidei exigit , ut intellectus non sit habitualiter videns id , quod credit : Atqui per habitum scientiæ intellectus sit habitualiter videns : Ergo cum habitu scientiæ non potest esse habitus fidei .

## TERTIA CONCLUSIO.

**H** Abitus fidei potest esse cum actu scientiæ , modo talis actus nullum producat habitum .

Sic censet S. Thomas, qui 2.2. quæst. 175. art. 3. ad 3. loquens de raptu, in quo Paullus vidit clarè Deum, & habuit scientiam Beatorum, sic ait : *Quia Paullus non fuit beatus habitualiter, sed solum habuit actum beatorum, ( id est, actum scientiæ beatificæ ) consequens est, ut simul tunc in eo non fuerit actus fidei ; fuit tamen simul tunc in eo habitus .*

Probatur conclusio, tum ratione, tum exemplis . Ratione quidem . Cum enim scientia expellat fidem, eo modo expellitur fides , quo introducitur scientia : Ergo si scientia solum introducatur per modum transeuntis & quoad actum , expellet solum fidem quoad actum . Exemplis quoque . Sic quia ignis non introducit calorem in ferro, nisi per modum actus transeuntis, relinquit illud semper habitualiter dispositum ad frigiditatem . Sic quia ma-

nus sursum projiciens lapidem non imprimit ipsi Inclinationem habitualement ad sursum, sed solum motionem actualem transeuntem, lapis quantumvis actu tendat sursum, semper tamen remanet habitualiter inclinatus deorsum. Sic quia unicus actus injustitiæ non producit habitum injustitiæ, cum tali actu manere potest habitus justitiæ. Itaque actus non excludit habitum, nisi in quantum producit contrarium habitum.

**Obje. 1.** Philosophus Christianus demonstrativè scit dari Deum, & tamen idem tenet per fidem: Ergo de eodem habet fidem & scientiam. Antecedentis prima pars supponitur; secunda probatur. Quilibet Christianus, etiam Philosophus, tenetur credere omnes articulos fidei: Sed primus articulus fidei est, quodd Deus sit: Ergo Christianus Philosophus tenetur id credere.

**Resp. Nego. antecedens.** Ad probationem, distinguo Christianus tenetur credere omnes articulos fidei, quando sunt sibi credibiles, concedo; quando sunt sibi evidentes, nego. Tunc enim desinunt esse articuli fidei respectu illius: nam fides est de rebus obscuris, ut supra dictum est.

**Instabis.** Qui non credit unum articulum, est infidelis: Ergo si Philosophus non crederet Deum esse, esset infidelis.

**Respond.** Distinguo antecedens: Qui non credit unum articulum est infidelis, si non credat negando illum, concedo; si non credat sciendo illum, nego.

**Urgebis.** D. Paullus ad Hebr. 11. dicit, *Oportere accedentem ad Deum credere, quia est, & inqueantibus se remunerator sit:* Sed Philosophus debet ad Deum accedere, sicut & alii fideles: Ergo debet credere Deum esse.

**Resp.** Dictum Apostoli intelligendum esse de Deo ut authore & remuneratore supernaturali; nam fides Dei ut authoris naturalis non est necessaria ad justificationem, nisi per accidens in eo, qui illum non cognoscit per scientiam. Unde Angeli nunquam habuerunt fidem de Deo, ut authore naturali, & tamen justificati sunt.

**Obje. 2.** Si Philosophus Christianus non haberet fidem de Deo ut authore naturali, minùs certus esset de existentia Dei, quàm rusticus: Ergo esset deterioris conditionis. Probaturs antecedens. Assensus fidei est certior omni scientia: Sed rusticus tenet per fidem Deum esse, Philosophus verò per scientiam. Ergo Philosophus est minùs certus, quàm rusticus.

**Resp.**

*An Scientia & Fides, &c. A. V. 451*

Resp. Nego antecedens. Ad probationem, distinguo majorem: Assensus fidei est certior scientia, sola, concedo; scientia per testimonium Dei confortata, nego. Solutio est Capreoli. Philosophus enim fidelis tenet Deum esse per duplex medium, divinam scilicet auctoritatem, & scientificam demonstrationem: unde scientia ejus confortatur à divina auctoritate, à qua recipit certitudinem supernaturalem; sicut virtutes morales acquisite recipiunt supernaturale meritum ex subordinatione ad Charitatem. Solutio fundatur in S. Thoma 2.2. q.4. a.8. ad 2. ubi dicit, *Quoddam aliquis parva scientia magis certificatur de eo, quod audit ab aliquo scientifico, quam de eo, quod sibi secundum suam rationem videtur*. Ex quo patet, quoddam scientia potest confortari per testimonium dicentis.

Instabis. Ergo talis Philosophus habet assensum fidei simul cum actio scientie. Probatur consequens. Assensus ille est fidei, qui innititur divine auctoritati: Sed talis Philosophus, licet habeat scientiam, quoddam Deus sit, adhuc tamen innititur divine auctoritati: Ergo, &c.

Resp. Nego consequens. Ad probationem distinguo majorem: assensus ille est fidei, qui innititur auctoritati divine, ut motivo assentiendi rei aliunde obscure, concedo; ut confirmanti id, quod aliunde est evidens, nego. Ut enim assensus aliquis sit actus fidei, necesse est, ut sit totaliter propter auctoritatem dicentis, per quam intellectus captivetur ad assentiendum illi, quæ sibi ignota sunt, ut supra dictum est.

Addunt præterea quidam, Philosophum Christianum habere certitudinem fidei de existentia Dei. Tum quatenus continetur in aliis creditis, v. g. in mysterio Trinitatis. Tum quia habet iudicium actuale formatum per fidem, quo iudicat, ejusmodi articulum esse omni veritate naturali certiore. Tum quia semper est in præparatione animi ad illum credendum, si scientiam amitteret semper enim retinet apud se fundamentum & columnam veritatis, scilicet divinam auctoritatem, ad quam, deficiente ratione, confugere possit, acque credere: nam in hac vita intellectus humanus adeo debilis est, ut in aperitissimis veritatibus sæpe vacillet, sicut videre est in antiquis Philosophis, qui licet acutissimi, attamen circa divina graviter erraverunt; & modò viri aliunde docti, ubi semel fidem perdidere, in immanes errores incidunt. Et ideo propter hanc humani ingenii infirmitatem datum est nobis.

nobis lumen fidei, quod & nos circa ea, quæ humanum captum superant, intrueret; & circa ea, quæ aliquo modo à nobis sciri possunt, ut circa Dei providentiam, immortalitatem animæ, & morum doctrinam, confirmaret.

## A P P E N D I X

### *De Ente rationis.*

**Q**UÆ de Ente rationis dicenda occurrunt duobus complectemur articulis, in quorum primo quaeretur, an, quid, & quotuplex sit Ens rationis. In secundo, à quo formetur.

#### A R T I C U L U S P R I M U S.

*an, quid, & quotuplex sit Ens rationis.*

**D**ico 1. Datur ens rationis. Conclusio adeo certa est, ut mirum sit, ab aliquibus negari.

Probat. Nomine *Entis rationis* nihil aliud intelligitur, quàm quod habet solùm esse in apprehensione rationis. Cum enim ens dicatur ab esse, sicut id, quod habet esse in rerum natura, dicitur *ens reale*; ita cujus esse totum consistit in apprehensione rationis, jure dicitur *ens rationis*. Atqui datur aliquid, quod cum nullam prorsus esse habeat inter res naturales, aliquod obtinet in apprehensione rationis: Ergo datur ens rationis. Probat. minor. 1. *Experientiâ*, quippe sentimus, nos plerumque ea, quæ minimè sunt in natura, quasi essent, apprehendere, sicque dare illis aliquod esse apprehensum & objectivum: unde loquimur de illis ut de entibus, ut cum dicimus, *tenebras*  
ope.

*aperire terram; mortem esse januam mellioris vitæ; esse pretiosam in Sanctis, &c.* Quippe constat, metas privationes esse; quæ non habent aliud esse, quàm in apprehensione. 2. Ratione. Quia ea est intellectus humani fecunditas, ut possit formare aliquod esse; ut cum varios respectus & ordines excogitat inter ea, quæ secundum naturam minimè ordinata sunt invicem, puta respectum prædicari, subiecti, medii, majoris extremi, &c. Sed cum aliunde nihil possit ad extra patturire, quippe, ut inquit Aristoteles, *Propter nostrum intelligere nihil mutatur in rebus*, tota illa interior fecunditas, ad instar ovi subventanei, non effundit aliquod esse reale, sed solum esse rationis, id est, totum in apprehensione intellectus consistens.

Objic. Ens rationis non habet causam: Ergo non datur. Probatur antecedens. Vel enim illa causa esset realis, vel rationis: Si realis, effectus ejus debet illam imitari, ac proinde esse realis: Si rationis, de illa causa rursus quæretur, an sit ab alia causa vel rationis, vel realis.

Resp. Ens rationis habere causam eo modo, quo est: unde quia non est nisi in apprehensione, ideo non habet causam nisi apprehendentem. Et hæc quamvis sit causa realis, non tamen producit ens reale, quia non agit per actionem effusivam esse ad extra, sed solum ejus apprehensivam ad intra; atque adeo dare tantum valet esse apprehensum.

Dico 2. Ens rationis definitur, Quod habet esse objectivè tantum in intellectu.

Declaratur definitio. Tripliciter aliquid potest esse in intellectu, subiectivè, effectivè, & objectivè. Ea sunt subiectivè in intellectu, quæ ipsi inhaerent tanquam accidentia subiecto, ut habitus, & species intelligibiles. Ea sunt effectivè in intellectu, quæ ab illo producuntur tanquam motus vitales ab eo physicè procedentes, ejusmodi est ipsa intellectio. Ea verò sunt objectivè in intellectu, quæ ab illo purè apprehenduntur. Ens igitur rationis est, quod habet tantum esse objectivè in intellectu, id est, cujus totum esse in eo consistit, ut apprehendatur. Ex quo inferitur, non esse meram denominationem extrinsecam, sed aliquid ad modum entis apprehensum.

Dico 3. Ens rationis aliud est fundatum, aliud verò sine fundamento inventum.

Conclusio patet. Nam intellectus aliquando rationabiliter & ipsis rebus ita exigentibus novos adinvenit respectus

A R, T I C U L U S S E C U N D U S.

*Qua Facultas efficiat Ens rationis.*

**D**ico 1. Nec sensus externi, nec interni, nec voluntas, sed solus intellectus efficit ens rationis.

Probatur. Ens rationis est, quod habet tantum esse objectivè in apprehensione rationis; Sed nec sensus externi, nec interni, nec voluntas dari possunt suo subjecto, ut habeat tantum esse objectivè in ratione; Id enim solius rationis actu efficitur, ut constat ex terminis; Ergo nequeunt efficere ens rationis.

Confirmatur. Ens rationis fit apprehendendo non ens ad modum entis; Ergo fit ab ea sola facultate, quæ rationem entis apprehendit. Atqui sola mens apprehendit rationem entis; ejus enim solius objectum est ens; Ergo sola facit ens rationis.

Objic. Sæpe sensus externus apprehendit ea, quæ non sunt in re, quasi essent. Ut oculus etiam umbram videt, quæ in re nihil est, & in picturis planis videt prominentias, ac distantias inter objecta, quæ prope sunt & planæ; Ergo facit ens rationis, aut potius ens sensibile fictum, cujus totum esse est in apprehensione Sensûs.

Resp. Nego in his, sensum apprehendere, quæ non sunt, quasi essent. Oculus umbram, quasi esset, non videt, sed vel colorem minus illuminatum, vel illuminationis extrema, ultra quæ dum nihil videt, dicitur abusive umbram videre, cum tamen re ipsâ nihil videat. Ceterum umbram & tenebras puras non videre vel eo consistat, quoddum sumus in profunda nocte, nihil magis videmus apertis, quàm clausis oculis. In picturis verd prominentias & distantias non fingit, ubi non sunt, sed speciem ejus, quod re ipsa est, excipit; taliter tamen modificatam, ut modificari solet, cum emittitur ab objectis prominentibus & inter se distantibus: ex quo sequitur in sensu communi iudicium, quale solet sequi ex speciebus emissis ab objectis remotis & distantibus.

Instabis. Imaginatio pleraque fingit, ut Centauros, Chimeras, montes aureos; Ergo facit entia rationis, aut certe imaginaria.

Resp.

# 456 IV. Part. Philos. Disp. II. Append.

Resp. Distinguo : Hæc fingit apprehendendo non ens ad modum entis , nego ; componendo ex variis speciebus realibus tertiam (speciem realem , concedo . Ut enim pictor miscendo colores Chimæram repræsentat ; sic imaginatio eandem fingit miscendo species entium realium . Sed ut pictura chimære non est ens rationis , sic nec ejus Phantasma imaginatione formatum .

Dices . Cur ergo Chimæradicitur ens rationis ?

Resp. Quia in Chimæra duo sunt . 1. Phantasma reale , ex variis partium animalium phantasmatis conflatum ; & hoc propriè pertinet ad imaginationem . 2. Ordo quidam apprehensus inter partes animalium , quæ re ipsa invicem non ordinantur . ; & hic Ordo , in quo formaliter consistit Chimæra , est ens rationis : at non fit ab imaginatione , sed ab intellectu , cujus solius est ordinare , quæ re ipsa non sunt invicem ordinata .

Dico 2. Probabile est , intellectum Angelicum posse facere ens rationis , saltem aliquod , etsi non omne .

Probat . Angelus distinguit attributa Dei , quæ non sunt in se distincta : Sed talis distinctio est ens rationis ; Ergo facit ens rationis . Major constat . Nam intellectus angelicus , cum sit limitatus , non potest concipere unico conceptu totum Deum : proindeque cogitur formare in Deo plures conceptus , & illum in varia attributa distinguere . Minor probatur . Ens rationis est , quod habet tantum esse objectivè in intellectu : Sed illa distinctio habet tantum esse objectivè in intellectu : Ergo est ens rationis .

Respondebis , Angelum concipere quidem attributa Dei diversis actibus , non tamen concipere illa ut distincta ; nec proinde facere ens rationis .

Sed contra . Licet Angelus non cognoscat attributa Dei ut distincta in re , bene tamen ut distincta in suo conceptu , in quantum de illis habet conceptus objectivos distinctos .

Dico 3. Intellectus divinus non facit entia rationis . Conclusio communior est inter Thomistas .

Probat . Cognitio formativa entis rationis est essentialiter imperfecta : Ergo non competit Deo . Probat . antecedens . Ens rationis fit cognoscendo rem aliter , quàm fit : Sed talis cognitio est imperfecta : Ergo cognitio formativa entis rationis est imperfecta . Major constat . Nam ens rationis fit , vel apprehendendo carentiam entis , quasi esset ens ; vel referendo ea , quæ non sunt relata : quæ cogni-  
tio



tionem, ut patet, cognoscunt rem aliter, quàm sit; nam nituntur apprehendere id, quod non est, quasi esset. Minor verò videtur certa. Nam cognitio censetur perfecta, quæ attingit rem, ut est: Ergo illa cognitio est imperfecta, quæ cognoscit rem aliter, ac sit; quæque nititur apprehendere, quasi esset, id, quod de facto nihil est.

Confirmatur ex discrimine, quod est inter Intellectum divinum & creatum. Intellectus enim creatus est sterilis ad extra, & non est mensura realitatis eorum, quæ apprehendit, sed magis ab illis mensuratur; unde si objectum, in quod fertur, non habet ex se realitatem, non potest cognoscendo illam ei dare, sed solum dat ei aliquod esse apprehensum, quod est merum esse rationis, sicque facit entia rationis. At cognitio Dei est causa realitatis rerum, & sicut ejus approbare est facere realiter, ita sine approbatione cognoscere & apprehendere est reddere realiter possibile: Ergo hoc ipso, quod aliquid est à Deo apprehensum, est ens reale, proindeque implicat, merum ens rationis fieri à Deo, sed quidquid ab eo fit, est reale. Hanc rationem frequenter insinuat D. Thomas, præcipue de Verit. Quæst. 2. art. 8.

Objec. 1. Ex S. Thoma 1. p. q. 15. art. 2. ad 3. & 4. Respectus ideales essentiae divinæ ad creaturas sunt entia rationis; non enim sunt reales, ut expressè dicit eo loci: Sed Deus causat tales respectus, ex eodem S. Thoma: Ergo facit entia rationis.

Resp. 1. Distinguo minorem: Deus causat respectus ideales, formaliter, apprehendendo aliquam relationem in sua essentia ad creaturas, nego; fundamentaliter, cognoscendo suam essentiam diversimodè à creaturis imitabilem, quæ imitabilitas est fundamentum respectuum idealium, quos in Deo formaliter intelligimus, concedo.

Resp. 2. Distinguo majorem: Respectus ideales Dei ad creaturas sunt relationes rationis, respectus ideales cogniti per modum relationum, existentium subjectivè in Deo, concedo; cogniti per modum relationum in Deo solum terminativè existentium, nego. Et similiter ad minorem: Deus causat tales respectus, eos apprehendendo ad modum relationum in sua essentia subjectivè existentium, nego; eos apprehendendo per modum relationum in creaturis subjectivè, in sua verò essentia terminativè existentium, concedo. Et nego consequentiam. Explicatur. Duobus modis potest Deus intelligi respicere creaturas

etras, & ad illas comparari. Primò tanquam relatus ad ipsas, ita ut relatio sit in Deo subjectivè, & in creatura terminativè. Secundò tanquam terminans relationem, quæ est subjectivè in creatura. Fateor quidem, quòd primo modo concipere in Deo respectum ad creaturas est facere relationem rationis: quia Deus non potest esse subiectum relationis realis ad creaturam. Attamen concipere secundo modo respectum in Deo non est facere ens rationis, nisi fundamentaliter, Deus autem non facit respectus ideales quasi concipiendo in sua essentia relationem ad creaturas, cum non dicat ad illas relationem; sed dicitur facere ideales respectus & comparare suam essentiam ad creaturas, in quantum cognoscit in creaturis esse relationem ad suam essentiam, quam imitantur & participant, ita ut ille respectus dicat relationem subjectivè in creatura, & terminativè in essentia divina existentem.

Instabis. Illa solutio est expressè contrà S. Thomam. Ergo non explicat ejus auctoritatem. Probatur antecedens. 1. Quia D. Thomas expressè dicit, respectus illos *esse in Deo, & non in creaturis*, cujus oppositum solutio tenet. 2. Quia dicit illos respectus *non esse reales, sed intellectus à Deo*, solutio autem explicat D. Thomam de aliquo respectu reali, quamvis realiter Deo non inherente. 3. Quia D. Thomas dicit, tales respectus *causari ab intellectu divino comparante essentiam suam ad creaturas*; cum è contrà solutio dicat, causari in rebus, ex eo quòd Dei essentiam respiciant.

Resp. Nego antecedens. Ad primam probationem resp. solutionem admittere, respectus ideales esse in Deo, & non in creaturis. Non tamen sunt in eo tanquam respectus, ut ita dicam, activi, referentes iptum ad creaturas; sed passivi competentés ipsi, ex eo quòd sit variè imitabilis à creaturis, sicque ab illis respiciantur ut exemplar.

Ad 2. Resp. Tales respectus idcirco non esse reales, sed intellectus tantum à Deo, quia non dicunt aliquam relationem in Deo, sicut respectus personales, ut ibidem ait D. Thomas, sed solum in eo consistunt, ut essentia Dei intelligatur per connotationem ad creaturas, seu, ut loquitur S. Thomas 1. p. q. 11. art. 7. *apprehendatur ut terminus relationis creaturarum*.

Ad 3. Resp. Respectus illos causari etiam ab intellectu divino, quia in eo consistit ratio ideæ, ut scientia Dei intelligatur variè imitabilis à creaturis, proindeque cum

con-

connotatione ad creaturas. Sed de his accuratius Theologi.

Objic. 2. Cognoscere ens rationis est ipsum facere: Sed Deus cognoscit ens rationis; nam cognoscit syllogismos, & cognitiones, quas habent homines, quæ plerumque terminantur ad ens rationis: Ergo facit ens rationis.

Resp. Distinguo majorem: Cognoscere ens rationis est illud facere, cognoscere practice, concipiendo ad modum entis id, quod non est, sicque illi affingendo esse objectivum, concedo; cognoscere pure speculative, ut factum ab alio, nego. Itaque ille, qui rationem entis non enti affingit, dicitur proprie cognoscere ens rationis practice, ac illud facere. Sed qui videt, alium affingere rationem entis non enti, non propterea facit ens rationis, sed videt fieri ab alio, & sic speculative solum illud cognoscit. Deus autem non sic cognoscit ens rationis, ut ipse non enti rationem entis affingat; sed solum videt, hoc nos facere.

Objic. 3. Deus cognoscit privationes, ut mortem, & tenebras, per modum entis: Ergo facit ens rationis. Probatur antecedens: quia quidquid cognoscitur, ad modum entis cognoscitur.

Resp. Nego antecedens. Ad probationem, distinguo: Quidquid cognoscitur, ad modum entis cognoscitur, si cognoscatur in se ipso esse aliquid, concedo; si non cognoscatur in se ipso esse aliquid, nego. Deus autem non cognoscit mortem in se ipsa, quasi esset aliquid, sed cognoscit eam in ipsa vita, in quantum cognoscit, mortem non esse vitam. Unde dicit D. Dionysius, *Deum cognoscere tenebras per lucem*.

Quæres, Qua specie cognoscatur Ens rationis.

Resp. In primis non cognosci per speciem impressam propriam. Nam cum in re non sit, nequit aliquid imprimere intellectui. Nec etiam cognoscitur per speciem expressam ipsi propriam, sed appropriatam ab intellectu. Fit enim, quatenus intellectus rationem entis abstractam ab ente reali, imo ab ipsa realitate, nempe ab *esse*, aut *non esse* extra intellectum, attribuit iis, quæ re ipsa non sunt; sicque iis tribuit *esse* aliquod objectivum in sola ejus apprehensione consistens. Et sic dicitur, Ens rationis cognosci per speciem alienam; id est, per speciem, quæ originarie est entis realis, sed quæ ab ipsa realitate abstracta fuit per intellectum, & affingitur, ubi re ipsa non est.

Sed

460 *IV. Par. Philosoph. Disp. II. Appen.*

Sed de rebus Philosophicis hætenus. In quo quidem opere si quid à me peccatum est, humanæ conditionis memor ignosce: Si quid boni, eo utere, ut dono per Angelicum Doctorem nobis à Deo concesso, à quo est omne bonum & verum. Ipsi gloria in secula: Amen. Quæ verò scripsi, omnia Sanctæ Romanæ Ecclesiæ judicio libentissimè submitto.

*Finis Tomi quarti, ac Totius Operis.*

— ANT

128184 61

